

श्रीराधाकृष्णभ्यां नमः

ब्रजविलास.

श्रीमद्राधाकृष्णचन्द्रकमलमधुकरसत्सङ्गाते
रसास्वादरतहरिभक्तशिरोमणि
ब्रजवासीदासकृत

जिसमें

श्रीचतुर्दशभुवनाधार धराधार भक्तजनहृदयारविन्दागार गोपी-
जनभयहरण कंसादिदैत्यदरण यदुकुलकुवलयदिनकर
रसिकशिरोमणि श्रीकृष्ण बलदेव श्रीराधा आदि
के विचित्र चरित्र अतिसरल और ललित
छन्दों में वर्णित हैं।

लखनऊ

केमरीदास सेठ द्वारा

नवलकिशोर प्रेस में छपकर प्रकाशित

नेरहर्वी गार

सन् १९२३ ई०

नाम लीला	पृष्ठ	नाम लीला	पृष्ठ
वन्दना,	१	धनुकवध लीला,	१५५
कथा प्रसंग वर्णन, ..	१३	कालीदमन लीला,	१६१
पूतनावध लीला,	३३	दावानल लीला,	१८०
कागासुरवध लीला,	३७	प्रलम्बासुरवध लीला,	१८५
तृणावर्तवध लीला,	४०	पनिघट लीला,	१८७
अन्नप्राशन लीला,	४३	चीरहरण लीला,	२०२
नामकरण लीला,	४७	वृन्दावन वर्णन लीला,	२१२
वरसगांठ लीला,	५०	द्विजपत्नी वाचन लीला,	२१६
ब्राह्मण भोजन लीला,	५३	गोवर्द्धन लीला,	२२७
चन्द्रप्रस्ताव लीला,	५५	नन्द एकादशी वरुण लीला,	२४२
पुरातनकथा लीला,	५७	वैकुण्ठदर्शन लीला,	२४७
कर्णछेदन लीला,	५८	दानलीला,	२६०
माटीखान लीला,	६०	गोपियों के प्रेमकी उन्मत्त अवस्था	
शालिग्राम लीला,	६२	लीला,	२६३
अन्हवावन लीला,	६४	स्नानलीला,	३१४
माखनचोरी लीला,	७३	वाटके मिलन की लीला,	३३७
दांवरवीरवध लीला,	८०	संकेत मिलन लीला,	३४२
वृन्दावनगमन लीला,	१०३	प्यारी के घर मिलन की लीला,	३४०
वत्सासुरवध लीला,	१०८	गर्वव्याज विरह लीला,	३४८
धेनुदुहन लीला,	१११	परस्पर अभिलाष लीला,	३६७
मोती डोने की लीला,	११३	शृंगारभूषण वर्णन लीला,	३७४
बकासुरवध लीला,	११४	नयन अनुगम लीला,	३८२
चकई भैंवरा खेलन लीला,	११६	सुरजी लीला,	३८७
राधाजू के प्रथम मिलन की लीला,	१२०	रासलीला,	३६७
अघासुरवध लीला,	१३१	अन्वर्तन लीला,	४११
ब्रह्माके मोहनकी लीला,	१३५	महामंगल गमलीला,	४२०
गोदोहनकी लीला,	१४३	मानचरित्रलीला,	४३०

ब्रजबिलास का सूचीपत्र ।

नाम लीला	पृष्ठ	नाम लीला	पृष्ठ
मध्यम मानलीला,	४४७	मल्लयुद्ध लीला,	५२६
गुरु मानलीला,	४५६	कंसासुरवध लीला,	५३४
हिंडोरा वर्णन लीला,	४६५	वसुदेवगृह उत्सव लीला,	५३६
फाल्गुन वर्णन लीला,	४६८	कुन्जगृहप्रवेश लीला, ...	५४२
सुदर्शन शायमोचन लीला,	४८२	नन्दविदा लीला,	५४४
शङ्खचूड़वध लीला	४८५	ब्रजकी विरह लीला,	५४६
वृषभासुरवध लीला,	४८७	श्रीकृष्ण के यज्ञोपवीत की लीला, ५६२	
केशीवध लीला,	४९०	उद्धव जी को ब्रजगमन लीला, ५६४	
व्योमासुरवध लीला,	४९२	उद्धवजी का ब्रजआगमन लीला, ५७१	
मथुरागमन लीला, ..	५०६	उद्धवजी की विदा लीला, .. ६०५	
रजकवध लीला,	५२१		

इति ॥



ब्रजविलास ।

सोरठा ।

होत गुणनकी खान, जाके गुण उरगनतही ।
 द्रवो सु दयानिधान, वासुदेव भगवन्त हरि ॥
 मिटत ताप त्रयतास, जासुनाम मुखते कहत ।
 बन्दौं सो शुभरास, नन्दसुवनसुन्दर सुखद ॥
 अरुण कमलदलनैन, गोपवृन्दमंडन सुभग ।
 करहु सो मम उर ऐन, पीताम्बर वर वेणुधर ॥
 बन्दौं जगत अधार, कृष्णाग्रज बलदेव पद ।
 अभिमत फलदातार, नीलाम्बर रेवतिरमण ॥
 श्रीगुरु कृपानिधान, बन्दौं पद महि माथधरि ।
 जासु बचन जलयान, नरचढिभवसागरतरहि ॥
 बन्दौं सन्तकृपाल, पदसरोजरज राखिशिर ।
 जगहितरतशुभमाल, जिननिजगुणहरिविशकरे ॥
 पुनि बन्दौं ब्रज देश, परमरम्य पावन परम ।
 महिमा जासु सुदेश, राधानाथ विहार थल ॥

प्रथम कृष्ण को तात मनाऊं ❀ श्री बसुदेव चरण शिर नाऊं
 बहुरि देवकी पद जलजाता ❀ बन्दन करौं कृष्ण की माता
 इनतें और कौन बड़ भागी ❀ ब्रह्म धखो नर तन जिन लागी
 बन्दौं नन्दमहर के चरना ❀ सहित यशोमति मंगल करना
 जिनकी महिमा भाग्य बढ़ाई ❀ निगमागम शिव शारद गाई
 बन्दौं रोहिणि पद जलजाता ❀ कृष्णाग्रज बलदेव कि माता
 कीरतियुत वृषभानु गोप वर ❀ बन्दौं चरणकमल रज शिर धर
 तात मात राधा रानी के ❀ त्रिभुवन ठाकुर ठकुरानी के
 कृष्ण कमल दृग की कमला के ❀ कलुष बिभंजन सख विमला के
 बन्दौं श्री राधा पद अम्बुज ❀ जिनके ध्यान मिटत भवभयरुज
 होत कृष्ण सहजहि बश ताके ❀ प्रेम सहित गुण गावत जाके
 बन्दौं सो वृषभानु दुलारी ❀ कृष्ण प्राण जीवन धन प्यारी

दो० राधाकृष्ण पदाम्बुजन, बन्दौं महि शिर टेक ।

ब्रजबिलासहित दोय तन, प्रकट किये हैं एक ॥

सो० बन्दौं युगलकिशोर, रूपराशि आनन्दधन ।

दोऊ चन्द चकोर, प्रीतिरीतिरसबससदा ॥

अपर गोप गोपी गोपाला ❀ जिनके सँग विचरहि नँदलाला
 गाय ब्रच्छ बालक ब्रजवासी ❀ जिनके सखा कृष्ण अविनासी
 और जाति जो ब्रजहि निवासी ❀ बन्दौं सकल सुकृत की रासी
 मथुरापुरी नारि नर नागर ❀ गोकुलादि जो ग्राम उजागर
 श्री यमुना सरि परम पुनीता ❀ जासु दरश नहिं यमपुर भीता
 परवत बापी कूप तड़ागा ❀ श्री बृन्दाबनादि बन बागा
 खगमृगजलचर जीव विभागा ❀ बन्दौं सकल सहित अनुरागा
 बन्दौं गिरि गोवर्द्धन देवा ❀ अपर देव तिनसम नहिं केवा

सुरपति मेदि जाहि हरिपूजा ❀ आनदेव तिनसम को दूजा
अतिरमणीय रेत यमुनातट ❀ उपवन अमित सुभग वंशीवट
जहां जहां हरि धेनु चराई ❀ सुन्दर श्यामल कुँवर कन्हाई
रास विलास जहां हरि कीनों ❀ भक्तवदल भक्तन सुख दीनों

दो० जड़चेतन ब्रजदेशके, तृणतरु महिरजजेत ।

बन्दौ कीट पतंग सब, पुनिपुनि प्रीति समेत ॥

सो० ब्रजजनपद शिरराख, बिनय करौं करजोरिपुनि ।

मोमनको अभिलाख, पूरण करिय सुजानजन ॥

ब्रजविलास कछु कहौं बखानी ❀ करन पुनीत हेत निजवानी
सो तबलों नहिं उरमें आवै ❀ जवलग तुमरी कृपा न पावै
मैं मन बच क्रम तुमरो दासा ❀ तातें पुरखहु मोरी आसा
यद्यपि मति इतनी मोहिं नाहीं ❀ करों उक्ति कछु निजतें नाहीं
तहां एक मैं कियो विचारा ❀ या विधि बल अपने उर धारा
श्री शुकदेव कही हरिलीला ❀ सुनी परीक्षित सब गुण शीला
मूरदास सोई हरि सागर ❀ गायो बहुविधि परम उजागर
फैलरह्यो सो त्रिभुवन माहीं ❀ गावत सुनत सुयश हरपाहीं
विविध प्रकार चरित हरिकेरे ❀ तामहिं वरणे मूर घनेरे
सो वह प्रीति रीति सुखदाई ❀ मेरे मन अतिशय कर भाई
सो तव कथा अमित विस्तार ❀ मोपै पायो जात न पारा
तामैं ब्रजविलास सुखदाई ❀ सो कछु कहिहों करि चौपाई

दो० भाषा की भाषा करौं, क्षमिये सब अपराध ।

जिहितिहिविधिहरिगाइये, कहत सकलश्रुतिसाध ॥

सो० हरिपद प्रीतिन होय, बिन हरि गुण गाये सुने ।

भवते छुटत न कोय, बिना प्रीति हरिपद भये ॥

ताते मैं सन्तन शिर नाई ❀ गावों हरियश जनमुखदाई
 जो ब्रज में हरि कियो बिलासा ❀ सो कछु कहिहों सहित हुलासा
 यामें इतनी कथा बखानों ❀ ताकी सूचनका यह जानों
 श्री बसुदेव देवकी व्याही ❀ चलो कंस पहुँचावन ताही
 तहां भई नभ बाणी वाहीं ❀ मुनिकै कंस डखो पुनि ताहीं
 अठ्यों गर्भ होयगो याके ❀ तेरी मृत्यु हाथ है ताके
 तबै देवकी हतन बिचाखो ❀ करि बिनती बसुदेव उवाखो
 सब सुत ताहि देन को भाखे ❀ तब नृप दुहुन बन्दि में राखे
 षट बालक तिनके नृप मारे ❀ पातक भये भूमि पर भारे
 दुखित गई सो हरिके पासा ❀ हरि ताकों जिमि दर्ई दिलासा
 पुनि संकर्षण गर्भहि आये ❀ तिनको बहुरि रोहिणी जाये
 सो सब कहिहों मति अनुमाना ❀ जैसी भांतिन सुन्यों पुराना

दो० पुनिभगवानअनादिअज, ब्रह्म सच्चिदानन्द ।

प्रकट भये बसुदेवगृह, निज इच्छा सुखकन्द ॥

सो० तात मात सुखदैन, सुन्दर रूप दिखायके ।

कियो परम उर चैन, दूर कियो दुखद्वंद्व सब ॥

तात मात पुनि जिमि समुभाये ❀ लै गोकुल बसुदेव सिधाये
 यशुदा गोद राखि घनश्यामहिं ❀ कन्या तासु गये लै धामहिं
 कंसासुर सो कन्या पाई ❀ सो जैसे आकाश सिधाई
 तासु बचन सुन अतिभय माना ❀ बालक हतन मन्त्र तब ठाना
 बजे नन्द घर अनंद बधाये ❀ ब्रजयुवतिन मिलि मंगल गाये
 भयो नन्द घर अति उतसाहा ❀ ब्रजवासिन को परम उच्चाहा
 प्रीति सहित सो सब सुख गैहों ❀ जितनो निजमति को बलपैहों
 बहुरि कंस पूतना पठाई ❀ सो जैसे हरिके दिग आई

ताहि मारि जननी सुख दीन्हों ❀ प्राण पान करि पावन कीन्हों
कागासुर पुनि जाविधि आयो ❀ ताको पुनि हरि मारि बहायो
बहुरो शकट चरणतें डाखो ❀ तृणावर्त्त को जाविधि माखो
अन्नपराशनादि जे कर्मा ❀ किये नन्द जिमि निज कुल धर्मा
दो० बालचरित्र पवित्र पुनि, जिमि कीन्हें अभिराम ।

जानुपाणि चलि सुख दियो, तात मात को श्याम ॥

सो० ब्रजजन के मन मोद, चले बहुरि पायँन कछुक ।

कीने बालबिनोद, नंद यशोमति के अजिर ॥

गर्ग आय लक्षण पुनि भाषे ❀ सुनि सब ब्रजवासी अभिलाषे
पुनि बालन संग खेलन लागे ❀ बाल खेल लीला अनुरागे
विप्र पाक जैसे छुड़ लीन्हो ❀ चन्दा हेत बहुरि हठ कीन्हो
कनछेदन लीला सुख दाई ❀ कहिहों सब आनन्द बधाई
पुनि हरि खेलत माटी खाई ❀ यशुमति लै सांगी उठि धाई
माता आगे जिमि मुख बायो ❀ ताही में त्रिभुवन दिखरायो
शालग्राम मेलि मुख लीन्हों ❀ नन्दहि पूजा में सुख दीन्हों
अन्हवावन हित जिमि मचलाये ❀ बहुत भांति यशुमति फुसलाये
ग्वालन संग बहुरि अनुरागे ❀ माखन चोरी के रस पागे
बहुरो माता क्रोध उपायो ❀ भक्त हेत दांवरी वैधायो
यमला अर्जुन वृक्ष ढहाये ❀ धनदसुतन के पाप नशाये
पुनि बन गोचारन मन आन्यों ❀ ग्वालन संग जान हठ ठान्यों

दो० बहुरि जाय बनमें हन्यो, वत्सासुर नंदनन्द ।

ग्वालसंग आनंद सहित, घर आये सुखकन्द ॥

सो० सो करिकै विस्तार, प्रेमसहित सब गाइहों ।

निजमतिके अनुसार, ब्रजवासी प्रभुके गुणन ॥

गो दोहन जैसे पुनि कीन्हों ❀ तात मात ब्रजजन मुख दीन्हों
 मोती बये नन्द के धामें ❀ सुर नर लखि चक्रित भये जामें
 बहुरि जाय बन नन्दकुमारा ❀ बकाअसुर को बदन विदारा
 बहुरों बाल चरित चित दीने ❀ भौरा चकई खेलन लीने
 श्री राधा सों प्रीति दृढ़ाई ❀ कीन्हे चरित ललित सुखदाई
 अघाअसुर माख्यो पुनि जाई ❀ ग्वालन संग छाक बन खाई
 भयो मोह जिमि विधिके मनमें ❀ बालक बत्स हरे तिन बनमें
 तिनको रूप आप प्रभु कीनों ❀ ब्रजके बासिनको सुख दीनों
 सो रस कहिहों सब विस्तारा ❀ अघनाशन प्रभु चरित उदारा
 श्री वृषभानुलली पुनि आई ❀ जैसे हरि सों गाय दुहाई
 कहिहों सो रसकथा सुहाई ❀ अति विचित्र जन मन सुलदाई
 बहुरों धेनुक को बध कीनों ❀ विष जलतें ग्वालन रख लीनों
 दो० पुनि नाथ्यो काली उरग, जलमें पैठि मुरारि ।
 यमुनाजल निर्मल कियो, ब्रजतेंदियो निकारि॥
 सो० करि दावानलपान, राखिलिये ब्रजलोग सब ।
 जिनके कृपानिधान, सदा भक्त संकट हरन ॥
 बहुरि प्रलम्बअसुर ब्रज आयो ❀ खेलत में हरि ताहि नशायो
 पनिघट यमुना तट पुनि जाई ❀ गोपिन सों रस कियो कन्हाई
 चौरहरण लीला पुनि कीनी ❀ कहिहों सकल प्रेम रस भीनी
 पुनि वृन्दाबन में सुखशीला ❀ ग्वालन संग करी जो लीला
 वृन्दाबन की महत बड़ाई ❀ श्री मुख श्री बलजू सों गाई
 ऋषिपतनिन सों भोजन लीनों ❀ भक्तिदान तिन को प्रभु दीनों
 पुनि श्री गोवर्द्धन गिरिराई ❀ ब्रज थापे सुरपतिहि मिटाई
 सुरपति कोप कियो यह जानी ❀ बरष्यो प्रलयकाल को पानी
 तब प्रभु गिरि करधरि ब्रजराख्यो ❀ जै जै सब ब्रजबासिन भाख्यो

सो सब अनुपम कथा सुहाई ❀ कृष्ण कृपा तें कहिहों गाई
नन्दहिं पकरि वरुणके दासा ❀ जिमि लै गये वरुण के पासा
ल्याये श्याम तहां तें जाई ❀ ब्रजमें भई आनंद वधाई

दो० बहुरों पुर बैकुण्ठ जो, अतिपुनीत निज धाम ।

ब्रजवासिनको करिकृपा, दिखरायो घनश्याम ॥

सो० सो सब कथा अनूप, अतिविचित्र पावनपरम ।

कहिहों मति अनुरूप, संतजनन मनभावनी ॥

पुनि जो करी श्याम सुखशीला ❀ अति अद्भुत ब्रज में रसलीला
श्री राधा वृषभानु दुलारी ❀ और सकल ब्रजगोप कुमारी
तिन सों मिलि श्री कुंजविहारी ❀ रस शृंगार लीला विस्तारी
आनंद भई सकल सुखकारी ❀ गाय तरत भव सब नर नारी
जिमि गोपिन हरिसों मनलायो ❀ प्रेम पन्थ दृढ़ करि दिखरायो
गो रस लै निकसीं ब्रजनारी ❀ जिमि दधिदान लिये बनवारी
भई प्रेम उन्मत्त गुवारी ❀ लोक लाज तन दशा विसारी
बहुरि चरित्र कुँवरि राधा के ❀ परम पवित्र हरण बाधा के
जैसे मिलीं श्याम सों जाई ❀ बहुरों जैसे प्रीति दुराई
पुनि संकेत चरित्र विविध वर ❀ किये प्रिया प्रीतम अति सुन्दर
गर्भ विरह अभिलाप परस्पर ❀ अति रहस्य लीला सुन्दर वर
कहिहों सकल कथा सुखदाई ❀ भक्ति रसज्ञान के मन भाई

दो० देखि मुकुर में लाड़िली, पुनि जैसो निजरूप ।

बिबश भई सो गाइहों, लीला परम अनूप ॥

सो० पुनि नैना अनुराग, अरु मुरलीकी प्रिय कथा ।

कहिहों सहितविभाग, प्रेम सुधारस सों भरी ॥

बहुरों शरद रैन अति पावन ❀ श्री वृन्दावन परम मुहावन

तहां श्याम बांसुरी बजाई ❀ घर घर तें ब्रजनारि बोलाई
कियो रास रस रसिकबिहारी ❀ भई प्रेम गर्वित तहँ नारी
अन्तर्धान चरित तब कीनों ❀ गर्व गोपिकन को हरि लीनों
कियो महा मङ्गल पुनि रासा ❀ बाढ्यो परमानन्द हुलासा
पुनि जल केलि करी मनभावन ❀ कहिहौं चरित सकल अतिपावन
मान चरित लीला सुखदाई ❀ करी बहुरि जिमि कुँवरकन्हवाई
बिस्तर सहित कही सो बरनी ❀ भरी प्रेम रस आनंद करनी
बहुरों जाय हिंडोला भूले ❀ भये सकल गोपिन अनुकूले
ऋतु बसन्त फागुन जब आयो ❀ कियो फाग रंग सब मनभायो
सो रस कथा सकल सुखदानी ❀ मति समान सब कहों बखानी
पुनि विद्याधर शाप नशायो ❀ अजगर तन तें ताहि हुड़ायो

दो० शंखचूड़ माख्यो बहुरि, अधम निशाचर नीच ।

पुनि माख्यो वृषभाअसुर, हरि ब्रजवासिन बीच ॥

सो० बढ्यो बहुरि गोपाल, केशीब्योमाअसुर जिमि ।

दुष्टदलन नंदलाल, कहिहौं चरित पुनीत सब ॥

बहुरि आय नारद यश गायो ❀ सुनिकै श्याम बहुत सुख पायो
तबहिं कंस अक्रूर पठायो ❀ लेन कृष्ण को सो ब्रज आयो
भये सुनत ब्रज लोग उदासी ❀ मधुपुर चले बहुरि सुखरासी
जब अक्रूर हृदय दुख पायो ❀ तब हरि जल में दरश दिखायो
भये सुखी लखि प्रभु प्रभुताई ❀ सो सब चरित कहों सुखदाई
गये बहुरि मथुरा दधि दानी ❀ माख्यो प्रथम रजक अभिमानी
बसन लुटाय सखन पहिराये ❀ बहुरि मुदामा के घर आये
कुबिजा ते चन्दन हरि लीन्हों ❀ ताको रूप अनूपम दीन्हों
तोखो धनुष असुर बहु मारे ❀ द्विद जीत पुनि दन्त उखारे

भिरै बहुरि मल्लन सों जाई ❀ कियो युद्ध तिन सों दोउ भाई
जीति मल्ल सब असुर सँहारे ❀ डखो कंस लखि अतिबल भारे
गये नृपति पहुँ तब दोउ भाई ❀ दियो मञ्च ते भूमि गिराई
दो० मारि कंस पुनिकेश धरि, दियो यमुन जल डारि ।

उग्रसेन राजा कियो, चँवर छत्र शिर डारि ॥

सो० बहुरि दियो सुख जाय, बँदि काटि पितु मातकी ।

सुंदर दरश दिखाय, भयो तहां मंगल परम ॥

कहिहौँ सकल चरित विस्तारी ❀ भव भय भंजन मङ्गलकारी
करि मधुपुरि के लोग सनाथा ❀ कुविजा सदन बसे ब्रजनाथा
नन्द बिदा करि ब्रजहिं पठाये ❀ बिहुरत ब्रजवासिन दुख पाये
हरितज नँद आये ब्रज जवहीं ❀ भई यशोदा व्याकुल तवहीं
गोपी सुनि हित कुविजा हरिको ❀ कियो परेखो अति गिरिधरको
भई बिरह बश सब ब्रजवाला ❀ कहिहौँ सो सब प्रेम विशाला
पुनि कुलरीति जानि वसुदेऊ ❀ हरि हलधर को कियो जनेऊ
बिद्यानिधि पुनि जानतराई ❀ विद्या पढ़न लगे दोउ भाई
पूरण काम गुरु के कीन्हे ❀ मरे पुत्र प्रभु तिनके दीन्हे
ज्ञान गर्व ऊधो मन जानी ❀ पठये ब्रजहिं श्याम मुखखानी
सो ऊधो गोपी संवादा ❀ प्रेम भक्ति रस की मर्यादा
कहों सुकथा विचित्र सुहाई ❀ भक्तजनन की अति सुखदाई

दो० पुनि ऊधो जैसे गये, प्रेम भक्ति को पाय ।

ब्रजवासिनकी सब कथा, कही श्याम सों जाय ॥

सो० ब्रजहिं रहे ब्रजराज, ब्रजवासिन के प्रेम बश ।

किये सुरन के काज, धारि चतुर्भुजरूप पुनि ॥

सो द्वारका चरित्र सुहाये ❀ प्रकट पुराणन में भव गाये

अति विचित्र हरि चरित अपारा ❀ काहू गाय लह्यो नहिं पारा
 मति समान बुध जन सब गावैं ❀ गाय गाय तन पाप नशावैं
 हरि पद पंकज प्रीति बढ़ावैं ❀ मन चंचल को तहां रमावैं
 ब्रजविलास हरि को अतिपावन ❀ रसमाधुर्य चरित्र सुहावन
 ताते कलुक कहत हों गाई ❀ सब सन्तन के पद शिर नाई
 यामें कलुक बुद्धि नहिं मेरी ❀ उक्कि युक्कि सब सूरहि केरी
 कियो सूर रस सिन्धु उधारा ❀ ताते प्रेम तरंग अपारा
 हरिके चरित रत्न विधि माना ❀ ब्रजविलास सो सुधा समाना
 पद रचना करि सूर बखान्यो ❀ कोमल विमल मधुर रस सान्यो
 समै समै के राग सुहाये ❀ अति विस्तार भाव मन भाये
 ताको स्वाद कह्यो नहिं जाई ❀ कहत सुनत श्रवणन सुखदाई

दो० अतिशय करि मोहत मनहिं, गंधर्व गुणनके संग ।

कहत बनै तामें नहीं, क्रम सो कथा प्रसंग ॥

सो० मेरे मन अभिलाष, प्रभु प्रेरित ऐसो भयो ।

कहिहों यह रस भाष, क्रम सों कथा प्रसंग सब ॥

ताते निज मनकी रुचि जानी ❀ इहि विधि करौ प्रबन्ध सुबानी
 द्वादश चौपाई प्रति दोहा ❀ तहँ पुनि एक सोरठा सोहा
 कहूँ कहूँ शुभ छन्द सुहाई ❀ भाषा सरल न अर्थ दुराई
 कहत सुनत समुझत मन भाई ❀ ध्यान रूप मय कथा सुहाई
 कर्म धर्म नहिं नीति बखानी ❀ केवल भक्ति प्रेम सुखदानी
 जानि कृष्ण के चरित पुनीता ❀ कहिहैं सुनिहैं सन्त सप्रीता
 बहुरि कहत दोऊ कर जोरी ❀ सुनियो विनय कृपा करि मोरी
 चूक परी जो मोतन होई ❀ सुजन सुधारि लीजिये सोई
 मैं नहिं कवि न सुजान कहाऊँ ❀ कृष्ण विलास प्रीति करि गाऊँ

सो विचार के श्रवणन कीजै ❀ काव्य दोष गुण मन नहिं दीजै
ऐसे सबकों विनय सुनाई ❀ कृष्ण चरित वरणों सुखदाई
कृष्ण चरित आनंद के रासा ❀ मंगल करण हरण भववासा

दो० बिघन बिनाशन शुभकरन, हरनताप त्रयशूल ।

चरित ललित नंदनंदके, सकल सुखनको मूल ॥

सो० चरणकमल उर धार, श्रीराधा नंदलालके ।

सुंदर रस आगार, ब्रजविलास अब वरणिहों ॥

सम्बत शुभ पुराण शत जानौ ❀ तापर और नक्षत्र न आनौ
माघ सुमास पक्ष उजियारा ❀ तिथि पंचमी सुभग शशि वारा
श्री बसन्त उत्सव दिन जानी ❀ सकल विश्व मन आनंददानी
मनमें करि आनंद हुलासा ❀ ब्रजविलास को करों प्रकासा
बन्दों प्रथम कमलपद नीके ❀ श्री बल्लभ आचारज जीके
श्री लक्ष्मण भट कुँवर उदारा ❀ जन उद्धारण हित अवतारा
माया व्याधि मिटाय अनेका ❀ कियो प्रेम मारग दृढ़ एका
श्री गोकुल बस सुख उपजायो ❀ कृष्ण नाम को दान चलायो
बिरहानल में सुभग शरीरा ❀ वाणी प्रेम सिन्धु गम्भीरा
हरि प्रापति की रीति बताई ❀ विरह रूप करि प्रकट कराई
विरह भखो जिन को सब नेमा ❀ विरह रूप करि जिन का प्रेमा
विरहै भरी भक्ति विस्तारी ❀ तातें गोकुल गैल निहारी

दो० द्वापर तन धरि सुरन हित, कृष्ण सँहारे दुष्ट ।

श्री बल्लभ वपु धरि कियो, प्रेम पंथ कलिदुष्ट ॥

सो० मनबचक्रमसोंचित्त, श्रीबल्लभचरणन लग्यो ।

वही आस वहिवित्त, वहिसाधन वहियुक्तफल ॥

पुनि श्रीबल्लभ कुलहि मनाऊं ❀ चरणकमल तिन के शिर नाऊं

श्री गोकुल में जिनको धामा ❀ विश्वविदित सुन्दर गुण ग्रामा
 प्रेम भक्ति की ज्योति बिराजै ❀ तेज प्रताप जगत पर राजै
 जिनके सदन देखिये ऐसे ❀ नन्द महारिके सुनियत जैसे
 तहां कृष्ण की नितनव लीला ❀ बाल विनोद भरी सुख शीला
 तिनकी शरण जीव जो आवै ❀ तौ दृढ़ भक्ति कृष्ण की पावै
 देत श्रवण मग अति सुखदाई ❀ कृष्ण नाम रस सुधा पियाई
 भक्ति दान को परम उदारा ❀ जगत विदित श्री गोकुल द्वारा
 तामहँ मंगल बंश मभारी ❀ परम कृपालु दीन दुखहारी
 श्री मोहन जी नाम गुसाई ❀ सुन्दर श्याम श्याम की नाई
 परम विशाल कमलदल लोचन ❀ दयादृष्टि उर ताप विमोचन
 मधुर मनोहर शीतल बानी ❀ प्रेम सुधारस सों लपटानी

दो० तिनतीरथपति मधिदियो, कृष्णनाम मोहिंदान ।

दीन जान राख्यो शरण, लागि के मेरे कान ॥

सो० तिनके पद उर राख, ब्रजबिलास बर्णन करौं ।

मो मनको अभिलाख, पूरण करिहैं जानिजन ॥

बन्दतहौं सब सूर सुजानै ❀ जिन्हैं सूर सम सब कोउ मानै
 प्रेम रूप बाणी परकासा ❀ प्रफुलित अम्बुज सुनि हरिदासा
 कृष्ण रूप बिन और न देख्यो ❀ जगत बिषै तृण सम करि लेख्यो
 राखे नैन सदा करि ध्याना ❀ दिव्य दृष्टि करि सुयश बखाना
 लीला श्याम जन्म भर गाई ❀ रहसकेलि सब प्रकट जनाई
 बाणी भांति अनेक बखानी ❀ कृष्ण प्रेम रस सों लपटानी
 चढ़े कठोर मोह बश जेऊ ❀ होत प्रेमबश सुनि के तेऊ
 कीनों अति उपकार जगत को ❀ मारग दयो चलाय भगत को
 मोहिं बड़ाई करि नहिं आवै ❀ जिनको गायो सब कोइ गावै

चरण शीश धरि तिन्हें मनाऊं ❀ यह अपराध क्षमा करि पाऊं
मोते यह अति होत ढिठाई ❀ करत विष्णुपद की चोपाई
सो मम दोष न उरमें धरिये ❀ सफल मनोरथ मेरो करिये
दो० अब संतनकी मण्डली, बढतहौं शिर नाय ।

बिना कृपा जिनकी भये, हरियश गाय न जाय ॥

सो० करिहैं मोहिं सहाय, गुणगाहक परहित करन ।

तिनको सहज सुभाय, संतत संत कृपालु चित ॥

सन्त मण्डली को शिर नाऊं ❀ जिनकी कृपा विमलमति पाऊं
जिनकी कृपा विघ्न सब नासे ❀ जिनकी कृपा कृष्ण गुण भासे
जिनकी प्रेम भक्ति फल पाई ❀ जिनकी कृपा कुमति मिटि जाई
जिनकी कृपा होयँ गुण नाना ❀ जिनकी कृपा सर्व कल्याणा
जिनकी कृपा मोह तम नाशे ❀ जिनकी कृपा ज्ञान परकाशे
जिनकी कृपा सकल सुखमूला ❀ होहु सो सन्त मोहिं अनुकूला
जै जै जै श्री कुंज बिहारी ❀ नन्दनँदन वृषभानु दुलारी
मंगल मूरति आनँदकारी ❀ लीला ललित भक्त भयहारी
रूप निधान प्रेम की रासी ❀ श्रीवृन्दावन धाम निवासी
अखिल नाम गुण सुखके धामा ❀ पूरण काम श्याम अरु श्यामा
युगल किशोर ध्यान उर धरिकै ❀ मुभग कमलपद वन्दन करिकै
ब्रजविलास रस परम हुलासा ❀ गावत हैं ब्रजवासी दामा

अथ कथाप्रसङ्ग वर्णन ॥

दो० तत्त्वनाम पद परम गुरु, पुरुषोत्तम जगदीश ।

कृष्णकमल लोचनसुखद, सकलदेवमणिशीश ॥

सो० बन्दौं नंद किशोर, वृन्दावन बासी सदा ।

श्री राधा चित चोर, आनंद घन भव भय हरण ॥

कहाँ कथा सुंदर सुख देनी * अघ हरणी बैकुण्ठ निशेनी
कृष्ण चरण पंकज रति दैनी * जन पावन कर्त्ती जिमि बैनी
श्रीकलिन्द तनयातट पावन * बसत मधुपुरी परम सुहावन
जाकी महिमा सुर मुनि गावैं * तीन लोक पद वेद बतावैं
दरशन ते नर पावन होई * कृष्ण कृपा विन सुलभ न सोई
उग्रसेन तहँ बसे नरेशा * नीति निपुण सह धर्म सुवेशा
ताको सुवन कंस अतिपापी * असुर बुद्धि भो विश्व सँतापी
कियो तात गहि बन्दीशाला * आपन भयो कंस भूपाला
तात अनुज तहँ देवक नामा * सुता तासु देवकी ललामा
दई कंस बसुदेवहिं ताही * लोक वेद की रीति विवाही
दायज दियो अनेक बिधाना * हय गज रथ पद भूषण नाना
दासी दास बहुत सँग दीनो * दान मान परिपूरण कीनो

दो० तब चढ़ाइ रथ देवकी, आप भयो रथवान ।

पहुँचावन अति हेतसों, चलयो सहित अभिमान ॥

सो० तेहि क्षण गिरा विशाल, होत भई आकाश तें ।

होय कंस को काल, देवकिको सुत आठवों ॥

कंसासुर मुनि बचन अकासा * भयो चकित मन मिट्यो हुलासा
शत्रु समान देवकी मानी * रथ तें उतरि पखो अभिमानी
खड्ग निकासि हाथ में लीन्हो * यह बिचार अपने मन कीन्हो
अबहीं याहि मारि दुख भेटों * पुनि कलेश काहेको भेटों
केश पकरि देवकि गहि लीनी * नहिं कलु कान बहिन की कीनी
तब बसुदेव दीन है कहहीं * तिय बधि नहीं भूप यश लहहीं

बहुरो यह पुनि खुशी तिहारी ❀ राजन कीजै काज विचारी
सुनु वसुदेव भई नभ बानी ❀ तुमहुँ सुनी कहु नाहिं छिपानी
तातैं अग्र शोच किन करिये ❀ पाछे काहे को दुख भरिये
बृक्ष फलै जो विप फल आगे ❀ ताहि वनै पहिले ही त्यागे
जो नहिं हतौं आज यह वाला ❀ मिटै न उरसे शोच विशाला
कन्या और व्याहि तोहिं दैहौं ❀ याहि मारि उर शोच नशहौं

दो० मुनिजनगुरुजन संगजे, तिन्हनि कह्योतिहिंकाल।
बृथा होत है यज्ञफल, यह न उचित महिपाल ॥

सो० यहै तुम्हारे मान, आनकहुन्दुभि देवकी।
इन्हें न हतिये जान, बेद विरोध न कीजिये ॥

पुनि वसुदेव कह्यो कर जोरी ❀ राजन मुनिय विनय कहु मोरी
बृथा देवकी को जिन मारो ❀ याको सुत है शत्रु तुम्हारे
सब सुत याके हम सों लीजै ❀ जीव दान याको प्रभु दीजै
यह बाचा हम तुम सों भाखैं ❀ चन्द्र मूर साखी दै राखैं
भली बात यह सब दिन जानी ❀ भावी विवश कंसहू मानी
हरि कीनो चाहैं सो होई ❀ ताहि मिटावन हार न कोई
तिन्हैं सहित नृप घर फिरि आये ❀ करि आगोट ढऊ रखवाये
प्रथम पुत्र जब देवकी जायो ❀ लै वसुदेव कंस पहुँ आयो
बालक देखि कंस हँसि दीनो ❀ इन तौ कहु अपराध न कीनो
अठवों गर्भ शत्रु है मेरो ❀ सो दीजो तुम मोहिं सबरो
यह कहि अपनो पाप क्षमायो ❀ तव वसुदेव हर्ष को पायो
ऐसे बाल फेरि सो दीनो ❀ वसुदेव गमन भवन को कीनो

दो० तव ऋषिनारद कंसपहँ, लिये हस्ततलवीन।

गुण गावत गोविन्द के, आये परम प्रवीन ॥

सो० उख्यो देखिकै कंस, शीश नाइ पद बन्दिकै ।
बैठाये परशंस, शुभ आसन ऋषि नारदहि ॥

समाचार जो कछु है आये ❀ सो सब ऋषि को कंस सुनाये
सुनि नृपबचन बिहँसि ऋषिबोले ❀ तुम कत रहत शत्रु सों भूले
जाके भय तुम अति भय मानो ❀ अठवों कौन सुतुम कछु जानो
जो बड़ प्रथमहि आयो होई ❀ देव चरित्र जान कछु कोई
आठ लकीर लैंचि दिखराई ❀ गिनती में सब आठों आई
यह समझाय गये ऋषि ज्ञानी ❀ कंसासुर उर अति भय मानी
तेहि क्षण बालक फेर मँगायो ❀ लै बसुदेव तुरत ही आयो
लियो मूढ़ गहि कर में ताही ❀ पटकत भयो शिलापर वाही
याही बिधि षट बालक मारे ❀ मात पिता अति भये दुखारे
कहत अहो श्रीपति असुरारी ❀ तुम बिन कासों करहिं पुकारी
यह सन्ताप मिटै कब भारी ❀ बेगि लेहु प्रभु सुरति हमारी
केहि बिधि नाथ राखिये प्राणा ❀ करत कंस निरवंश निदाना

दो० बिपति बिनाशन दुखदमन, जनरंजन सुरराय ।

अब हमको कोऊ नहीं, तुम बिन और सहाय ॥

सो० बिनती प्रभुहिं सुनाय, मनमहँदम्पति दुखितअति ।

होत न प्रकट जनाय, कंस असुर के त्रासतें ॥

भई भूमि जब अधिक दुखारी ❀ बढ़यो पाप असुरन को भारी
सहि न सकी तब गोतनधारी ❀ शिवबिरंचि पै जाय पुकारी
सकल सुरनमिलि कियो बिचारा ❀ हमतें नहिं उतरै भुव भारा
बिनय करिय चलि श्रीपतिपाहीं ❀ कृपा करें तब सब दुख जाहीं
भूमि सहित सुर सकल सिधारे ❀ क्षीर सिन्धु तट जाइ पुकारे
जहँ श्रीपति श्रीसहित निवासी ❀ पुरुषोत्तम अविगति अविनासी

धेनु अग्रकरि विनय सुनाई ❀ जै जै जै त्रिभुवन के साई
 जै सुखकन्द सन्त हितकारी ❀ जै जगवन्द्य भूमि भयहारी
 जै जै असुर समूह निकन्दन ❀ जै जै भक्तन के उर चन्दन
 जै जै जै प्रणतारत मोचन ❀ दैत्य दलन सुर शोच विमोचन
 जै जै जै प्रभु अन्तर्यामी ❀ मुनिय विनय सचराचर स्वामी
 करिये प्रभु सो वेग उपाई ❀ हरिये नाथ भूमि गरुवाई
 दो० धरिय मनुज तन दनुजहति, करिये धरणि उधार ।

परसत पदपंकज मिटहिं, सकल भूमि अधभार ॥

सो० पाहि पाहि भगवन्त, शरणागत वत्सल हरे ।

क्षमाकरहु अब कंत, दीन दुखित जनजानि हरि ॥

दीन वचन जब धेनु पुकारी ❀ भई गिरा नभ मंगलकारी
 जाहु सकल सुर घर भय त्यागी ❀ धरिहौं नर तनु तुम हित लागी
 प्रथम जन्म देवकि वसुदेवा ❀ मोसम मांग लियो करि सेवा
 तुम सम पुत्र हमारे होई ❀ मैं तिनको वर दीनो सोई
 तैसे नन्द यशोदा जानों ❀ दूध पियावन उनहिंन मानों
 गर्भ देवकी के अवतरिहौं ❀ बालचरित गोकुल में करिहौं
 तुमहूं गोप वेष ब्रज होऊ ❀ मम संग सुख पावो सब कोऊ
 यह कहि सुरन बिदा हरि कीन्हों ❀ आप सुयोग शक्ति कहि दीन्हों
 ससम गर्भ देवकी केरा ❀ तहां शेष सम अंश वसेरा
 सो आकर्षण कै क्षण माहीं ❀ राखी गर्भ रोहिणी पाहीं
 शक्ति जवहिं हरि आयसु पायो ❀ ततक्षण ताहि वहीं पहुँचायो
 हरि चरित्र कछु जान न कोई ❀ जो कछु करन चहें सो होई

दो० तब कृपालजनके सुखद, अविगति कमलाकन्त ।

निज आगम देवकि उदर, दिय जनाय भगवन्त ॥

सो० तनद्युति बढी अपार, परमप्रकाशित भवन सब ।

आनन मुकुर निहार, अतिप्रसन्न मन देवकी ॥

निज मुख मुकुर देवकी देख्यो ❀ शरद चन्द्र पूरण सम लेख्यो

मिथ्योतिमिरभ्रमअतिमुखपायो ❀ जान्यो कंस काल हरि आयो

प्रभु आगमन जान कर देवा ❀ आये सकल जनावन सेवा

नभतें गर्भस्तुति सब करहीं ❀ जै जै जै जै जै उच्चरहीं

जै ब्रह्मा शिव सेव्य सदाई ❀ जै वेदान्त वेद सुर साई

जै तीरथपद भवनिधि बोहित ❀ प्रणतपाल जै दीनन के हित

जै संकल्प सत्य गुण धामा ❀ जै मनवाञ्छित पूरण कामा

जै गोविज हित नरतनु धारी ❀ जै संतनपति गति अपहारी

जै कृपाल आनन्द बरूथा ❀ बन्दत चरण सकल सुर यूथा

जै पुरुषारथ अमित अनूपा ❀ महापुरुष सचराचर भूपा

जै अहीश नितनव गुण गावैं ❀ तदपि नाथ गुण अन्त न पावैं

जो मुनिजन मन ध्यान न आवैं ❀ भक्ताधीन वेद यश गावैं

दो० अलख अरूप अनीह अज, प्रभु अद्वैत अनादि ।

गर्भबास साँ देवकी, कौतुक निधि सर्वादि ॥

सो० किनहुँ न पायो भेव, शेष महेश गणेश विधि ।

नमो नमो तिहि देव, परम विचित्र चरित्रशुभ ॥

करि बिनती सुर सदन सिधारे ❀ परमानन्द मगन मन भारे

तब देवकि पति पास बखाने ❀ कोमल वचन प्रेमते साने

हो पिय सो उपाय कछु कीजै ❀ अबकै यह बालक रखलीजै

बुधिबल छल पी कीजै सोई ❀ जामें कुल को नाश न होई

मैं मन बच अबकै यह जाना ❀ हैं मम उदर देव भगवाना

कहा करौ कछु यत्न न पाऊं ❀ कौन भांति यह गर्भ दुराऊं

सत्य धर्म बर जाय तो जाऊ ❀ पति यह सुत हित करिय उपाऊ
कर्म धर्म सब हरि हित भाखें ❀ सो हरि तजि कहूँ धर्महिं राखें
सुनहु पिया अस को हितकारी ❀ जो यह बालक लेहि उवारी
शिर ऊपर बैठे रखवारे ❀ पायँन पड़े निगड़ अति भारे
कंस असुर अपवंश विनाशन ❀ किहि विधि सों उवरे तिय तासन
ऐसो को समर्थ जग पाई ❀ जो इहि अवसर होय सहाई
दो० षट बालकबधसुरतिकरि, दम्पतिदुखित विचार ।

अतिआकुल भय कंसके, दृगन चली बहि धार ॥

सो० करुणासिंधु दयाल, तात मात अति दुखितलखि ।

प्रकटभयेतिहिकाल, दुखमोचन लोचनमुखद ॥

योग शक्ति हरि आयसु पाई ❀ प्रकटी नन्द भवन सो जाई
ताके प्रकट ही नर नारी ❀ भये नींद वश देह बिसारी
भादों कारी निशि अति पावन ❀ आठैं बुध रोहिणी मुहावन
अखिललोकपतिजनमुखदायक ❀ आके जन्म लियो सुरनायक
शीश मुकुट कलकुण्डल कानन ❀ शरद मयंक सरस शुभ आनन
चारु चरण पंकजदल लोचन ❀ चितवनि मुखद ताप त्रय मोचन
कुटिल अलक भ्रू मेचकताई ❀ जन मन हरन परम मुखदाई
पीत बसन तन श्याम तमाला ❀ उर श्री वत्स चारु मणिमाला
भुजा विशाल मनोहर चारी ❀ शंख चक्र गद अम्बुजधारी
अंग अंग सब भूषण नीके ❀ परम विचित्र भावते जीके
चरण सरोज उदित नख जोती ❀ कमल दलन राखे जनु मोती
परम प्रताप सुभग शिशु बेखा ❀ अद्भुत रूप देवकी देखा
दो० देखिअमितअविचकितमति, पतिद्विगलियेबुलाय ।

दम्पति परमानन्द मन, परे हर्षि सुत पाय ॥

सो० भरे प्रेम जल नैन, अति सनेह आकुलशिथिल ।

बोले गदगद बैन, जोरि पाणि बिनती करत ॥

प्रभु केहिबिधितुमगुणनबखानौ ❀ तुम मायावश तुमहिं न जानौ
सहसानन जाके गुण गावैं ❀ नेति नेति जेहि निगम बतावैं
जाकी भू बिलास अनयासा ❀ अखिललोक उपजे अरु नासा
जो स्वरूप मुनि ध्यान लगावैं ❀ कृपा करहु तब दरशन पावैं
जो सबते पर अज अविनासी ❀ सो किमि कहिय उदर मम बासी
परम बिचित्र चरित्र तुम्हारे ❀ मोहत हैं प्रभु मनहिं हमारे
तात मात के बचन सुहाये ❀ सने प्रेमवश प्रभु मन भाये
बोले तात मात सुखदानी ❀ मधुर मनोहर अमृत वानी
सुनहु मात मैं तुमहिं सुनाऊं ❀ प्रथम जन्म की कथा बताऊं
तुम यांच्यो मोहिं कर तप भारे ❀ तुम समान सुत होय हमारे
जनहित बिरद मोर श्रुति गायो ❀ सो कैसे करिजात लजायो
तातें मैं बर तुम को दीनो ❀ सो हम आय सत्य अब कीनो

दो० शिवब्रह्मासनकादिमुनि, ध्यानसकत नहिं पाय ।

सो मैं तुम्हरे प्रेम बश, दियो दरशनिज आया ॥

सो० कौतुकनिधिसुरराय, करत चरित मुनिमनहरण ।

महामोह उरभाय, दियो बहुरि पितु मात मन ॥

करहु तात अब बेग उपाई ❀ हमहिं कंसते लेहु बचाई
गोकुल हमहिं देहु पहुँचाई ❀ तहां यशोदा कन्या जाई
मोहिं राखिकै यशुदा पासा ❀ कन्या लै आवहु अनयासा
सो कन्या लै कंसहि दीजै ❀ तात हमारो नाम न लीजै
ऐसहि मात पिता समुझाई ❀ भये तुरत शिशु यदुकुलराई
देखि चरित मुनि प्रभु की बाता ❀ शिवमय हर्ष बिबश पितु माता

सुत उठाय उर सों लपटायो ❀ प्रेम विवश लोचन जलझायो
कहति देवकी पति सुनि लीजै ❀ गमन बेगि गोकुल को कीजै
जब लागि सुनहि न वह हत्यारो ❀ मन वच क्रम नृप को न पत्यारो
बनै नाथ उर धीरज धारे ❀ नाहिन इतने भाग्य हमारे
जो यह सुख नयनन पुट पीजे ❀ ऐसे सुत को यश सुनि लीजे
दरशन सुखित दुखित महतारी ❀ शोचत विकल कंस भयहारी
दो० अति अंधियारी अर्द्धनिशि, भट घेरे चहुँ ओर ।

कौन भांति जैहैं दई, पायँ निगड़ अतिघोर ॥

सो० बरषत अतिजल जोर, घन गरजत चमकत चपल ।

बीच यमुन अतिघोर, पार कवन विधि पाइहैं ॥

कहा करौ अब काहि पुकारौ ❀ कौन भांति धीरज उर धारौ
कंस सरोष तवहिं किन मारी ❀ विनती करि पति वृथा उवारौ
ऐसो सुत विह्वल महतारी ❀ कौन भांति जीवै दुख भारी
कृपा समुद्र भक्त सुखदानी ❀ सुनत मातु की आरत बानी
कृपा करी सब भ्रम भय दारे ❀ गिरे निगड़ पायँनतें भारे
तब बसुदेव हरष तिहि ठाहीं ❀ लक्षधेनु मनसी मन माहीं
पुत्र गोद लै तुरत सिधाये ❀ द्वार कपाट खुले सब पाये
रखवारे सब सोवत देखे ❀ सपदि चले उर हरष विशेषे
तबहीं मधवा वृष्टि निवारी ❀ मन्द समीर भई श्रमहारी
हरिमुख चन्द्रप्रभा तम नाशै ❀ क्षण क्षण तड़ित पंथ परकाशै
प्रभु पर शेष छांह फण छाई ❀ आगे सिंह दहाड़त जाई
सो बसुदेव न जानत भेवा ❀ पहुँचे जाय यमुन तट देवा

दो० सरित देखि गम्भीर अति, मनमें शोच विचार ।

गोकुल के सम्मुख धस्यो, प्रभु प्रताप उर धार ॥

सो० यमुनापति पहिंचानि, मन अनन्द हुलस्योहियो ।

परसनहित पदपानि, अति प्रबाह उंच्यो उछ्यो ॥

गुल्फ जंघ कटिलों जल आयो ❀ तब हरिको कहु ऊर्ध्व उठायो
ज्यों ज्यों बसुदेव सुताहि उठावै ❀ त्यों त्यों जल ऊपर को आवै
नाक प्रयन्त नीर जब आयो ❀ तब हरि पद अधको लटकायो
परसि नीर हुंकारहिं दीनों ❀ तुरतहि भयो गुल्फतें हीनों
भयो पार लैकै घनश्यामहिं ❀ गये बसुदेव नन्द के धामहिं
तहां सकल जन सोवत पाये ❀ सुत लै यशुमति पास सिधाये
कन्या तहां पुनीत निहारी ❀ लई उठाय राखि दैत्यारी
फिरि फिरि सुत को बदन निहारी ❀ चले तुरत भय कंस विचारी
जो सम्पति निगमागम गाई ❀ योगीजनन जानि नहिं पाई
सनकादिक सबस विधि प्राणा ❀ शंकर जासु धरत हैं ध्याना
शारद नारदादि यश गावैं ❀ सहस बदन हूं पार न पावैं
अहो बिलोकहु भाग्य बढ़ाई ❀ सोई सेवत यशुमति माई

दों० वहां देवकी प्रेमबश, अति व्याकुल अकुलात ।

बालक अरु बसुदेव कहैं, पठै बहुत पछितात ॥

सो० बैठत उठत अधीर, व्याकुल सोरहि सेज पर ।

पोंछत नैनन नीर, बोल सकत नहिं कंस भय ॥

मन मन सुर मनाय सनमानै ❀ मत यह भेद दई कोउ जानै
खवारे कहूँ जान न जाहीं ❀ मत कोइ दुष्ट मिलै मगमाहीं
यातें अधिक शोच मोहिं भारी ❀ क्यों दुरि है राशि मुख उजियारी
मगमहैं यमुना अति गम्भीरा ❀ केहि विधि पहुँचैगे उहतीरा
गोकुल पहुँचे धौ मगमाहीं ❀ भई बेर पति आयो नाहीं
यहि विधि शोच विवश अकुलाई ❀ इक क्षण कल्प समान बिहाई

पहुँचे वसुदेव तिहि क्षण जाई ❧ बूझत उठी पुत्र कुशलाई
 केहि विधि पुत्र राखि पति आये ❧ समाचार वसुदेव सुनाये
 कन्या दई देवकी जवहीं ❧ द्वारकपाठ गये लागि तवहीं
 बेरी हैगई पग ततकाला ❧ कन्या रोय उठी तिहि काला
 चहुँ दिशि जाग परे रखवारे ❧ तुरत कंसपहँ जाय पुकारे
 सुनतहिँ उठ अति आतुर धायो ❧ लीने खड्ग तहां चलि आयो
 दो० कन्या लै तब देवकी, आगे राखी आय ।
 दीन बचन आधीन है, कंसहि कही सुनाय ॥
 सो० अहो भ्रात यह दान, तुम हमकहँ अब दीजिये ।
 है कन्या जियजान, याते भय तुमको नहीं ॥

सुनत कंस भगिनी की बानी ❧ मृत्युत्रासतें शठ रिस मानी
 यामें कझ होय छल कोई ❧ को जानै विधनागति गोई
 यह विचार कन्या गहि लीनी ❧ पटकन की मनसा तिहि कीनी
 कर तें छूटि गई आकाशा ❧ दिव्य रूप तहँ कियो प्रकाशा
 बोलति भई गगन ते बानी ❧ अरे मन्दमति अधम अज्ञानी
 मम हत्या तैं लई बृथाहीं ❧ तेरो रिपु प्रकट्यो ब्रजमाहीं
 सर्प ग्रसित जिमि दादुर होई ❧ माखी खान चहत शठ सोई
 तैसे तू चह मारन मोहीं ❧ आयो काल निकट शठ तोहीं
 ऐसे कहि कै स्वर्ग सिधारी ❧ कंसहि शोच भयो मुनि भारी
 पखो देवकी चरणन माहीं ❧ मैं मारे तुव पुत्र बृथाहीं
 क्षमा करौ मेरे अपराधा ❧ है विधिकी गति अलखअगाधा
 वसुदेवहु सन क्षमा कराई ❧ निगड़ दिये पगतें कटवाई
 दो० गयो शोच व्याकुल सदन, परयो सेजपर जाय ।
 जागतही बीती निशा, नौंद पड़ी नहिं ताय ॥

सो० हरिके चरित अनूप, असुर विमोहन सुर सुखद ।
नर न परत भवकूप, सहज प्रेम गावहिं सुनहिं ॥

यशुदा जब सोवत ते जागी ❀ सुत मुख देखतही अनुरागी
पुलक अंग उर आनँद भारी ❀ देखि रही मुख शशि उजियारी
गदगद कंठ न कछु कहि आयो ❀ हर्षवन्त है नन्द बुलायो
आवहु कन्त पुत्र मुख देखौ ❀ बड़ो भाग्य अपनो करि लेखौ
भये प्रसन्न आज सब देवा ❀ सुफल भई सबहिन की सेवा
मुनत नन्द प्रिय तियकी बानी ❀ प्रेम मगन तन दशा भुलानी
हर्षित है उठि आतुर आयो ❀ यशुमति सुतको बदन दिखायो
देखत मुख उर मुख भयो जैसो ❀ कहि न सकहिं श्रुति शारद तैसो
कहा कहौ तिहि क्षणकी शोभा ❀ मनहुँ महाछवि तरुके गोभा
आनँद मगन नन्द मनमार्ही ❀ जानत नहिं हमको केहि ठाहीं
रोय उठे तब नन्दके लाला ❀ जागि परे सब ग्वालिन ग्वाला
जित तित तैं हर्षित उठ धाये ❀ मनहुँ रंक धन लूटन आये
दो० देहिं बधाई नन्द को, परे यशोदा पाँव ।

कहैं पियारे लाल को, नेक हमहिं दिखराव ॥

सो० अति हर्षित नँदराय, कह्यो बजावन सोहिलो ।
नारिउठौ सब गाय, लाग्यो बजन बधावनो ॥

छं० सुर सिद्ध मुनिन्दा परम अनन्दा मुनि गोकुल हरि आये ।
हुन्दुभी बजावत मंगल गावत तियन सहित उठि धाये ॥
बिद्याधर किन्नर सुधर कण्ठवर करत गान सचुपाये ।
गरजत तिहिकांला मधुर रसाला घनगति जनन जनाये ॥
बाजत करताला बरषत माला सुरतरु सुमन सुहाये ।
सब करै कलोलैं हर्षित बोलैं जै जै जै सुख पाये ॥

नभ मँहँ धुनि होई सुन सब कोई भये सवन मन भाये ।
 सन्तन हितकारी असुर सँहारी आवत क्षिति सुख जाये ॥
 शिव ब्रह्मादिक मुनि सनकादिक परम प्रफुल्लित गाता ।
 गुण गण सब गावैं प्रभुहि सुनावैं आनँद उर न समाता ॥
 भागे गन चीते सब भय भीते प्रकटे दनुज निपाता ।
 अति गन हर्षे पुनि पुनि वर्षे सानुज सुरतरु जाता ॥
 सुरतिय मनमाहीं निरखि सिहाहीं यशुमति के बड़ भागा ।
 इन सम हम नाहीं पुरायन माहीं कहैं सहित अनुरागा ॥
 योगी जेहि ध्यावैं ध्यान न पावैं करि करि योग विरागा ।
 जो वेद न जानै नेति बखानै सो सुत है उर लागा ॥

दो० भरे परमआनन्द सुर, उपजावत अनुराग ।

बार बार बर्णन करैं, नन्द यशोमति भाग ॥

सो० रहे सदनसुर भूल, गोकुल को उत्सव निरखि ।

जन्मे मंगलमूल, ब्रजवासी हर्षित सबै ॥

ब्रजवासिन सबहिन सुनि पायो ❀ नन्दमहर घर छोटा जायो
 गुणानन्द लोतरा बँधाये ❀ नंदराय तब विप्र बुलाये
 काढ़ि लग्न ग्रह योग सुधायो ❀ अति विचित्र सब द्विजन सुनायो
 करत बेद ध्वनि अति सुखपाई ❀ देहि नंद को सकल बधाई
 तब अस्नान महारि उठि कीनों ❀ भाल तिलक चन्दन लें लीनों
 जातकर्म करि पितर पुजाये ❀ भूषण वसन द्विजन पहिराये
 गायें लक्ष सबत्स सोहाई ❀ वाढ़ी दूध नवीन मँगाई
 सब विधि सकल अलंकृत कीनी ❀ करि सङ्कल्प द्विजन को दीनी
 मुदित विप्र सब देई अशीसा ❀ चिरजीवहु सुत कोटि वरीना
 हँसि हँसि बहुरि महारि नंदराई ❀ हितकुटुम्ब सब निकट बुलाई

बहु सुगन्धि मथि तिलक बनाये ❀ भूषण वसन विविध पहिराये
हुते जु कुल में बृद्ध जिठेरे ❀ हितसों पांय परे सबकेरे

दो० बन्दी मागध सूतगण, भरे भवन सब आय ।

लै लै नाम बुलाय सब, परितोषे नँदराय ॥

सो० मनबांछित सबलेहिं, जो जाके भावै मनहिं ।

नन्दभरे रसदेहिं, किये अयाची याचकनि ॥

सुनि सुनि धाई ब्रजकी नारी ❀ लेकर कमलन कंचन थारी

मंगल साज साज सब लीन्हें ❀ सहज श्रृंगार सुभग तन कीन्हें

चारु चीर तन दृग कजरारे ❀ भाल तिलक कुच शिथिल सवारे

मांग सिंदूर तरोना कानन ❀ रोरी रंग किये कहु आनन

अँगिया अंग कसे छबि छाजै ❀ विविध भांति उर हार धिराजै

अति आनंद मगन मन फूली ❀ अंचल उड़त सँभारन भूली

निज निज मेल मिली सब गावैं ❀ विहरत नंद धाम को आवैं

इक भीतर इक आंगन माहीं ❀ इक द्वारे मग पावत नाहीं

सब को यशुमति निकट बुलावैं ❀ मुख उधार सुत को दिखरावैं

देहिं अशीष परो शिशुपांयन ❀ जीवहु जब लग नभ तारागन

पूरण काम भयो ब्रज सारो ❀ धन्य यशोदा भाग्य तिहारो

धन्य सो कोखि जहां सुत राख्यो ❀ पुण्य तिहारो जात न भाख्यो

दो० धन्य दिवस धनि राति यह, धन्य लग्न तिथि बार ।

जहँ जायो ऐसो सुवन, थिर थाप्यो परिवार ॥

सो० पुनि पुनि शीश नवाय, देहिं अशीष मनाय मुर ।

जियहु सुवन नँदराय, रूप अचल कलकी थुनी ॥

परमानंद नन्द अनुरागे ❀ चित्र विचित्र वस्त्र बहु मांगे

सारी सुँग कसब के लहिंगे ❀ अति चटकीले मोलन महिंगे

सिगरी बधू बोल पहिराई ❀ जो जैसी जाके मन भाई
 देहिं अशीष मुदित ब्रजनारी ❀ फूलीं कमल कलीसी न्यारी
 एक रहसि निज निज गृह जाहीं ❀ इक हुलसी आवैं गृह माहीं
 एक कहैं एकन सों धाई ❀ हों यह बात भली मुनि आई
 महारि यशोदा दोटा जायो ❀ नंदद्वार सखि बजत बधायो
 चलो बेगि सखि देखिय सोई ❀ विधना चाहतही है सोई
 इक नाचैं इक ढोल बजावैं ❀ एक नंद को गारी गावैं
 एक साथिये द्वार बनावैं ❀ एकै तोरण द्वार बँधावैं
 ध्वज पताक तोरण छविछाई ❀ घर घर होत अनंद बधाई
 पुनि पुनि सुमन देव वर्षावैं ❀ फूलन सों सब गोकुल छावैं

दो० ध्वज पताक तोरण कलश, बंदनवार दुवार ।

गोपन के घर घर बँधे, तोरण मंगलचार ॥

सो० नंदसदन सबिचार, बरणिसकै सो कौन कवि ।

लियो जहां अवतार, छवि सागर त्रिभुवनधनी ॥

ग्वालवृंद सब मुनि उठिधाये ❀ बालवृंद सब निकट बुलाये
 घसि बन धातु चित्र सब कीने ❀ गुंजा भूषित भूषण लीने
 यद्यपि अरु भूषण तन माहीं ❀ तद्यपि अहिरन गुंज मुहाहीं
 एक कहैं एकन समुझाई ❀ आज बनहिं कोऊ नहिं जाई
 गैया लेपन सहित बनावो ❀ चित्र विचित्र बेगि ले आवो
 पूत नन्द के घर है जायो ❀ भयो सवन के मन को भायो
 कितनो गहर करत दिन काजा ❀ बेगि चलो सब सहित समाजा
 दधि माखन के माठ भराये ❀ कछु इक हरदी रंग मिलाये
 लिये शीश पर केतिक गावैं ❀ केतिक ताल मृदङ्ग बजावैं
 मिलिमिलिनिजनिजयूथनमाहीं ❀ नंदसदन निरखत सब जाहीं

देखि नंद अति आनंद पावैं ❀ हँसि हँसि सबको निकट बुलावैं
छुड़ छुड़ चरण भेंट धरि आगे ❀ देहिं वधाई अति अनुरागे

दो० नाचत गावत मगन मन, भई सदन अति भीर ।

मनु आये उतसाह सब, धरि धरि गोपशरीर ॥

सो० देह धरे आनन्द, मनहुँ नंद तिन मधि लसै ।

जन्मे आनंदकन्द, कहि न सकहिं सुखसहसमुख ॥

इक नाचत इक गावत ठाढ़े ❀ इक कूदत अति आनंद वाढ़े

झिरकत एक दूध दधि डोलैं ❀ एक कुलाहल करत कलोलैं

मनो नंद घर दधि को कांदौं ❀ बरसत दूध दही जनु भादौं

एक धाय एकन पै जाहीं ❀ एकै मिलत डारि गलवाहीं

एक एक के पाँयन परहीं ❀ इक दधिदूर्वाक्षत शिर धरहीं

अति उछाह सबके मन माहीं ❀ राजा राव गनत कछु नाहीं

गोकुल मध्य देखिये जितहीं ❀ करत गोप कौतूहल तितहीं

एकै लूट नन्द को लेहीं ❀ एकै एकन को धन देहीं

एकन हित करि नन्द बुलावैं ❀ पट भूषण तिन को पहिरावैं

एक कहैं हम तब कछु लैहैं ❀ जव लालन मुख देखन दैहैं

एक जो एकन तें कछु लेहीं ❀ ते निशंक एकन को देहीं

अति आनंद मगन पशुपालक ❀ नाचत तरुण वृद्ध अरु बालक

दो० गोकुल को आनंद सब, कापै बरणयो जाय ।

जहां परम आनंदमय, लियो जन्म हरिआय ॥

सो० नित नव होत बिलास, हरिमुकुन्द के जन्म तें ।

ब्रजसम्पदासुपास, सुरमुनि कहैं कौतुक निरखि ॥

जब तें जन्म लियो हरि आई ❀ सुखसम्पति ब्रज घर घर आई

सो उदार सब परम प्रवीना ❀ सब सुन्दर सब रोग विहीना

मुदित जहां तहँ सब ब्रजवासी ॥ सब यशुमति सुत प्रेम उपासी ॥
 संग साधन बरण्यो किमि जाहीं ॥ सुत सुरेश लखि विभ्रमजाहीं ॥
 अति प्रकाश मन्दिर के माहीं ॥ फैलिरही हरि छवि की छाहीं ॥
 ग्वाल गाय गोपन की भीरा ॥ कहँ दधि कहँ माखन कहँ क्षीरा ॥
 भूमि बाग बन गिरि रमनीया ॥ खग मृग सर सरिता कमनीया ॥
 बिटप बेलि सब सहित फूल फल ॥ दिशा प्रकाशित निर्मल जल थल ॥
 सुरभी सुर सुरभी सम तूला ॥ भयो सकल ब्रज मंगल मूला ॥
 विभव भेद यह कोउ न जाने ॥ आदिहि ते हम ऐसे माने ॥
 कृष्ण जन्म आनंद बधाई ॥ सुरपुर नाग तिहंपुर भाई ॥
 ब्रजवासिनगण अधिक उझाहू ॥ करि नहिं सकहिं सहसमुख काहू ॥

दो० ब्रजको सुख को कहि सकै, सुखमा बढी अपार ।

सुखनिधान भगवान जहँ, लियो मनुज अवतार ॥

सो० प्रगटे गोकुल चंद, संत कुमुद वन मोदकर ।

तमकुल असुरनिकंद, ब्रजजन चारु चकोर हित ॥

नित नव भीर नंद के द्वारे ॥ याचकजन सब होयँ सुखारे ॥
 गांव गांव ते सुनि सुनि आवैं ॥ मन भायो सब कोऊ पावैं ॥
 पांच दिवस इहिविधि सुख पायो ॥ छठ्यों दिवस छठी को आयो ॥
 मंदिर सकल सुवास लिपायो ॥ जहां तहां चित्रित करवायो ॥
 बीथी चारु सुगंधि सिंचाई ॥ द्वारन बंदनवार बंधाई ॥
 जानि कुटुम्ब मित्र हित जेते ॥ नंदराय न्योते सब तेने ॥
 ठौर ठौर बहु व्यंजन होई ॥ भोजन कहँ आये सब कोई ॥
 गोपबधू सब बनि बनि आवैं ॥ लालन को पहिरावन ल्यावैं ॥
 जरकिस कुरता भूषण टोपी ॥ रत्नममेत प्रेम रंग आयो ॥
 रोरी अक्षत पान मिठाई ॥ धरि धरि कञ्चनधारिन लाई ॥

गावहिं मंगल कोकिल बानी ❀ नंद भवन आवहिं हरपानी
करि आदर यशुदा बैठवैं ❀ देखि श्यामघन सबसुख पावैं
दो० बृषभानादिक गोपवर, ब्रजवासी समुदाय ।

आये सब नँदराय गृह, भूषण बसन बनाय ॥

सो० अति आदरकर नंद, शुभआसन दीन्हें सबन ।

सबके मन आनंद, बजत दुन्दुभी नचत नट ॥

कहूं ग्वाल गावत हैं होरी ❀ कहूं खिलावत गाय घनेरी
बंश प्रशंसा भाट सुनावैं ❀ कितहूं ढाढ़ी ढाढ़िनि गावैं
देहिं गोपगण तिनको दाना ❀ भूषण बसन धेनु मणि नाना
परजा सकल खिलौना ल्यावैं ❀ अति अद्भुत कापै कहि आवैं
धरहिं नंद के आगे आनी ❀ राखहिं सब अतिशय सुख मानी
तिनहीं देहिं निझावरि हरिकी ❀ कोमल श्यामल सुन्दर वरकी
लालन हित सों नंद रखायो ❀ विशुकर्मा सब बांछित पायो
ऐस दिवस पामर युग पायो ❀ तब सब गोपन नंद जिमायो
झिरकि सुगंध पान कर दीनो ❀ तब सब गोपन भोजन कीनो
मंगलमय रजनी जब आई ❀ गाय उठीं सब नारि सुहाई

दो० कुरता टोपी पीतरंग, लालन को पहिराय ।

लै उछंग पूजन छठी, बैठीं हर्षित माय ॥

सो० करि कुलको ब्योहार, करी आरती श्याम की ।

करतनिझावरिनारि, तन मनधनशशिमुखनिरखि

नेग जोग सब नेगिन पायो ❀ दियो सबनि यशुदा मन भायो
प्रातहि उठि लालन अन्हवाये ❀ सुदिन शोधि पलना पौढ़ाये
निरखि निरखि यशुदा बलिजाई ❀ अरुण चरण कर कोमलताई
ब्रजवासी जीवन नँदलाला ❀ मातु मुकूत फल मदनगोपाला

नितनव मंगल होहिं सुहाये ॥ मंगल निधि जव ते हरि आवे ॥
नंद सुकृत वरपा ऋतु सोई ॥ यशुमति सुकृत अकाश वनोई ॥
तहँ धनश्याम श्याम तन उनये ॥ मंद हँसन दामिनि द्युति जुनये ॥
रंजन मंद मधुर किलकारी ॥ ब्रजजन मोरन आनँदकारी ॥
दादुर गुणगण गावहिं दासा ॥ परम प्रीति मन परम हुलासा ॥
पलना पचरँग मणि छवि छाई ॥ इन्द्र धनुष उपमा तिन पाई ॥
गजमुक्कन की लर लटकाई ॥ सोई मानों वग पांति सोहाई ॥
ब्रज घर घर सुख सम्पति छाई ॥ सोई मनहुँ भूमि हरि आई ॥
दो० वरपत परमानन्द जल, नन्द सदन जग माहिं ।

ध्यान भूमि दृगसरितमग, जनउरसिन्धुसमाहिं ॥

सो० पूरण होत सुनाहिं, यद्यपि निशि वासर भरन ।
बढ़तलहरिपुलकाहिं, हरिमुखशशिराकानिरखि ॥

कंसहि वहां नींद निशि नाहीं ॥ अति चिंता व्याकुल मन माहीं ॥
बैठ्यो निकसि सभा उठि प्राता ॥ मंत्री बोलि कहहि सव वाता ॥
मेरो रिपु प्रगढ्यो ब्रज माहीं ॥ कौन भांति पहिंचानों ताहीं ॥
जाते जाय बेगि वह मारो ॥ ऐसो तुम कहु मंत्र विचारो ॥
दिन दिन बड़ो होय अब सोई ॥ को जानै फिरि कैसी होई ॥
बोल्हो एक असुर मुनु राजा ॥ क्यों डरपत इतने के काजा ॥
मोपै एक मंत्र मुनि लीजै ॥ धर्म काज कहु होन न दीजै ॥
जप तप होम होन नहिं पावै ॥ विप्रन साधुन असुर सतावै ॥
जो वह देव होय गो कोऊ ॥ सहि नहिं सकै प्रगट ह्वे मोऊ ॥
तब तेहि असुर जाय संहारै ॥ या विधि शत्रु तुम्हारे मारै ॥
बोलो एक बात यह नीकी ॥ औरों मुनों हमारे जीकी ॥
देश देश को असुर पठावो ॥ बालक मासक के जे पावो ॥

दो० तिन सबहिन को बध करें, बचन न पावै कोय ।

इनहीं में वह होयगो, माख्यो जै है सोय ॥

सो० कह्यो कंस हरषाय, कहैं मंत्र दोऊ भले ।

पठवहु असुर निकाय, जाय करें कारज सँभरि ॥

या विधि असुर बिदा बहु कीनों ❀ बाल वधन की आयसु दीनों

कह्यो जाय ब्रज बेगाहि कोई ❀ तहां के बालक मारै सोई

कह्यो पूतना आयसु पाऊं ❀ तौ यह कारज में करि ल्याऊं

सकल घोष शिशु जाय नशाऊं ❀ जो कहिये तौ जीवत ल्याऊं

क्षण में रूप मोहिनी धारौं ❀ वशीकरण पढ़ि सब पर डारौं

घसि कङ्कोल उरोजन लाऊं ❀ ब्रजवासिन के बाल पियाऊं

तौ पूतना नाम कहवाऊं ❀ जो नृप को कारज करिआऊं

तुरत कंस तेहि आयसु दीनों ❀ सुनतहि बचन गवन तिन कीनों

ता दिन नन्द मधुपुरी आयो ❀ राजअंश कछु नृप कहँ ल्यायो

नृप दरबार ताहि पहुंचायो ❀ समाचार वसुदेव को पायो

छोड़ि बन्दिते नृप ने राखे ❀ हते मित्र सुनि के अभिलाखे

मिलन गये तिनको नँदराई ❀ उठि वसुदेव मिले हरपाई

दो० कुशल पूछि करि परस्पर, बारम्बार सप्रीति ।

बैठारे नँदराय ढिग, करिकै आदर रीति ॥

सो० तब बोले नँदराय, सुनिय दैव भावी प्रबल ।

तासों कछु न बसाय, जगत भ्रमत जाके बिबश ॥

तुम अति कष्ट कंसते पायो ❀ सुनि सुनि भयो बहुत पछितायो

आजु देखिकै चरण तिहारे ❀ भये हमारे नैन सुखारे

तब वसुदेव कही मृदुबानी ❀ अहो नन्द तुम सत्य बखानी

कर्मरेख नहिं जात मिटाई ❀ विधि की गति कछु जात न पाई

मुन्यो नंदसुत भयो तुम्हारे ॥ तव ते अनि मुख भयो हमारे ॥
 तुमको जरा आय नियराई ॥ बड़ी वैस विधि भयो सहारे ॥
 तव नंद हलधर जन्म सुनायो ॥ प्रथमहिं तिन्हें रोहिणी जायो ॥
 तिनको उत्सव प्रकट न कीनो ॥ कंस त्रास अपने उर लीनो ॥
 पुनि वसुदेव बहुत मुख पायो ॥ तव ऐसे कहि वचन सुनायो ॥
 सुनहु नंद तुम नीके जानो ॥ कंस नृपति कृत नाहिं छिपानो ॥
 ताते अब वे दोऊ बालक ॥ अपने मानि करौ प्रतिपालक ॥
 अब तुम बेगि गोकुलहि जाहु ॥ बालक हित पतियाहु न काहु ॥

अथ पूतनावधलीला ॥

दो० जित तित भेजे कंस के, करत असुर अनरीति ।

प्रजा लोग के बालकन, ताते हैं अति भीति ॥

सो० गई पूतना आज, ब्रज के बालकधातिनी ।

करि है कलू अकाज, बेग धाम सुधि लीजिये ॥

मुनि वसुदेव वचन नंदराई ॥ भये विदा तुरतै भय पाई ॥
 निकसत शकुन अशुभमग पायो ॥ तातें अधिक शोच उर छायो ॥
 क्षिप्र चले कलू सुधितन नाहीं ॥ बालक की चिंता मन माहीं ॥
 इहां पूतना ब्रज में आई ॥ रूप मोहनी प्रकट बनाई ॥
 गरल बांटी कुचसों लपटायो ॥ ऊपर मुभग शृंगार बनायो ॥
 अतिही कपट छबीली सोहै ॥ जो देखें ताको मन मोहै ॥
 इत उत है नंदधामहिं आई ॥ देखि रूप यशुदा मन भाई ॥
 देखि रही मुख सुन्दरताई ॥ कै यह नर के मुखी जाई ॥
 काकी बधू कौन की बेटी ॥ अब लों ब्रज में कवहुं न भेटी ॥
 बिन पहिंचाने आदर कीनो ॥ बैठन को शुभ आसन दीनो ॥
 अहो महारि पालागन मेरो ॥ हों आई मुन देखन तेरो ॥

हरि पलना पर मन मुसुकाई ❀ यशुमति कहु गृह काज सिधाई

दो० तबहिं राक्षसी दुष्टमति, पलना के ढिग जाय ।

निरखि बदनमुखचूमिकै, लीन्ह उखंग उठाय ॥

सो० दियो कमल मुखमाहिं, विपलपट्यो अस्तनतुरत ।

पकरि दुहं कर माहिं, लगे करन पय पान हरि ॥

पय सँग प्राण खिंचे जब वाके ❀ है गये अंग शिथिल सब ताके

तब सो लगी छुड़ावन बालक ❀ सो क्यों छुटै दुष्ट कुलघालक

पयसँग प्राण खींच हरि लीना ❀ पठै स्वर्ग जननीगति दीना

परी मृतक है असुर सुनारी ❀ योजन लौं निज तन विस्तारी

यशुमति धाय देखि गुहरायो ❀ पलना पर बालक नहिं पायो

त्राहि त्राहि करि धन ब्रज धाई ❀ व्याकुल विपुल नंद गृहआई

अति व्याकुल यशुमति महतारी ❀ दूंदहिं श्यामहिं रोवत भारी

हरि ताकी छाती लपटाने ❀ करत चरित्र जो अचरजसाने

दूंदत दूंदत उर पर छाये ❀ लै उठाय माता उर लाये

दुख सुख ताको कह्यो न जाई ❀ जिमि मणिगई भुवंगन पाई

सुखित भई सब ब्रजकी वाला ❀ कहति वच्यो अति नंदको लाला

नंद यशोमति भाग बड़ेरी ❀ सुतकी करवर दरी कोरी

दो० आई अद्भुत रूप धरि, अति विपरीत कुमारि ।

कपटहेतु नहिं सहि सक्यो, तेहि माख्यो करतार ॥

सो० कहत यशोमति माय, पुनिपुनि सबके पांयपरि ।

उबख्यो आज्ञा कन्हाय, तुमपञ्चनके पुण्य ते ॥

बड़ो कष्ट यह सुत ने पायो ❀ आज्ञा विधाता बहुत वचायो

कोउ कह भागवंत नँदराई ❀ कुल के देवन करी सहाई

कोउ कहै नेक मोहिं सुत देरी ❀ देखहुं मुख में पुनि तू लेरी
कोउ मुख चूमि बलैया लेई ❀ लै उछंग पुनि यशुदहि देई
बच्चो कान्ह सब ब्रज सुधि पाई ❀ घर घर बजी अनंद बधाई
तवहिं नन्द गोकुल में आयो ❀ देखि पूतनहिं अति भय पायो
जो बसुदेव कहीही बानी ❀ सो सब मन में सांची जानी
तहँ सब ब्रजवासी जुरिआये ❀ समाचार सब प्रकट सुनाये
तब मुख पाय गये नँद धामहिं ❀ देख्यो जाय सुवन घनश्यामहिं
बदन विलोकि हरपि उर लाये ❀ बहुत दान दे देव मनाये
तब ब्रजवासी सकल बुलाये ❀ अंग पूतना के कटवाये
वाहेर एक ठौर सब कीने ❀ अग्नि लगाय धूँकि सब दीने

दो० अति सुगंध ता अंग में, कीन्ही अग्नि प्रकास ।

हरि अस्पर्श प्रताप ते, ब्रज सब भयो बुवास ॥

सो० रहे अचम्भौ पाय, ब्रजवासी चकित सवै ।

चरणकमल चितलाय, नंदसुवनमहिमा सुनत ॥

हरि रोये माता की कनियाँ ❀ दूध पियायो तब नँदनियाँ
पुनि पलना पौढ़ाय भुलावै ❀ हलरावै हुलराय मल्लावै
लालन के हित नँद बुलावै ❀ मधुरे मुर जोई सोई गावै
रेलालन को आव निदरिया ❀ तोहिं बुलावत श्यामसुंदरिया
जो करि कपट लाल को आवै ❀ तौ अवकीलों विधि बिनसावै
अहो देवता या कुल केरे ❀ मैं पूजिहों कमल पद तेरे
बेगि बड़ो कर दे यह बालक ❀ ब्रज जन प्राण पूतनाबालक
दुतिया के शशिलों शिशु बाढ़े ❀ आँवालों अरि उर नित डाढ़े
सोवे मेरो बाल कन्हई ❀ माता मुख की बलि बलि जाई
सोवत देखि मौन गहि रहई ❀ जागत देखि बहुरि कहु कहई

अंग फरकाय अलप मुसुकाने ❀ ता छवि की उपमा कोउ जाने
बार बार शिशु वदन निहारें ❀ यशुमति अपनो भाग्य विचारें

दो० हलरावत गावत मधुर, हरिके बाल विनोद ।

जो सुखसुरमुनिको अगम, सो सुखलेत यशोद ॥

सो० कबहुं लेत उखंग, उर लगाय चूमत सुखहि ।

निरखि मनोहर अंग, कबहुं झुलावत पालने ॥

दरशन को नित सुर मुनि आवैं ❀ बाल विनोद निरखि सुख पावैं

कहैं परस्पर सुर नर नारी ❀ हरिके अद्भुत चरित निहारी

अलख अगोचर अज अविनासी ❀ पुरुष पुरातन विश्वनिवासी

जाको भेद न शिव मुनि जानैं ❀ ब्रह्मा पढ़ि पढ़ि वेद बखानैं

सो हलरावत नँदकी घरणी ❀ पूरण भई पुरातन करणी

मन अभिलाष बढ़ावत भारी ❀ हुलसत हँसत देत किलकारी

चरषि प्रमून हरषि मनमाहीं ❀ धन्य धन्य कहि ब्रज घर जाहीं

नितनव कौतुक होहिं अकासा ❀ ब्रजवासिन मन अमित हुलासा

यशुदा नवानित लाड़ लड़ावैं ❀ निरखि निरखि ब्रजजन सुख पावैं

नित नव मंगल नँदके धामा ❀ नित नवरूप श्याम अभिरामा

भक्त बल्लभ भक्तन हितकारी ❀ भक्तन हित नाना तन धारी

भजत संत यह हृदय विचारी ❀ जन ब्रजवासी हैं बलिहारी

दो० जब हरि मारी पूतना, मुनि डरप्यो नृप कंस ।

प्रकटभयो ब्रजशत्रु मम, यह जानी निस्संस ॥

सो० बसो तासु उरमाहिं, ताही क्षणते अचल हरि ।

भूलत इक क्षणनाहिं, शत्रुभाव लाग्यो भजन ॥

अथ कागासुरवधलीला ॥

कागासुर नृप निकट बुलायो ॥ ताहि मतो सब कहि गमुभायो ॥
 आवहु वेगि नन्दमुत मारी ॥ करियहु कारज बुद्धि विचारी ॥
 आयसु धरि शिर गर्व बढ़ायो ॥ काग रूप तें अमुर बनायो ॥
 वेगिवन्त उठि गोकुल आयो ॥ प्रेरित काल अवधि नियगयो ॥
 वैद्यो नंद धाम पर आई ॥ पलना वैद्यो बाल कन्हई ॥
 ताको आवतही हरि जान्यो ॥ काग न होय अमुर पहिचान्यो ॥
 यशुदा हरिको सोवत जानी ॥ कहु गृह कारज में लपटानी ॥
 तबहिं अमुर पलनापर आयो ॥ चाहत हरिको चोंच चलायो ॥
 कंठ पकरि हरि करसों लीन्हो ॥ चोंच मरोरि फेंक त्यहि दीन्हो ॥
 पखो जाय नृप पास उतान्यो ॥ यह ब्रजवासी काहु न जान्यो ॥
 तुरत कंस तिहि बूझन धायो ॥ बीते याम बोल तब आयो ॥
 सुनहु कंस वह बाल न होई ॥ है अवतार महाबल कोई ॥

दो० एकहाथ सों पकरि मोहिं, फेंक दियो तुम पाम ।

हैहै तुम्हरो काल वह, मैं कीन्हां विश्वास ॥

सो० अति डरप्यो सहिपाल, कागासुरके बचन सुनि ।

वह सो गयो विशाल, जम्यो जु उरमें शोचतन ॥

सभा मध्य सब अमुर सुनाई ॥ बार बार शिर धुनि पछिताई ॥
 ब्रज में उपज्यो मेरो काला ॥ ताको अवहीं ते यह हाला ॥
 दलुज सुता पूतना पठाई ॥ ताको इक क्षण मांक नशाई ॥
 कागासुर के ऐसे हाला ॥ सो तो दिन दिन होन विशाला ॥
 है कोउ वीर जु ताहि नशावै ॥ मम कारज करि आर बचावै ॥
 ऐसे कौन कहों मैं जासों ॥ अब कै जाय भिरें जो नासों ॥
 अमुरन को ये नृपति सुनायो ॥ शक्यअमुर यन गर्व बढ़ायो ॥

उठिके पान नृपति सों मांगे ❀ कहा काम यह मेरे आगे
 तब प्रताप तेहि पल में मारौं ❀ कहौ तौ सब ब्रज को संहारौं
 कंस हर्ष तेहि बीरा दीन्हों ❀ शूरसराहि बिदा तेहि कीन्हों
 यहां श्याम पलना पर खेलैं ❀ करगहि पद अँगुठा मुख मेलैं
 अपने मन यह करत बिचारा ❀ इह मम पद संतन आधारा

दो० ये पदपंकज राखि उर, निरखत शम्भु सुजान ।

इनको रस मन मधुप करि, करत निरंतर पान ॥

सो० पुनि इन पदको ध्यान, करत ब्रह्मसनकादिमुनि ।

लक्ष्मी अति सुखमान, उरतें क्षण टारत नहीं ॥

इन पद पंकज रस अनुरागा ❀ मगन सकल सुरनर मुनि नागा
 ऐसो धौं का रस इन माहीं ❀ सो तो मोहिं विदित कहु नाहीं
 मोकों यह रस दुर्लभ भारी ❀ देखौं धौं मैं ताहि बिचारी
 तातें पद अँगुठा मुख मेलैं ❀ लै लै स्वाद मगन रस खेलैं

ता अन्तर शकटसुर आयो ❀ पवन रूप काहु न लखि पायो

भारे शकट नंद घर केरे ❀ पलना के ढिग हते घनेरे

तिनमें सो शठ आय समान्यो ❀ नंदसुवन तबहीं यह जान्यो

ताको हरि एक लात चलाई ❀ गिखो शकट तब अति हहराई

दनुज निधन काहु नहिं जान्यो ❀ गिखो शकट यह सबहिन मान्यो

मुनत शब्द सब व्याकुल धाये ❀ नंदआदि सब जुरि तहँ आये

यशुमति दौरि श्याम को लयऊ ❀ सबके मन अतिविस्मय भयऊ

कारण कहा कहैं नर नारी ❀ गिखो शकट आपुहि तैं भारी

दो० पलना ढिग खेलतहुते, कलुक गोपके बाल ।

तिनन कह्यो डाख्यो शकट, पलना तैं नंदलाल ॥

सो० सो नहिं करी प्रतीति, काहू बालन की कही ।

यहतौ कछु बिपरीति, मई कुशल अति श्यामकी ॥

यशुमति अति मन मन पछिताई ❧ भये आज कुल देव महाई

वार वार उरसों सुत लाई ❧ निरखि नन्द पुनि पुनि बलिजाई

मेरे निधनी के धन जेया ❧ लगै मोहिं तेरो रोग बलैया

ऐसे बहु विधि लाड़ लड़ाये ❧ पय पियाय पलना पौढ़ाये

मन्द मन्द कर ठोंकि सुनावैं ❧ कछु इक मधुर मधुर स्वर गावैं

सोवत श्याम शुभग सुन्दर वर ❧ चोंकि चोंकि शिशुदशा प्रकट कर

लिये मातु छतियां लपटाई ❧ जनु फणि मणि उरमांभ दुराई

प्रात निरखि मुख आनँद कीनो ❧ चूमि बदन सुन को पय दीनो

कोमल धाय अजिर जब आयो ❧ तहँ सुन पलना पर पौढ़ायो

आप मथन दधिभवन सिधारी ❧ नन्दहि सुत के दिग घेंठारी

निरखि नन्द सुत आनँद भारी ❧ कमल बदन छवि रहे निहारी

चुटकी दै दै सुतहिं खिलावैं ❧ निरखि निरखि मुख अति सुगुण पावैं

दो० किलकिउठेलखितातसुख, करपददृग अतुराय ।

भपट भटकि उलटेपरे, सुखनिधि त्रिखुवनराय ॥

सो० सो ब्रवि कहिय न जाय, निरखिनन्द देखतमहरि ।

आपनसकत उठाय, अतिकोमलसमसकुचमन ॥

नन्दहि देखत सुनि नँदरानी ❧ तजी तुल्य दधि मथन मथानी

जाने महरि गिरे सुखदाई ❧ तातें अति आनुर उठि धाई

नन्दहि देखि हँसति हें पास ❧ तव धीरज धरि कियो हुलामा

उलटि परयो सुत देखौ आई ❧ उठि न सकत कर सज लगाई

सो छवि निरखि मातु सुख पायो ❧ तुरत मुदिन उलटाय उठायो

उर लगाय मुख चुम्बन लागी ❀ कहत आज मैं भई सभागी
 पिष्टकरान हरि उलटन लागे ❀ डेढ़ मास के भये सभागे
 चिरजीवहु मेरे कुँवर कन्हारै ❀ आन करो मैं अनँद वधाई
 नँदरानी ब्रज नारि बुलाई ❀ यह सुनि सब आनँद कर धाई
 हरिको निरखि परम सुख पायो ❀ हरपित सवहिन मङ्गल गायो
 बाँटी घर घर पान मिठाई ❀ नन्दमुवन ब्रज जन सुखदाई
 धनि धनि ब्रजकी बाल सभागी ❀ हरि के बालचरित अनुरागी
 दो० जननी अति आनँदभरी, निरखत श्यामलगात ।
 जैसे निधनी पाय धन, सुदित रहत दिनरात ॥
 सो० धनिधनि ब्रजको वास, धन्य यशोदा धन्य नँद ।
 धनि ब्रजबासी दास, जिनको मन या रसमगन ॥

अथ तृणावर्त्तबधलीला ॥

यशुदा भाग न जात बलाने ❀ त्रिभुवनपति को सुत कर माने
 हरि को गोद लिये पय प्यावै ❀ विविध भाँति करि लाड़ लड़ावै
 कबहुं हरि मुख सों मुख लावै ❀ कबहुं हर्षित कंठ लगावै
 मो निधनी को धन सुत नान्हा ❀ खेलत हँसत रहौ नित कान्हा
 कब धौं मधुर बचन कछु कैहैं ❀ कब जननी कहि मोहिं बुलैहैं
 कब नन्दहि कहि बाबा बोलै ❀ खेलत इत उत आंगन डोलै
 कब धौं तनक तनक कछु खैहैं ❀ अपने कर लै मुख में नैहैं
 कब बिधि यह अभिलाप पुरावै ❀ मन हीं मन कुलदेव मनावै
 किलकत हरि जननी की कनियां ❀ करत चरित्र मातु सुखदनियां
 तृणावर्त्त हरि आवत जाना ❀ पठयो कंस सहित अभिमाना
 भयो गरुड जननी पौदायो ❀ सहि न सकी तब भुव वैठायो

दो० आप लगी गृह काज कइ, राखि अजिर गोपाल ।

अति प्रचंड बौंढर उद्यो, गोकुलपुर तेहि काल ॥

सो० वातचक्र भिस आय, तृणावर्त्त पापी असुर ।

हरि को लियो उठाय, अन्वधुन्ध गोकुल कियो ॥

हरि को लैकै गयो अकासा ॥ धूरि धुन्ध गोकुल नहुँ पामा

जहां तहां नर नारि छिपाने ॥ प्रलय काल सम करि सब माने

यशुमति दौरि अजिर में आई ॥ तहां न पायो कुँवर कन्हाई

नन्द नन्द करि शोर लगायो ॥ तेरो सुत अँधवायु उड़ायो

दौरौ बेगि गुहार लगावो ॥ ब्रजवासिन को ढेरि बुलावो

अतिव्याकुल खोजत नँदरानी ॥ जिततित फिरत भुवन बिलखानी

तृणावर्त्त को हरि यों कीन्हों ॥ ग्रीव लिपट तिहिं नीचे लान्हों

कठिन शिलापर ताहि गिरायो ॥ ताके ऊपर आपुन आयो

चूर चूर करि ताके गाता ॥ कीन्हे भुक्ति मुक्ति के दाना

धूरि धुन्ध सब तुरत विनासी ॥ खोजत हरिहिं विकल ब्रजवासी

ब्रजवनितन उपवन में पाये ॥ लिये उठाय कंठ लपटाये

अति आतुर यशुमति पै ल्याई ॥ है गइ घर घर अनैद बधाई

दो० लिये धाय कै मायने, छतिया रही लगाय ।

नन्दनिरखि सुखपायके, मनसी बहुतिक गाय ॥

सो० बारिबारि ब्रजनारि, देहिं बसन शृपण मगन ।

जिततित कहैं विचारि, नयो जन्म हरिको सयो ॥

उबरे श्याम महारि बड़भागी ॥ देखहु यों कहूँ चोट न लागी

रोग लेउँ बलि जाउँ कन्हाई ॥ हरि हैं ब्रज के जीवन गढ़ी

भली न प्रकृति यशोदा तेरी ॥ इकलो हरि को छाँड़न हेरी

घर को काज इनहुँ ते प्यारो ॥ वौरी अजहं गुनि तेंगारो

बहुत बच्योरी आज कन्हई ❀ भयो पूर्विलो पुण्य सहाई
 यशुमति सबसों कहत लजानी ❀ अब मैं सीख तिहारी मानी
 मोहिं कहां हो यह मुख माई ❀ मैं तौ रंक परी निधि पाई
 अब मैं अपनो लाल चितैहों ❀ एकौ क्षण काहू न पतैहों
 ऐसे कहि सब सों नँदरानी ❀ कीन्हीं विदा सकल सनमानी
 यशुमति हरि को गोद लिलावैं ❀ देखि देखि मुख नयन मिरावैं
 अति कोमलश्यामलतन देखी ❀ बार बार पश्चितात विशेषी
 कैसे बच्यो जाउँ बलिहारी ❀ तृणावर्त्त की घात निवारी

दो० नाजानों किहि पुण्यतें, को करिलेत सहाय ।

कियो काम सब पूतना, तृणावर्त्त यह आय ॥

सो० मातु दुखित जिय जानि, कृपासिंधुपत्सलभगत ।

बालचरित सुखदानि, करन लगे पुन्दरपरम ॥

खेलत मातु उछंग कन्हई ❀ करत बाललीला मुखदाई
 जननी बेसर लटकत देखी ❀ चितवत ताहि बिसारि निमेषी
 ताहि गहन को पाणि चलायो ❀ तब जननी कछु बदन उचायो
 नहिं पहुँचे तब अति उकताई ❀ सो छवि निरखि मातु बलिजाई
 जननी बदन निकट करिलीन्हों ❀ तब हरिहुलसिकिलकिहँसिदीन्हों
 बिहँसत चमकि परीं दुधदंतियां ❀ जनु युग विज्जु बीज की पँतियां
 प्रसुदित निरखि यशोदा फूली ❀ प्रेम मगन तनकी सुधि भूली
 बाहर तें तब नन्द बुलाये ❀ परमानन्द सहित उठि धाये
 हो पति सुफल करो दृग आई ❀ देखहु सुत मुख दतुलि सुहाई
 हर्षित हरिहिं गोद नँद लीन्हों ❀ निरखि तातमुख हरि हँसिदीन्हों
 देखत बदन नयन सियराने ❀ दूधदांत किधों छवि के दाने
 अहो महारि बड़ भाग तुम्हारे ❀ सफल फले मन काज हमारे

दो० कलु दिनघट पटमासके, भये श्याम सुखदान ।

अन्नपराशन के दिवस, वृक्षहु विप्र विहान ॥

सो० सुनि पुलके नँदराय, भये पराशन योग हरि ।

प्रेम रह्यो उरझाय, सो सुख कापै जाय कहि ॥

अथ अन्नपराशनलीला ॥

प्रात काल उठि विप्र बुलायो ❧ राशि वृष्णि शुभ दिवस धरायो

यशुमति सो दिन आछा पायो ❧ सखिन बोलि शुभगान करायो

युवति महरि को गारी गावैं ❧ और महर को नाम सुनावैं

मणि कंचन को थार मँगायो ❧ भांति भांति के वासन आयो

नन्दधरनि व्रजवधू बुलाई ❧ जे सब अपनी जानि सुलाई

कोउ जिवनार कोऊ पकवाना ❧ पटरस के बहु करत विधाना

बहु प्रकार के व्यंजन ठाने ❧ जिनके स्वाद न जायँ बचाने

अति उज्ज्वल कोमलशुभनीके ❧ किये विविधविधि मनहुँ अगीके

यशुमतिनन्दहिबोली कह्यो तब ❧ बोलो महर जाति अपनी सब

आय गये नँद सकल महर घर ❧ ल्याये बोली सवन आदर कर

बैठारे सब आनि अथाई ❧ भीतर गये आप नँदराई

यशुमति हरिको उवाटि न्हावाये ❧ सुन्दर पट भूषण पहिराये

दो० तन मँगुली शिर चौतनी, करचूरा दुहुँ पाय ।

बारबार सुख निरखि कै, यशुमति लेत बलाय ॥

सो० लै बैठे नँदराय, जानि शुभघरी गोद हरि ।

लीने सदन बुलाय, गोप सकल अ.नँद भरे ॥

बैठे सकल गोप गुण गाई ❧ अति आनंद मगन नँदगाई

कनक थार भरि खीर धसाई ❧ मिसिरी घृत मधु डारि मिलाई

लगे नंद हरि मुख जुठावन ❀ गोपवधू लागीं सब गावन
 आंगन बाजी विविध बधाई ❀ शङ्ख निशान भेरे सहनाई
 पसर के व्यंजन हैं जेते ❀ हरिके अधर छुवाये तेते
 तनक अधर जल पोंछि सुहाये ❀ हरिको यशुमति पै पहुँचाये
 हर्षवन्त युवती सुनि पायो ❀ लैलै मुख चुम्बति उर लायो
 विप्रन बोलि दक्षिणा दोन्ही ❀ नाना वस्तु निछावरि कीन्ही
 गोपन संग महारि नँदराई ❀ बैठे पनवारे पर जाई
 अति रुचिसबहिन भोजन कीनो ❀ वीरा बहुरि सवन को दीनो
 गोप वधू सब महारि जिमाई ❀ दै करि पान सुगंधि सिंचाई
 इहि विधि सुख बिलसै ब्रजवासी ❀ निरखै श्याम सुभग शुभरासी

दो० सुरसिहाहिं ललचाहिं सुनि, लखि ब्रजजन के भाग ।

धन्य धन्य कहि सुमन भरि, करहिं सहित अनुराग ॥

सो० नित नव मंगल चार, नित नव लीला श्याम की ।

को कबि बरणै पार, शेष न पावै पार जिहिं ॥

नेति नेति जिनको श्रुति गावै ❀ तिन को ब्रजजन गोद खिलावै
 जो मुख नंद भवन के माहीं ❀ तीन लोक महँ सो कहूँ नाहीं
 नित्य नयो मुख यशुमति पावै ❀ नये नये नित लाड़ लड़ावै
 नयन ओट हरि करत न कैसे ❀ जुगवत रहै फणिक मणि जैसे
 निंदति निमिष होत पल ओट ❀ निरखत ही मुख पावति दोट
 तनक कपोल अधर अरुणारे ❀ तनक तनक कच घूँघरवारे
 कुटिल श्रुति की रेख सुहाई ❀ मसि बिन्दुक तापर सुखदाई
 नयन नासिका भाल विशाला ❀ कलवल बोलन परम रसाला
 अल्प दशन चिबुकंदर श्रोत्रा ❀ तन घनश्याम मृदुल छवि सीवा
 मात निरखि नयनन मुख पावै ❀ प्रेम विवश मति गति विसरावै

निरखि रूप यशुमति अनुरागै ❧ कहत कहूं मम दीठि न लागे
तव अँचरा तर लेत छपाई ❧ डारत वार लोन अरु राई

दो० कबहुँ सुलावति पालने, कबहुँ खिलावति गोद ।

कबहुँ सुलावति पलँगपर, यशुदासहित विनोद ॥

सो० नितप्रति ब्रजकी वाम, आवैं यशुमतिके सदन ।

सुदित निरखि घनश्याम, लैलै गोद खिलावहीं ॥

इहि विधिबिहरत बाल कन्हई ❧ कहु दिनमें संतन मुखदाई

लागे चलन घुदुरुवनि आँगन ❧ लगे मात सों माखन माँगन

खेलत मणिमय आँगन माहीं ❧ देखि रहत लखि निज परछाहीं

कबहुँ तात कहि पकरन धावैं ❧ जानु पाणि विचरन छवि पावैं

कबहुँ किलकि अनत उठि भाजैं ❧ गिरत परत घुदुवन छवि छाजैं

कबहुँ कि जात जहां बल भाई ❧ खेलत गोप बाल समुदाई

कबहुँ कहत कहु खंडित वाता ❧ सुनत होत मुख पूरणगाना

कहन चहत कहु प्रकट न आवै ❧ माखन मांगत सैन बनावै

मात समझ मथनी तें लेई ❧ कहु खवाय कहु कर धर देई

खेलत खात कान्ह मणि आँगना ❧ इत उत करत घुदुरुवन गिंगना

दो० करचूरा पग पैंजनी, तन रंजित रज पीत ।

उरहरिनख कटिकिंकिणी, मुखमंडित नवनीत ॥

सो० होत चकित चितचाय, वजत पैंजनी शब्दमुनि ।

सुरमुनि रहत लुभाय, बालदशाकेचरित लखि ॥

खेलत आँगन बालगोविन्दा ❧ तात मात उर करत अनन्दा

चलत पाणि पद की परछाहीं ❧ प्रतिबिम्बन मणि आँगनमाहीं

मनहुँ सुभग छवि महि तट पाई ❧ जलज नाल जनु लेन भुलाई

किया जानि पद कोमल तासन ❧ धरि धरि देत कमल के आसन

निरखि सुभग शोभा मुखदनियाँ ❀ लिये हरषि सादर नँद कनियाँ
 नील जलज तन सुन्दर श्यामा ❀ सुभग अंग सब छवि के धामा
 अरुण तरुण नख ज्योति सुहाई ❀ कोमल कमल चरण सुखदाई
 रनुशुनु पैजनि पाँयन बाजै ❀ मनसिज यंत्र सुनत सुर लाजै
 कटि किंकिणी जटित स्वकारी ❀ पीत भँगुलिया सुभग सर्वाँरी
 उर कमलनि चूड़ा छवि छाजै ❀ रुचिर वाहु भूषण अति राजै
 कटुला हार जो अंग सुहाये ❀ बिच बिच पदिक प्रवाल गुहाये
 चारु चिबुक द्युति बरणि न जाई ❀ गोल कपोल परम छवि आई
 दो० अरुणअधरमधिदशनद्युति, प्रकट हँसनमें होति ।

मानहुँ सुन्दरता सदन, रूप रत्न की ज्योति ॥

सो० मधुर तोतरे बैन, श्रवण सुखद मुनि मन हरण ।

सुनत होत चित चैन, समुझत कछुक बनै नहीं ॥

नासा सुभग कमलदल लोचन ❀ भाल विशाल तिलक गोरोचन
 भृकुटिनिकटमसिविन्दुकलाग्यो ❀ मनो अलिशावक सोयन जाग्यो
 लाल चौतनी शीश सुहाई ❀ विविध रंग मणि गण लटकाई
 बाल दशा के कच धुँवरारे ❀ छियकि रहे कछु घूम घुमारे
 मंजुल तारन की चपलाई ❀ बाल दशा की ललित सुहाई
 चन्द्रबदन मुख सदन कन्हारै ❀ निरखि नन्द आनँद अधिकारै
 बदन चूमि उर सों लपटायो ❀ सो सुख कापै जात बतायो
 ब्रज युवती सब चितवत ठाढ़ी ❀ मनहुँ चित्र पुतरी लिखि काढ़ी
 प्रेम भगन नँदसुवन निहारै ❀ गृह कारज की सुरति विसारै
 ब्रज युवती हरि सों मन लावै ❀ नन्दसुवन सब के मन भावै
 ब्रजवासी प्रभु सब के नायक ❀ प्रेम विवश जन के सुखदायक
 बालचरित लिखि सुर सुख पावै ❀ योग दशा सनकादि मुलावै

दो० करत वाललीला ललित, परस पुनीत उदार ।

सुन्दर श्याम मुजान हरि, सन्तन के आधार ॥

सो० कापै वरण्यो जाय, बालचरित नंदलाल को ।

कल्पन सकहिं न गाय, शेष कोटिशारद सहस ॥

अथ नामकरणलीला ॥

इक दिन श्री बसुदेव विज्ञानी ॥ पठये बोलि गर्ग मुनि ज्ञानी ॥

करि पूजा विधिवत बैठायो ॥ युग पदकमल शीश तव नायो ॥

बहुरि कह्यो मुनिये ऋषिराई ॥ जवतें भयो कंस दुख दाई ॥

तबतें गोकुल नन्द अवासा ॥ जाय रोहिणी कियो निवासा ॥

जाके गर्भ जन्म सुत लीन्हो ॥ कंस त्रासतें प्रकट न कीन्हो ॥

नामकरण ताको अवताई ॥ भयो नाहिं तुम बिना गोसाई ॥

करिके कृपा तहां प्रसु जइये ॥ ताको नाम राखि के अइये ॥

मुनि बसुदेव बचन सुख पायो ॥ हर्ष सहित मुनि गोकुल आयो ॥

नन्दराय ऋषि आगम जान्यो ॥ अपनो बड़ो भाग्य करि मान्यो ॥

चरण धोय चरणोदक लीन्हों ॥ अर्घासन अति हिन करि दीन्हों ॥

बड़ी कृपा कीन्हों ऋषिराजू ॥ सो सम धन्य आन नहिं आजू ॥

अति पुनीत भोजन बनवायो ॥ विविध भांति ऋषिगय जिमायो ॥

दो० बहुरि महरि ऋषिरायसों, कह्यो जोरि कर दोय ।

किहि कारज प्रसु आगमन, कह्यो कृपा करिसोय ॥

सो० तब बोले ऋषिराज, पठयो हे बसुदेव सोहि ।

नामकरण के काज, सुभ्रम रोहिणीसुवन को ॥

सुनत नन्द अति भये सुखारे ॥ ले आयें कनियां दोउ वारे ॥

मुनि चरणन मेले दोउ भाई ॥ दई अशीश मुनि ऋषिराई ॥

हरि की छवि अति आनंदकारी ❀ देखि रहे मुनि पलक विसारी
 प्रथम नन्द बल हाथ दिखायो ❀ जन्म दिवस मुनि पास सुनायो
 देखि गर्ग उठि फियो विचारा ❀ है यह शिशु सब जगत अधारा
 अति शुभ लक्षण बल को धामा ❀ धखो नाम तिन को बलरामा
 बहुरि नन्द चरणन शिर नायो ❀ कह्यो कि अपि मम भागन आयो
 तुम सर्वज्ञ अहो मुनिनाथा ❀ देखिय या बालक को हाथा
 मुनिवर देखत चिह्न भुलान्यो ❀ प्रेम भगन सब तन पुलकान्यो
 पुनि पुनि हरि को बदननिहारी ❀ बोल्यो मुनिवर सुरत सँभारी
 धन्य नंद धनि महारि यशोदा ❀ धनि धनि धन्य खिलावत गोदा
 सुनहु नंद मैं सत्य बखानों ❀ इनको तुम सुत करि मत जानों
 दो० रूपरेख जाके नहीं, अलख अनादि अनूप ।
 सो भक्तन हित अवतख्यो, निज इच्छा अनुरूप ॥
 सो० इनते बड़ा न कोय, ये कर्त्ता सब जगत के ।
 जो ये करें सो होय, तुमसों हम सांची कहें ॥

इनके नाम अमित जगमाहीं ❀ तदपि कहों मैं कहु तुम पाहीं
 इन कबहुं बसुदेव के धामा ❀ लियो जन्म सुन्दर वर श्यामा
 ताते वासुदेव इक नामा ❀ सो सुमिरत नर पावहिं कामा
 कहिहैं कृष्ण बहुरि जग माहीं ❀ जाके सुमिरत पाप नशाहीं
 अरु ये जैसे कर्मनि करिहैं ❀ तैसे नाम जगत बिस्तरिहैं
 दुष्ट दलन संतन सुखदाई ❀ भूमि भार हरिहैं दोउ भाई
 तुम कबहुं तप करि यह माँगा ❀ तुमहिं खिलावैं अति अनुरागा
 ताते सुत करि तुम इन पायो ❀ मत जानौ इन को निज जायो
 ये अति सुखदायक ब्रज केरे ❀ करिहैं अति आनंद घनेरे
 मुनि अपि सुखहरियश सुखरासी ❀ आनंदे सब ब्रज के वासी
 सुनत नंद यशुमति सुख पायो ❀ मुनि चरणन को शीश नवायो

बहुत भेंट लै आगे राखी ॥ अस्तुति बहुत भांति सों भाखी ॥

दो० विदा भये ऋषिराज तव, नंद भाग्य बड़भाखि ।

चले मधुपुरी को हरषि, हरिमूरति उर राखि ॥

सो० कह्यो हरषि ऋषिराय, सब उदंत वसुदेव को ।

सुनत बहुत सुखपाय, ऋषिहि पूजिकीन्हे विदा ॥

यशुमति समुझि गर्गकी बानी ॥ आपुनि अति बड़भागिनि जानी ॥

हरि को लै उर सों लपटायो ॥ प्रमुदित अस्तन पान करायो ॥

श्याम राममुख निरखत मोदा ॥ मातु रोहिणी और यशोदा ॥

रखैं रूखैं हरि बैठत गोदा ॥ भावत हरिके बाल बिनोदा ॥

हरि को गोद लिये दुलरावैं ॥ पुनि पुनि तुतरे बोल बुलावैं ॥

कबहुँक गावत दै करतारी ॥ कबहुँ सिखावत चलन मुरारी ॥

तनक तनक भुज टेक उठावैं ॥ क्रम क्रम ठाढ़े होन मिलावैं ॥

पुनि गहिभुज पद द्रैक चलावैं ॥ लखरात लखि मन सुख पावैं ॥

मनही मन यों विधिहि मनावैं ॥ कब धौ अपने पांयन धावैं ॥

कबहुँक छोड़ देत अँगनैया ॥ खेलत मुदित तहां दोउ भैया ॥

गौर श्याम बलराम कन्हैया ॥ संगहि संग फिरत दोउ भैया ॥

जिभि बछरा के पाछे गैया ॥ ब्रजवासी जन लेत बलैया ॥

दो० धौल धूरि धूसरित तन, बाल विभूषण अंग ।

अंजन रंजित दृग चपल, निरखत लजत अनंग ॥

सो० बिहरत आनंदकंद, मणिमय आँगन नंदके ।

यदुकुल कैरवचंद, दहन दनुज कुल बन अनल ॥

कबहुँ ठाढ़ि होति गहि भैया ॥ कबहुँ डोलत चलत कन्हैया ॥

कुलही चित्र विचित्र मंगुलिया ॥ दसकि उठत दै ललित दैनुलिया ॥

मुनि मनहरण मंजु मसि विंदा ॥ मुखद चारु लोचन अविंदा ॥

कल बल बचन तोतरे बोलैं ❀ गहि माणि खंभ डिंभ डग डोलैं
 निरखत भुकि भांकत प्रतिबिम्बै ❀ देत परमसुख पितु अरु अम्बै
 मथति जहां दधि नँदकी रानी ❀ होत खरे तहँ टेक मथानी
 मात तनिक दधि देत खवाई ❀ लेत प्रीति सों सो सुखदाई
 क्षीर समुद्र जासु रजधानी ❀ तनक दही सों तिन रुचि मानी
 तनिकसोबदन तनिकसी दँतियां ❀ तनिकसो अधर तनिकसी बतियां
 तनक बदन दधितनककपोलन ❀ तनक हँसन मन हरन अमोलन
 तनक तनक कर तनकै माखन ❀ तनक अँगुरिया तनकै चाखन
 तनक तनक भुज चरण सुहाये ❀ तनक स्वरूप मनोज लजाये
 दो० तनक बिलोकनि जासुकी, सकल भुवन बिस्तार ।
 तनक सुने यश होत है, तनक सिंधु संसार ॥
 सो० तनक रहत नहिं पाप, तनक नाम जाके लिये ।
 मिटत सकल भवताप, तनक कृपा जापै करहिं ॥

अथ बरसगांठलीला ॥

बरस गांठ लालन की आई ❀ द्विष्ट मास के भये कन्हवाई
 फूली फिरत यशोमति माई ❀ घर घर ते सब बधू बुलाई
 प्रसुदित मंगल गान करायो ❀ आनंद उमँगे तूर वजायो
 आंगन सकल सुगंधि लिपायो ❀ रचि रचि मोतिन चौक पुरायो
 फूले फिरत नंद मुख भारी ❀ लिये गोप गण सकल हँकारी
 द्वारन बन्दनवार बँधाये ❀ ध्वज पताक रचि विविध बनाये
 पान फूल फल डार रसाला ❀ हरदि दूब दधि अक्षत माला
 मंगल द्रव्य सकल मँगवाई ❀ बहु मेवा बहु भांति मिठाई
 यशुमति कान्ह उबटि अन्हवाये ❀ अंग पोंडि भूषण पहिराये
 दोपी जरकस पीत भंगुलिया ❀ दमकत डै डै चार दँतुलिया

कटुला कंठ बँधत अति नीको ॥ किये भाल केसर को टोका
लटकत ललित ललाट लटूरी ॥ वराणि न जाय बदन द्रविर्गरी
दो० नयन आंज भृकुटी निकट, कियो मातुमसि बिन्द ।

करि शिं गार हरि मुख निरखि, चूम्यो मुख अर बिन्द ॥

सो० लिये गोद मुख कंद, नंद वोलि यशुमति कल्यो ।

बोलहु भूसुर वृंद, लग्न घरी आवत चली ॥

काहे को अब गहर लगावत ॥ विप्र बेगि काहे न बुलावत
नन्द क्षिप्र वर विप्र बुलाये ॥ पद पखारि आसन बैठाये
लै उछंग लालन नँदराई ॥ बैठे हर्षि चौक पर जाई
बेदमंत्र विधि सहित पढ़ावत ॥ वरसगांठ मुख सहित जुरावत
ब्रजनारी सब बनि बनि आवैं ॥ मंगल तिलक श्याम को लावैं
गावत मंगल कोकिल वयनी ॥ हरि दरशन न्यारी मृगनयनी
तिलक सवनि मोहन को दीनों ॥ देखि देखि मुख अति सुख लीनों
विप्रन बहुत दक्षिणा पाई ॥ बांटी सब को पान मिठाई
धन मणि चीर निछावरि कीने ॥ वार वार नेगिन को दीने
तब सारी पँचरंग मँगाई ॥ हर्षित महरि बन्धु पहिराई
देत अशीष सकल अति मोदा ॥ लेत यशोमति भरि भरि गोदा
नित नव गोकुल होत वधाई ॥ सदा श्याम जनके मुख दाई
दो० धन्य यशोमति धन्य नँद, धनि धनि बाल विनोद ।

धन्य सुमन जिन जनन के, रहत सुधार सओद ॥

सो० धनि धनि ब्रजकी बाल, कहिकहि मुरवर्षहि सुमन ।

धन्य धन्य नँद लाल, दैत्य दलन सज्जन मुखद ॥

कान्ह चलत पग दै दै धरनी ॥ होत मुदित लखि नँद की बग्गी
करत हुती अभिलाषा जोई ॥ निरखत अपने नयनन सोई

रुनुक रुनुक नूपुर पग बाजै ❀ डगमगात डोलत छवि छाजै
 बैठ जात पुनि उठत तुरतहीं ❀ देहरिलों चलि जात फुरतहीं
 धाम अवध राखत अट्काई ❀ गिर गिर पड़त नांघि नहिं जाई
 कीन्ही तीन पैड़ जिन वसुधा ❀ देहरि ताहि नँधावत यशुधा
 पकरि पाणि क्रम क्रम उतरावै ❀ लखि सुर मुनि मन विस्मय आवै
 कोटिन अण्ड रचैं पल माहीं ❀ पल में बहुरि मिटावैं ताहीं
 ताहि खिलावत यशुमति ग्वारी ❀ नाना विधि सुख करि करि भारी
 कवहूँ दै करतारि नचावै ❀ कवहूँ मधुर मधुर स्वर गावै
 देखि श्याम जननी के नाई ❀ आपुन गावत तारि बजाई
 पग नूपुर कटि किंकिणि कूजै ❀ लखि छवि मन अभिलाषा पूजै
 दो० शोभितकठुला कंठकल, उर हरिनख छविराश ।

मनहुँ श्यामघनमँकियो, नवशशिविमलप्रकाश॥

सो० जननि कहत बलि जाउँ, नचहुलेहुनवनीतसद ।

धरत रुनकरुन पाउँ, त्रिभुवनपति नवनीतहित ॥

बोलन लगे श्याम कल बानी ❀ कलुक तूतरी कलुक सयानी
 नंदाहि तात यशोदा भैया ❀ बल सों दाऊ कहत कन्हैया
 प्रातहि उठि मांगत दोउ भैया ❀ माखन रोटी देरी भैया
 अँचरा गहैं न मानत बाता ❀ अति आतुर लुनकत दोउ भ्राता
 सुनि सुनि मधुर बचन सुख पावैं ❀ तातें जननी गहर लगावैं
 जननि मध्य सनमुख संकर्षण ❀ पाछे उठे सुभग श्यामलतन
 मनौ सरस्वति संग युग पक्षी ❀ राजहंस अरु मोर विपक्षी
 कवरी गही श्याम खिजलाई ❀ मुक्ता मांग गही बल भाई
 मनहुँ दुहुँननिजनिज भखलीनो ❀ जननी सों भगरो यह कीनो
 नंद देखि हँसि हँसि गे लोटी ❀ यशुमति मुदित कर्म की मोटी
 कतहो आरि करत गहि चोटी ❀ यहै बात मोहन तेरी खोटी

जो चाहौ सो लेउ दोउ भैया ❧ करहु कलेवा में वलि जेया

दो० दियो कलेऊ मात उठि, साखन रोटी हाय ।

खात खवावत बालकन, सकल विश्वके नाय ॥

सो० जेहि ध्यावैं योगीश, सनकसनंदन आदि सुनि ।

कौतुकनिधिजगदीश, करतचरितसन्तनसुखद ॥

अथ ब्राह्मणलीला ॥

चलत लाल पैजनि के चायन ❧ पुनिपुनि हर्षित नखिलसिपांयन

विविध ग्वाल बालन सँग लीने ❧ डगमगात डोलत रँग भीने

कन्हूँ दौरि ढार लौं जाहीं ❧ कन्हूँ भजि आवैं घरमाहीं

ब्राह्मण एक नन्दके आयो ❧ महा भाग्य हरि भक्त मुदायो

गोपन को सो पूज्य कहायो ❧ पुत्र जन्म सुनिके उठि धायो

यशुमति देखि अनन्द बढ़ायो ❧ आदर करि भीतर बैठायो

पांय धोय जल शीश चढ़ायो ❧ पाक करन को भवन लिपायो

अहो विप्र विनती सुनि लीजै ❧ जो भावे सो भोजन कीजै

धेनु दुहाय दूध लै आई ❧ पांड़े सचि करि खीर बनाई

घृत मिष्ठान्न खीर मिश्रित कर ❧ कृष्ण योग हित थार पगसि धर

वेदमंत्र पढ़ि कै हरि ध्यायो ❧ नयन मूँदि कै ध्यान लगायो

नैन उधारि विप्र जब देख्यो ❧ श्यामहि आगे जेवन पेख्यो

दो० अहो यशोदा आपने, सुतकृत देखौ आय ।

सिद्धपाक सब आय कै, दाख्यो कान्ह जुठाय ॥

सो० महरि जोरियुगपानि, विनय करी द्विजराजसन ।

बालक अति अज्ञान, बहुरि पाक विधि कीजिये ॥

बहुरि दूध मिष्ठान्न मँगायो ❧ ब्राह्मण फिर कर पाक बनायो

जबहीं ध्यान धर्यो मन लाई ❀ तबहीं लागे खान कन्हाई
 ऐसेहि बिप्र न जेवन पावै ❀ बार बार हरि लू लू आवै
 तब यशुमति हरि सों रिसियाई ❀ कतहि अचगरी करत कन्हाई
 मैं इच्छा करि बिप्र जिमाऊं ❀ बार बार भोजन बनवाऊं
 यह अपने ठाकुरहि जिमावै ❀ ताको तू गोपाल खिभावै
 मैया मोहिं जिनि दोष लगावै ❀ बार बार यह मोहिं बुलावै
 नयन मूँदि कर जोरि मनावै ❀ बहुत भांति कर विनय सुनावै
 लै लै नाम कहत प्रभु ऐसे ❀ खीर खांड यह भोग लगैये
 तब मैं रहि न सकौं उठि धाऊं ❀ याको दीनों भोजन पाऊं
 प्रेम सहित जब मोहिं बुलावै ❀ तब नहिं रहत मोहिं बनिआवै
 सुनत गूढ़ मृदु हरिके वयना ❀ खुलि गये बिप्र हृदयके नयना
 दो० धनिधनिगोकुलनन्द धनि, धन्ययशोदा माय ।
 धनि ब्रजवासी धन्य ब्रज, जहँ प्रगटे हरिआय ॥
 सो० सुफलजन्मप्रभुआज, प्रगट भयो सब सुकृतफल ।
 दीनबन्धु ब्रजराज, दियो दरश मोहिं कृपाकरि ॥
 बार बार कहि नन्दके आँगन ❀ लोटत द्विज आनंद मगन मन
 मैं अपराध कियो बिन जाने ❀ को जाने किहि वेष समाने
 भक्त हेतु बश रहत सदाई ❀ यहै नाथ तुम्हरी वढ़ि याई
 जे जे शरण तुम्हारी आये ❀ ते ते भये पुनीत सोहाये
 पतित उधारन यश बिस्तारा ❀ अब जारन इक नाम तुम्हारा
 देह धरत गोद्विज हित लागी ❀ पायों दरश भयों बड़ भागी
 हित की चित की माननहारे ❀ सब के जिय की जाननहारे
 शरण शरण प्रभु शरण तुम्हारे ❀ दीन दयालु कृपालु मुरारे
 हँसत श्याम यशुमति दिग ठाढ़े ❀ प्रेम मगन मन आनंद वाढ़े
 निजजन जानिकृपा अतिकीन्ही ❀ प्रेम भक्ति हरि ताको दीन्ही

प्रेममगन द्विज वारहि वारा ❀ कहि जय जय जय नंदकुमारा
पुनि पुनि पुलकत देत अशीशा ❀ विदा भयो घर को द्विज ईशा
दो० देखि चरित यशुमति चकित, परी विप्रके पाँय ।

दिये रत्न बहु दक्षिणा, चले हर्ष द्विजराय ॥

सो० यशुमतिलिये उठाय, गोद खिलावत कान्हको ।
चितैवदनबलिजाय, आनंदनिधिमुखकोसदन ॥

अथ चंद्रप्रस्ताव लीला ॥

शोभा मेरे हरि पै सो है ❀ मैं बलि बलि पट्टर को को है
मेरे श्याम मनोहर जीवन ❀ विहँसि श्याम लागे पय पीवन
ठाढ़ी अजिर यशोदा रानी ❀ गोदी लिये श्याम मुखदानी
उदय भयो शशि शरद सुहावन ❀ लागी सुत को मातु दिखावन
देखहु श्याम चन्द्र यह आवत ❀ अति शीतल दृग ताप नशावन
चितै रहे हरि इकटक ताही ❀ करतें निकट बुलावत बाही
मैया वह मीठो कै खारो ❀ देखत लगत मोहि यह प्यारो
देहि मँगाय निकट मैं लैहौं ❀ लागी भूख चन्द्र में खैहौं
देहि वेग मैं बहुत भुखानो ❀ मांगतहीं मांगत विरुभानो
यशुमति हँसति करत पछतायो ❀ काहे को मैं चन्द्र दिखायो
रोवत है हरि विनहीं जाने ❀ अब धों कैसे करिके माने
विविध भांति करि हरिहि भुलावै ❀ आन बतावै आन दिखावै

दो० कहति यशोदा कौन विधि, समझाऊँ अबकान ।

भूलि दिखायो चंद्र मैं, ताहि कहत हरि खान ॥

सो० अनहोनी क्यों होय, तात सुनी यह बात कहूं ।

याहिखात नहिं कोय, चन्द्र खिलौना जगतको ॥

यहै दैत नित माखन मोकों ❀ क्षण क्षण तात दैत सो तोकों
 जो तुम श्याम चंद्र को खैहौ ❀ बहुरो फिरि माखन कहँ पैहौ
 देखत रहौ खिलौना चंदा ❀ हठ नहिं कीजै बालगोविंदा
 मधु मेवा पकवान मिठाई ❀ जो भाषो सो लेहु कन्हवाई
 पालागों हठ बहुत न कीजै ❀ मैं बल रिसही रिस तन छीजै
 खसिखसिकान्ह पड़त कनियातें ❀ दे शशि कहत नंदरनियातें
 यशुमति कहत कहा अब कीजै ❀ मांगत चंद्र कहाँ ते दीजै
 तब यशुमति इक जलपुट लीनों ❀ करमें लै तिहि ऊंचो कीनों
 ऐसे कहि श्यामहिं बहकावै ❀ आव चंद्र तोहिं लाल बुलावै
 याही में तू तन धरि आवै ❀ तोहिं देखि लालन मुख पावै
 हाथ लिये तोहिं खेलत रहिये ❀ नेक नहीं धरणी पर धरिये
 जलपुट आनि धरणि पर राख्यो ❀ गहिआन्यो शशिजननी भाख्यो
 दो० लेहि लाल यह चन्द्रमा, लीन्हो निकट बुलाय ।
 रोवै इतने के लिये, तेरी श्याम बुलाय ॥
 सो० देखहु श्यामनिहारि, याभाजनमें निकट शशि ।
 करो इती तुम आरि, जा कारण सुंदर सुवन ॥
 ताहि देखि मुसक्याय मनोहर ❀ बार बार डारत दोऊ कर
 चंदा पकरत जल के माहीं ❀ आवत कछु हाथ में नाहीं
 तब जलपुट के नीचे देखै ❀ तहां चंद्र प्रतिबिम्ब न पेखै
 देखत हैंसी सकल ब्रजनारी ❀ भगन बालछवि लखि महतारी
 तबहिं श्यामकछु हैंसि मुसकाने ❀ बहुरो माता सां बिरुभाने
 ल्योंगो री मा चंदा ल्योंगो ❀ बाहिर अपने हाथ गहोंगो
 यह तो कलमलात जल माहीं ❀ भरे कर में आवत नाहीं
 बाहिर निकट देखियत वाही ❀ कहै तो मैं गहि ल्यावों ताही
 कहत यशोमति सुनहु कन्हवाई ❀ तुम मुख लखि सकुचत उडुराई

तुम तिहि पकरन चहत गोपाला ॐ ताते शशि भजि गयो पताल
अब तुम ते शशि डरपत भारी ॐ कहत अहो हरि शरण तुम्हारी
विरुम्हाने सोये दै तारी ॐ लिय लगाय अतिया महनारी

दो० लै पौढ़ाये सेजपर, हरिको यशुमति माय ।

अतिविरुम्हाने आजहरि, यह कहि कहि पञ्चिताय ॥

सो० करसों ठोंक सुआय, मधुरे स्वर गावत कहुक ।

उठि बैठे अकुलाय, चटपटाय हरि चैंकि कै ॥

अथ पुरातन कथा लीला ॥

पौढ़ौ लाल कहत महतारी ॐ कहौ कथा इक श्रवण प्यारी
हर्षे यह सुनि मन बनवारी ॐ पौढ़ि गये हँसि देन हुँकारी
नगर एक रमणीक सुहावन ॐ नाम अवध अति सुन्दर पावन
बड़े महल तहँ अगम अटारी ॐ सुंदर विशद चारु गचकारी
बहुत गली पुर बीच सुहाई ॐ रहत सदा सब सुगंधि सिंचाई
भांति भांति बहु हाट बजारु ॐ अतिसुंदर मनो विश्व शृंगारु
तहां नृपति दशरथ रजधानी ॐ तिनके नारि तीन पद्मिनी

कौशल्या केकई सुमित्रा ॐ तिन जन्मे सुत चार पवित्रा
राम भरत लक्ष्मण रिपुहंता ॐ चारों अति सुन्दर गुणवंता
तिन में एक राम व्रतधारी ॐ अति सुन्दर जनके हिनकारी
विश्वामित्र एक ऋषिराई ॐ तिनहिं सतावें निश्चर आई
तिन नृपसों द्वै सुत लिय मांगी ॐ अपनी रक्षा के हिन लागी

दो० राम लपण ऋषि लैगये, दनुज हते तिन जाय ।

ऋषि दीन्ही विद्या बहुत, तिनको अति सुखपाय ॥

सो० तहां जनक इक भूप, धनुषयज्ञ ताने रच्यो ।

कन्या तामु अनूप, जुरे तहां भूपति अभित ॥

ऋषि लै गये कुँवर तहँ दोऊ ❀ जनक राय सनमाने सोऊ
धनुष तोरि भूपन मुख मारी ❀ राम विवाही जनककुमारी
चारिहु कुँवर ब्याहि तहँ आये ❀ भये अवधपुर अनंद वधाये
रामहिँ देन लगे नृप राजू ❀ सज्यो सकल अभिषेक समाजू
मुनि पितु बचन धर्म हित धारी ❀ नारी सहित भये वनचारी
तिन्हँ चलत आता संग लाग्यो ❀ उनके जात पिता तनु त्याग्यो
चित्रकूट गये भरत मिलन जब ❀ दै पद पांवरि विदा करी तब
युवती हेतु कपट मृग मारा ❀ राजिवलोचन राम उदारा
रावण हरण कियो तब नारी ❀ सुमन श्यामघन नींद विसारी
चौंकि कह्यो लक्ष्मण धनु देहू ❀ देखि भयो यशुमति संदेहू

अं० सन्देह जननी मन भयो हरि चौंकि धौं काहे पखो ।

कहुँ दीठि खेलन में लगी धौं स्वप्न में कान्हर डख्यो ॥

बहु भांति देव मनाय पढ़ि पढ़ि मंत्रदोष निवारई ।

लै पियत पानी वारि पुनि पुनि राइलोन उतारई ॥

दो० सांझहि ते बिरुभाय हरि, करी चंद्रहितआरि ।

भिभकउठ्योधौंताहिते, रहिउँ शरणउरधारि ॥

सो० बड़ भागिनि नंदनारि, महिमा बेद न कहिसकैं ।

हरिको बदन निहारि, बिसरावत त्रयतापदुख ॥

अथ कर्णछेदन लीला ॥

प्रात नंद उठि हरि पहँ आये ❀ मुख छवि देखन को अतुराये
निशिके द्बन्द नैन अति आरत ❀ हरुवे करि मुखते पट टारत

स्वच्छ सेजते वदन प्रकाशो ❀ छन्द तिमिर नयननिको नारयो
मनहुँ मथत पयनिधि उडराई ❀ फेण फोरि के दई दिखाई
धाये ब्रज जन चतुर चकोरा ❀ इकटकरहे वदन शशि ओरा
फूली कुमुदिनि सी महतारी ❀ कहत उठहु सुत में बलिहारी
माखन रोटी अरु मधु मेवा ❀ जो भावै सो करहु कलेवा
सदमाखन मिसिरी तब आनी ❀ कहु खवाय धोयो मुख पानी
देखि वदन छवि महारि सिहानी ❀ कहत नंदसों यशुमति रानी
कनछेदन अब हरि को कीजै ❀ कुरहल सहित देखि मुख लीजै
बोली विप्र शुभदिवस गनायो ❀ जाति कुटुंब सब न्योति बुलायो
कुल व्योहार कियो सब साजा ❀ विविध भांति बहुवाजन बाजा

छं० वाजी वधाई विविध आंगन नारि मंगल गावहीं ।
सुर नर निरखि अति हर्षि सुमननि वर्षि गोकुल आवहीं ॥
करि प्रथम मुराडन श्यामको पुनि कर्णवेधन विधि लई ।
धरिकै सुपारी पान ऊपर बहुरि गुरुभेली दई ॥
हँसत मुरगण सहित विधि हर मातु उर अति धुकधुकी ।
अतिहि कोमल श्रवण वेधत सकत नहिं सनमुख तकी ॥
भरिसीक रोचन देत श्रवणनि निकटकरि अति चातुरी ।
छेदुर मँगाये कनकके का कहों छेदन आतुरी ॥
देखि रोवत जननि लीन्हे विहँसि तवहीं झुकि अली ।
हँसत नँद सब युवति गावत तनकि भीतर लें चली ॥
कहत सुर वनिता परस्पर धन्य धनि यह भाभिनी ।
नाहीं न इनकी किसीसम हम सकल सुरवङ्गकिभिनी ॥

दो० करति निझावरि ब्रजवधू, धनमणि भूपण चीर ।
सकल अशीशत नन्दमुत, जहँतहँ याचक भीर ॥

सो० पहिरावत नँदराय, ब्रजयुवतिन भूषण वसन ।

आनँदउरनसमाय, मनहुँ उमगिचहुँ दिशि चलयो ॥

नितही नव मुद मंगल ताके ❀ मंगल मूरति हरिमुत जाके
जिहि विधि तात मात सुख पावैं ❀ सुखनिधान सोइ चरित उपावैं
जाको भेद वेद नहिं पावैं ❀ नंदभवन सो कान छेदावैं
निज भक्तन हित नर तनुधारी ❀ करत बाललीला सुखकारी
हरि अपने रंगन कछु गावैं ❀ नंदभवन भूषण मन भावैं
तनक तनक चरणनि सो नाचैं ❀ मनमन रीझ विविध विधि राचैं
मन्द मन्द पग नूपुर बाजैं ❀ बाल विभूषण अंग विराजैं
कवहुँ भुज उठाय गुहरावैं ❀ धौरी धूमरि गाय बुलावैं
कवहुँ माखन लै मुख नावैं ❀ कवहुँ खम्भ प्रतिविम्ब खवावैं
माखन माँग दुहूँ कर लेई ❀ एक भाग प्रतिविम्बहिं देई
तासों कहत लेत क्यों नहिं ❀ डारि देत काहे महि माहीं
दुरि देखत यशुमति महतारी ❀ उर आनंद करत अति भारी

दो० हरषि जननि सुख चूमिकै, लीनो गोद उठाय ।

परमानंदरसमगनमन, सो सुख किमि कहि जाय ॥

सो० कौतुकनिधि भगवान, करत चरित नितनितनये ।

सुंदर श्याम सुजान, ब्रजवासिन के प्रेसवश ॥

अथ माटीखान लीला ॥

खेलत श्याम धामके द्वारे ❀ सोहत ब्रज लरिका सँगवारे
अति अज्ञान सबनि मति भोरी ❀ सबकी प्रीति श्याम सँग जोरी
एक वैस सब परम सुहाये ❀ करत बाललीला सकुचाये
गावत हँसत देत किलकारी ❀ लाखि लाखि सुखपावत महतारी

निरखि रूप सब ब्रजजन मोहैं ॥ कोटिकाम नहिं पठत सोहैं
तन पुलकित अति गदगदवानी ॥ निरखि मनहिं मन महरि सिद्धानी
तवहिं श्यामघन माटी खाई ॥ यशुमति देखि सांठिले धाई
पकरी भुजा श्यामकी जाई ॥ कहति कहा यह करन कन्हाई
उगिलहु बेगि बदन ते माटी ॥ नाहीं तो मारति हों सांठि
सबदिन झड़कत हौं सबगालन ॥ मोसों अब कह कहिहो लालन
तव मोहन कीन्हीं लँगराई ॥ कहत कि मैं माटी नहिं खाई
भूठहि मोको लोग लगावै ॥ माटी मोको नेक न भावै

दो० भूठ कहत तोसों सबै, माटी मोहिं न सुहाय ।

नहिं मानै जो मातु तू, दिखराऊं सुँह बाय ॥

सो० दीनो बदन उधारि, नयन धूँदि माता निकट ।

देखि चकित नँदनारि, तनकी सुरति रही नहीं ॥

देखरायो त्रिभुवन मुखमाहीं ॥ नभ शशि रवि तारा इक ठाहीं
सर सागर सरिता गिरि कानन ॥ सुर सुरनायक शिव चतुरानन
सकल लोकनायक यमकाला ॥ महिमंडल सब अग जग जाला
देखि चरितयशुमति अकुलानी ॥ कंते सांठि गिरन नहिं जानी
बदन धूँदि तव हरि दृग खोले ॥ डर समेत माना सों बोले
मैया मैं माटी नहिं खाई ॥ यशुमति चकित रही अरुनाई
कहत नंद सों यशुदा रानी ॥ हरि की कथा न जान बखानी
माटी के मिस करि मुख बायो ॥ तीनि लोक तामहिं दिखगयो
स्वर्ग पताल धराणि वन वागा ॥ सुर नर असुर विपुल गग नागा
अपर सृष्टि कहि जातसु नाहीं ॥ देखी सकल बदन के गार्हीं
मोकों परत सांच सब जानी ॥ जो कहु कही गर्ग मुखवानी
चकित नन्द लुनि अचरजवानी ॥ मन मन करन विचार विनाना

दो० नन्द कहत सुनु बावरी, हरि अति कोमल गात ।
लै सांटी धावति बृथा, पुनि पावै पङ्क्तितात ॥

सो० अचरज तेरी बात, को जानै देख्यो कहा ।
कुशलरहौ दोउ भ्रात, रामश्याम खेलत हँसत ॥

कहत श्यामसों यशुमति मैया ❀ मैं तेरी बलिहारि कन्हैया
मैं अजान रिस बीच न जानी ❀ बृथा श्याम तुमकों रिसियानी
जरहु हाथ जिन सांटी उठाई ❀ बरहु आंखि जिन दीठ दिखाई
मधु मेवा दधि माखन छाटी ❀ खात लाल तुम काहे माटी
सिगरोइ दूध पियो तुम न्यारे ❀ बल को वांछि न देहु पियारे
कहत नंद सों यशुमति मैया ❀ दुहौ लाल की नाटी गैया
कजरी को पय पियो गोपाला ❀ जो तेरी चोटी बढै विशाला
सब लरिकन में तो तन माहीं ❀ बेग बयस बल श्रीअधिकाहीं
मातु बचन सुनिकै अनुरागे ❀ ज्यों त्यों करि पय पीवन लागे
झिन पीवत झिन झिन कहु टोवै ❀ देखि देखि मुख हँसत यशोवै
मैया कब बाढैगी चोटी ❀ यह तो है अवहीं लौं छोटी
तू जो कहतहि बल लौं है है ❀ छोड़त गुहत गोड़लों जैहै

दो० किती बार भइ पय पियत, चोटी बड़ी न होहि ।
कहि कहि झूठी बातनित, दूध पियावत मोंहि ॥

सो० सुनि सुनि भोरी बात, सुंदर श्याम सुजान की ।
यशुमतिमनन अघात, हँसिलीने उरलाय हरि ॥

अथ शालग्राम लीला ॥

भोरहिं महर यमुन तट धाये ❀ दर्शन करि अति ही सुख पाये
करि अस्नान नन्द घर आये ❀ पूजा हित यमुना जल लाये

तुलसीदल अरु कमल पुनीता ॥ प्रभु निमित्त आने अनि प्रीता
पांय धोय प्रभु मन्दिर आये ॥ करी दण्डवत प्रेम बढ़ाये
अस्थल लीप पात्र सब धोये ॥ पूजा के सब साज सजाये
छाप तिलक सब अंग सँवारे ॥ प्रभु पूजा विधि करन सँवारे
कुँवर कान्हू खेलत ते आये ॥ देखत पूजा विधि चित लाये
विधिवत देव नन्द अन्हवाये ॥ चन्दन तुलसी फूल चढ़ाये
पट अंतर दै भोग लगायो ॥ आरति चरणनि शीश नवायो
तवहीं श्याम विहँसि उठि बोले ॥ कहत तातसों वचन अमोले
बाबा तुम जो भोग लगायो ॥ सो तो देव कछु नहीं लायो
सुनि हरि वचन श्रवण सुखदाई ॥ चितै रहे मुख हँसि नँदराई

दो० कहत नंद मुख पाय कै, यों नहीं कहिये तात ।

देवन को कर जोरिये, कुशल रहै जिहि गात ॥

सो० हँसत श्याम सुखदानि, नंद स्वरूप न जानहीं ।

रह्योतिनहिंसुतमानि, करत जो ब्रजलीलासगुण ॥

देखत जननि तहां दुर ठाढ़ी ॥ मगन प्रेमरस आनंद बाढ़ी
बैठे नंद समाधि लगाई ॥ तव यह लीला रची कन्हाई
शालग्राम मेलि मुख माहीं ॥ बैठि रहे हरि बोलत नाहीं
ध्यान बिसरजन करि नंद जागे ॥ शालग्राम न देखे आगे
खोजत चकित चित नँदराई ॥ इष्ट देव किन लिये चुगई
इत उत खोजत पावत नाहीं ॥ भयो बड़ो अचरज मनमाहीं
विहँसत हरिके मुख में जाने ॥ देखत महारि महर मुसकाने
सुनहु तात जननी बलिजाई ॥ उगिलहु शालग्राम कन्हाई
मुखते तवहिं काढ़ि ब्रजनाथा ॥ दियो देवता नन्द के हाथा
हरिके चरित कहे नहीं आवैं ॥ बालविनोद मोद उपजावैं

लखि लखि मात पिता पुलकाहीं ❀ देखि देखि सुर सिद्ध भुलाहीं
 धन्य धन्य सब ब्रजके बासी ❀ बिहरत जहां ब्रह्म अविनासी
 दो० परते पर है ब्रह्म जो, निर्गुण अलख अनूप ।
 सो ब्रज भक्तन प्रेमबश, बिहरत बालक रूप ॥
 सो० प्रेम मगनपितु मात, निशिदिन जात न जानहीं ।
 क्योंहूं मन न अघात, सुनत बचन देखत दरश ॥

अथ न्हवावन की लीला ॥

यशुमति श्यामहिकह्यो न्हवावन ❀ सुनतहिं मचलि परे मनभावन
 उबटन लै आगे गहि बाहीं ❀ लोटि गये हरि मानत नाहीं
 तब यशुमति बहुभांति दुलारे ❀ मैं बलि उठहु न्हवाऊं प्यारे
 उबटन पाछे धख्यो चराई ❀ फुसलावत सुत श्याम कन्हवाई
 मैं बलि ऐसी आरि न कीजै ❀ जो चाहौ सोइ मोपै लीजै
 कहत लाल रोवै दुख पावै ❀ ऐसी को जो तोहिं खिभावै
 अतिरिस तैं मैं बलि तन छीजै ❀ सुन्दर कोमल अंग पसीजै
 बरजतही बरजत बिरुझाने ❀ करि करि क्रोध मनहिं अकुलाने
 धरत धरत धरणी पर लोटैं ❀ गहि माता के चीर निभोटैं
 गहि गहि अँगके भूषण तोरैं ❀ दधि माखन के भाजन फोरैं
 धख्यो तपत जल जननी पासै ❀ मानत नाहिं ताहि ते त्रासै
 महरि बांह धरिकैं तब आने ❀ जबहीं तेल उबटने साने
 दो० तब दुचती करि मात को, गिरत परत गये भाज ।
 नेक निकट लागै नहीं, मनमोहन ब्रजराज ॥
 सो० तब चुपकारे मात, समय भेद कहि कहि बचन ।
 मैं बलि आवहु तात, नहिं आवो तो जानिहौ ॥

तुम मेरी रिस को हरि जानों ॥ मोकों नीकी विधि पहिचानों ॥
जो नहिं आवहु मदनगोपाला ॥ आज तुम्हें तो बांधों लाला ॥
तवहिं नंद उतते चलि आये ॥ कहत हरिहिं किन अतिहि विभाये ॥
लै कनियां उरसों लपटाये ॥ बदन चूमि यशुमति पहँल्यये ॥
कत खिझत मोहनहिं अयानी ॥ लै हिय लाय लिये नंदगानी ॥
क्योंहुँ यत्न करिके जब पायो ॥ तब उवटन हरिके अँग लायो ॥
पुनि तातो जल स्नान समोयो ॥ दियो न्हाय बदन शशि धोयो ॥
सरस बसन लैकै तन पोंछयो ॥ पटुरो बदन सरोज अँगोछयो ॥
अंजन दोऊ दृग भर दीनों ॥ धूपर चारु चखोंडा कीनों ॥
सब अँग के भूषण मँगवाये ॥ क्रम क्रम लालन को पहिराये ॥
ऐसी रिस नहिं कीजै कान्हा ॥ अब कलु खाउ जाउँ बलि नान्हा ॥
तब तुतरात कह्यो काहेरी ॥ जो मोको भावै सो देरी ॥

दो० कहत जननि या वचनपर, मैया बलिवलिजाय ।

जोइजोइ भावै लालको, सोइ सोइ ल्यावै माय ॥

सो० किये अमित पकवान, मैं अपने सुत के लिये ।

सो सब कहौं बखान, जो भावै सो लीजिये ॥

सद माखन अरु दही सजायो ॥ तुम्हरे हित पर ओटि जमायो ॥
खोवा औट्यो मधुर मलाई ॥ तापर मिसरी पीसि मिलाई ॥
अरु प्योसरि अति सरस सवाँरी ॥ तामहिं साँटि मिख रुचिकारी ॥
खीर बरा करिकै दधिबोरे ॥ मानहुँ चंद अमी मधुबोरे ॥
खुरमा और जलेबी बोरी ॥ जेहि जेवत रुचि होत न थोरी ॥
अरु लड्डू बहुभांति रुवाँरे ॥ जे मुख मेलत कोमल प्यारे ॥
अरु गूभा बहु पूरिन पूरे ॥ अति सुवास उज्ज्वल अनिहारे ॥
बावर घेवर घीउ चभोरे ॥ मिश्री पीस तल उपर बोरे ॥

सुन्दर मालपुआ मधुसाने ❀ तप्त तुरत करि रोहिणि आने
 अतिहीं सुन्दर सरस अँदसे ❀ घृतदधि मधुमिलि स्वादन सरसे
 सरस सवारी दाल मसूरी ❀ अरु कीन्हों सीरा घन पूरी
 पूरी सुनिके हिय हरि हरषे ❀ तब जेवन पर मन करि करषे
 दो० सुनत यशोदा तुरतही, लै आई हरषाय ।

बलदाऊ को टेरि कै, लीन्हों नन्द बुलाय ॥

सो० षटरस के परकार, जे बरणे यशुदा प्रथम ।

परसिधरे सब थार, जेवत हरि बलबीर दोउ ॥

जेवत एक थार दोउ बीरा ❀ हरषि श्याम रुचि राख्यो सीरा

तब शीतल जल लियो मँगाई ❀ भरि भारी यशुमति लै आई

जल अँचवावत नैन जुड़ाने ❀ दोऊ हर्षि हर्षि मुसकाने

तब जननी हँसि चुरू भराये ❀ तनक तनक कलु मुख पखराये

रवि रवि उजरे पान खवाये ❀ अतिही अधर अरुण द्वै आये

ठाढ़े तहां सबल ब्रजदासा ❀ लागिरहे जूठनि की आसा

तनक तनक कलु मोहन खायो ❀ उबख्यो सो ब्रजदासनि खायो

सखा बृन्द प्रिय द्वार पुकारे ❀ खेलन आवहु कान्ह पियारे

तृपित दरश रस चातक दासा ❀ हरिय बरषि नव घन छवि पासा

बिनय बचन सुनि हर्ष कृपाला ❀ चले मनोहर चाल रसाला

लघुलघु ललितचरण कर लाला ❀ कमलनैन उर बाहु विशाला

चन्दबदन तन छवि घनश्यामा ❀ अंग अंग भूषण अभिरामा

दो० निरखत छवि नँदलाल की, थकित सकल सुरवृन्द ।

निहचल चखन चकोर जनु, तकत शरद को चन्द ॥

सो० अति आनन्द उमंग, मिले सबन को जाय हरि ।

ब्रीड़त कोटि अनंग, क्रीड़त बालक वृन्द सब ॥

खेलत दूरि गये कहूँ कान्हा ❀ सखन संग धावत हैं नान्हा
 बहुत अवेर भई धनश्यामहिं ❀ खेलत तें आये नहिं धामहिं
 नंदहि तात मातु मुहिं कानन ❀ येंहीं मुनत मुहात जु आनन
 मन अवसेर करत महतारी ❀ पलक ओटहि सकन न न्यारी
 देखत द्वार गली में ठाढ़ी ❀ मुतमुख दरश लालमा बाढ़ी
 तत्क्षण हरि खेलत तें आये ❀ दौरि मातु लै कण्ठ लगाये
 खेलन दूरि जात किन कान्हा ❀ मैं बलि तुम अवहीं अति नान्हा
 आज एक वन हाऊ आयो ❀ तुम नहिं जानत में मुनि पायो
 इक लरिका भजिआयो तवहीं ❀ सो वह मोसां कहिगयो अवहीं
 वह तो पकरि लेत है तिनको ❀ लरिका करि जानत है जिनको
 चलहुभाजि चलिये निज धामहिं ❀ यह मुनि ढेर लिये बलरामहिं
 कनियां करि लैआई धामहिं ❀ बड़भागिनि यशुमति सुतश्यामहिं

दो० रूप रेख जाके नहीं, विधि हरि अन्त न पाय ।

हाऊसाँ डरपाय तिहिं, यशुमति राखत स्वाय ॥

सो० भाववश्य भगवान, भावइ करिके पाइये ।

भक्तन के सुखदान, तिहि तैसे जैसे भजे ॥

ब्रज बीथिन खेलत मन मोहन ❀ हलधर सुवल सुदामा गोहन
 और गोप बालक बहु वारे ❀ एक वयस सब हरिके प्यारे
 बाल विनोद मोद मन दीने ❀ नाना रंग करन रस भीने
 तारी हाथ मारि सब भाजें ❀ धावत धन होइ कर भाजें
 बरजत बलि हरि तू मति दौरै ❀ लगि है चोट गोइ कहूँ नौरै
 तव हरि कछो दौरि मैं जानों ❀ मेरो गात बहुत बलवानों
 है श्रीदामा योग्य हमारी ❀ तासों मारि भजों में नारी
 बोलि उठ्यो तवहीं श्रीदामा ❀ तारि मारि भाजो तुम श्यामा

तबहीं श्याम भजे दै तारी * धखो जाय श्रीदाम हँकारी
 तब हरि कह्यो बढौं नहिं तोहीं * ठाढ़ो भयो छुयो तब मोहीं
 ऐसे कहि हरि ताहि रिसाने * कहत सखा सब श्याम खिमाने
 तब तो कह्यो दौर मैं जानों * हारे श्याम बुरो अब मानों
 दो० बोलि उठे बलराम तब, इनके माय न बाप ।

हार जीति जाने नहीं, लरिकन लावत पाप ॥

सो० ये हैं तनके श्याम, झूठहि झगरत सखन सँग ।

रूठि चले हरिधाम, लखि उदास पूँछति जननि ॥

मैं बलि क्यों उदास हरि आयो * कौने मेरो लाल खिमायो
 मैया मोहिं दाऊ दुख दीन्हों * मोसों कहत मोल को लीन्हों
 कहा करौं या रिसके मारे * मैं नहिं खेलन जात दुआरे
 पुनि पुनि कहत कौन तेरि माता * को तेरो तात कौन तेरो भ्राता
 गोरे नन्द यशोदा गोरी * तुम तो कारे आये चोरी
 मो सों कहत देवकी जाये * लै बसुदेव यहां निशि आये
 मोल कछू बसुदेवहिं दीन्हों * ताके पलटे तुम को लीन्हों
 ऐसे कहि कहि मोहिं खिभावै * अरु सब लड़कन यहै सिखावै
 मोहीं को तू मारन धावै * दाउहि कबहुं न खीझ डरावै
 रोष सहित सुनि बतियां भोरी * बढ़त मातु उर प्रीति न थोरी
 सुनहु श्याम बलराम चवाई * झूठहिं तोहिं खिभावत जाई
 मोहिं गोधन की सोंह कन्हैया * मेरो सुत तू मैं तेरी मैया
 दो० पाछे ठाढ़े सुनत सब, नंद श्याम की बात ।

लीन्हें गोद उठाय हँसि, सुन्दर श्यामल गात ॥

सो० बलको धरियो नन्द, सुनि मन हर्षे श्याम तब ।

लीलानंद ब्रजचन्द, करत चरितजन मन हरन ॥

भोजन के समये नँदराई ❀ करें सुरति बलराम कन्हैया
 कह्यो बुलाय लेहु दोउ भैया ❀ मो संग जेवें आय कन्हैया
 खेलत बहुत वेर भइ आजा ❀ उन दिन भोजन कौने काजा
 यशुमति सुनत चली अतुराई ❀ ब्रज घर घर देखत दोउ भाई
 कहत बोलि लेहु कोऊ श्यामहिं ❀ खेलत हैं धों काके धामहिं
 जेवन सिद्ध सिरात धरोई ❀ उन विन नंद न जेवत सोई
 ऐसे जननी के सुनि बैना ❀ आये खेलत तें सुखेदना
 चलहु तात भैया बलि जाई ❀ जेवन को बैठे नँदराई
 परस्यो थाल धरोउ मग हेरति ❀ में तवहीं से तुम को देखति
 दौरि चलहु आगे गोपाला ❀ छाँड़ि देहु गति मंद मराला
 चलहु बेगि दौरौ दोउ भाई ❀ सो राजा जो आगे जाई
 जो जैहै पहिले बलि भाई ❀ तौ हँसिहैं तोहि ग्वाल कन्हैया

दो० आये दौरे श्याम तव, तुरतहि पांय पखार ।

बैठे जेवन नन्द के, संग दोऊ सुकुमार ॥

सो० कछु डारत कछु खात, कछु लपटानो पाणि दुहुं ।

सुभग सांवरे गात, बाल केलि रसवस खरे ॥

बड़ौ कौर खेलत मुख भीतर ❀ आय गई तव मिरचि दशनन
 तीक्ष्ण लगी नैन भरि आये ❀ रोवत बाहर को उठि धाये
 रोहिणि फूंक देत मुखमाहीं ❀ लिय लगाय उर नों गहि बाहीं
 मधुर आस लै तात निहारे ❀ लै बैठे कुसलाय अँकुरे
 जेवत कान्ह नंद की कनियां ❀ अवि निरग्वत ठाढ़ी नंदगनयां
 बेसनके व्यंजन विधि नाना ❀ बराबरी बहु शाक विशाना
 मूंग ठरहरी हींग लगाई ❀ दाल चना की पीत नुहाई
 राजभोग को भात पसायो ❀ उज्ज्वल क्रोमल सुगंध नुहायो

बेसन मिले कनिक की रोटी ❀ सद घृत बोरी पतरी छोटी
 आंव आदि बहु भांति सँधाने ❀ दोउ भैया जेवत रुचि साने
 मिश्री दधि ओदन मिश्रित कर ❀ लेत श्यामसुन्दर अपने कर
 आपुन खात नंद मुख नावै ❀ सो छवि कहत कौन पै आवै

दो० भोजन कर अचमन कियो, लै भारत नँदराय ।

अपने करसों श्यामको, दीनों बदन धुवाय ॥

सो० को करि सकै बखान, भाग्य यशोमति नंदके ।

ब्रह्म रह्यो रुचि मान, बालरूप जिनके बदन ॥

बैठे श्याम तात की कनियां ❀ पिवत दूध सुन्दर सुखदनियां
 बार बार यशुमति समुभावै ❀ हरि सों अस्तन पान हुड़ावै
 कहति श्याम तू भयो सयानो ❀ मेरो कह्यो लाल अब मानो
 दूध पिवत देखत लरिका सब ❀ हँसत तोहिं नहिं लाज लगत अब
 जैहैं दांत बिगारि सब तेरे ❀ अजहूं छांड़ि कह्यो करि मेरे
 सुनत बचन मुसकाय कन्हई ❀ अँचरो तर मुख लियो छिपाई
 आये तवहीं संखा बुलावन ❀ मात कह्यो खेलहु मनभावन
 यह सुनि हर्ष उठे बनवारी ❀ मांगत दे चौगान कहाँरी
 मथनी के पाछे कहि दीन्हों ❀ हर्षित श्याम तहांतें लीन्हों
 लै चौगान बटा करि आगे ❀ चले सखन देखत अनुरागे
 कहत सखन सों हरि हरवाई ❀ खेलहु गेंद कि ठोहर भाई
 खेलत बनिहै घोष निकामू ❀ हरषि चले सब सहित हुलामू

दो० कान्हर हलधर बीर दोउ, भये मुजा बरजोर ।

श्रीदामा अरु सुबलमिलि, जुरे सखा इकठोर ॥

सों० और सखन के बृन्द, बांटिलिये जुरि जोटजुट ।

अति आनंद नंदनन्द, दियो बटाढरकायमहि ॥

आप अपनि घातन लैजाहीं ॥ एक एक सन पावन नाहीं ॥
 इत तैं उत उत तैं इत धेरें ॥ वय गारि चोगाननि फेरें ॥
 दौरत हँसत खसत उठि मारें ॥ आप आपनी जान धिचोरें ॥
 जम्यो खेल अति मगन कन्हाइ ॥ देखत गुर मुनि रहे लुगइ ॥
 जीतत सखा श्याम जब जाने ॥ करो खेल कछु तब मचलाने ॥
 कहत सखा सब सुनहु गोपाला ॥ रुगटैयां को कौन प्रियाला ॥
 श्रीदामा सों हौ तुम हारे ॥ भूठी सोंहैं ग्वाउ ललारे ॥
 खेलत में को काको सैयां ॥ कहा भयो जो नन्द गोसैयां ॥
 तातैं तुम गर्हित मन महियां ॥ तनक बसत हम तुम्हरी छहियां ॥
 अति अधिकार जनावत तातैं ॥ तुम्हरे अधिक गाय कछु जानें ॥
 अब नाहिं खेलहिं संग तुम्हारे ॥ भये सखा सब रिस करि न्यारे ॥
 खेलोहि चाहे त्रिभुवन राई ॥ दियो दांव तब पीठि चढ़ाई ॥

दो० जाकेगुणगणअगमअति, निगसन पावत ओर ।

सो प्रभु खेलत ग्वाल्संग, वंधे प्रेम की डोर ॥

सो० खेलत भई अवेर, जननी टेस्त श्याम को ।

आवहु धाम सवेर, सांभ समय नहिं खेलिये ॥

सांभ भई घर आवहु प्यारे ॥ बहुरि खेलियो हान गवारे ॥
 आपुहि जाय बांह गहि आने ॥ सुभग श्याम तन रज लपटाने ॥
 बोलि लिये यशुमति बलरामहिं ॥ लै आई दोऊ चुन धामहिं ॥
 धूरि झारि तातो जल ल्याई ॥ नेल परसि दीन्हें अन्हवाइ ॥
 सरस बसन तन पोंछि सँवारे ॥ लै गोदी भीतर पग धारे ॥
 करहु बियारू कछु दोउ भाई ॥ पुनि तुमको गवों पोंदाइ ॥
 सीरा पूरी सरस सर्वाँरी ॥ और धरी मेवा बहु न्यारी ॥
 दीन्हों परसि कनक की थारी ॥ बल मोहन दोउ करन बियारी ॥

मिसिरी मिलै दूध औद्यई ❀ लै आई तब रोहिणि माई
 प्रेमसहित दोउ जननि जिमावत ❀ देखि देखि छवि नैन जुड़ावत
 खात खात मोहन अलसाने ❀ बारहिं बार श्याम जमुहाने
 आरस' सों कर कौर उठावत ❀ नैनन नींद भ्रमकि भ्रुकि आवत
 दो० उठहु लाल तब मातुकहि, धोये मुख अरविंद ।

पौढ़ाये लै सेज पर, बलि अरु बालगोविंद ॥

सो० सोयै बालमुकुन्द, दोउ भैया मुखसेज पर ।

जननी अतिआनन्द, शोचत गुण गोपाल के ॥

माखन मोहन को प्रिय लागै ❀ भूखो क्षण न रहत जब जागै
 ताहि बढौं जो गहर लगावै ❀ नहिं मानै जो चंद मनावै
 मैं इहि जानत बात श्याम की ❀ दृग नीचे नवनीत खानकी
 लै मथनी दधि धखो बिलोई ❀ जब लगि लालन उठहिं न सोई
 भोर भयो जागहु नंदनंदन ❀ संग सखा ठाढ़े जगबंदन
 सुरभी पय हित बच्छ पिपाये ❀ पक्षी तरुतजि चहुँदिशि धाये
 चन्दमलिन उडुगण द्युतिनाशी ❀ निशि निघटी रबिकिरण प्रकाशी
 कुमुदिनि सकुची बारिज फूले ❀ गुंजत मधुप लतालगि भूले
 दर्शन देहु मुदित नर नारी ❀ ब्रजवासी प्रभुजन सुखकारी
 सुनि जननी के बचन रसाला ❀ खोले दृग राजीव विशाला
 हँसत उठे संतन सुखदाई ❀ मुख छवि देखि मातु बलि जाई
 हरि कछु करहु कलेऊ प्यारे ❀ मैं माखन मथि धरेउँ सवारे

दो० रोटी अरु माखन तनक, देरी मा मोहिं हाथ ।

लै आई जननी तुरत, कछु मेवा धरि साथ ॥

सो० करत कलेऊ श्याम, माखन रोटी मानि रुचि ।

त्रिभुवनपति सुखधाम, चारिपदारथ हाथ जिहि ॥

अथ माखनचोरी लीला ॥

मैयारी मोहिं माखन भावै ॥ और कहु अति ननि नहि आवै
मधु मेवा पकवान मिठाई ॥ सो मो को नेकहु न सुहाई
ब्रज युवती इक पाछे ठाढ़ी ॥ हरिके वचन सुनत रन बाढ़ी
मन मन कहत कवहुँ अपने घर ॥ माखन खात लखौ सुन्दर वर
वैठैं जाय मथनियां पाहीं ॥ अपने करनि काढ़िके खाहीं
मैं बरु देखहुं कहूं छिपाई ॥ कैसे मो घर जाहिं कन्हाई
हरि अन्तर्यामी सब जानैं ॥ ग्वालिन मन की प्रीति पिछानैं
गये श्याम ता ग्वालिन के घर ॥ ठाढ़े भये जाय द्वारे पर
इत उत देखत कोऊ नाहीं ॥ तव पैठे ताके घर माहीं
हरिको आवत ग्वालिन जान्यो ॥ परम मुदित अतिही मुख मान्यो
रही दबकि दुरि दीठ लगाई ॥ हरि बैठे मथनी दिग जाई
देखी माखन भरी कमोरी ॥ खान लगे करि अति मति भोरी

दो० चितै रहे मणि खरभ में, हरि अपनी प्रति चाहै ।
जानि दूसरे ग्वाल तिहि, प्रभु सकुचे मनमाहै ॥

सो० तासों करत सयान, कहत लेहु आश्रो तुमहुं ।
हम तुम एक समान, भलो बन्यो है संग अब ॥

प्रथम आज मैं चोरी आयो ॥ तुम को देखि बहुत मुख पायो
अब तुम मेरे संग नित आवो ॥ यह काहू मे मतिहि जनावो
सुनि सुनि हरिके मुख की वानी ॥ उमंगि हूँनी ब्रज युवनि मयाना
श्याम चौंक मुख तामु निहारी ॥ भाजि चले ब्रज खोरि मुगन
अति आनंद ग्वालिन मन माहीं ॥ पूंछत सर्षा परमर नाहीं
पायो आज परो कहु तैरी ॥ कहा नहि अति आनंद हरी

गदगद करठ पुलकतन तैरी ॥ सो किन कहै कहा सुख हैरी
 तन न्यारो जिय एक हमारो ॥ हमें तुम्हें कछु भेद न न्यारो
 सुनहु सखी मैं तोहिं बताऊं ॥ जो सुख भयो सो तोहिं सुनाऊं
 यशुमति सुत सुन्दर सुनु गोरी ॥ आयो आज हमारो चोरी
 खम्भ निकट मथनी हो माखन ॥ लियोनिकासि लग्यो सो चाखन
 मैं दुरि भीतर देखन लागी ॥ वा मोहन छवि पर अनुरागी
 दो० देखिखम्भ प्रतिबिम्बको, मन कछु सकुचे श्याम ।

अर्द्धभाग तेहि देन कहि, प्रकट करो निजनाम ॥

सो० तब न रह्यो मोहिं धीर, हँसी मनोहर बचन सुनि ।

कहा कहौं तुम बीर, मन हरि लीन्हों सांदरे ॥

मोहिं देखि तब गयो पराई ॥ सखी सो छवि कछु वरणि न जाई
 सुनि हरि चरित सखी अनुरागी ॥ अति सुख पाय प्रेम रस पागी
 कहत कि मैं देखन नहिं पायो ॥ सोइ अभिलाष जासु उर छायो
 हरि अन्तर्यामी सब जानैं ॥ सब के मनकी रुचि पहिंचानैं
 इहि विधि माखन प्रथम चुरायो ॥ कीन्हों ग्वालनि को मन भायो
 भक्तवद्वल संतन सुखकारी ॥ पुनि मन महुँ यह बात विचारी
 अब सब ब्रज घर माखन खाऊं ॥ माखन चोर नाम कहवाऊं
 बालरूप मोहिं यशुमति जानैं ॥ ग्वालनि प्रेम भक्ति करि मानैं
 मित्रभाव करि ग्वाल वखानैं ॥ प्रीति रीति सब मोसों मानैं
 इनहीं के हित गोकुल आयो ॥ करौं सवन के मन को भायो
 यह विचारि हरि निज उर ठाना ॥ भक्ति कृपा अम्बुज भगवाना
 बालसखा सब निकट बुलाई ॥ तिनसों हँसि हँसि कहत कन्हवाई

दो० माखन खइये चोरिकै, सब ब्रज घर घर जाय ।

कीजै बाल बिहार यों, मेरे मन यह आय ॥

सो० सुनि हर्षे सब ग्वाल, देत परस्पर तारि सब ।

भली कही नँदलाल, तुम बिन यह बुधि को करें ॥

चले सखन लै माखन चोरी ॥ एक वयम मवहिन मति भोगी

देख्यो भ्रांकि भरोखा ओरी ॥ मयति एक ग्वालनि दधि गोरी

धख्यो मठा मठनी में जानों ॥ ऊपर माखन हे लपटनों

ग्वालनि गई कमोरी मांगन ॥ पाई घात तबहि सुन्दर घन

सखन समेत ताहि घर आये ॥ दधि माखन मवहिन मिलि लाये

छूँझी मटुकी छाँड़ि सिधाये ॥ हँसत हँसत सब बाहर आये

आय गई द्वारे सोइ वाला ॥ घरसों निकसत देखे ग्वाला

माखन कर मुख दधि लपटनों ॥ ग्वालनि यह कहु भेद न जानों

देखिरही हँसि मुख की शोभा ॥ निरखि रूप लारयाँ मन लोभा

चमकि गये हरि सखन समेता ॥ तबहीं ग्वालनि गई निकेना

देखी जाय मथनियाँ खाली ॥ चकित बिलोकन इनउन ग्वाली

मन हरि लीनो मदनगोपाला ॥ जान्यो ग्वालनि हरि के ग्याला

दो० घर घर प्रकटी बात यह, सुखा लुंद लो साथ ।

चोरी माखन खात हैं, लन्दलुवन व्रजनाथ ॥

सो० सबके मन अखिलाख, चोरी पकरन पाइये ।

धरियो माखन राज, यहै ध्यान सबके हिये ॥

कहत परस्पर ग्वालि खानी ॥ मन मोहन के रूप लुभानी

माखन खान देहु गोपालहि ॥ मन बरजो कोउ श्याम नयानहि

तुम जानत हरि कहु न जाने ॥ वे मोहन हैं पगम नयाने

कोऊ कहत पकर जो पाऊं ॥ तो अपने हरि कण्ठ लगाऊं

एक कहत जो मेरे आवें ॥ तो माखन हम दहिहि पचावें

कहत एक जो मैं गहि पाऊं ॥ तो हरि को बहु नाच नचाऊं

कोऊ कहत जो हरिको पैंये ❀ तौ गहि यशुमतिपे लैजैये
 इक कह आजु हमारे आये ❀ द्वारहिं ते मोहिं देखि पराये
 इहिबिधि प्रेममगन सब वाला ❀ सबके हृदय ध्यान नँदलाला
 निशि बासर नहिं नेक विसारैं ❀ मिलिवे कारण बुद्धि विचारैं
 गये श्याम मूने ग्वालनि घर ❀ सखा सबै ठाढ़े द्वारे पर
 देख्यो भीतर जाय कन्हाई ❀ दधि अरु माखन धर्यो मलाई

दो० सदमाखन देख्यो धरो, हरपे श्याम सुजान ।

सखा बुलाये सैन दै, लै लै लागे खान ॥

सो० इतउतचितवत जात, कछु संशय मनमें किये ।

बांटत दधि अरु खात, उठिउठि भांकतद्वारतन ॥

देखत सो ग्वालनि अंतर करि ❀ मगन भई अति उर आनँदभरि
 लीन्हीं बोलि सखी दिगवासी ❀ तिन्हें दिखावत हरि सुखरासी
 देखि सखी शोभा अति बाढ़ी ❀ उठि अबलोकि ओट के ठाढ़ी
 किहि बिधि है दधि लेत कन्हाई ❀ सखन देत अरु आपन खाई
 बदन समीप पाणि अति राजै ❀ माखन सहित महाझवि छाजै
 लै उपहार जलज मनु जाई ❀ मिलत चन्द सों बैर बिहाई
 गिरिगिरि परत बदन तें ऊपर ❀ दुइ दधि सुत के वुन्द सुभगतर
 मनौप्रलय जल आगम हरपत ❀ इन्दु सुधा के कणका वरपत
 मुखझवि देखि थकित ब्रजनारी ❀ कहत न वनै रही उर धारी
 बाल बिनोद मोद मन फूली ❀ भई शिथिल सब तन सुधि भूली
 बरजन को अस्फुरत न बानी ❀ रहीं बिचारि विचारि सयानी
 गये ठगोरी लाय कन्हाई ❀ रहीं ठगीसी सब सुख पाई

दो० बिश्वभरण पोषण करण, कल्प तरोवर नास ।

सो प्रभु दधि चोरी करत, प्रेमबिबश भगधाम ॥

सो० नितउठि करत विहार, ब्रज में घर घर सांवरो ।

ब्रजजन प्राण आधार, माखन चोरी व्याजकरि ॥

श्याम एक ग्वालनि घर आये ❀ चोरी करत पकरि निन पाये
कहत करी तुम बहुत ढिगई ❀ अब तौ घात पेटो आई
निशिवासर मोहिं बहुत खिभायो ❀ दधि माखन सब मेरो खायो
दोउ भुज पकरि कह्यो कित जैहौ ❀ दधि माखन दे छूटन पेटो
ताके मुखतन चितै कन्हई ❀ बोले वचन मधुर मुसुकाई
तेरी सौं मैं लुयो न राई ❀ सखा खाव सब गये पराई
चारु चितौनि चित उरभानो ❀ उरते रोप जात नहि जानो
मुनत मनोहर हरिकी बतियां ❀ लिये लगाय ग्वालनि अनियां
बैठो श्याम जाऊँ बलिहारी ❀ मैं ल्याऊँ दधि खाव विद्वारी
हरि को लेन चली दधि गोरी ❀ हरि हंसि निकसि गये ब्रज खोरी
रही ठगी सी ग्वालनि भोरी ❀ मन लै गयो सांवरो चोरी
हरि गये और ग्वालनि के घर ❀ देख्यो जाय न कोऊ भीतर

दो० माखन काढ़ि निशंक है, लागे खान कन्हाय ।

ग्वालनि आवत जानि घर, तबउठि रहे छिपाय ॥

सो० ग्वालनि घर में आय, मथनी ढिग ठाढ़ी भई ।

भाजनरीतोपाय, चकित बिलोकति चहूं दिशि ॥

अबहीं गई आई इन पांवन ❀ आयो माखन कौन चुगवन
भीतर गई तहां हरि पाये ❀ पकरी भुजा भये मन भाये
तब हरि कहि निज नाम लजाये ❀ नयन सरोज कलुक भरि आये
देखि बदन छवि आनंद हीके ❀ दीन्हे जान भाव ते जाके
भयो ग्वाल मन परम हुलारा ❀ कहन चली यशुमति के पाना
जो तुम मुनहु यशोमति माई ❀ हंसि हौं मुनि हरिकी लरिकाई

आजु गये हरि मों घर चोरी ❀ देखी माखन भरी कमोरी
 मैं गइ आय अचानक जबहीं ❀ रहे छिपाय सकुचि कै तवहीं
 जब मैं कह्यो भवन में कोरी ❀ तब मोहिकहि निजनाम निहोरी
 लगे लेन लोचन भरि आंमू ❀ तब मैं कानन तोरी सांसू
 मुनत श्याम सब रोहिणिकनियां ❀ सकुचत हँसत मंद मुसुकनियां
 ग्वालि बिहँसि हरि तन डरपायो ❀ माखन चोर पकरि मैं पायो
 दो० करों नोयकी दामरी, बांधों अपने धाम ।
 लाय लिये उर रोहिणी, बांधि सकै को श्याम ॥
 सो० यशुमति उर आनंद, बाल चरित सुनि श्यामके ।
 कहत सुनो नंदनंद, ऐसो काम न करहु सुत ॥

पुनि इक गृह गये नंददुलारे ❀ देखि फिरे तहँ ग्वाल दुवारे
 तब हरि ऐसी बुद्धि उपाई ❀ फाँदि परे पिछवारे जाई
 सुनो भवन कहूँ कोउ नहीं ❀ मानहुँ इन को राज सदाहीं
 भाँड़े मूंदत धरत उतारत ❀ दधि अरु माखन दूध निहारत
 रैन जमायो गोरस पायो ❀ लगे खान मनु आप जमायो
 आहट सुनि युवती घर आई ❀ झलकत देखे कुँवर कन्हाई
 अँधियारे घर श्याम गये दुरि ❀ दधि मदुकी ढिग बैठि रहे मुरि
 सकल जीव उर अंतरासी ❀ तहां कछूक चटक परकासी
 ग्वालनि हरि को इत उत हेरे ❀ पावत नहीं धाम अँधेरे
 कहति अबहि देख्यो नंदनंदन ❀ किताहि गयो पछितात मनहिंमन
 परि गये दीठ ओट मथनीके ❀ सुन्दर श्याम प्राण गथनीके
 तबहीं ग्वालनि भुजगहि लीन्हों ❀ कहत तुम्हें अब तो मैं चीन्हों
 दो० कहाँ कहा चाहत फिरत, धाम अँधेरे माहिं ।
 बूझे बदन दुरावते, सूधे चितवत नाहिं ॥

सो० दधि मथनी में हाथ, अबका उतर बनाइहो ।

सखा नहीं कोउ साथ, कहिये अब कैसी वने ॥

मैं जान्यों यह घर है मेरो ❀ ता धोखे इत हैं गयो फेरो
दृष्टि परी च्यूंटी दधि माहीं ❀ काढ़न लग्यों तिन्हें यहि ग्रहो
मुनि मृदुवचन ग्वालि मुसुकानी ❀ तुम हो रतिनागर हम जानी
उर लगाय मुख चुम्बन कीनो ❀ विधिहि मनाय विदा करि दीनो
हरि दरशन विन क्षणन सोहाई ❀ उरहन मिस यशुमति पहुँ आई
मुनहु महारि निज सुतकी करणी ❀ करत अचकरी जात न बगणी
नित प्रति करत दूध दधि हानी ❀ कहँ लगि करें कान नैदरानी
मैं अपने मंदिर अधियारे ❀ माखन धरयो दुराय सवारे
सोई ढूँढि लियो हरि जाई ❀ अति निशंक नहिं नेकुडेगई
बूझे उत्तर तुरत बनावै ❀ च्यूंटी काढ़न को कर नावै
मुनि ग्वालिन के वचन सयानी ❀ हँभिकै बोध कियो नैदरानी
यशुमति कहत श्यामसों प्यारे ❀ पर घर काहे जात ललारे

दो० मस लोचन आगे सदा, खेलहु सखन बुलाय ।

तुम्हरे बालबिनोद लखि, मेरो हियो सिराय ॥

सो० सोपै लीजै श्याम, दधि माखन मेवा सधुर ।

सब कछु तेरे धाम, पर घर जाय बलाय तुव ॥

माखन मांग्यो कुँवर कन्हवाई ❀ मुदित मातु तुरन्हि ले आई
लगी खवावन हिय हरपानी ❀ श्याम कहाँ खेहो निजपानी
दियो हाथ धरि भरिकै दोना ❀ चले खान खेलन हरि लोना
सखन संग खेलत वनमाली ❀ यमुना जानि लग्यो इक ग्वाली
आप चले ताके घर माहीं ❀ पूँछत बात कोन है काही
लखे तहां शिशु दोय अयाने ❀ भीर देखने गोय डगने

इत उत देख्यो गोरस नाहीं ❀ ऊँचे धरचो सिकहरन माहीं
 तब मनमोहन रच्यो उपाई ❀ आनि तहां ऊखल ओंधाई
 ता पर एक सखा बैठारी ❀ ताके कन्ध चढ़े बनवारी
 ऐसी विधि करि गोरस पायो ❀ दधि माखन सबही मिलि खायो
 दूध डारि बढरू सब छोरे ❀ दिये निकासि बनहिं के ओरे
 मही छिरकि लरिकन डरपाई ❀ चले अग्र करि सखा कन्हाई
 दो० ग्वालनि आवत देखिकै, सखा गये सब दौरि ।

फँसि भीतर मोहन परे, रोंकि लई तिन पौरि ॥

सो० रोष भरी मुख बात, प्रेम भख्यो अन्तर हियो ।

कहत महरके तात, जात कहां दधिचोर अब ॥

तब हरि ताके मुख तन देखी ❀ कीन्हे उर नख घात विशेषी
 अति रिस ग्वालनि मन उपजाई ❀ दोउ भुज पकरि महरि पै लाई
 मानों महरि कह्यो तुम मेरो ❀ अति उत्पात करत सुत तेरो
 राख्यो गोरस छिके चढ़ाई ❀ ग्वाल कन्ध चढ़ि लियो कन्हाई
 माखन खाय दूध ढरकायो ❀ मही छिरकि बालकन रुवायो
 और कहत सकुचत हौं वाता ❀ कहा दिखाऊँ तुमको गाता
 हैं गुण बड़े श्याम के माई ❀ इहां सकुचि लरिका हैं जाई
 बरजत क्यों नहिं सुतहि अनेरो ❀ कहा कहौं नित प्रति को भेरो
 जो कछु राखैं दूरि दुराई ❀ तहीं तहीं ते लेत चुराई
 तापर देत बढरुअन छोरी ❀ वन वन फिरत वही चहुँ ओरी
 चोरी अधिक चतुर बनवारी ❀ सुनहु महरि हम इनते हारी
 कहँ लगी इनके गुणनि बखानों ❀ तुम इन को सूधो मति जानों
 दो० सुनंत ग्वालनीके वचन, यशुमति हरि तन देखि ।

भये सकुचयुत मुख निरखि, कोमल ललित विशेषि ॥

सो० कहत लगावत लोग, भूठहि सब मेरे सुतहि ।

कब भयो चोरी योग, पांच वर्ष के तनिक मे ॥

इहि मिसि देखन को सब आवें ❀ चोरी मेरे सुतहि लगावें

ऐसो तो मेरो न अन्याई ❀ अतिही बालक कुंवरकन्हाई

छोके बंधे भवन अति ऊंचे ❀ तहँ कैसे ये भुजा पहंचे

कौन बेग इतनो है आयो ❀ तेरो गोरस कैसे लायो

हाथ नचावत आवत दौरी ❀ जीवन करहि समुझि के वोगी

घरही माखन भरी कमोरी ❀ कबहूँ लेत न आंगुरि वोगी

इतनी सुनतनिरखि घनश्यामहिं ❀ विहँसिचली ग्वालनि निजधामहिं

हरि सों कहत महरि समुझाई ❀ मैं बलि कहूँ जिन जाहु कन्हाई

तुम्हरे कारण पट रस नाना ❀ करि करि राखे विविध विधाना

इतो उपाय करत कित माई ❀ पर घर दधि माखनहिं लगाई

ब्रज की बाढ़ी ग्वालि गँवारी ❀ हाट बाट दधि बेंचन दारी

नहिं कछु लाजन कान विचारें ❀ बोलत बचन कदुक मुह फारें

दो० भूँठो दोष लगायकै, नित उठि आवत प्रात ।

सन्मुख बादत शंक तजि, विकट बनावत वात ॥

सो० नौ लख दुहियत गाय, दूध दही तेरे घनो ।

तू कित चोरी जाय, बुरो मानिहें नन्द मुनि ॥

हरि माखन चोरी रस गीधे ❀ कैसे रहें प्रेम के वीधे

एक ग्वालि घर मांझ अंधेरे ❀ अति श्यामल तन पग्न न हरे

कछुक धरो गोरस तहँ पायो ❀ प्रथम मुसुचि कर भोग लगायो

कियो प्रकट दीपक गृह ग्वाली ❀ तहँ देखे भीतर वनमाली

भुजा चार धरि दरश दिखायो ❀ ग्वालिनिलखि अनिअचरज पायो

दधि माखन के बूंद मुहाये ❀ मुभग श्याम उर अति दधि लाये

मानहुँ यमुना जल के माहीं ❀ देखि परत उडुगण परब्राहीं
 इहि छवि निरखिरही छकि ग्वाली ❀ वहुओं भये द्विभुज वनमाली
 देखि चरित हरषीं ब्रजवाला ❀ चकित विलोकति हर्ष विशाला
 मन मन कहति कहा मैं देख्यो ❀ यह जाग्रत के स्वप्न विशेष्यो
 प्रेम मगन तन की सुधि भूली ❀ गदगद कंठ रोमावलि फूली
 मन हरि लीनो रूप दिखाई ❀ चले वहां तैं कुँवरकन्हाई
 दो० देखि श्यामके चरित वर, ब्रजनारी सुख पाय ।

होहिं हमारे पुरुष हरि, मांगत विधिहि मनाय ॥

सो० घर घर करत विलास, नाना भेष दिखाय हरि ।

ब्रजजन परम हुलास, देखि चरित गोपाल के ॥

देखी श्याम ग्वालि इक ठाढ़ी ❀ गोरस मथति प्रात छवि वाढ़ी
 डोलत तन उद्यस्योशिर अंचल ❀ बेणी चलत पीठ पर चंचल
 यौवन मदमातीं अठिलानी ❀ करपत रजु दुहुँ करन मथानी
 इत उत अंग मोरति झकझोरी ❀ गोरे अंग दिनन की थोरी
 मदी उरोजन अंगिया गाढ़ी ❀ मनहुँ काम सांचे भरि काढ़ी
 सीफि रहे लखि नंददुलारे ❀ लागे खेलन तासु दुआरे
 फिरि चितई ग्वालनि द्वारे तन ❀ परि गये दृष्टि श्यामसुन्दर घन
 बोलि लिये हरुवे सूने घर ❀ लिय लगाय उर सों सुन्दर वर
 उमंग अंग अंगिया उरदरकी ❀ तिहि अवसर सुधि रही न घरकी
 तवहीं सुन्दर श्याम सुजाना ❀ भये वरस द्वादश अनुमाना
 सो छवि देखि छकी ब्रजनारी ❀ बहुरि भये शिशुरूप निहारी
 हरिके कौतुक अति सुखदाई ❀ देखि रही मति गति विसराई
 दो० माखन लै तब श्याम मुख, धरत आपने पान ।

अति आनंद उमंग उर, बिसरी ग्वालि सुजान ॥

सो० रसिकशिरोमणिश्याम, माखनखायरिभायतिय।

आये अपने धाम, छवि सागर नागर नवल ॥

मन हरि लीन्हों कुँवरकन्हाई ॥ विन देखे क्षण रह्यो न जाई ॥

उरहन के मिस ग्वालि सयानी ॥ आई देखन हरि मुखदानी ॥

सुनहु महारि सुत के गुण जैसे ॥ कहा कहाँ कहि जात न तेरे ॥

माखन खाय मही दरकायो ॥ चोली फारि अवहिं भजि आयो ॥

गोरस हानि सही लै माई ॥ अब कैसे सहि जान खुदाई ॥

बीचहिं बोलि उठे वनवारी ॥ झूठहिं मोहिं लगावत ग्वारी ॥

खेलत तें मोहिं लियो बुलाई ॥ दोउ भुज भरि लीनो उर लाई ॥

मेरे कर अपने उर धारी ॥ आपुनहीं चोली उर फारी ॥

माखन आपहिं मोहिं खवायो ॥ मैं कब दही मही दरकायो ॥

अति भोरी सुनि हरिकी वानी ॥ यशुमति ग्वारी सों रिसियानी ॥

जानत हों जो कयक्ष तिहारो ॥ अति भोरो सुन मेरो वागे ॥

दै दै दगा बुलावति ताही ॥ सोइ सोइ करन जो भावन जाही ॥

दो० बोलिबोलिनिजनिजभवन, भेटतिभरिभरिअक।

मोरे भोरे बाल को, ग्वाल्लिनि लाज निशक ॥

सो० तापर उर नख लाय, फिरत दिखावति लाजतजि।

कान्हहिं दोष लगाय, आपुन आत भोरी भई ॥

नित उठि उरहन लै हठि धावें ॥ बिना भीन ही चित्र वनावें ॥

मिस करि करि मेरे गृह आई ॥ रहन श्याम तन दाँटि गंगाई ॥

मेरो पांच वरष को कान्हा ॥ अजहुं रोय पय मांगन नान्हा ॥

कहूँ तू यौवन की मदमाती ॥ हरिके मंग फिरन अठिनानी ॥

ग्वाल्लिनि सुनत यशोमति वैना ॥ मन हरि लीन्हो गजिवनेना ॥

आव न रोष प्रीति मन माहीं ॥ उत्तर देन वनन कहु नाहीं ॥

कछु अनउत्तर कहि रिसिआई ❀ चली भवन उर राखि कन्हआई
 यशुमति यहै सिखावति श्यामहिं ❀ कत हो जात पराये धामहिं
 ये सब गोस्स की मदमाती ❀ फिरत ढीठ ग्वालनि इतराती
 नित उठि उरहन देत बिहाने ❀ मुखसँभारि नहिं बात बखाने
 रुचि उपजै तुम्हरे मन जोई ❀ गोपै मांगि लेहु किन सोई
 कहि कहि मधुरबचन निजताता ❀ सुख उपजावत मेरे गाता
 दो० अपनेहिं आंगन खेलिये, सखन सहित दोउ भाय ।

मुहिं सुख दीजै आपने, बाल बिनोद दिखाय ॥

सो० सुन्दर घन ब्रजनाथ, कोटिकाम शोभा हरण ।

गोप बाल लै साथ, करत बाललीला ललित ॥

मथुरा जात लखी इक ग्वाली ❀ चरचि लई ताको वनमाली
 बैठि रहे ताके पिछवारे ❀ सखा संग लै नन्ददुलारे
 कहति परोसनि सों समुझाई ❀ सुनि लीन्हों सो कुँवरकन्हआई
 बेंचन जाति सखी हों दहियो ❀ तौलों मेरे घर तन चाहियो
 सद माखन दै माठ धरोई ❀ सौँपि जातिहों ताकों सोई
 डर तो और कछु ब्रज नाही ❀ नंदमुवन सखि आय न जाहीं
 यों कहि चली ग्वालिनी जबहीं ❀ सखन सहित हरि पैठे तबहीं
 कछु ग्वालन की आहट पाई ❀ सो पुनि फेरि घरहि फिरि आई
 देखि सखा सब चले पराई ❀ पकरे ग्वालनि धाय कन्हआई
 और न जानि जान मैं दीन्हे ❀ तुम कित जात अचकरी कीन्हे
 बांह पकरि लै चली लिवाई ❀ कहत यशोमति देखहु आई
 उरहन देत सदा रिस मानौ ❀ अब अपनो सुत आय पिछानौ
 दो० वहै उरहनो नित्य को, सत्य करन के काज ।

मैं गहि ल्याई श्यामको, बांह पकरिके आज ॥

सो० हरि बैठे निज धाम, खेलत जननी के निकट ।

कौतुकनिधि घनश्याम, करत चरितसंतन सुखद ॥

यशुमति मुनि ग्वालिनि कीवानी ॥ देखन चली सुतहि अकुलानी

गये तहां है सुता पराई ॥ देखि यशोमति अनि रिमयाई

तेरे आंखन मति हिय नहीं ॥ वदन देखि पहिचानत नहीं

देखहु री याकी गति माई ॥ या कन्या को कहत कन्हाई

तैं जो मेरे सुत को नामा ॥ सूधो करि पायो है श्यामा

तू गहि बांह कौन को ल्याई ॥ खेलत मेरे धाम कन्हाई

रही बाल हरिको मुख चाही ॥ समुझि समुझि मनमें पश्चिनाही

बांह पकरि मैं घर ते ल्याई ॥ कीन्हे कैसे चरित कन्हाई

जात बनै ना कलु कहि जाई ॥ रही ग्वालि ठगिसी सकुचाई

महरि कहत चलि जाहि इहां तैं ॥ मैं जानत सब तुम्हरी बातें

हरि के चरित कहा कोउ जाने ॥ ग्वालिनितन दुरि मुरि मुसकाने

हरिते हारि चली गृह ग्वाली ॥ बुधि हरि जीते श्याम तमाली

दो० बहुरि गये इक ग्वालि घर, मनमोहन घनश्याम ।

सखन सहित हरपित गये, सुनो पायो धाम ॥

सो० सब घर लियो ढँडोरि, माखन खायो चोरि कर ।

भाजन डारे फोरि, गोरस दियो लुटाय सहि ॥

सोवत लरिकन चुटकि जगाये ॥ मही छिरकि डरपाय ग्वाये

बड़ो माठ इक धीको पेसो ॥ बहुत दिननको चिकना चांगो

सोऊ फोरि कियो बहु टूटा ॥ चले हँसन सब मिलिदे कुका

आयगई ग्वालिनितिहि काला ॥ निकसन धरिपाये नंदलाला

देख्यो घर वासन सब फोरे ॥ रोवन बाल मही सो चो

दोऊ भुज गाढ़े गहि लीन्हे ॥ जाय महरि दिग दाढ़े कीन्हे

कहति सरोष यशोमति आगे ❀ अब पति रहिहै या ब्रज त्यागे
 ऐसे हाल किये गृह मेरे ❀ सुनहु महारि लक्षण सुतकेरे
 माखन खाय दही दरकायो ❀ मही छिरकि बालकन रुवायो
 बासन फोरि धरे सब घरके ❀ उपज्यो पूत सपूत महर के
 घी को माट युगन को राख्यो ❀ सोऊ फोरि दूक करि नाख्यो
 चलो दिखाऊं घर को हाला ❀ राखहु बाँधि आपनो लाला

दो० जननी खोजत कान्ह को, करत फिरत उत्पात ।

नित उठि उरहन सहत हौं, तू नहिं मानत तात ॥

सो० बड़े बाप के पूत, चोर नाम प्रकट्यो जगत ।

उपज्यो पूत सपूत, नाम धरावत तात को ॥

जननी के स्वीकृत हरि रोये ❀ भरि आये नयनन के कोये
 झूठहिं मोहिं लगावत धगरी ❀ मेरे ख्याल परी हैं सिगरी
 यशुमति रोवत देखि कन्हई ❀ वदन पोछि लीनो उर लाई
 कहत सबै युवतिन यह भावै ❀ नितही नित उठि भोरहिं आवै
 मेरे बारहि दोष लगावै ❀ झूठहिं उरहन मोहिं सुनावै
 कबहीं गयो तेरे दरवाजें ❀ दूध दही माखन के काजें
 धन माती इतराती डोलैं ❀ सकुचत नाहिं सँभार न बोलैं
 मेरो कान्ह तनक सो माई ❀ ताहि रुवावत झूठि लगाई
 कब हरि तेरो माखन लीनों ❀ मेरे बहुत दर्ई को दीनों
 कहा भयो घर गयो तिहारे ❀ छुयो तनक दधि बालक वारे
 ग्वालिनिसुनियशुमतिकीबानी ❀ कहति महारि तुम उलटि रिसानी
 नित उठि होय जासुकी हानी ❀ सो क्यों कहै आन नँदरानी

दो० तुम कह्यु लावत औरही, लेहु आपनो गांव ।

जहां बसे नहिं पति रहै, तजन कह्यो सो ठांव ॥

सो० पूतहिं देत पठाय, भड़हाई घर घर कनन ।

उरहन देत रिसाय, को बसिहैं ऐसे नगर ॥

सखा भीर लै पैठत जाई ❀ आप खाय तो महिये माई
जो कछु गोरस घरमें पावैं ❀ कछु डारैं कछु सखन लुटावैं
कहँ लों सहैं नित्य की हानी ❀ कबलों करें नंदकी कानी
इक दिन मेरे मन्दिर आयो ❀ मोको देखत वदन विरायो
जब मैं सन्मुख पकरन धाई ❀ तब के गुण कह कहै सुनाई
भाजि रह्यो दुरि देखत जाई ❀ मैं पौढ़ी अपने गृह आई
हरैं हरैं आये शिरहाने ❀ चोरी पायी बांधि पराने
सुन मैया याके गुण मोसों ❀ यह सब झूठ कहत हैं तोसों
खेलति तैं मोहिं लियो बुलाई ❀ मोपै दधिकी च्युटि कदाई
ठहल करों मैं याके घरकी ❀ यह सोवैं पतिसंग निधरकी
सुनत वचन यशुमति मुसकानी ❀ ग्वालिनहंसि सुख मोरि लजानी
सुनहु महरि मुतके गुण काने ❀ समुझहु हैं भोरे के म्याने

दो० करतफिरत उतपातअति, सबव्रज घरघर जाय ।

नित उठि खेलत फागसी, गरियावत न लजाय ॥

सो० बाहर तरुण किशोर, बोलत वचन विचित्र वर ।

यहां होत शिशु भीर, तुम अचरज मानत नहीं ॥

यों कहि गई ग्वालिनी धामहिं ❀ यशुमतिपुनिपुनिसिखवनध्यामहिं
घरगोरस जिन जाहु पराये ❀ तात रिसाने उरहनों लाये
लघु दीरघता कछु नहिं जानैं ❀ भगरो आय भुंठ नव ठाने
नौ लख धेनु दूध की तेरे ❀ और बहुत बन चैं अने
तू कित माखन खात बुलाई ❀ दाढ़िदेहु अब यह नमिनाई
यों कहि जननी कंठ लगायो ❀ सुन्दरराम हरष नव पायो

खेलन गये बहुरि नँदलाला ❀ किये जाय पुनि सोई ख्याला
 अपर ग्वालि उरहन लैआई ❀ आई यशुमति पहुँ रिसिआई
 तेरे कान्ह मेरो माखन खायो ❀ सखन सहित अबहीं भजि आयो
 मैं गइ यमुन भरन को पानी ❀ दुपहर द्योस सून घर जानी
 गयो भवन मम खोल किंवारी ❀ छीकन ते दधि लियो उतारी
 खाय लुटाय बहाय पराने ❀ बालक है बरजो नहिँ माने
 दो० कीन्हों अतिही लाड़लो, लाड़ लड़ाय बहूत ।

अबहीं ते ये ढँग करत, जाय अनोखो पूत ॥

सो० सुनिग्वालिनके बैन, कहत यशोमति कान्हसों ।

सिखयो मानत हैन, लै सँटिया डाटत भई ॥

माखन खात पराये घरको ❀ मेरे रहत जहां तहँ दरको
 नित प्रति मथियत सहस मथानी ❀ तेरे कौन वस्तु की हानी
 कितने अहिरे जियत घर मेरे ❀ बँचत खात मही बहुतेरे
 पूत कहावत नन्दमहुरि को ❀ चोरी करत उधारत फरिको
 मैया मैं नहिँ माखन खायो ❀ मेरे वदन सखन लपटायो
 भाजन ऊँचे छीकन चढ़ायो ❀ समुझ देखु मैं कैसे पायो
 मैं इन नान्हें हाथ पसारी ❀ किहि बिधि माखन लियो उतारी
 मुख दधिपोंछत कहत कन्हआई ❀ दोना पाछे पीठ दुराई
 दारि सांठि यशुमति मुखकानी ❀ गहि उरलाय लिये सुखदानी
 बालाबिनोद मोद मन मोह्यो ❀ निरखत वदन त्रास युत सोह्यो
 भक्ताधीन बेद यश गावै ❀ सो हरि भक्तिप्रताप दिखावै
 यशुमतिको सुखनिरखि अगाधा ❀ विसरी शिव मुनि ब्रह्म समाधा

दो० धनिब्रजवासीधन्यब्रज, धनि धनि ब्रजकी गाय ।

जिनको माखन चोरि हरि, नित उठि घर घर खाय ॥

सो० रहे सकल सुर भूल, ब्रजविलास हरि को निरखि ।

हरपहिं वरपहिं फूल, धन्य धन्य ब्रज धन्य कहि ॥

आई कहत और इक ग्वाली ॥ सुनहु यशोमति सुत की चाली
भाजि गये मेरे भाजन फोरी ॥ माखन खाय मही महि दोरी
हांक देत पैठत घर माहीं ॥ काहू विधि करि मानत नाहीं
सखा संग कीन्हे इकठोरी ॥ नाचत फिरत सांकरी खोरी
वाट घाट कोउ चलन न पावै ॥ गारी दे दे सवन बुलावै
गोरस हानि करत है सिंगरी ॥ कहूँ लगि कीजे नित उठि भागे
घर घर करत फिरत सुत चोरी ॥ ऐसी विधि बसिहे ब्रज को री
सुनत गोपिका की रिसवानी ॥ कहत श्यामसों नंद की रानी
तू नहिं मोहिं डरात मुरारी ॥ वक्त वक्त तोमों पविटारी
पटंस भरे धरे घर माहीं ॥ ताते तुलै खान क्यों नाहीं
घर घर चोरी को नित जाई ॥ देत उरहनों ग्वालि मदई
मोको कृपण कहत सब आई ॥ तेरे घर दोटहु न अघाई

दो० सुनि सुनि लाजन सरति में, तू नहिं मानत बात ।

अब तोहिं राखौं बांधि कै, जानी तेरी घात ॥

सो० सुन री ग्वालिन बात, कहे देत अब तोहिं म ।

जवहीं पावहु घात, मेरी सों यहि मारियो ॥

अब तैं मोकहूँ बहुत खिभाई ॥ सांझि मारि कों पटुनाई
अजहूँ मानि कह्यो करि मेरो ॥ नृ घर घर मति फिरि अनेगे
जननी रिस लखि श्याम डगने ॥ अब नहिं जहाँ धाय विगने
यों कहि निकरि गये हरि द्वारे ॥ लेलन सखन संग गनियो
तवहीं ग्वालि और इक आई ॥ सो वगुमनिगों कहन सुनाई
नन्दमहरी सुत भलो पदायो ॥ ब्रजघर बीथिन शो मचायो

मारि भजत काहू के लरिका ❀ खोलत है काहू को फरिका
 काहू को दधि माखन खाई ❀ काहू के घर करत भँडाई
 गारी देत सकुच नहिं मानै ❀ गैल चलत हठि फगरो ठानै
 कह कह हरिके गुणन बतैये ❀ तोसों उरहन देत लजैये
 कछु दोनासो पढ़ि करि आई ❀ जो भावत सो कहत कन्हआई
 पीताम्बर ओढ़त शिरमार्हीं ❀ अञ्जलु दै दै मुरि मुसकाहीं

दो० तेरी सों तोसों कहत, मैं सकुचति यह बात ।

तेरोमुख हरि लखतहीं, सकुचि तनकु ब्रै जात ॥

सो० नेक दिखावहु आँखि, नहिं अबतें यह ढँग भले ।

कबल गिकहियेराखि, करत अचकरी श्याम अति ॥

अथ दांवरी बन्धन लीला ॥

यशुमति मुनि हरि के गुणगाथा ❀ रिसकरि उठी सांठि लै हाथा
 कहत जो ऐसी रिस में पाऊं ❀ तो हरि की गति तुमहिं दिखाऊं
 कैसे हाल करों हरि केरे ❀ लागे तात आज है मेरे
 झाँड़ों नहीं आज विन मारे ❀ भये श्याम अब बहुत दुलारे
 इहि अन्तर आई इक गोपी ❀ बांह गहे हरिकी मुख कोपी
 भलो महारि सूँघो सुत जायो ❀ चोली हार खोलि दिखायो
 किन नहिं सुतको लाड़ लड़ायो ❀ कौने नहीं कठिन करि जायो
 तेरो कछु अधिक री माई ❀ बरजत नाहिंन नेक कन्हआई
 यशुमति हरिको भुज गहिलीन्हों ❀ कहत बहुरि अपनो ढँग कीन्हों
 हस्ते सँटिया दैव लगाई ❀ आज बांधि मेठों लँगराई
 गहे भुजा सुत की बिततानी ❀ इत उत रजु खोजत नँदरानी
 हारि जननी उर कोप निहारी ❀ मन मन बिहँसत कौतुक कारी

दो० अग्नि प्रेरि त्रिभुवन धनी, दियो क्षीर उफनाय ।

यशुमतिलखितजिहरिभुजा, लगीसँभारनजाय ॥

सो० इहि बिधि भुजा छुड़ाय, दधि भाजन फोरनलगे ।

माखन सुँह लपटाय, गोरस दियो लुटायसव ॥

रिस में रिस औरै उपजाई ॥ जानि जननि अभिलाष कन्हाई

देखि यशोमति अतिरिस पागी ॥ पकरि श्याम को बांधन लागी

गर्व जानि नहिं दाम समाई ॥ सब रजु दे आँगुर घटि जाई

पुनि पुनि यशुमति औरै मँगावै ॥ हरिके तन सब ओझी आवै

देखि यशोमति अति रिस बाढ़ी ॥ मन पछितात ग्वालिनी ठाढ़ी

देखि सखी यशुमति बौरानी ॥ हरिको बांधन चहत सयानी

हरिको त्रिभुवनपति नहिं जानै ॥ जिनते सकल कलेश न मानै

अखिल ब्रह्मांड उदर में जाके ॥ बांधत महिर उदर रजु ताके

ब्रह्मा शिव सनकादिक ज्ञानी ॥ इनहुं जिनकी गति नहिं जानी

जल थल जिनकी ज्योतिसमानी ॥ कही गर्ग सब प्रकट बलानी

मुखमें त्रिभुवन दियो दिखाई ॥ ताहु पर परतीति न आई

तिनहिं देख बांधति नंदरानी ॥ अचरज कथा न जानि बयानी

दो० आप बाँधावत प्रेम वश, भक्तन छोरत पन्द ।

वदत बेद बाणी विदित, भक्तवदल नंदनन्द ॥

सो० जननिहिं अतिरिस जान, यमला अर्जुन सुरतिकरि ।

दीनबन्धु भगवान, जन हित गये बाँधाय प्रभु ॥

जननी के मन की रुचि जानी ॥ आप बाँधाया सांगिपानी

कहत यशोमति लै कर डोरी ॥ बांधा तोहि मके को चोरी

लै लै रजु ऊखल साँ जोरै ॥ हरि लगि नंद नयन जल डोरी

यह सुनि ब्रजयुवती उठि धाई ॥ देखि श्याम को मन मुकुटाई

कहति इन्हें कोऊ मत छोरो ❀ बहुरि श्याम अब माखन चोरो
 ऊखल बांधि यशोमति डोरी ❀ मारन को सँटिया कर तोरी
 सांटी देखि ग्वालि पद्धितानी ❀ बिकल भई मन अति अकुलानी
 कहत यशोमति सों सब गोपी ❀ ऐसी कहा पूत पै कोपी
 कहा भयो जो बालक पाहीं ❀ ढरक गई मथनी महि माहीं
 घर घर गोकुल दई दिवारी ❀ तू बांधत हरि की भुज कारी
 ऐसी तोहिं बूझियत नाहीं ❀ गोरस लागि बांधत सुत बाहीं
 चूक परी हम तें इहि भोरें ❀ उरहन दियो बकस कर जोरें

दो० बार बार जोवत बदन, हुचकिन रोवत श्याम ।

बज्रहुँ ते तेरो हियो, कठिन अहो नँदबाम ॥

सो० कित रिस करति अचेत, छोर उदर ते दांवरी ।

डार कठिन कर बेत, लोचन भरि भरिलेतहरि ॥

जाहु चली अपने अपने घर ❀ तुमहिं सबै मिलि ढीठ कियो बर
 बन्धन छोरन को अब आई ❀ मोको मति बरजो कोउ माई
 मोहिं आपने बाबा की सों ❀ अब न पत्याउँ श्याम को बीसों
 देखिचुकी मैं इन के ख्याला ❀ उपजे बड़े नन्द के लाला
 मैं देवन हित पय औठायो ❀ कोरी मटुकी दही जमायो
 जावन दियो न पूजन पायो ❀ सो सब फोरि भूमि ढरकायो
 तिहि घर देव पितर कहु काके ❀ भयो कान्ह सों सुत घर जाके
 कहत एक सुन यशुमति बौरी ❀ दधि कारण सुत बांधत दौरी
 तैं यह सीख कौन पै लीनी ❀ इतनी रिस बालक पर कीनी
 जो अतिही अवकरो कन्हाई ❀ तऊ कोख को जायो माई
 नेक देख धौं हरिहिं निहारी ❀ कैसे ढरत लकुटि डर भारी
 शोभित सजल सांवरे लोचन ❀ नीरजलद अति औस भरे जन

दो० नमित वदन सुखत अधर, कहुक सकुचमें रोष ।

सांभहोत जिमि बातवश, शोभित पंकज कोष ॥

सो० निरखि नैन सुख देत, हरिपै सरवस वारिये ।

प्रगटे नंद निकेत, को जानै किहि पुण्यवश ॥

एक कहत जो आयसु पाऊं ॥ तौ माखन निज घरते लाऊं ॥
जिहि कारण कीनी रिस हरितें ॥ अजहुँ न डारत सँटिया कर्में ॥
देखि डरात तोहिं हरि कैसे ॥ सकुचत जलज शीतभय जैसे ॥
बेग छोरि बंधन पट त्यागी ॥ ले लगाय उर श्याम सभागी ॥
कहनलगीं अब बढ़ि बढ़ि बानी ॥ माखन मोहिं देतिहैं आनी ॥
मानौं मेरे घर कहु नार्हीं ॥ तब नहिं उरहन देत लजार्हीं ॥
ढोय मेरो तुमहिं बँधायो ॥ उरहन दै दै मृदु पिरायो ॥
रिसही में मोको गहि दीनो ॥ सबको ज्ञान जानि में लीनो ॥
बोली अपर एक ब्रजनारी ॥ देखहु यशुमति सुतहिं निहारी ॥
मुखछवि कोटिमदन बलिहारी ॥ ये हैं साह कि चोर बिहारी ॥
नाहिंन तरुण किशोर कन्हार्ई ॥ कतहिं करत इनसों रिस माई ॥
कहा भयो जो उरहन आने ॥ बालक हरि अवहीं कहजाने ॥

दो० श्रमित भ्रमित तो त्रासतें, चपल सजल दृगकोर ।

मनहुँ मीन बंसी विंधे, करत सलिल भ्रकभोर ॥

सो० ले उठाय उर धारि, झोर उदरतें दांवरी ।

प्राण दीजिये वारि, मोहन मदनगोपाल पर ॥

तेरो कठिन हियो है माई ॥ कहत एक बालिनि समुझाई ॥
ऐसी माखन दधि बहि जाई ॥ बांधे कमलनयन जेहि लाई ॥
जो मूरति शिव ध्यान लगावैं ॥ सपनेहुँ सुर नहिं देखन पावैं ॥
निगमनहुँ खोजत नहिं पाई ॥ सो तें दे कनार नचाई ॥

याही तैं तू गर्व भुलाई ❀ घर बैठे तेरे निधि आई
 काहू को सुत रोवत देखी ❀ लेत धाय उर लाय विशेषी
 अब यह कित सीखी चतुराई ❀ निज सुतसों इतनी कठिनाई
 कहत एक देखहु नँदनारी ❀ कब के ऊखल बँधे मुरारी
 गयो क्षुधा ते मुख कुम्हिलाई ❀ अति कोमल तन श्यामकन्हाई
 भई बेर बीते युग यामा ❀ हरिके निकट आयगयो धामा
 तू लागी गृह कारज माहीं ❀ है निरदई दया कछु नाहीं
 घरको काज इनहुँ तैं प्यारो ❀ यशुमति नेक न हृदय विचारो

दो० जलजलोल लोचन सजल, भये त्रासते दीन ।

चितवत तेरे बदन तन, मनमोहन आधीन ॥

सो० केतिक गोरस हान, जाको तोरत कान तू ।

वारि दीजिये प्रान, रोम रोम पर श्याम के ॥

हरिको देखि सखा यक धायो ❀ तिन हलधरसों जाय सुनायो
 अहो राम तुम्हरो लघु भैया ❀ बांध्यो आज यशोदा भैया
 काहूके लरिकहिं हरि माख्यो ❀ यशुमति पै तिन जाय पुकाख्यो
 तबतैं हरिहि बांध बैठायो ❀ छोड़ति नाहिंन सवाहि छुड़ायो
 सो हम तुमहिं जनावन आये ❀ हलधर सुनत तुरत उठिधाये
 माता डरत न अतिहि त्रसाये ❀ हरिहि देखि लोचन भरिआये
 कहत भले दोउ भुजा बँधाये ❀ ऊखल सों बाँधे हरि पाये
 मैं बरजे कइबार कन्हाई ❀ आजहुँ छोड़ देहु लँगराई
 दोउ करजोरि कहत री भैया ❀ काहे को बांध्यो मेरो भैया
 श्यामहिं छोड़ि बांधि बरु मोहीं ❀ और कहा कहिये अब तोहीं
 मेरो प्राण अधार कन्हाई ❀ ताकी भुज मोहि बँधी दिखाई
 कौन काज गोरस धन धामा ❀ जिहिकारण बांध्यों घनश्यामा

दो० छुवतौ और जो तन कोऊ, आज देखतो सोय ।

तू जननी कछु वश नहीं, जो कछु करै सो होय ॥

सो० तेरे वश हरि आहिं, को जानै केहि पुण्यते ।

तू पहिचानत नाहिं, गोरस हित बांधत हरिहिं ॥

सुनहु बात हलधर तुम मेरी ❀ करन देहु सेवा इन करी

माखन खात परायो जाई ❀ प्रगटत चोरी नाम कन्हाई

तुमहीं कहौ कमी केहि केरी ❀ नौ निधि की मेरे घर देरी

हौं हारी वरजत दिन राता ❀ मानत नाहिंन मेरी बाना

कहा करौं हरि अतिहि खिभाई ❀ भयो बहुत ही दीठ कन्हाई

मेरो कह्यो तनक नहिं मानै ❀ नित उठि टेक आपनी ठानै

भोर होत उरहन लै आवै ❀ ब्रज युवतिन तें मोहिं लजावै

जहँ तहँ धूम मचावत जाई ❀ घर नहिं रहत क्षणक कन्हाई

तुमहूँ दोष देत हौ मोहीं ❀ कान्हर ते प्यारो दधि तोहीं

तोहिंतजि और कहौं किहि मेया ❀ और कौन मेरो मान ग्येया

तेरी सों जननी सुन मोहीं ❀ उरहन देत झूठ गव तोहीं

है सब ब्रज को श्याम पियारो ❀ श्याम सकल ब्रज को रखवागो

दो० दधि माखन पय कान्ह को, कान्हाकी सब गाय ।

मोहूँ को बल कान्ह को, तू नहिं जानत माय ॥

सो० बलदाऊ की बात, सुनि हँसिकै यशुमति कहाँ ।

तुमयकमतदोउ भ्रात, जानत में तुम्हें चरित ॥

हरिहि देखि हलधर मुसकाने ❀ यह तुम गनि तुम बिन को जाने

को तुम छोरन बांधन हारा ❀ तुम छोरन बांधन संगारा

कारन करन करत प्रन माने ❀ अतिहित यशुमति दाय विकाने

असुर सँहारन जन दुखमोचन ❀ कमलापति राजा विलोचन

भक्तन के बश रहत सदाई ❀ ताही तें कछुओ न बसाई
 हरि यमलार्जुन तरु तन हेरे ❀ मन में कहत दास ये मेरे
 अबहीं आजु इन्हें उद्धारों ❀ दुसह शाप मुनिवर को टारों
 इनहीं के हित भुजा बँधाई ❀ परसि विष्ट अक् देहुँ गिराई
 दारुण दुख इन को सब टारों ❀ इहि मिसि करि बन्धन निखारों
 भक्तबल्लल हरि दीनदयाला ❀ करुणासिन्धु अगाध कृपाला
 भक्ताधीन बेद यश गावैं ❀ पावन पतित नाम कहवावैं
 भक्त हेतु नाना तन धारी ❀ करत चरित भक्तन सुखकारी

दो० ब्रजवासी प्रभु भक्तहित, आप बँधायो दाम ।

ताही दिनतें प्रकट है, दामोदर सो नाम ॥

सो० नन्दनँदन घनश्याम, जनरंजन भंजन विपति ।

मेतत जिनको नाम, पाप शाप त्रयताप दुख ॥

यशुदा बाहर छाँड़ि कन्हई ❀ लगी मथन दधि भीतर जाई
 कहत बचन रस रिस लपटाने ❀ खात फिरत दधि धाम विराने
 षटरस छाँड़ि आपने धामा ❀ चोरी प्रकट करत हैं श्यामा
 मारि भजत ब्रजलरिकन जाई ❀ जहां तहां ब्रज धूय मचाई
 रहौ तुमहुँ हलधर चुप साधी ❀ इनकी मेठन देहु उपाधी
 ऊखल सों बांधे बनवारी ❀ कहत यशोमति सों ब्रजनारी
 कान्हहुँ ते तोहिं माखन प्यारो ❀ अरी देख तरसत हरि वारो
 डारि देहि मथनी नँदरानी ❀ है है हरि की भुजा पिरानी
 दूध दही हरि पै सब वारो ❀ मोहन जीवनप्राण हमारो
 हरुवे बोलि उठी नँदरानी ❀ जाहु सबै तुम युवति सयानी
 मैं खीझति लरिकहि गुणकाजें ❀ तुम कत झुरत दई विन काजें
 लरिकहि त्रास दिखावत रहिये ❀ अबहीं ते अवगुण नहिं चाहिये

दो० युवतिचलीं विरुभायसव, कहत यशोदहिं पोच ।

मूरख सों कहिये कहा, करत प्रेमवश शोच ॥

सो० कहाकरें बलि जाउँ, कहत चलीं सब श्याम सों ।

धरत यशोदहि नाउँ, अति कठोर मानत नहीं ॥

तवहिं श्यामसुन्दर यह ठानी ॥ युवती धाम गई सब जानी ॥
गृह कारज जननी अटकायो ॥ आप चमल अर्जुन पहुँ आयो ॥
परसत पात उठे भहराई ॥ परे शब्द आघात मुहाई ॥
उखरे मूल सहित अरसाई ॥ दिये धरणि दोउ तरुन गिराई ॥
भये चकित सब ब्रजके वासी ॥ रहे सकुचि तन मुधिवुधि नारी ॥
कोइ भूमि कोउ तकत अकासा ॥ रहे धरिकलों जकि मनत्रासा ॥
याही अन्तर युगल कुमारा ॥ प्रगटे धनदतनय सुकुमारा ॥
नारद शाप पाय दोउ भाई ॥ भयेहुते ब्रज में तरु आई ॥
हरिके परसत निज गति पाई ॥ भये पुनीत मिथी जड़नाई ॥
तिन्हें कृपाल अनुग्रह कीन्हों ॥ चारिभुजाकरि दरशन दीन्हों ॥
देखि दरश अति पुलक शरीरा ॥ परे चरण दोउ बन्धु अर्धांग ॥
बार बार पद रज शिर धारी ॥ जोरि पाणि अस्तुनि अनुसारी ॥

छं० अनुसारि अस्तुति युगल प्रेमानंद मगन सन्मुख खरे ।

जय जय भगत हित सगुण सुन्दर देहधरि धावत हरे ॥

जो रूप निगमन नेति गायो बुद्धि मन वाणी परे ।

सो धन्य गोकुल आय प्रगटे धन्य यशुमानि उर धरे ॥

धन्य ब्रज धनि गोप गोपी गाय दधि माखन मही ।

धन्य गोविंद बाललीला करन माखन चोग्दी ॥

धनि धनि उरहनो देत नितउठि धन्य अनख बहावही ।

धनि सो जननी बांधि राखति जाहि वेद न पावही ॥

धन्य सो तृण जासु को रजु श्याम भुजन बँधायऊ ।
 धन्य सो तरु जासु ऊखल धनि मुजन गढ़ि ल्यायऊ ॥
 धन्य ऋषि धनि शाप दीन्ह्यो अतिअनुग्रह सो कियो ।
 जासु शिव ब्रह्मादि दुर्लभ नाथ तुम दरशन दियो ॥
 अब कृपाकरि देहु बर प्रभु चरण पंकज मति रहै ।
 जहां जन्महिं कर्मबश तहँ एक तुम्हरी रति रहै ॥
 दीनबन्धु कृपाल सुन्दर श्याम श्रीब्रजनाथ जू ।
 राखिये निज शरण अब प्रभु करिय हमहिं सनाथ जू ॥

दो० बार बार पद नाय शिर, विनती प्रभुहिं सुनाय ।
 प्रेममगन निरखत वदन, हर्षसहित दोउ भाय ॥

सो० साधु साधु कहि नाम, भक्तिदान तिनको दियो ।
 विदा किये घनश्याम, हर्षिगये निजपुर युगल ॥

बृक्ष शब्द सुनि यशुमति धाई ❀ देखे अजिर न कुँवरकन्हार्ई
 परे विटप महि लखि अकुलानी ❀ श्याम चले तरुंतर यह जानी
 आरत महारि पुकारन लागी ❀ बांधे हरि मैं परम अभागी
 सुनत शोर ब्रजजन उठि धाये ❀ नन्दद्वार सब आतुर आये
 देखि गिरे तरु मनहिं डराने ❀ दूढ़त श्यामहिं अतिहि सकाने
 बार बार सब करहिं बिचारा ❀ गिरे कौनविधि विटप अपारा
 देखे दुहुँ तरु बीच कन्हार्ई ❀ रहे त्रसित ऊखल लपटार्ई
 धाय लिये भुज छोरि उठार्ई ❀ ब्रजयुवतिन उर लीन्हे लाई
 कहत सबै नन्दहि बड़ भागी ❀ बचे श्याम कहूँ चोट न लागी
 कबहुँ बांधत मारत कबहुँ ❀ देत दोष यशुमति को सबहुँ
 नयन नीर भरि दौरि यशोदा ❀ लियो लगाय कंठभरि गोदा
 जरहु सो रजु जिनतुमको बांध्यो ❀ जरहु हाथ जिन जेवरि सांध्यो

दो० नन्दमोहिं कहिं कहा, देखितवरणि न जाय ।

कुशल रहौ अब आतदोउ, में ले मरहुँ बलाय ॥

सो० श्याम रहे लपटाय, अति समीत उर सातुके ।

वारवार बलिजाय, यशुमति मन पछितात अति ॥

ब्रजयुवती लै लै उर लावै ॥ निरखि वदन तन मन मुख पावै ॥

मुख चूमत यह कहि पछिताहीं ॥ कैसे बचे अगम तरु मार्ग ॥

बड़ी आयु हरिकी हे माई ॥ जहां तहां विधि होत महाई ॥

प्रथम पूतना मारन आई ॥ पय पीवत वह तहां नशाई ॥

तृणावर्त लै गयो उड़ाई ॥ आपहि गिम्हो शिला पर आई ॥

कागासुर आवत नाहिं जान्यो ॥ मुनी कहति जिव लेन पगन्यो ॥

शकटासुर पलना दिग आयो ॥ को जाने तिहि काहि गिरायो ॥

कौन कौन करवर विधि टारी ॥ ऊखल मां बांधे महनाग ॥

बहुतेउँ उबखो आजु कन्हाई ॥ ऊपर वृक्ष परे भटगई ॥

सवहिन पेलि करत मन भाई ॥ पुण्य नन्द के बन्धो कन्हाई ॥

भुजपर बन्धन चिह्न निहारी ॥ कहत यशोमति मां ब्रजनाग ॥

ये गुण यशुमति अहहिं तिहारे ॥ सङ्कुची महारि निगधि हरि प्यारे ॥

दो० तबहिं नन्द आये घरहिं, दोउ तरु गिरे निहारि ।

श्याम चपल बांधे सुने, देत महारि को गारि ॥

सो० बांधति है विन काज, मेरे हरि वारे सुतहिं ।

कुशल करी विधि आज, शोचत नन्द लखित म्वग्न ॥

तबहिं तात कहि धाय कन्हाई ॥ लिये नन्द कनियां मुग्य पाई ॥

चूमि वदन उरसों लपटाये ॥ प्रेम पुलकि लोचन भारि आये ॥

मेरे लाल में तुम पर वारी है काहे को बांधे महनाग ॥

कैसे गिरे वृक्ष अति भारी ॥ चली नाहिं कहुँ तनक बयारि ॥

बार बार शोचत नँदराई ❀ पूछत तैं कछु लख्यो कन्हारै
 श्याम कही मैं कछू न जानों ❀ ऊखल दिग मैं रह्यो छिपानों
 कहत बन्द हरि बदन निहारी ❀ बड़ी आज विधि करवर टारी
 बहुत दान हरिहाथ दिवायो ❀ द्विज चरणन लै लै सुत नायो
 देहिं अशीष विप्र सुख मानी ❀ भये प्रसन्न नन्द सुनि बानी
 तवहीं श्याम जननि पहुँ आये ❀ हर्षि यशोमति कण्ठ लगाये
 भूखो भयो आज मेरो बारो ❀ काको मुख धों प्रात निहारो
 ल्याई उरहन ग्वालनि भिनहीं ❀ यह सब कियो पसारो तिनहीं

दो० पहिले रोहिणि सों कह्यो, तुरत करो जिवनार ।

ग्वालबाल सब बोलि कै, बैठे नन्द कुमार ॥

सो० बेगि ल्याव री मात, भूख लगी मोकों बहुत ।

आज न खायों प्रात, सुनत बचन यशुमति हँसी ॥

रोहिणि रही चितै यशुमति तन ❀ शिरधुनिधुनि पङ्कितात मनहिंमन
 परसहु हरिहि बिलम्ब न लावहु ❀ भूखे हरि किन बेगि जिमावहु
 बहु व्यंजन बहु भांति रसोई ❀ कहँ लगि वराणि कहै कवि कोई
 परसत जात यशोमति मैया ❀ जेवत श्याम सखा बल भैया
 जो जो व्यंजन यशुमति राखे ❀ तनक तनक मोहन सब चाखे
 श्याम कही अब मात अघानो ❀ अब मोकों शीतल जल आनो
 अँचवन करि अँचये दोउ भैया ❀ अति सुख पायो लखि दोउ भैया
 सहित सुगंधि पान कर लीने ❀ बांढि सकल ग्वालन को दीने
 आता सहित आप हरि खाये ❀ अधिकै अधर अरुण ह्वै आये
 निरखत बदन मुकुर के माहीं ❀ ब्रजबासी जन बलि बलि जाहीं
 भोजन करत भयो सुख जेतो ❀ बराणि सकै नहिं शारद तेतो
 जो सुख नंदभवन के माहीं ❀ सो सुख तीन लोक में नाहीं

दो० मुख यशुमति अरु नंद को, को करि सकै बखान ।

सकल सुखन की खानि हरि, जहां रहे मुख मान ॥

सो० कोटि कोटि ब्रह्मण्ड, इक इक रोम विराटतन ।

सो अपने भुजदण्ड, लिय उछंग यशुमतिहरपि ॥

यशुमति कहत श्यामसों प्यारे ॥ मुनहु वात मेरि नंददलारे

अपनेही आंगन तुम खेलो ॥ मेरो कह्यो कबहुं नहिं पेलो

कहत चोर ब्रजवनिता तोहीं ॥ मुनि मुनि लाज लगति है मोहीं

ताते रोष होत मन मेरे ॥ तव बांधत मारत जिमि चरे

हलधर आज कहत हैं मोहीं ॥ भूँछहिं नाम धरत सब तोहीं

ग्वालिनि हँसत कहत इक ऐसे ॥ चोरी नाम फिरत अब कैसे

चोर कहत युवती सब मोकों ॥ भूँछहिं आय कदन सब तोकों

मैं खेलों बाहर जहँ जाई ॥ चितै रहत सब मेरी घाई

अपने घर सब मोहिं बुलावैं ॥ मुख चूमति गहि गहि उर लावैं

माखन म्वहिं निज करन खवावैं ॥ हाथ जोरि कै विधिहिं बनावैं

देखत जवहिं लेत मोहिं ठेरी ॥ मैं नहिं जाउँ सोह मोहिं तेरी

यशुमतिनिरखि वदन मुसकानी ॥ उनकी बात सब मैं जानी

दो० टेरि लेहु सब निज सखन, अरु भैया बलराम ।

मुख दीजै मेरे दृगन, चलहु आपने धाम ॥

सो० यह मुनि हर्ष बढ़ाय, बोलि लिये हलधर मखा ।

खेलहिं आंखमुंदाय, कहत सबनसों सुदित दगि ॥

हलधर कह्यो आंख को मुँदे ॥ हरपि कह्यो हरि जननि यशोदे

हरि अपनी तव आंख मुंदाई ॥ जहां तहां सब रहे लुकाई

कान लागि जननी समुभावे ॥ हैं वगै बलराम विषाये

बलदाऊ को आवन देहों ॥ श्रीदामा को चोर बनेहों

इत उत मैं सब बालक आई ❀ यशुमति गात छुवन सब धाई
 श्याम छुवन के कारण धावत ❀ अति अकुलात छुवन नहिं पावत
 धाये सुबल छुवत तब श्यामा ❀ गहो जाय तिरछे श्रीदामा
 कहत नन्द की सोंह जनाये ❀ जननी ढिग भुज नहिं लै आये
 हँसि हँसि कहत सखा सों रामा ❀ अब तो चोर भयो श्रीदामा
 हर्षित कहत यशोदा मैया ❀ जीत्यो है मेरो पूत कन्हैया
 जाकी माया जगत खिलावै ❀ ब्रह्मा जाको अंत न पावै
 ताहि यशोदा खेल खिलावै ❀ बालक जिभि बचनन फुसलावै

दो० जाके उर त्रयलोक थल, पंचतत्त्व चौखान ।

सो बालक है खेलई, यशुदा के गृह आन ॥

सो० दुर्लभ जप तपयोग, ज्योति रूप जगधामहरि ।

धन्यसो ब्रजकेलोग, बालक करि मानततिन्है ॥

कहत भई यशुमति महतारी ❀ भई रात अब मुनहु मुरारी
 करहु वियारू अब कहु प्यारे ❀ बहुरि खेलिये होत सबारे
 मोकों तो कहु रुचि नहिं आवै ❀ तू कहि भोजन कहा बतावै
 बेसन मिले कनक की पूरी ❀ कोमल उज्ज्वल हैं अति रूरी
 अवहीं ताती तुरत बनाई ❀ रोहिणि तुम्हरे हेतु कन्हवाई
 निंबुआ आम करील सँधानो ❀ जाते तुम अतिही रुचि मानो
 बल के संग वियारू कीजै ❀ मेरे नयनन को सुख दीजै
 तनक तनक धरि कंचन थारी ❀ लै आई रोहिणि महतारी
 श्याम राम मिलि करत वियारी ❀ अति अनंद दोउ जननि निहारी
 खात खात दोऊ अलसाने ❀ मुख जँभात जननी पहिचाने
 जल अँचवाय कमल मुख धोये ❀ बाँह पकरि पलना पौढ़ाये
 सोवत राम श्याम दोउ भैया ❀ हरुवे पाँय पलोटत भैया

दो० सोये श्याम सुजान हरि, मुख सों बीती गत ।

बहुरि कलेऊ के लिये, जननि जगाये प्रात ॥

सो० दियो कलेऊ प्रात, माखन प्यारे श्याम को ।

मुदितनिरखिदिनरात, यशुमतिहरिकेचरितको ॥

अथ वृन्दावनगमनलीला ॥

महर महरि यह मनहिं विचारी ॥ गोकुल होत उपद्रव भारी

जब ते जन्म भयो हरि केरो ॥ नितहि होत उत्पात घनेरो

आकस्मात गिरे तरु भारी ॥ बच्यो बड़न के पुगय सुगरी

ताते अब तजिये यह गाऊं ॥ बसिये चलि कहूँ उत्तम ठाऊं

नन्दराय सब गोप बुलाये ॥ समाचार ये सबनि सुनाये

सबहिं के मन में यह आई ॥ बसिये अनन कहूँ अब जाई

नितहिं उपाधि नई जिहि ठाहीं ॥ बसियो भलो तहां को नाहीं

नंद कही मैं मनहिं विचारी ॥ है इक ठाउँ बहुत सुखकारी

वृन्दावन गोवर्द्धन पासा ॥ तहँ सबको सब भाँति सुपामा

तहां गोपगण सब सुख पैहें ॥ वन में गोधन वृन्द चैहें

यह विचार सब के मन भायो ॥ चलिवे को शुभ दिवस धरायो

वृन्दावन सब चले गुवाला ॥ पांच वर्ष के मदनगोपाला

दो० शकट सौंज सब साजिके, गोधन दिये हँकाय ।

चले गोप गोपी हरपि, वृन्दावन ममुहाय ॥

सो० निरखि अनूपम ठाम, शकट दिये मन् झोरिते ।

सबके मनवश श्याम, वसे सकल वृन्दा विपिन ॥

वसे सकल वृन्दावन माहीं ॥ अति आनन्द गोप मनमाहीं

गाय वच्छ सबही सुख पायो ॥ चरत निकट नृप हनि सुजायो

हलधर धेनु चरावन जाहीं ❀ मनमोहन लखि मनहिं सिहाहीं
 प्रात चले सब गाय चरावन ❀ जननी सों बोले मनभावन
 मैं हूं गाय चरावन जैहों ❀ बड़ो भयो अब नाहिं डरैहों
 संग सखा अरु हलधर भैया ❀ इन के संग चरैहों गैया
 बालन संग यमुन तट माहीं ❀ खेलहिंगे सब बट की छाहीं
 अपनी रुचि बनके फल खैहों ❀ तेरी सों यमुना नाहिं न्हैहों
 ऐसी अबहिं कहौ जिन बारे ❀ देखहु अपनी भांति ललारे
 तनक पाँय चलिहौ किहि भांती ❀ गैयन आवत है है राती
 प्रात जात गैयन लै चारन ❀ आवत सांभ लखौ सब ग्वालन
 तुम्हरो कमलबदन मुरझैहै ❀ रंगत घाम मांभ दुख पैहै

दो० तेरी सों मुहिं घाम नहिं, लागत भूख न नेक ।

कह्यो कान्ह मानत नहीं, करै आपनी टेक ॥

सो० चले चरावन गाय, ग्वाल बाल बलदेव बन ।

हेरी टेर सुनाय, गोधन करि आगे लिये ॥

हेरी टेर सुनत लरिकन की ❀ गये दौरि हरि अतिरुचि मनकी
 इत उत यशुमति जबहिं निहारी ❀ दृष्टि न पड़े श्याम बनवारी
 बन तन जान्यो जात कन्हई ❀ टेरति यशुमति पीछे धाई
 जात चले गैयन सँग धावत ❀ बलदाऊ को टेरि बुलावत
 पीछे जननी आवत जानी ❀ फेरि फेरि चितवत भय मानी
 हलधर आवत देखि कन्हई ❀ ठाढ़े किये सखा समुदाई
 पहुँची जननि भये सब ठाढ़े ❀ रिस करि दोउ भुज पकरे गाढ़े
 बल कहै जान देहु सँग मेरे ❀ बन ते ऐहैं आजु सेवरे
 कह्यो यशोमति बलहिं निहारी ❀ देखत रहियो मैं बलिहारी
 प्रात संग गये बनहिं कन्हई ❀ यशुमति यहै कहति घर आई

देखौ हरि कैसे ढंग लीन्हों ॥ अपनी टेक पखो सोइ कीन्हों ॥
आज जाय देखहु वनमाहीं ॥ कहा परोस धखो तिहि ठाहीं ॥
दो० माखनरोटी और जल, शीतल झाक बनाय ।
दई वेगही ग्वाल सँग, यशुमतिवनहि पठाय ॥
सो० चिन्तामणि सुर भेक, पंच सुधारस कल्प तरु ।

अनुदिन जाके एक, खात झाक सो ग्वाल सँग ॥

बृन्दावन खेलत नंदलाला ॥ भयो हिये आनन्द विशाला ॥
जहँ जहँ ग्वालन के सँग जाहीं ॥ तहँ तहँ आप फिरत वनमाहीं ॥
बलदाऊ सों कहत कन्हाई ॥ नित ल्यावहु मोहिं सँग लिचाई ॥
आज मरुं करि आवन पायो ॥ जननी तुम्हरे कहे पठायो ॥
काल्हिकवनविधि करिवन ऐहों ॥ यशुमति पे आवन नहि पैहों ॥
सोवत बोलि लीजियो मोकों ॥ सोहैं नन्दववा की तो कों ॥
पुनि पुनि विनय करत मुखदाई ॥ बलि सों सखन समेत सुनाई ॥
संध्या समय निकट जब आई ॥ घर कहँ चलो कबो बल भाई ॥
गैयन घेरि करी इकठौरी ॥ चले सदन सब गावत गोंग ॥
आवत वन ते धेनु चराई ॥ ग्वालन मध्य श्याम मुखदाई ॥
जिहिजिहिभांतिग्वालमुखभाखें ॥ मुनि मुनि मन मोहन उर गावें ॥
नान्हें स्वर पुनि आपुनि गावें ॥ तारी देत हँसत मुख पावें ॥
दो० मोर मुकुट वनमाल उर, पीताम्बर पहराय ।

गोपद रज छवि वदन पर, आवत गाय चराय ॥

सो० छुटी अलक छवि देत, जलज वदनपर मधुपजन ॥

आवत सखन समेत, नंदमुखन ब्रज प्राणधन ॥

देखत नन्द यशोदा ठाढ़े ॥ रोहिणि अरु ब्रज जन मुख बाढ़े ॥
गायन संग श्याम जब आवे ॥ ले बलाय जननी उर नाये ॥

आज गयो हरि गाय चरावन ❀ मैं बलि जाऊँ तनक से पांव न
 मो कारण कछु बनते लाये ❀ तुम्हें मिली मैं अति मुख पाये
 आंचर सों सब अँग अँग भारे ❀ बदन पोंछि मुख चूमि दुलारे
 खाउ कछु जो भावै मोहन ❀ देरी माखन रोटी सोहन
 दिये जिमाय तुरत दोउ भैया ❀ अति आनन्द मगन मन भैया
 कहत जननि सों श्री ब्रजनाथा ❀ प्रात नितहिं जैहों बल साथा
 मैं अपनी अब गाय चरैहों ❀ तेरे कहे घरहि नहिं रहौ
 ग्वाल बाल गायन के माहीं ❀ नेकहु डर लागत मोहिं नाहीं
 आज न सोवों नन्द दुहाई ❀ रहिहों जागत कहत कन्हई
 सब मिलि गाय चरावन जाहीं ❀ मैं क्यों रहौ बैठि घर माहीं

दो० सोय रहौ अब श्याम तुम, जननि कहै चुचकारि ।

प्रात जान कहिहों तुम्हें, बन को मैं बलिहारि ॥

सो० ज्यों त्यों राखे स्वाय, प्रात देन बन जान कहि ।

जननी दावत पाँय, श्रमित जान बनगमन के ॥

बहुते दुख हरि सोय गयो है ❀ ज्यों त्यों करि मन बोध लयो है
 सांझहि ते लाग्यो इहि बातें ❀ जान कहत बन उठि पुनि प्रातें
 यह तो संग लागि बलरामहिं ❀ गये लिवाय आज बन श्यामहिं
 अब तो सोय रह्यो करि ऐसे ❀ प्रात विचार करै धौं कैसे
 कहत नंद बलि के संग जाई ❀ इत उत आवन दे फिरि धाई
 भोर भयो यशुमति कह प्यारे ❀ जागहु मोहन नन्द दुलारे
 बीती निशि रवि किरण प्रकाशी ❀ शशि मलीन उडुगण्य छुतिनाशी
 सुनहु शब्द बोलत खगमाला ❀ खोलहु अम्बुज नयन विशाला
 सुनत श्याम जननी की बानी ❀ जागि उठे सन्तन मुखदानी
 ल्याई तुरत कलेऊ भैया ❀ माखन रोटी खाउ कन्हैया

देत ग्वाल सखा सब द्वारे ॥ आये तब के होत मकारे
 खेलहु ब्रज भीतर ही प्यारे ॥ दूर कहं मनि जाहु लगारे
 दो० देरि उठे बलराम तब, आवहु धाय कन्हाय ।
 जात ग्वाल बनको सबै, चलहु चरावन गाय ॥
 सो० श्याम जोरि दोउ हाथ, जननी सां हाहाकरत ।
 जैहों ग्वालन साथ, गोचारन वृन्दाविपिन ॥
 देत मोहिं दाऊ री मैया ॥ जैहों बनहिं चरावन गेया
 बनफल तोरि देत मोहिं जाई ॥ आपुन घेत गेवन भाई
 जैहों अरु ग्वालन संग नाहीं ॥ मोहिं सिंहावन वे बनमाहीं
 मैं अपने दाऊ संग रहों ॥ देखत वृन्दावन मुख पैहों
 आगे दै ल्यावत मग माहीं ॥ तू क्यों जान देत मोहिं नाहीं
 लीन्हो यशुमति बलहिं बुलाई ॥ मुनहु लाल हरिके गुण आई
 कहत यशुमति सों बलमैया ॥ जान देहि मां संग कन्हेया
 अपने ढिग ते नेकु न अरों ॥ जिय परतीत तनक नहिं धागें
 तू काहे डरपति मन माहीं ॥ जान देत हरि को क्यों नाहीं
 हँसी महारि मुनि बलकी बानी ॥ जाहु लिवाय कहत नंदगनी
 मैं बलिहारी तुम्हरे मुखकी ॥ तुमहं कहत श्याम के मुख की
 अति आनन्द भयो हरि धाये ॥ दाऊ संग खरिक मैं आये
 दो० धाय धाय भेंटत सखन, उर अतिहर्ष बढ़ाय ।
 पठयो मैया मोहिं बन, चलहिं चरावन गाय ॥
 सो० कहत सखा मुख पाय, चलहु श्याम देख्यो बनहिं ।
 बनसाला पहिराय, कमत चित्र बनधानु तन ॥
 चले बनहिं सब गाय चरावन ॥ मग्य मंग मोहन मनभावन
 ग्वाल बाल सब कलुक सयान्हे ॥ नंदमुवन निनमें कहु नान्हे

गाय गोप गोसुत बन जाई ❀ तिनके मध्य श्याम सुखदाई
 हरि सों सखा कहत समुझाई ❀ छोड़ि कहूं जिन जाहु कन्हाई
 बृन्दावन अति सघन विशाला ❀ जैहौ भूलि कहूं नंदलाला
 सुनत श्यामघन तिनकी बाता ❀ मन मन हँसत कहत जगत्राता
 तुम्हरो संग न छाँड़त राई ❀ वनहिं डरात बहुत मैं भाई
 जात चले सब हर्ष बढ़ाये ❀ खेलत श्याम संग सुख पाये
 कोउ गावत कोउ बेणु वजावै ❀ कोउ नाचत कोउ कूदत आवै
 देखि देखि हरि अति हर्षाहीं ❀ कहत सखनसों दै गलवाहीं
 भली करी तुम मोकों ल्याये ❀ आज यशोमति हर्ष बढ़ाये
 इहि विधि गोधन लै सब ग्वाला ❀ यमुना तट पहुँचे नंदलाला
 दो० दर्ई धेनु बगराय सब, बरन आपने रंग ।

गाय चरावत नंदसुत, मिलि ग्वालन के संग ॥

सो० उर मुक्कनकीमाल, शीश मुकुट कटि पीतपट ।

हाथलकुटिया लाल, डोलत ग्वालनसंग प्रभु ॥

अथ बत्सासुरवध लीला ॥

खेलत श्याम सखन के माहीं ❀ यमुना के तट तरु की छाहीं
 बत्सासुर तिहि अवसर आयो ❀ पठयो कंस काल नियरायो
 बत्सरूप धरि आय समान्यो ❀ कृष्ण ताहि आवतही जान्यो
 बलतन चितै कह्यो मुसकाई ❀ तुम याको जानतहौ भाई
 वह तो असुर बत्स है आयो ❀ हमको मारन कंस पठायो
 हलधरहू देख्यो धरि ध्याना ❀ कहत साँच तुम श्याम सुजाना
 ग्वालनहूं सों कहत कन्हाई ❀ बछरा घेरि करो इक ठाँई
 ल्याये घेरि बत्स सब ग्वाला ❀ वह नहिं घिरहि चपल बिकराला
 बार बार हरि ओर निहारै ❀ दांव घात मनमाहिं विचारै

तव हरि कह्यो याहि मैं ल्यावत ❧ तुम तो याको लुवन न पावन
हाथ लकुटिया लै हरि धाये ❧ वत्सासुर के सम्मुख आये
हरि को जवहिं जुदो करि पायो ❧ असुर क्रोध करि मारन धायो
छं० धायो असुर करि क्रोध मारन श्यामके सम्मुख गयो ।
हैगयो निष्पाप तवहीं योग्य सुरपुर के भयो ॥
धायकै हरि चपरि ताको पकरि पाँय फिगइयो ।
पटव्यो धरणि तन असुर प्रगड्यो फेरि श्वास न आइयो ॥

दो० वत्सासुर सुरपुर गयो, अधम असुर तन त्याग ।
सुर हर्षत वर्षत सुमन, गगन सहित अनुराग ॥
सो० धाय परे सब ग्वाल, चकित कृष्ण बल देखिके ।
धन्य धन्य नँदलाल, कहत परम आनँद भरे ॥

असुर देखि सब अचरज पायो ❧ कहत हमें हरि आज वचायो
बद्धा करि हम जान्यो याही ❧ यह तो असुर भयानक आही
आज सबनि धरिकै यह खातो ❧ और कौन पे जान निपातो
हरपि हरपि हरिको उर लायो ❧ असुर निकन्दन नाम मुनायो
कहत ग्वाल धनि धन्य कन्हाइ ❧ धन्य धन्य व्रज प्रगटे आई
यह ऐसो तुम अति सुकुमार ❧ किहि विधि भुजन फिगय पद्माग
सबही के देखत पल माहीं ❧ माखो असुर डरे तुम नाहीं
अबलों हम न तुमहिं पहिचान्यो ❧ हौं तुम बड़े मन्नि ने जान्यो
कोउ वनमाल आनि पहिरावै ❧ कोउ वनधातु रगि तन लावै
कोउ कुण्डल शिरमुकुट सँवारै ❧ अलकावलि कोउ तिलक मुधारै
आज भुजन पर कोउ बलिहारै ❧ तन देखत कोउ वदन निहारै
वनफल तोरि धरत कोउ आगे ❧ कहत खाउ मँठे अनिलागे
दो० इहि विधि हरिको पूजिकै, ग्वाल बाल हरपाय ।

सांभ निकट आवत चले, घर को धेनु चराय ॥

सो० परम सुदित सब ग्वाल, असुरमारि आवत घरहिं ।

गावैं शब्द रसाल, ब्रजबासी प्रभु के गुणन ॥

सखन मध्य सोहत नँदनंदन ❀ जलद श्याम तन त्रिजित चंदन

मोर मुकुट पट पीत मुहावन ❀ इंद्रधनुष दामिनिहि लंजावन

मुकुटमाल वनमाल बिराजै ❀ वक्रशुक अवलि मनहुं छवि छाजे

हाथ लकुट कल कुण्डल कानन ❀ कोटि काम छवि शोभित आनन

कुटिल अलक श्रुव नैन विशाला ❀ गोपद रजकनद्युति छविजाला

बल मोहन वनते वन आवैं ❀ निरखि निरखि ब्रजजन सुख पावैं

सखन सहित हरि धामहिं आये ❀ हरषि यशोमति कण्ठ लगाये

कहत ग्वाल सुनु यशुमति मैया ❀ है तेरो रणवीर कन्हैया

बत्सरूप यक दानव वन में ❀ आय समान्यो वछरागन में

हम ताको कुछ जानि न पायो ❀ सो वह हरि को मारन धायो

क्षणहीं माहिं ताहि हरि माख्यो ❀ हम देखत महि पढ़कि पछाख्यो

यह कोउ बड़ो पूत तैं जायो ❀ भाग हमारे ब्रज में आयो

दो० सुनि ग्वालन के बचन ते, वत्सासुर को घात ।

यशुमति सब के पाँय परि, बार बार पढ़ितात ॥

सो० भयो महारि उर त्रासु, बचे आज हरि असुरतैं ।

मैं न बिगाख्यो कासु, भयो सहायक आनिहरि ॥

यशुदा शोच करत तू जाये ❀ यह तो ख्याल कान्हके भाये

परबत तुल्य बिकट तन जाही ❀ कियो प्राण विन क्षण में ताही

तुम्हरी रक्षा को यह नाहीं ❀ हम सब को रक्षक यह आहीं

याके चरण कमल चित लैये ❀ बार बार याकी बलि जैये

ग्वालन यों हरिके गुण गाने ❀ ब्रजजन सब आश्चर्य भुलाने

लीला सागर हरि मुखदानी ॐ मोहे मय नर नागि मुबानी
हँसि जननी सों कहत कन्हई ॐ देख्यों में वृन्दावन जाई
अति रमणीक भूमि डुम नीके ॐ कुञ्ज मघन निगुन नृप जीके
अति कोमल तृण हरित मुहाये ॐ यमुना के तट वन्द्य चगये
वनफल मधुर मिष्ट अति नीके ॐ मूख भिटी खाये निनहीं के
सखन संग खेलत बट छाहीं ॐ वन में मोहिं लगन डर नाहीं
रोहिणि सहित यशोदा माता ॐ मुदिन सुनत हरि की मृदु वार्ता

दो० मोहि लियो मन जननिको, मधुरे वचन मुनाय ।

कत्सासुर को शोच उर, क्षण में दियो भिटाय ॥

सो० लगे दुहन सब गाय, जहँ तहँ हर्षित गोपगण ।

गये तहां हरियाय, गाय दुहन चाहत मिस्रन ॥

अथ धेनुदुहन लीला ॥

धेनु दुहत हरि देखत ग्वालन ॐ कहत मोहिं मियवो गोपालन
में दुहिहों मोहिं देहु सिखाई ॐ बैठि गये निन मत्त कन्हई
कैसे लैया थनहि लगावत ॐ कैसे नाय पगन अद्रकावत
घुट्टन गहत दोहनी कैसे ॐ मोहिं वताय देउ तुम तेम
कैसे धार दूध की होई ॐ देहु दिखाय गोहिं सब कोई
कहत ग्वाल तुम सुनो कन्हई ॐ भई अवार आज अनि भाई
तुम को सिखवैं दुहन सवारे ॐ अब कहूँ लगिहैं चोट तुम्हारे
श्याम कछो सवहीं समुझाई ॐ भोर दुहों निज नन्द दुहाई
मेरी सों मोहिं लीजो ऐसी ॐ में दुहिहों निज नाय मेरी
देष्ट दलन सन्तन मुखदाई ॐ बड़े गैयन मांझ कन्हई
आवहु कान्ह सांझ की बेरिया ॐ कहन जननि यह दर्ई कुवेरिया
लरिकाई कहु छाड़त नाहीं ॐ सोवहु लाल आव दू माहीं

दो० आये हरि यह सुनतही, जननि लिये अँकवार ।

लै पौढ़ाये सेज पर, अजिर चांदनी चार ॥

सो० कहत कहत कछु बात, होय गये वश नींदके ।

कहत यशोमतिमात, सोय गयो हरि अजिरहीं॥

दोउ जननी हरुवै कै हरिको ❀ सेज सहित लीन्हें भीतर को

बहुत आज हरि सोय गयो है ❀ अतिहि नींद के वशहिं भयो है

नेक न बैठत थिर घर माहीं ❀ खेलन में मन रहत सदाहीं

रोहिणि कहत देहु किन सोवन ❀ खेलत हारि गयो मनमोहन

माता हरुवै पवन दुरावति ❀ निरखि वदन सुन्दर सुख पावति

प्रात जगावत नंद कि रानी ❀ उठहु श्यामसुन्दर सुखदानी

नाहिंन इतो सोइयत लाला ❀ सुनु सुत प्रातसमय शुचिकाला

उग्यो तरणि कुमुदिनि सकुचानी ❀ घरघर ग्वालनि मथत मथानी

बार बार टेरत सब ग्वाला ❀ सांझ कह्यो तुम दुहन गोपाला

होत अवार गाय सब ठाढ़ी ❀ भरि भरि क्षीर भार धन वाढ़ी

बत्स पुकारत आरत ताई ❀ दुहत नाहिं तुम सोंह दिवाई

तुम्हरे लिये ग्वाल सब ठाढ़े ❀ देखत बाट प्रेम उर वाढ़े

दो० यह सुनतहि तुरतहि उठे, शशि मुखते पटटार ।

धेनु दुहन सीखन चले, मोहन नंदकुमार ॥

सो० ल्याव रोहिणी मात, बेग तनक सी दोहनी ।

कह्यो सिखावन तात, आज मोहिं गैया दुहन ॥

रोहिणि तुरत दोहनी ल्याई ❀ घर घर ते देखन सब आई

अटपट आसन बैठि कन्हाई ❀ गोथन कर लीन्हो मुखदाई

धार अनतही जात निहारी ❀ हँसे नंद यशुमति महतारी

चिते चोर चित हरि हँसि दीनों ❀ ब्रजबासी जन वलिवलि कीनों

किये यशोमति आनंद भारी ❧ दियो दान विप्रनहिं हेकाम
गावत मंगल व्रज की नारी ❧ दुही गाय मनन दिनकारी
अति आनंद मगन नैदराई ❧ बैठे प्रमृदित गोप अयाई
लिये गोद सुंदर घनश्यामहिं ❧ व्रजके जीवन जन सुनयामहिं
आयो तहां एक वनजारी ❧ मृगा मोती बेचन दारो
तिहि लखि अटके नंदकुमार ❧ देहि देहि कहें चारम्भार
दीरघ मोल कह्यो व्योपारी ❧ रहे ठगे सब गोप निदारी
कर पर राखि रहे हरि मोती ❧ देत नहीं लखि सुन्दर जोती

अथ मोती बोलने की लीला ॥

दो० सुक्का लै हरि घर गये, बये अजिर बलवीर ।
आलवाल थल रोपिकै, पुनि पुनि सींचत नीर ॥
सो० हँसत यशोमति मात, कहत करत मोहन कहा ।
गुण नहिं जानत मात, ये करता सब जगत के ॥

भये तुरत शाखा दल तामें ❧ यशुमति अजिर मुक्त फल जामें
फूलत फलत न लागी वारा ❧ ब्रह्मादिक निव करन विचार
सुर नर मुनि कोउ मरम न जानें ❧ देखि देखि अति अचरज मानें
नन्दभवन हरि मुक्त बनाये ❧ व्रज वनिनन गुहि द्वार बनाये
व्रजवासी यह प्रभु की लीला ❧ सब गुण नमरथ सब गुणगीला
क्षणमहँ जासु रजायसु माया ❧ प्रकट करन ब्रह्मागड निजाया
ब्रह्मादिक जेहि पार न पावें ❧ नंद अजिर गो ग्याल बनवि
जाकी महिमा लखे न कोई ❧ निरगुण नगुण धरे वपु मोहि
लोक रचै नाशै प्रतिपारे ❧ सो ग्यालन संग लीला दारे
शिव विरंचि मुनि ध्यान न आवें ❧ ताहि यशोमति गोद विन्यावे

अगम अगोचर लीलाधारी ❀ सो बृन्दावन कुंजविहारी
 बड़े भाग्य सब ब्रज के वासी ❀ जिनके संग विहरत अविनासी
 दो० धनि धनि ब्रजके नारिनर, धनि यशुदा धनिनंद ।
 बिहरत जिनके सदन में, ब्रह्म सच्चिदानंद ॥
 सो० कहि कहि देव सिहाँय, धन्य धन्य ब्रज वाग बन ।
 जहाँ चरावत गाय, सकल सुरन शिरमुकुटमणि ॥

अथ बकासुर बध लीला ॥

प्रात चले उठि गाय चरावन ❀ हलधर सुन्दर श्याम सुहावन
 देखत छवि ब्रज सुंदर गाढ़ी ❀ करत परस्पर आनंद वाढ़ी
 देखु सखी ब्रज ते बन जाहीं ❀ बल मोहन ग्वालन के माहीं
 रोहिणि सुत छवि गौर मुहाई ❀ यशुमति सुवन श्याम मुखदाई
 ओढ़े नील पीत पट सोहैं ❀ सो छवि निरखि वदन मनमोहैं
 युगल जलद धन दामिनि जानौ ❀ जों रतिनाथ परस्पर मानौ
 शीश मुकुट कल कुण्डल कानन ❀ भलकैं बिध कपोल छवि आनन
 सखन मध्य सोहत नंदलाला ❀ मंद हँसनि दृग कमल विशाला
 कटिर्किंकिणि कर लकुट मुहाये ❀ जात चले बन मनहिं चुराये
 रहीं थकित लखि छवि ब्रजनारी ❀ गये वनहिं विहरत वनवारी
 बन बन फिरत चरावत गैया ❀ हलधर श्याम सखा इक दैया
 करत विहार विविध बनमाहीं ❀ बालकेलि रस वरणि न जाहीं
 दो० कबहुँ गावत सखन संग, कबहुँ बजावत बेनु ।
 धौरी धूमरि नाम लै, कबहुँ बुलावत धेनु ॥
 सो० कबहुँ नचावत मोर, सुन्दर श्यामल जलदतन ।
 गरज मुरलि घनघोर, बरषत परमानंद जल ॥

खेलत विविध खेल मनभावन ॥ श्री वृन्दावन परम सुहावन
तृपित जानि गैयन नंदलाला ॥ कह्यो चलहु जल देन गुगुलाला
लेहु बुलाय सुरभि गण ॥ ऐसी सुनत ग्वाल सब लाये धैर
गोधन वृन्द हांकि सब लीनों ॥ ग्वालन गमन यमुनतट कीनों
तहां वकासुर छल करि आयो ॥ माया रचित स्वरूप बनायो
एक चोंच भूतल महुँ लाई ॥ एक रहा आकाश नमाई
मग में बैख्यो वदन पसारी ॥ ग्वालन देखि भयो भय भागे
बालक जात हते जे आगे ॥ ताहि देखि सो पाछे भागे
कहत भये सब हरिसों आई ॥ आगे एक बलाय कन्हाई
आवत नितहि ग्वाल इहि ठाहीं ॥ ऐसी कबहुँ लग्यो हम नार्ही
तवहिं कृष्ण ताको पहिंचान्यों ॥ आय वकासुर में यह जान्यों
पल में आज याहि में मारों ॥ असुर चोंच धरि वदन विदागों

दो० निडर श्याम आगे भये, चले वकासुर पाम ।

कहत सखा सब श्यामसों, नहिं जीवनकी आस ॥

सो० अबहूँ नाहिं डरात, बचे किते उतपात तें ।

चले कहां हरि जात, हम वरजत मानत नहीं ॥

तब हरि कह्यो चलहु तिहिपासा ॥ सब मिलि मारि कर्गहिं वकनाना
जब हरि संग चले सब ग्वाल ॥ देख्यो जाय वकाहिं धिकगना
ताके निकट गये सब जवहीं ॥ लियो लीलि हरिको वक तवहीं
जान्यो असुर काज में कीन्ह्यों ॥ तवहीं वदन मंदके लीनों
ग्वाल पुकारत आरत भागे ॥ बल में आय कहन सब लागे
हम वरजत हठि गये कन्हाई ॥ लीन्हें लीलि असुर वकधाई
हरि चरित्र कहु जानि न जाहीं ॥ उपजी आगि असुर नननाहीं
लाग्यो जरनिभयो अतिव्याकुल ॥ हरिको उगिल दिया अनिआकुल

बहुरों पकरन को मुख बायो ❀ चोंच पकरि हरि चीरि बहायो
 मरत विकार असुर अतिमारी ❀ व्याकुल भये ग्वाल भयभारी
 ग्वालन बिकल देखि बलरामा ❀ कहत असुर माखो घनश्यामा
 टेरे उठे उत कुँवर कन्हई ❀ आवहु सखा बृन्द सब धाई
 दो० बक बिदारि हरि सखनको, टेरेत आवहु धाय ।

चोंच फारि मारेउ असुर, तुमहूँ करौ सहाय ॥

सो० गये सखा सब धाय, सुनत श्याम के वचनवर ।

निरखिनयनसुखपाय, पुनिपुनि भेंटत पुलकतन ॥

कहत परस्पर सखा सयाने ❀ ये कोउ ब्रज प्रकटे हम जाने
 इन्हैं नाहिँ कोउ घात करैया ❀ ये हैं असुरन के दलवैया
 जबते इन्हैं यशोमति जाये ❀ तवतें असुर कितेकउ आये
 तृणा पूतना शकटा मारे ❀ तव ये रहे बहुत ही वारे
 हम देखत बत्सासुर माखो ❀ कितक बात यह बका विदाखो
 इनके गुण कछु जानि न जाहीं ❀ हम अपने जिय डरे बृथाहीं
 धनि यशुमति जिन इनको जाये ❀ धनि हम इनके सखा कहाये
 बकहि मारि सुंदर घनश्यामा ❀ यमुना तट आये सुखधामा
 सुरभी गण सब नीर पियाये ❀ सखन समेत आप प्रभु आये
 घसि बन धातु चित्र तन कीन्हो ❀ मोर मुकुट माथे धरि लीन्हो
 बनमाला रचि सखन बनाई ❀ प्रेम सहित हरिको पहिराई
 बन फल मधुर गोपलै आये ❀ सखन सहित हरि भोग लगाये

दो० बल मोहन घरको चले, जानि सांकरी वेर ।

लीनी गैया घेर सब, मुरली की धुनि टेरे ॥

सो० चले बजावत बेन, ग्वाल बृन्द के मध्य हरि ।

अँग अँग छबिकी सैन, ब्रजजन मोहन सांवरो ॥

मुनि मुरली की ठे रसाला ॥ देखन को धाई व्रजबाला ॥
 कहत परस्पर अति मुख पावत ॥ देखु सर्वा वनने हरि आवत ॥
 नाना रङ्ग सुमन की माला ॥ श्याम हिये छवि देन विशाला ॥
 मोर पक्ष शिर मुकुट विराजै ॥ मधुर मधुर मुख मुरली वाजे ॥
 भृकुटी विकट निकट मुखदाई ॥ तिलक रेख छवि बगिनि न जाई ॥
 कुण्डल लोल अलक धुँधराई ॥ निरखु सखी लागन अतिप्यारी ॥
 नासा निकट अधर अरुणार्द्र ॥ जनुशुक विम्वहि चोंच चलाई ॥
 मन्द हँसनि घन दामिनि जैसे ॥ दुरि दुरि प्रकट होतहे तेने ॥
 तन घनश्याम कमलदल नैना ॥ बोलत मधुर मनोहर बेना ॥
 मुख अरविन्द मन्द मुर गावत ॥ नटवर रूप सखन मन भावत ॥
 सब अँग चन्दन खौर बनाये ॥ गुंजमाल मन लेत दुगये ॥
 या मोहन छवि परबलि जैये ॥ नँदनन्दन देखत मुख पेये ॥

दो० ग्वालवाल गोधन लिये, हरि हलधर दोउभाय ।

सांभ समय वनते चले, आये धेलु चराय ॥

सो० रांभति धाई गाय, बत्स मुरति कर पय स्रवत ।

हरषि यशोदामाय, कहति श्याम आवत घगति ॥

इतनी कहत श्याम घर आये ॥ जननी दौरि हरषि उ लाये ॥
 व्रज लरिका सब तुरतहि धाये ॥ महरि महर पद शीश नचाये ॥
 ऐसो पूत धन्य तुम जायो ॥ इनको गुण बहू जान न गाये ॥
 आज गये वन गाय चरावन ॥ चले यमुन नद जगहि पिवावन ॥
 तहां असुर एक खगतनुधारी ॥ रव्यो यमुन नद चदन पदारी ॥
 एक चोंच महि सों लपटाई ॥ एक रव्यो आकाश लगाई ॥
 हम वरजत पहिले हरि धायो ॥ नाके मुख में जाय लगायो ॥
 हम सब डरषि भजे बलपासा ॥ अनिव्याकुल नन भये विगसा ॥

कैसे धौं हरि बाहिर आयो * चोंच फारि तेहि मारि गिरायो
 सुनत नन्द यशुमति ब्रजनारी * चकितचित्त रहे हरिहि निहारी
 यशुदा कहति कहा कोउ जानै * नितप्रति होत आनकी आनै
 भयो आज कोउ सुकृत सहाई * विधिकी गति कहु जानि न जाई
 दो० जन्म भयो है श्याम को, तबते यहै उपाधि ।

कह्योसखोहमरेयतन, विधिगतिअगमअगाधि ॥

सो० किन धौं करी सहाय, को जानै भावी प्रबल ।

को मेरे पछिताय, करी अयानी बूझ बिन ॥

लै बलाय छतिया हरि लाये * प्रेमसलिल लोचन भरि आये
 मैं बलिजाउँ कहत कहु खाहू * तुम कित गांय चरावन जाहू
 नन्दमहर सों पिता तुम्हारी * मोसी मात जाय बलिहारी
 खेलत खात रहौ अपने घर * दधिमाखन पकवान विविध वर
 निरखि बदन सुनि वचन तुम्हारे * लोचन श्रवण सिरात हमारे
 दुष्ट दलन भक्तन सुखदानी * बोले मधुर मातु सों वानी
 मैया मैं न चरैहौं गैया * अब बन मेरी जात वलैया
 मोसों सबै ग्वाल बन जाई * गाय घिरावत हैं बरिआई
 दौरत मेरे पायँ पिराहीं * जब मैं बैठि रहौ तरुछाहीं
 जो न पत्याय बूझ बल भाई * देहि आपनी सौंह दिवाई
 यहसुनतहियशुमति रिसियानी * गारि देत ग्वालन दुखमानी
 मैं पठवत लरिकहि बन जाई * आवहि तनिक मनहि बहलाई

दो० जानहि कहा चरायकै, अबहीं मोहन गाय ।

अति बारो मेरो सुवन, मारत ताहि रिंगाय ॥

सो० हरिजन के सुखदाय, को जाने हरि के चरित ।

मधुरे वचन सुनाय, मोहि लियो मन मातको ॥

अथ चकई भवँरा खेलन लीला ॥

कलुक लाय हरि निशि को सोये ॥ प्रात जगाय जननि मुख धोये ॥
 कियो कलेऊ कलु मुखदाई ॥ जननी सों बोले हर्षाई ॥
 दे मैया भवँरा चकडोरी ॥ खेलत रहिहों ब्रजकी नोहि ॥
 हर्षि जननि आरे पर भाखे ॥ तुम हित नये मोल ले राखे ॥
 लै आये हरि तुरत निकारी ॥ भये मगन अति रंग निहारी ॥
 बारवार हर्षित मुख भाखै ॥ मैया विन अरु को ले राखे ॥
 विहँसि चले फेरत चकडोरी ॥ खेलन सखन सह ब्रजखोरी ॥
 जैसे आप सखा सब तैसे ॥ सुन्दर कोटि मनोभव जैसे ॥
 निरखि निरखिछवि गोपकिशोरी ॥ बारवार डारन तृण तोरी ॥
 सहहिन को मनमोहन भावें ॥ सब ब्रजतिय हरिनों मनलावें ॥
 यह वासना करें ब्रजवाला ॥ होहिं हमारे पति नंदलाला ॥
 हरि अन्तर्यामी सब जानें ॥ सबके मनकी रचि पहिचानें ॥
 दो० चितदै जो हरि को भजै, कोऊ कौनेहु भाव ।
 ताको तैसेई सदा, प्रगटत त्रिभुवन राव ॥

सो० भक्तन के सुखदान, भक्तवद्भल भगवानहरि ।
 नारि पुरुष नहिं मान, प्रेमभाव के बश मदा ॥

गोपिन के यह ध्यान सदाई ॥ नेक न अन्तर होहिं कन्हाई ॥
 हरि उनके मनकी रचि जानी ॥ कहिं वान उनके मनगानी ॥
 मारग चलत तिन्हें हटि रोकें ॥ खेलन यांक जहाँतहें रोकें ॥
 चकई भवँरा डोरि फिरावें ॥ तिनके भूषण नों अरु नावें ॥
 काहूसों हरि वदन सकोरें ॥ काहू सों दग वदन मंगोरें ॥
 काहू सों आँखियां मटकावें ॥ आप हंसैं अरु उन्हें हँसावें ॥
 युवतिन के मन बसे कन्हाई ॥ देखे विन इक पल न मुटावें ॥

हरिको खेलत मांझ खिभावैं ❀ खटकौरी दै गारी गावैं
 गेंद उरोजन माहिं दुरावैं ❀ इहिविधि हरिसों अङ्ग छुवावैं
 कंचुकि फारि आपही लेहीं ❀ यशुदहि जाय उरहनो देहीं
 अन्तर भुजगाहि हरिहिं दुरावैं ❀ कहैं चलो नँदरानि बुलावैं
 यशुमति पै तुमको लैजैहैं ❀ कुटिल भौंह किय हम न डरैहैं

दो० यों ब्रजबनितन नेहबश, आनँदद्ववि घनरास ।

रसिक पुरंदर सांवरो, ब्रजमें करत विलास ॥

सो० अबबरणों सुखखानि, हरिवृषभानकुमारिको ।

प्राण एकही जानि, प्रथममिलनदोउदेहको ॥

अथ राधाजू की प्रथम मिलनकी लीला ॥

खेलन हरि निकसे ब्रजखोरी ❀ मेघश्याम तन पीत पिछोरी
 श्रवणन कुण्डल की छबिछाजै ❀ मोर पखनको मुकुट विराजै
 दशन दमक दामिनि द्युति थोरी ❀ हाथ लिये फेरैं चकडोरी
 गये यमुन के तट मन मोहन ❀ नाहीं तहां सखा कोउ गोहन
 औचक दृष्टि परी तहँ राधा ❀ प्रेमराशि गुण रूप अगाधा
 नयन विशाल भाल दिये रोरी ❀ नीलवसन तनकी छवि गोरी
 बेनी पीठ करत झकझोरी ❀ अति छविपुंज दिननकी थोरी
 संग लरिकिनी आवत देखी ❀ चितै रहे मुख रोक निमेखी
 रीझि रहे घनश्याम कन्हारै ❀ अनुपम छवि लखि रहे लुभाई
 नयन वयन मिलि परी ठगोरी ❀ बूझत श्याम कौन तैं गोरी
 रहत कहां काकी है बेटी ❀ अबलौं नहीं कहूं ब्रज भेंटी
 काहे को हम ब्रज तन आवैं ❀ खेलत रहत आपने गावैं

दो० सुनत रहत श्रवणनसदा, नँददोटा ब्रजमाहिं ।

घरघरते नित चोरिकै, माखन दधिलै खाहिं ॥

सो० बिहँसि कह्यो घनश्याम, तुम्हरो कहा चुगइहैं ।

आवहुकिनप्रजधाम, नितहिखेलियेसंगमिलि ॥

रसिक शिरोमणि नागर दाऊ ॥ प्रीति पुरानन जान न कोऊ

ब्रजवासी प्रभु कुंजविहारी ॥ वातन भुरे लई हरि प्यारी

प्रथम सनेह दुहुन मनजान्यो ॥ गुप्त प्रेम शिशुना प्रगटन्यो

कहत श्याम मनकत सकुचावहु ॥ खेलन कवहुँ हमार आवहु

दूर नहीं कुछ सदन हमारो ॥ श्रवणन मुनियन बात पुकारो

लीजो मोहिं ऐरि नंद पोरी ॥ कान्ह नाम मेरो लुनु गोरी

मूधी बहुत देखियत तुमहुँ ॥ ताते साथ कीजियन हमहूँ

तुम्हें ववा वृषभान दुहाई ॥ घरी पहर खेलहु इन छाई

गैयां गिनन नंद जब जेह ॥ तिनके संग हमहुँ उन पेह

जो तुम गाय दुहावन ऐहो ॥ खरिक मांफ तो मांको पेहो

रसिक शिरोमणि जानत राई ॥ इमि प्यारी संकेत बुलाई

मुनत गूढ़ हरि की मृदुवानी ॥ मनही मन प्यारी मुसुकानी

दो० गुप्तप्रीति प्रकटी नहीं, दोउअनु हृदय छिपाय ।

मनमोहन प्यारी चली, घरको नयन चलाय ॥

सो० चली सदन सुकुमारि, मनमें उरभो भांवरो ।

जानी वड़ी अवार, सात वाम उर आनिके ॥

कहत सखिन सों चली कुँवरिक ॥ को जेह खेलन इनके घर

चलो वेग अपने घर जाहीं ॥ भई अवार दमन नद माहीं

वचन कहत ऊपर मुखपाहीं ॥ हृदय प्रेम दुख मन हगियाहीं

गई भवन वृषभान कुमारी ॥ जननी कहति कहाहुनिप्यारी

अबलों कहाँ अवार लगाई ॥ गया खरिक देन में छाई

ऐसे कहि मातहिं वलराई ❀ अन्तर्गति वसिरहे कन्हारै
 बिरह बिकल तन गृह न सुहाई ❀ सुन्दर श्याम मोहनी लाई
 खान पान कछु नेक न भावै ❀ बंचल चित्त पुलकि तन आवै
 मात पिता को मानत त्रासा ❀ नयनन हरि दर्शन की आसा
 कहत दोहनी दे मोहिं मैया ❀ जैहों खरिक दुहावन गैया
 अहिर दुहत तव गाय हमारी ❀ जब अपनी दुहि लेत सवारी
 घरी एक मोहिं लागि तहँ जाई ❀ तू मति आउ खरिक अतुगई

दो० लई मात सों दोहनी, चली दुहावन गाय ।

मन अटको नँदलाल सों, गई खरिक ससुहाय ॥

सो० मग मग शोचत जाय, कव देखों वह सांवरो ।

जिन मनलियोचुराय, खरिकमिलनमोसों कह्यो ॥

देखे जाय तहां हरि नहीं ❀ भई चकित प्यारी मनमाहीं
 कबहूँ इत कबहूँ उत डोलै ❀ प्रेम विकल कछु मुख नहिं बोलै
 देखे नन्द संग हरि आवत ❀ ललकि लगे लोचन मुख पावत
 देखी श्याम राधिका ठाढ़ी ❀ लई बुलाय प्रीति अति वाढ़ी
 कह्यो गहर लागि खेलहु दोऊ ❀ दूरि कहुँ मति जैयो कोऊ
 सुनि बृषभानसुता इत आई ❀ अपने साथ खिलाव कन्हारै
 हरि तन रहियो नेक निहारै ❀ कोई कहुँ गाय जिन मारै
 नन्दबबा की बात सुनो हरि ❀ जाहु न मो ढिगते कतहूँ दरि
 महर सौँपि हमको तुम दीन्हों ❀ राधे हरिहि बांह गहि लीन्हों
 तुमको कहुँ जान नहिं दैहों ❀ जो जैहौ तो पकरि ले ऐहों
 मेरी बांह छोड़ दे राधा ❀ कहत श्याम ऊपर मन साधा
 तुम्हरी बांह न तजौँ कन्हारै ❀ महर खीझि हैं हमको आई

दो० परम नागरी राधिका, अति नागर ब्रजचन्द ।

करत आपनी घात दोउ, बँधे प्रेम के फन्द ॥

सो० समुझि पुरातन नेह, ब्रजविलास हित तन धरे ।

चलन चहत वन गेह, युगल विहारी कुंज के ॥

तवहि श्याम घन घटा उठाई ॥ गरज मेघ महि चहुँ दिशि छाई

पवन झकोर चली झकझोरी ॥ चपला चपल चमक चहुँ ओरी

है गड़ भूमि सकल अधियारी ॥ तैसिय तरुणमाल चुनिकारी

डरे देखि के कुँवर कन्हारै ॥ कह्यो राधिका सों नंदरारै

कान्है संग लिये घर जा री ॥ भई अकाश घटा अति भारी

लिये बांह गहि कुँवर कन्हारै ॥ चले युगल वन घर घर जाई

नवल राधिका नवल विहारी ॥ पुलक अंग मन आनंद भारी

नवल नेह नवरंग मन भायो ॥ नवल कुंजवन सुभग सुहायो

नवल सुगन्ध नवल तरु फूले ॥ गुंजत भ्रमर मन रम भूले

सुभग, समुन जल पवन झकोरै ॥ उठन श्याम छाँव कुंज हिंडोरै

वनज विपुल बहु रंग सुहावन ॥ चारु विचित्र पुत्तिन अनि पावन

गये युगल तहँ रसिक रसीले ॥ नागर नवल प्रेम रम गीले

दो० विहरत विविध विलासवन, युगल रूपकी रास ।

गुण गावत सुनि वेद विधि, अहिपतिपतिकेलास ॥

सो० अति रहस्य सुखदाय, वन विहार नंदलालका ।

क्यों सो कहै कवि गाय, वेद भेद पावैं नहीं ॥

अथ श्लोक गीतगोविन्द ॥

मेघैमेंदुरमम्बरं वनभुवश्श्यामास्तमालद्रुमेनकृष्णमोदयं स्वमेव-

दिमं राधे गृह्मप्रापय । इत्थं नन्दनिदेशनश्चलितयोः प्रत्ययकुंज-

द्रुमं राधामाधवयोज्ज्वयन्ति यमुनाकूलेरुदःकेलयः ॥ १ ॥

चले सदन प्रभु कुंजविहारी ❀ गृह पठई अंकम दै प्यारी
 प्यारी की सारी हरि लीन्ही ❀ पीत पिछौरी प्यारिहि दीन्ही
 बादर जहँ तहँ दिये उड़ाई ❀ आये सदन श्याम मुखदाई
 रही यशोमति हरिहि निहारी ❀ ओढ़े देखि शीशपर सारी
 मन धौं कहत कहां यह पाई ❀ पीत पिछौरी कहां गँवाई
 यशुमति तुरत आंख पहिंचानी ❀ व्रजश्रुतिन भुरये यह जानी
 पूछत हरिहि विहँसि नँदरानी ❀ तरुणिन की सिखई बुधिठानी
 पीत पिछौरी कितहिं विसारी ❀ यह तौ लाल तियन की सारी
 जानि लई जननी हरि जानी ❀ तब यक बुद्धि तुरत उर आनी
 मैं लै गाय गयो यमुना री ❀ तहँ वह भरति हुती पनिहारी
 बिड़रीं गाय भर्जीं सब नारी ❀ बची वँसुरिया बहुत सँवारी
 हौं लै भजो और की सारी ❀ सो लै चादर गई हमारी

दो० पीत पिछौरी लै भजी, मैं पहिचानत वाहि ।

मैयारी मैं जाय कै, घर लै आवत ताहि ॥

सो० हरि माया को जानि, पीताम्बर ताको कियो ।

जननिदेखायो आनि, कहतलै आयों ताहिसों ॥

राधा गई सदन समुहाई ❀ हाथ दोहनी दूध भराई
 परम प्रीति हरि वसन दुरायो ❀ जननी द्वारहिं ते गोहरायो
 और कि और कहत मुख वानी ❀ जननी दौरि देखि भयमानी
 कहत दीठि लागी कहुँ वारी ❀ उर लगाय पछितात निहारी
 बूझत नेह बिकल महतारी ❀ कहा भयो राधा तोहिं प्यारी
 अबहीं खरि क गई तू नीके ❀ आवत कौन बिथा भइ जीके
 इक लरिकिनी संग ही भरे ❀ कारे इसो आय तिहिं नेरे
 मूर्च्छि परी वह धरणि मँझारी ❀ मैं डरपी अपने जिय भारी

श्यामवरण यक दोय आयो ॥ कहत सुनो वह नंद को जायो
कहु पढ़िकै उन तुरतहि भारी ॥ जानत नहीं कौन की वारी
मेरे मन भरि त्रास गयोरी ॥ अब कहु नोको नेक भयोरी
अति प्रवीण वृषभानदुलारी ॥ यह कहि समुझाई महतारी
दो० सुनि जननी राधा वचन, उरसों लीन्हीं लाय ।

कहत टरी करिवर बड़ी, बार बार पछिताय ॥

सो० एक सुता है तात, पायो वेदन द्वार परि ।

भई आज कुशलात, बची सर्प ते लाड़िली ॥

खीभी कहुक कुँवरि पै जननी ॥ घर नहिं रहति फिरति भइ हरनी
कितनो कहत तोहिं मैं हारी ॥ दूर कहूं बाहेर जिन जा री
हैं लरिकिनी सवन घरमाहीं ॥ तोसी निडर कहूं कोउ नाहीं
कवहुं खरिक कवहुं वन जाई ॥ कवहुं फिरत यमुनातट धाई
चितै अकाश धरत पग धरनी ॥ वात कहत लागत तोहिं जरनी
सात वरप की भई कुमारी ॥ बहुत महर वृषभानदुलारी
आज कुशल कुलदेवन कीन्ही ॥ विधि वचाय विषधर ते लीन्ही
शीतल जल लै तुरत न्हाई ॥ अंग अँगोछ बसन पहिराई
वारहि बार कहत कहु खा री ॥ अब कहुं खेलन दूरि न जा री
यह सुनि हँसी मनहिं मनप्यारी ॥ हृदय ध्यान हरि कुंजविहारी
कहत दूर अब कतहुं न जैहों ॥ गोप घरहि खेलत नित रहिहों
जिनके गुणन विराधि भुलाने ॥ तिनके चरित कहा कोउ जाने

दो० जन रंजन भंजन कलुप, राधा नन्दकुमार ।

गुप्त प्रकट लीला करत, ब्रजमें युगल विहार ॥

सो० देखि अनूपम पाल, मात पिता गुरुजन हरिहि ।

असुरलखतविकराल, नवकिशोरचितचोरतिय ॥

सर्व रूप सब घट के बासी ❀ सब विधि करन सकल सुखरासी
 सर्व भाव सब फल के दायक ❀ सर्वोपरि सब गुणके लायक
 सर्व आदि सब अन्तर्यामी ❀ सब ते परे सकल के स्वामी
 माया ब्रह्म कृष्ण अरु राधा ❀ प्रेम प्रीति दोउ परम अगाधा
 छवि शृंगार मनहुं इक जोरी ❀ करत विहार श्याम अरु गोरी
 बसे श्याम श्यामा उर माहीं ❀ देखे बिन भावत क्षण नाहीं
 खेलन मिसु बृषभानकिशोरी ❀ आई नन्द महरि की पौरी
 टेरत मधुर बचन सकुचाई ❀ घर भीतर हैं कुँवर कन्हैया
 सुनत श्याम कोकिल समवानी ❀ अति आतुर राधा पहिचानी
 माता सों कलु कलह करत घरि ❀ तुरतहिं सो विसराय दियो हरि
 तू पहिचानति इन को मैया ❀ कहत वारही वार कन्हैया
 मैं यमुनातट काहि भुलान्यों ❀ बांह पकरि मोको इन आन्यों
 दो० तू सकुचति आवति इहां, मैं दै सौंह बुलाय ।

अति नागर जननी हृदै, दियो प्रेम उपजाय ॥

सो० भीतर लेहुबुलाय, कहत मात हरिसों निरखि ।

चलेश्यामसुखदाय, लखि प्यारी आनंद भयो ॥

नैन सैन मिलि दोउ सुख पायो ❀ विरह ताप दुख द्रंद नशायो
 मनहीं मन आनंद अति भारी ❀ भये मगन दोउ रूप निहारी
 कहत श्याम राधा किन आवै ❀ तुमको यशुमति माय बुलावै
 बांह पकरि ल्याये वनवारी ❀ यशुमति बोलि निकट बैठारी
 देखि रूप मन मांझ सिहानी ❀ वृक्षत नन्द महर की रानी
 ब्रज में तोहिं न कबहुं निहारी ❀ कौन गांव है तेरो प्यारी
 को तेरो तात कौन महतारी ❀ कहा नाम तेरो है प्यारी
 भूलि गयो है कालि कन्हैया ❀ भली करी तू कर गहि ल्याई

धन्य कोख जिन तो कहँ धारी ❧ धन्य वरी तू जेहि अवतारी
देखि रूप यशुदा अभिलाषी ❧ सविता माँ धिनर्ता करि भारी
नयन विशाल वदन शुभ छोटी ❧ भली बनी है सुन्दर जोड़ी
वार वार वृक्षत हरपाई ❧ है तू कौन महर की जाई
दो० मैं बेटी वृषभान की, तुमको जानत माय ।

बहुतवार मिलनो भयो, यमुनाके तट आय ॥

सो० अब मैं लीनी जान, वे तो कुलटा हैं बड़ी ।

हैं लांगर वृषभान, गारिदेत हैं सिनैद वरनि ॥

राधा बोलि उठी इत आई ❧ करी कछू बाधा लंगरई
ऐसो समरथ कब उन पायो ❧ हैंसि यशुमति राधा उर लायो
कहति महरि कीरति हम जोटी ❧ अब कीजत है तेरी चोटी
यशुमति राधा कुँवरि सँवारी ❧ प्रेम सहित वागनि निग्वारी
बड़े वार कोमल अति करे ❧ लै सुमना मुन आँख मँवारी
माँग पारि बेनी रचि गृथी ❧ मानहुं सुंदर छवि की रूथी
गोरे वदन बिंदु करि बन्दन ❧ मानों इंदु मध्य भुविनन्दन
सारी नई सुरंग निकारी ❧ यशुमति अपने हाथ मँवारी
वदन पोछि अम्बर सो दीनो ❧ उर आनंद निगवि छवि कीनो
तिल चावरी बतासे मेवा ❧ कुँवरि गोदभरि धिनवन देवा
कह्यो कान्हू सँग खेलहु जाई ❧ यह मुनि कुँवरि मनहि हरपाई
सुंदर श्याम सुंदरी राधा ❧ खेलत दोउ छविमिधु अगाधा

छं० छविसिंधु पशु अगाध दोऊ नंदनदन विगजर्ही ।

लखिरूप कोटिक कामरनि घनदाभिनी युति लाजर्ही ॥

यशुमति विलोकति चकिन देखति रूपमनआनंदमरी ।

सोइभावदेख्यो दुहुँन के उर जोइ अभिलाषा करी ॥

दो० खेलत दोउ भगरन लगे, भरे परम अहलाद ।

मानों घन अरु दामिनी, करत परस्पर बाद ॥

सो० अमियबचनरसमूल, अकथनीयछविअमितगुण ।

रही यशोमति भूल, युगलकिशोर बिहार लखि ॥

चली महरिसों कहि सुकुमारी ❀ सदन आपने जानि अवारी
यशुमति निरखि कह्यो हरषाई ❀ खेल्योकरि हरि संग नित आई
बोलि उठे मोहन सुन राधा ❀ तू कत सकुच करै जिय बाधा

मैं बोलत तू आवत नाहीं ❀ जननीसों डरपति मनमाहीं
तोको लखि मैया सुख पावै ❀ देखि कितो करि ओह बुलावै
मुनि मोहन के बचन सयानी ❀ चितैरही मुख मन मुसकानी

बिहँसि चली बृषभानदुलारी ❀ हरिमूरति उर दस्त न ठारी
गई सदन बूझत महतारी ❀ कहां हुती अवलौं री प्यारी
बेनी गूँथि मांग किन कीनी ❀ बेंदी भाल लाल किन दीनी

खेलत रही नन्द के द्वारी ❀ यशुमति बोलि निकट बैठारी
बूझन नाम लगी पुनि मेरो ❀ बाबा को पूछेउ अरु तेरो
मोहिं चितै पुनि सुतहि निहारी ❀ कछु सबिता सों गोद पसारी

दो० मेरी शिर बेनी गुही, बेंदी लाल बनाय ।

पहिराई निज हाथ सों, सारी नई भँगाय ॥

सो० तिल चावरि दै गोद, बिधना सों विनती करी ।

उर करिकै अति मोद, तोहिं बिहँसि गारीदई ॥

बिहँसि कह्यो तोको नँदरानी ❀ वह जैसी तैसी हम जानी
तोहिं नाम धरि धख्यो बबाको ❀ कह्यो भूत बृषभान सदाको
तब मैं कह्यो ठग्यो कब तुमहीं ❀ हँसि लपटानि लगी तब हमहीं

मुनि कीरति राधा की बातें ❀ सरल स्वभाव भरी शिशुतातें

कहत ज्वाय तैं नीको दीनो ॥ बेरी दांव आपना लीनो
जो कहू मोहिं कह्यो नँदवानी ॥ सो सब है उनहीं की कली
हँसि हँसि कीरति कहत सुभाये ॥ मन में अति आनंद बताये
फेरि फेरि यशुदा की बातें ॥ वृभक्त हैं जननी राधा ने
मुनि मुनि बरसाने की नारी ॥ गावन यशुमति को हितगारी
मुनि बातें कीरति मुसकानी ॥ नँदरानी के जियकी जानी
मेरी सुता विमल चपलासी ॥ वे हरि मेघ श्याम लविगनी
बाढ्यो उर आनंद हुलासी ॥ कीरति गई समुझि पति पानी

छं० समुझि पति के पास कीरति गई अति आनंद भरी ।
प्रीति रीति जनाय हित सों बात सब परघट करी ॥
भयो अति उत्साह दम्पति हरिपि मन आनंद भरे ।
नित्य दूलह श्याम श्यामा वेद गुण गावन गरे ॥

दो० युगलकिशोर स्वरूप वर, वृन्दावन रमन्वान ।
नव दूलहिन दूलह सदा, राधा श्याम मुजान ॥

सो० दूलह दूलहिन चार, मांडव वृन्दाविपिन के ।
गावत नित्य विहार, रोप महेश गणेश विधि ॥

कहत यशोमति सों हरि प्यारे ॥ जहँ नहँ रहत बिलौना उरे
राधा जिन लै जाय चुराई ॥ आवत नांक नवार नवई
चितै रहत मुरली की बाहीं ॥ मेगे प्राण बचन डहि माहीं
तेरे भाये नेक न माता ॥ राखु उठाव मान सों बाता
बलहू को पतियाय न राई ॥ राखु बिलौना नवहि विपहि
कहत जननि हँसि लालन मेरे ॥ को लै जाय बिलौना तेरे
नेक सुनत ताको जो पाऊँ ॥ बाको ब्रज नैं दाव नखाऊँ
बिन देखे तू काको कहिहूँ ॥ मो कहूँ केन के मगईहूँ

आवति ही राधा लै जैहै ❀ फिर तू पाछे ते पछितैहै
 अजहूं राखु उठाय सबारी ❀ मांगे ते पुनि देहै गारी
 जननी हरिकी बतियां भोरी ❀ श्रवण सुनत रुचि होत न थोरी
 टेंव आपने सुतकी जानै ❀ विरमाने क्यों हूं नहिं मानै

दो० सैंतति है हरि के हरषि, महारि खिलौना जान ।

भौरा चकई मुरलिका, गेंद बटा चौगान ॥

सो० यशुमति सुखकी रास, नंदभवन भूषण परम ।

ब्रज में करत विलास, ब्रजबासीजन जाहिंबलि ॥

कहति श्याम सों यशुमति मैया ❀ पियहु दूध कछु लेहुं बलैया
 आज सबार दुही मैं गैया ❀ सोई दूध प्याव मोहिं मैया
 और दूध रुचि मोहिं न आवै ❀ जो तू कोटि यतन करि प्यावै
 जननी तबहिं सौंह करि ल्याई ❀ यह धौरी को दूध कन्हआई
 तुमते और कौन मोहिं प्यारो ❀ औट धखों तुम्हरे हित न्यारो
 तातो जानि बदन नहिं ल्यावै ❀ फूँकि फूँकि जननी पय प्यावै
 पय पीवत मोहन अलसाये ❀ सुन्दर सेज जननि पौदाये
 प्रात जगावत नन्द कि रानी ❀ उठहु लाडिले शारंगपानी
 भोर भयो जागहु मेरे प्यारे ❀ ठाढ़े ग्वाल वाल सब द्वारे
 हरहु ताप मुख कमल दिखाई ❀ करौ कलेऊ मिलि दोउ भाई
 सद माखन दधि रैन जमायो ❀ मांगि लेहु अरु जो मन भायो
 सखा बन्द सब लेहु बुलाई ❀ उठौ लाल जननी बलि जाई
 दो० तब हँसि चितये सेजतें, उठे श्याम सुखदान ।

यशुमति जलभारी लिये, मुखधोखोनिजपान ॥

सो० बोल उठे बलराम, उठे सबारे आज हरि ।

हरषि मिले घनश्याम, दाऊजू कहि भ्रात सों ॥

दारे से सब सखन बुलायो ॥ देखि बदन सबहिं लुभ पायो ॥
 सखन सहित सुन्दर मुखदाई ॥ कियो कलेऊ कहू दोउ भाई ॥
 गैयन लै वन चले गुवाला ॥ सह चले मोहन नैदलाना ॥
 टेरे सुनत वालक सब धाये ॥ घर घर के बछरन लै आवे ॥
 सखा कहत सब सुनहु कन्हैया ॥ चलहु आज वृन्दावन भैया ॥
 यमुना तट सब बच्छ चरै हैं ॥ वंशीवट खेलत मुख पढ़ै ॥
 भलीकही हँसि कह्यो गोपाला ॥ चले सकल वृन्दावन ग्वाला ॥
 कोउ टेरेत कोउ घर लै आवैं ॥ कोउ सुरभीगण जोर चलावैं ॥
 कोउ श्रृंगी कोउ वेणु बजावैं ॥ कोउ परस्पर हेरी गावैं ॥
 हेरी टेरे सुनत मन मोहन ॥ कहत मोहिं लिखवहु निजगोहन ॥
 हरि ग्वालन सँग टेरे उठाई ॥ हँसे सकल पूरी नहिं आई ॥
 कहत श्याम अवकै फिरलीजो ॥ अवकै जाय तवै हँसि दीजो ॥
 दो० गावत खेलत हँसत सब, सखाचन्द गां साथ ।
 पहुँचे वृन्दावन सघन, वृन्दावन के नाथ ॥
 सो० फिरत चरावत धैन, दीनवन्दु दुष्टन दलन ।
 कृष्ण कमलदल नैन, सबै अंग सुंदर मुखद ॥

अथ अघासुर वध लीला ॥

तहां अघासुर वनमें आयो ॥ कंसराज करि कोप पठायो ॥
 ताके एक बहिनि दै भैया ॥ मारे प्रथमहिं कुँवर कन्हैया ॥
 एक पूतना जो ब्रज आई ॥ बत्सासुर अरु बक दोउ भाई ॥
 तिन को वैर असुर उर धारी ॥ कियो गर्व मन में अतिभारी ॥
 आज राज को कारज कीजै ॥ और वैर भाइन को लीजै ॥
 गिरि समान अजगर तनधारी ॥ पक्षो असुर भग बदन पनाही ॥
 वन घन नदी रची मुख माहीं ॥ मायाकृत पहिचानत नारी ॥

वाही मग निकसे नँदलाला ❀ गाय बच्छ लीन्हें सब ग्वाला
 हरि अन्तर्यामी जिय जानी ❀ कपटरूप यह खल अभिमानी
 याको आज तुरत संहारौ ❀ असुर मार भू भार उतारौ
 ग्वालन अहि पर्वत करिजान्यो ❀ तासु वदन गिरिकंदर मान्यो
 देखि सुहावन तृण हरिआई ❀ गाय बच्छ बैठे सब धाई
 दो० गाय बच्छ ग्वालनसहित, सब मुखगये समाय ।

कहत परस्पर आज बन, सुरभी चरहि अघाय ॥

सो० सबमुखगये समाय, असुर सिकोख्यो बदन तव ।

अंधकार गयो छाय, मानौ घन घेरो निशा ॥

अति अकुलाय उठे तहँ ग्वाला ❀ गाय बच्छ सब विकल विहाला
 कहत परे धौं हम कहँ आई ❀ त्राहि त्राहि घनश्याम कन्हआई
 सबके प्राण गये इहि बारा ❀ तुम विन कौन उवारनहारा
 श्रवण सुनत प्रभु आस्तबानी ❀ भये दुखित चिन्ता उर आनी
 दीनबन्धु भक्तन मुखदाई ❀ बैठे आप अघा मुख आई
 अघा असुर उर अतिहरपाई ❀ लियो ओंठसों ओंठ लगाई
 विद्याधर मुनिवर गन्धर्वा ❀ अतिभय विकल मगनसुरसर्वा
 तबहिं कृष्ण मन बुद्धि उपाई ❀ अबिगतगति भक्तनमुखदाई
 मुख ते देह द्विगुण बिस्तारी ❀ रुंधों श्वासभौ त्रास दे चारी
 सक्यो नहीं तब असुर सँभारी ❀ कियो शब्द आघात पुकारी
 फूटि गयो शिर दशम दुवारी ❀ निकसी प्राणज्योति उजियारी
 सो वह ज्योति स्वर्ग को धाई ❀ बहुरि आय हरि मांझ समाई
 दो० याही मग अघ बदन ते, निकसे गोकुलराय ।

कहतसखन आवहुनिकसि, मैं करिलई सहाय ॥

सो० अतिहिसकानेग्वाल, गायबच्छ व्याकुलसकल ।

मिथ्योतिमिरतिहिकाल, जहँतहँहँवचन मुनि ॥

हर्ष सहित बाहर सब आये ❀ हरि को देखि परम सुख पाये
हम अज्ञान वृथा भय भाई ❀ श्याम हगारे साथ सहाई
धन्य कान्ह धनि धनि पितुमाता ❀ जिन जायो तुमको ब्रजवाता
गिरि सम असुर सर्प तनुधारी ❀ बाहि हन्यो तुम हो असुगरी
कहत कान्ह तुम करी सहाई ❀ तब माखो में असुर अन्याई
जो तुम मेरे सङ्ग न होते ❀ तो यह माखो जान न मोने
देखि अघासुर वध सुर ज्ञानी ❀ वर्षिमुमन कहि जय जय वानी
विद्याधर किन्नर गन्धर्वा ❀ अति आनंद गुण गावन लवा
अघा असुर की करत वड़ाई ❀ हरिमधि जाकी ज्योनि नमाई
करत अनेक यत्न मुनि ग्रामा ❀ अन्तकाल दुर्लभ हरिनामा
सो हरि अन्तकाल जगपावन ❀ वसे आप अघमुख दुखदावन
इहि सम और कौन के भागा ❀ कहत देव सब अतिअनुगगा
दो० जयजयजय प्रभु जगतहित, जगत्राताजगदीश ।

जाको मारन हूँ प्रगट, तारन विस्वावीश ॥

सो० हरषिसुमन वरपाय, जयजयधुनि नभकरतमुख ।
गायगवालमुखपाय, अति अनन्दनिरखतहरिहि ॥

तबहिं सखनसों विहँसि कृपाला ❀ बोले ककुणाभिन्धु गोपाला
चलहु सकल वंशीवट छाहीं ❀ आई हँदें आक नहांहीं
भोजन करिये सब मिलि जाई ❀ वज्र हांकि लेहु अगुवाई
हरषि चले तहँ ते बलवीरा ❀ आवे नव वंशीवट नांग
वंशीवट अति सुभग मुहावन ❀ और चहँ दिशि बहुदुमपावन
चरत वज्र सब वनके माहीं ❀ बैठे आव श्याम वट दाहि
और पास गोपन के बालक ❀ मध्य श्याममुन्दर जगसालक

मोर मुकुट कल कुण्डल कानन ❀ कोटि काम छवि मोहन आनन
 गेरुकादि चित्रित तन श्यामा ❀ पीतवसन वनमाल ललामा
 बाहु विशाल लकुटि कर लीन्हे ❀ गुंजन के आभूषण कीन्हे
 सखा बृन्द सब सुन्दर सोहै ❀ निरखत रूप मदन मन मोहै
 प्रेम मगन मन परम हुलासा ❀ करत परस्पर हास विलासा
 दो० तहां छोक घर घरनते, आई भरि भरि भार ।

यशुमति पठये कान्हको, व्यंजन बहुत प्रकार ॥

सो० छोक पठाई मात, हरषि कहत हरि सखनसों ।
 दधि लवनी बहुभांत, सबमिलिभोजनकीजिये ॥

वन भोजन विधि करत कन्हई ❀ छोक सवै इकठाव रखाई
 जलते पुरइन पात मँगायो ❀ दोना बहु पलाश के लायो
 कछु फल बृन्दावन के नीके ❀ लिये मँगाय भावते जीके
 बैठे मण्डल जोरि गोपाला ❀ मध्य श्यामसुन्दर नँदलाला
 भांति भांति व्यंजन रस पागे ❀ परसि धरे सबहिंन के आगे
 कछुक हथोरिन पर धरि लीन्हों ❀ शाकखोलि अँगुरिन विचकीन्हों
 मुरली मुकुट कांख तर लीने ❀ भोजन करन लगे रसभीने
 मधु मंगल परसै न सुदामा ❀ सुवल सुखमना अरु श्रीदामा
 अपर अनेक गोप सुत लीने ❀ जैवत मिलि सँग श्यामप्रवीने
 लेत परस्पर कौर छड़ाइ ❀ कबहुँ कितवको देत कन्हई
 कबहुँ काहू देन बुलावैं ❀ डहाँकि ताहि अपने मुखनावैं
 मीठे खाटे स्वाद बखानैं ❀ हास विलास करत सुखसानैं

दो० देखत सुरगण सिद्ध मुनि, चढ़े बिमान अकास ।

लखि कौतुक चक्रित सबै, गये कमलभव पास ॥

सो० कह्यो ब्रह्म सों जाय, कहत जाहि परब्रह्म तुम ।

सो ग्वालन सँग खाय, छोरि छोरि करत कयर ॥
अथ ब्रह्माके मोहकी लीला ॥

हरि माया मोहै सब प्राणी ॥ कह ब्रह्मा कह सुर मुनि तानी ॥
मुनि विरंचि सुरगण की बानी ॥ भयो मोह उर में यह आनी ॥
गोकुल जन्म कौन यह आयो ॥ में कहु बाकी भव न पायो ॥
परचौ लै देखौ प्रभुताई ॥ बाल बच्छ हरित्यावों जाई ॥
जो सर्वज्ञ ईश भगवाना ॥ लेहें तुरत गैगाय मुजाना ॥
यह विचार विधि मन ठहरायो ॥ चलो तुरत वृन्दावन आयो ॥
देखि सरित वनमें अतिपावन ॥ पुहुप लता द्रुम परम मुदावन ॥
अति रमणीक कदम चहुँपासा ॥ वंशीवन्मधि सुखद निवाना ॥
गोप मण्डली मण्डल मोहन ॥ भोजन करत नखन सँग गोहन ॥
देखि विरंचि चकित भ्रम भारी ॥ बछरा हरि लीन्हें वनभागी ॥
हरि अन्तर्यामी सब जानी ॥ विधिके मनकी रूचि पहिचानी ॥
तब पठ्ये द्वे ग्वाल कन्हवाई ॥ लावहु बत्स धेरि नय जाई ॥
दो० ग्वाल सकल वन हूँढिकै, फिरि आये हरिपाहिं ।
कहत बच्छ गे दूर कहूँ, खोज पाइयत नाहिं ॥
सो० तब हँसि कह्यो कन्हाय, तुम सब यहँ बैठे रहौ ।
मैं धौं देखौ जाय, चले आप बहराय तब ॥
जब गे दूर वनहिं जनत्राता ॥ तबहीं बालक हँ विधाना ॥
प्रभु लीला की गम कहु नहीं ॥ गविन गया लोक निज पाही ॥
निज माया सों करि मत भोगी ॥ गवे बाल बच्छ इकठायी ॥
गुण सागर नागर नैदनन्दन ॥ वंशीवन् आयो जगन्मदन ॥
दीनबन्धु भक्तन हितकारी ॥ यह अपने मनमाने निनारी ॥
बाल बच्छ जो ब्रज नहिं जेह ॥ मान पिना इनके दुख पहे ॥

ताते रूप सबन को धारों ❀ या विधि तिनको दुःख निवारों
 बाल बच्छ विधि लै गयो जेते ❀ भये श्याम तब आपुन तेते
 वैसोइ रूप वैस गुण शीला ❀ वैसिय बुद्धि पराक्रम लीला
 रंग रेख जैसो जिहि माहीं ❀ अंग चिह्न अंतर कछु नाहीं
 बोलन हँसन चलन चतुराई ❀ हेरन टेहन फेरन राई
 भूषण बसन लकुट कर जैसे ❀ भये श्याम सब आपन तैसे

दो० मारन उद्धारन यदपि, हैं समर्थ भगवान ।

तदपि जान निजदास विधि, करी तासुकी कान ॥

सो० अपनोकरि विधि जान, अनजानत ढीठो करी ।

ताते कीन्हे आन, मन भायो विधिको कियो ॥

कह्यो श्याम सब सखन बुलाई ❀ लावहु घेरि वत्स सब जाई
 ब्रजको चलहु सांभ नियराई ❀ हर्षि चले बालक समुदाई
 चहुँ पास सब सखा सुहाये ❀ मध्य श्याम बद्धरन अगुवाये
 वेणु विशाल रसाल बजावत ❀ अपने अपने रंग सब गावत
 रांभति गाय बच्छ हितलागी ❀ देखत ब्रजयुवती अनुरागी
 मोर मुकुट कुंडल वनमाला ❀ हँसन मनोहर नयन विशाला
 गो पद रज मुखपर छवि छाई ❀ मनहुँ चंदकण अमिय निकाई
 ब्रजबनिता सब तनमन वारत ❀ निराखि रूप भेंटत चित आरत
 पहुँचे ब्रजहिं श्यामसुन्दर वर ❀ गये बच्छ बालक निज निज घर
 गो सुत ग्वाल बाल हर्षाई ❀ लीन्हे जात मात उरलाई
 परम प्रीति करि भोजन दीन्हों ❀ कृष्ण चरित काहू नहिं चीन्हों
 यशुमतिकहत सुतहि मिलिप्यारे ❀ वनहिं रात कत करत ललारे

दो० मैं सबेर घरको चलयो, सखा करत सब रात ।

देखि अगम बन में डर्यो, वे डरपावत जात ॥

सो० बार बार पड़िताय, ले बलाय यशुमति कहत ।

ल्यावहिं गाय चराय, काल्हि जायें वेई मये ॥

पह मुनिके हंसि कहत कन्हाई ॥ काल्हि चरावन जान बलाई
लागी भूख बहुत मोहिं हे री ॥ भोजन को तुरतहिं कहु दे री
मुनत तुरत माखन ले आई ॥ तव लो खाहु जननि बलिजाई
है जल तस घाम का प्यारे ॥ लेत गरम तन न्हाहु ललारे
जाते वनको श्रम मिटि जाई ॥ भोजन करहु बहुरि दोउ भाई
तव जननी गहि बाहँ न्हावाये ॥ जेवन को बलराम बुलाये
अति रुचि सों जेवत दोउ भाई ॥ परम प्रीति परसत है माई
जेई उठे अचमन तव कीन्हों ॥ धीग दुहुँन गेहिणी दीन्हों
जानि उनींदे सेज बिछाई ॥ जननी पाँदाये दोउ भाई
श्याम राम सोवत दोउ भैया ॥ सुख पावत निरखत दोउ मैया
अधम रखो विधि गर्व नवायो ॥ ब्रजवासिन कहु भेदन पायो
बाल बरस हरि नये उपाये ॥ सब जानत वेई हैं आये

दो० बालबरस नवकृत तिन्हें, ब्रजवनिता अरु धन ।

पूरव प्रीतिहु ते अधिक, करत रहत उर चैन ॥

सो० ब्रज मंगल भगवान, ब्रह्म सचिदानन्द प्रभु ।

भङ्गन के सुखदान, लगे देन सुख घरन घर ॥

तव विरंचि के मन यह आई ॥ ब्रज के लोगन देखो जाई
हैं हैं करत विलाप कलाषा ॥ दिन बन्धन गेयन मनाषा
आय विरंचि तुरत तहँ देख्यो ॥ घर ही घर मय कोतुक पेग्यो
जहँ तहँ दुहत गाय पशुपालक ॥ खेवन निज निज घर मय बालक
देखि विरंचि चकित मन माहीं ॥ हैं यह ब्रज केयो यह नाहीं
में विधना सब नृपि उपाई ॥ यह रचना भो किनहिं बनाई

कै धौं हौं यहि भ्रमहि भुलाना ❀ हैं हरि अविनाशी नहिं जाना
 अन्तर्यामी जानत सबहीं ❀ बाल वच्छ धौं ल्याये तवहीं
 अति संभ्रम बिधि ज्ञान भुलायो ❀ गयो फेरि निज लोकहिं धायो
 देखे वत्स बाल जहँ राखे ❀ चकित वहुरि ब्रजको अभिलाखे
 क्षण भूतल क्षण लोक सिधारो ❀ बाल वत्स दुहुँ ठौर निहारो
 वर्ष दिवस इहि भाँति बिताई ❀ भयो थकित अति उर भ्रम छाई
 दो० मोह बिकल अति देखिकै, सुन्दर श्यामसुजान।

प्रगट कियोजनजानिनिज, बिधिके उरमें ज्ञान॥

सो० हृदय भई तब सुद्धि, ये पूरण अवतार प्रभु।

धिक धिक मेरी बुद्धि, पैर बढ़ायों कृष्णसों॥

मैं मतिहीन भेव नहिं जान्यों ❀ मोह विवश प्रभु सों छल ठान्यों
 यह अपराध बहुत मैं कीन्ह्यो ❀ निज अज्ञान न प्रभु को चीन्ह्यो
 भई गलानि बहुत मनमाहीं ❀ सन्मुख होय सकत विधि नाहीं
 भयो शोच उरमांझ विशेषा ❀ प्रभु प्रभाव तब परगट देखा
 बालक वत्स सहित सब साजू ❀ कृष्णरूप सब लख्यो समाजू
 शिव ब्रह्मादिक देव अनेका ❀ देखे अधिक एक ते एका
 चरण कमल बन्दत प्रभु केरे ❀ गावत गुण गन्धर्व घनेरे
 देखि चकित चित भर्म नशान्यो ❀ पूरणब्रह्म कृष्ण पहिंचान्यो
 शरण शरण कहि अति अतुराई ❀ पख्यो चरण कमलन पर जाई
 अनजानत मैं करी ढिठाई ❀ क्षमा करहु त्रिभुवन के राई
 मैं प्रभु तुम प्रताप नहिं जान्यों ❀ तुम्हरी माया मांझ भुलान्यों
 चूक परी मोतें निज भोरे ❀ नाथ न बनै तुम्है सुख मोरे
 दो० मैं अपराधी हीनमति, पख्यों मोह के जाल।

ममकृत दोष न मानिये, तुम प्रभु दीनदयाल॥

सो० कह जानौं तुम भैव, मैं ब्रह्मा तुम्हरो कियो ।

तुम देवन के देव, आदि मनातन अजितअज ॥

जो जनतैं विगैरै विन जाने ॥ सो अपराध न प्रभु कह्य माने ॥
ज्यों शिशु अज्ञ दोष उर मारि ॥ माता कबहुं मानत नारी ॥
तोष पोष ताको वह कहै ॥ विकलन धिन अंकले भगै ॥
रद रसनादि जोलो सिस होई ॥ कहौं कौन पर कीजै मंड ॥
निज तन व्याधिपीर जन पावे ॥ पदधि दन करि नहीं बचावे ॥
तैसेही प्रभु मोको कीजै ॥ क्षमि गगदोष शरण गहि लीजै ॥
तुम जाने विन जीव सदाहीं ॥ उत्पति परलें मांभ नमार्हीं ॥
तुम करि कृपा जनावहु जाको ॥ सो जानैं तुम्हरी प्रभुताको ॥
मैं विधि एक लोक को साई ॥ जिमि कृमि गुलर मांभ गोमाई ॥
तुम्हरे रोम रोम प्रति गाता ॥ कोटि कोटि ब्रह्मागड विधाना ॥
कोटि खद्योत प्रकाश कराहीं ॥ गवि सम क्योंहुं होहि मुनाहीं ॥
अब प्रभु बनै सँभारे तोहीं ॥ राखिय चरण शरण निज मोहीं ॥

दो० अतिहीअगमअगाधतद, अविपत्यनिको जान ।

तासु पार चाहौं लख्यो, मैं विधि अति अज्ञान ॥

सो० करिय विरदकी लाज, ममकृतदोष न मानिये ।

दीन बन्धु ब्रज राज, शरणागत पालन हेरे ॥

जब विधि कही दीन बहु बानी ॥ शरण शरण कहिअनिभय मानी ॥
तब नहिं बाल बच्छ कह्य देखे ॥ एकै रूप कृपा विधि पने ॥
कृपा करी तब श्री ब्रजनाथा ॥ हस्त कमल पग्न्यो विधि माया ॥
अभय कियो विधि शोच मित्रयो ॥ चरण कमलने शीला उठायो ॥
बार बार पद कमल निहोगे ॥ अस्तुति करन बुरे कजोगे ॥
जो जगधाम श्याम मुखगमी ॥ ज्योति स्वरूप सब उज्जामी ॥

गुणगण अगम निगम नहिं पावै ❀ ताहि यशोदा गोद खिलावै
 धरजल अनल अनिल न भझाया ❀ पंचतत्व मिलि जगत उपाया
 काल डरै जाके भय भारी ❀ सो ऊखल बांधे महतारी
 जग करता पालन संहरता ❀ विश्वम्भर सब जगके भरता
 ते गैयन सँग ग्वालन माहीं ❀ ब्रज में हँसि हँसि जूठनि खाहीं
 बड़े भाग्य ब्रज वासिन केरे ❀ तिनके प्रेम रहत तुम घेरे

छंद रहत जिन के प्रेम घेरे धन्य ब्रजवासी सबै ।
 ब्रह्म एक अनीह अबिगत घरन घर जिनके फवै ॥
 धन्य श्रीवसुदेव देवकि पुत्र करि जिन पाइयो ।
 धन्य यशुमति नन्द जिन पय प्याय गोद खिलाइयो ॥
 धन्य ब्रज के गोप जिन सँग धन्य गाय चरावहीं ।
 चार मुख मैं कहा बणौँ सहसमुख नित गावहीं ॥
 धन्य बालक बच्छ तिनतें नाथ यह दर्शन लयों ।
 परसि चरणसरोज मस्तक पाप तजि पावन भयों ॥
 अब देहु ब्रजको बास मोहिं प्रभु आस यह मेरे हिये ।
 रेणु तृण डुमलता खग शृंग होहिं जो तुम्हरे किये ॥
 यह नित्य ब्रजलीला तुम्हारी तुम अनुग्रह तें लही ।
 महत श्रीवृन्दाबिपिनको अभित मित सक को कही ॥
 लोक मोहिं न सुहात अब प्रभु आन बिधि कोउ कीजिये ।
 मोहिं ग्वालन को करौ भृत खाय जूठनि दीजिये ॥
 बार बार मनाय युग पद नाथ यह बर मागहूं ।
 है रहौ वृन्दा बिपिन रज चरण पंकज लागहूं ॥

दो० करि अस्तुति गदगद बचन, दृगजलपुलकशरीर ।
 पखो चरणपंकज बहुरि, विवि अति प्रेम अधीर ॥

सो० तब हँसि बोले श्याम, गर्वप्रहारी भक्तहित ।

जाहु आपने धाय, वचन हमारो मानि अब ॥

और कहि अब करों विधाता ॥ तुम हो कर्म धर्म के दाना ॥
तुमते है यह सब संसारा ॥ मम माया को नाहि न पाव ॥
ताते अब मम आयसु कीजै ॥ ब्रजकी जाय प्रदक्षिण दीजै ॥
जाते तन के पाप नशार्हीं ॥ बहुरि जाहु लोकहि सुख माहीं ॥
हरि उरहार विविध पहिरायो ॥ विदा कियो सब शोच नशायो ॥
प्रभु आयसु माथे पर धारी ॥ पाय प्रमाद हरि मुख चारी ॥
ब्रज दाहिन फिर पाप नशाये ॥ बाल बत्स प्रभु पहें पहुँचाये ॥
बार बार चरणन शिरनाई ॥ विधि निजलोक गये सुखपाई ॥
ग्वालन यह कछु मरम न जान्यो ॥ बाहि समय सबहि न मन मान्यो ॥
हरि सों कहत विलंब कहैं लाँई ॥ हम तुम बिना आक नहिं लाँई ॥
तुम सब भोजन मांभ भुलाने ॥ बच्छ जाय बने दूग हिताने ॥
खोजत खोजत क्योंहं पाये ॥ सो में ले तुम पहें पहुँचाये ॥
दो० अब राखौ सब धेरिकै, दर निकस नहिं जाहिं ।

तब सुचिते हैं के सबै, सचिमां भोजन ग्वाहिं ॥

सो० ऐसे कहि ब्रजराय, सखन सहित भोजन कियो ।

बहुरि यमुनतट जाय, जल अँचयो धायो बदन ॥

सन्ध्या समय चले घर ग्वाला ॥ मध्य श्यामसुन्दर नंदनाना ॥
बच्छ धेरि आगे करि नीके ॥ कांधन पर धर लाँहे लाँके ॥
जन जन शृंग बजावत गावत ॥ वन में बने ब्रजहिं हरि आयत ॥
घर आये ब्रजमोहन लाला ॥ कहत यशोमति मे सब खाना ॥
अहो महर वन आज कन्हाई ॥ महा दुष्ट एक नामो जाई ॥
उरगरूप निगलो शिशु बच्छा ॥ करी आज नवकी हरि ग्वा ॥

गिरिकन्दर सम तिनमुख बायो ❀ पैठि श्याम तिहि तुरत नशायो
 याके बल हम बढत न काहू ❀ फिरत सकल वन सहित उछाहू
 जीते सबै असुर बन माहीं ❀ यह काहू ते हास्यो नाहीं
 बीते बर्ष कहत सब ग्वाला ❀ आज अघा माखो नँदलाला
 यह प्रभु लीला अपरम्पारा ❀ कौन कौन को भुरै न पारा
 यशुमति सुनि चकित पछिताई ❀ मैं वरजत बन जात कन्हाई
 दो० केती करवर ते बच्च्यो, तरु न नेक डरात ।

अतिबिचित्रगति ईश की, जानीजात न बात ॥

सो० खीभति यशुमति मात, मानतनहिं मेरो कह्यो ।

श्याम मनहि सुसकात, अव बनमें नहिं जाइहों ॥

हरि की लीला कहत न आवै ❀ सुर नर असुर सबहि भरमावै
 पय पीवत पूतना नशाई ❀ पटक्यो तृणा शिला पर जाई
 तीनि लोक मुख में दिखराये ❀ यमला अर्जुन वृक्ष दहाये
 बत्सासुर बक बहुरि नशायो ❀ अघा मारि विधिगर्व नवायो
 यशुमति यह पुरुषारथ देखी ❀ तापर खिभ पछितात विशेषी
 अघा मारि आये नँदलाला ❀ घरघर कहत फिरत सब ग्वाला
 सुनि मन ब्रजयुवती उठिधाई ❀ चकित बिलोकत हरि मुख आई
 मन मन करत यहै अनुमाना ❀ इनकी सर कोऊ नहिं आना
 येई हैं ब्रज के रखवारे ❀ येई हैं पति प्राण हमारे
 कहत परस्पर सुनहु सयानी ❀ हैं येई जगपति यह जानी
 प्रेम मगन ब्रज के नर नारी ❀ लहत परम सुख हरिहि निहारी
 ब्रजमोहन सुन्दर सुखरासा ❀ भोजन मांगत यशुमति पासा

दो० खाहु लाल जो भावई, रुचिसों सखन समेत ।

सद माखन व्यंजन सरस, करिराखे तुमहेत ॥

सो० दे रोटी नवनीत, और मोहिं भाव नहीं ।
दियोमातअतिप्रीत, खातहँमतमिलिसखनमँग॥

अथ गोदोहन की लीला ॥

हँसि जननी सों कहत कन्हैया ॥ दोहनी दे दुहियों में गया
नंद बवा मोहिं दुहन सिखायो ॥ ग्वालनकी सर दुहन चढ़ायो
धौरी धूमरि काजरि गया ॥ तुस्तहिं दुहि ल्यावों दे गया
भयो मोहिं बल माखन खाई ॥ अब न डरात वृष्ण बल भाई
तोहिं नहीं पतियारो आवै ॥ बैठि ऊठ कर भाव बनावै
अँगुरी भाव देखि हँसि माता ॥ उरलगाय लिय नावल गाना
कहत कहाँ इतनी बुधि पाई ॥ हर्षि निरखि मुख बलि बलिजाई
लै दोहनी दई कर माता ॥ हर्षित बले दुहन सुखदाना
बछरा छोरि तुस्त थनलायो ॥ मात दुहत लगि हर्ष चढ़ायो
सखा परस्पर कहत कन्हवाई ॥ हमद्वं ते तुम करन चढ़ाई
दुहन देहु कछु दिन मोहिं गया ॥ तव करियो मेरी सर भैया
जब लगि एक दुहौ तवताई ॥ दश न दुहों तो नन्द दुहाई

दो० सखा कहत सब भूठही, नन्द दुहाई खात ।

प्रात साथ हम दुहहिंगे, देखहिं को अधिकत ॥

सो० कह्यो कान्ह हर्पाय, भली कही तुम बात यह ।

प्रात दुहहिंगे गाय, हम तुम होइ लगाय के ॥

श्रीवृषभानु कुँवरि मन माहीं ॥ श्यामसुख अण विमग्न नाहीं

दरश लालसा दृगन न थोगी ॥ देखोइ चहत चहोगि चहोगि

उठे प्रभात दोहनी लीन्ही ॥ सुख श्याम दर्शन की कान्छी

जननी देखि कह्यो दुलराई ॥ जानि किन राधा अनुगई

खरकहिं जात दुहावन मैया ❀ दुहत सवेर ग्वाल सब गैया
 काल्हितनक मैं बिलंब लगाई ❀ उठे अहिर सब मोहिं रिसाई
 गई गाय सब बच्च पियाई ❀ रीती दोहनी लै फिरि आई
 तुमहूँ खीझन लागि तब मोहीं ❀ जात सवार आज कहि तोहीं
 ऐसे कहि जननी समुझाई ❀ धरते चली ब्रजहिं समुहाई
 नन्द सदन आई हरि प्यारी ❀ दुहत गाय गृह द्वार विहारी
 दुहुन परस्पर लखि मुख पायो ❀ निरखि बदन छवि हर्ष बढ़ायो
 राधाहि देखि महरि नँदरानी ❀ लई बुलाय निकट हर्षानी

दो० दंपतिको मुख देखि कै, मुदित यशोमति माय ।

बारवारलखि युगलछवि, मनहीं मन बलिजाय ॥

सो० महरिमुदित मुसकाय, मथनकह्योदधिकुवँरिसों ।

मान दुहाई गाय, आयसु तें ठाढ़ी भई ॥

नेतिपाणि मन अति अनुरागी ❀ रीतोइ माठ बिलोवन लागी
 तैसइ भई श्याम गति भोरी ❀ मनलाग्यो जहँ कुवँरि किशोरी
 बृषभहिं सों लोई लै लैया ❀ बिसरगई ठाढ़ी कित गैया
 दम्पति दशा देखि नँदरानी ❀ रही चकित नहिं जात बखानी
 राधा सों कहि प्रगट जनायो ❀ किन यह तोकों मथन सिखायो
 निज घर मथति ऐसहीजानी ❀ कै मेरे घर आय भुलानी
 मैं नहिं मथन कबहुँ दधिकीनी ❀ तुम मोहिं सोंह बवाकी दीनी
 तातें मथन करन मैं लागी ❀ तुम्हरो बचन सकी नहिं त्यागी
 तब नँदघरनी मथन बतायो ❀ राधे हरितन ध्यान लगायो
 दुहन श्याम गैया बिसराई ❀ लैया बृषभ पाँव अटकाई
 दोहनी श्याम मांगि तब लीन्हीं ❀ तुरत सखा इक लैकर दीन्हीं
 कहत दुहौ हरि करौ चढ़ाई ❀ हँसत गोप बालक समुदाई

दो० हँसत कहत हरि सों सबै कहँ तुम रहे लुभाय ।

सुनत सखनकी बात नहिं, प्यारी सों चितलाय ॥

सो० प्रिया वदन टगलाय, रहे श्याम इकटक निगिखि ।

देह दशा विसराय, भूलि गये सब चतुरता ॥

यशुमति कहत राधिकहि छे ॐ ये हँग हें गे प्यारी तेरे

ऐसो हाल मथत दधि तेरो ॐ हरि भयो मानहुँ चित्रचिन्तेरो

तेरो मुख सम शशि नहिं भ्राजै ॐ नयनन लघि खंजनगति लाजै

चपलाहू तें चमकत हे री ॐ करिहै कहा श्याम को तें री

मेरो कह्यो सुनत कलु नहिं ॐ हें धों कहा गुनन गन माहीं

इकटक दीठि तवहिं ते ल्याई ॐ तनकी सुरति सब विसराई

अवहीं ते ऐसे हँग योहीं ॐ अवहीं बहुत होन हें तोहीं

ऐसे हंग लगायो श्यामहिं ॐ काज नहिं कलु तेरे धानहिं

चितयो मतिहि करै टकलाई ॐ हिलमिल खेल श्याम गन आई

कै रहो बैठि आपने धामहिं ॐ धेनु दुहन दे मेरे श्यामहिं

देखत तोहिं श्याम मुधि जाई ॐ तू चितवति तन मुधि विसराई

सूधे रहि जो इहां तू आवै ॐ ऐसो हँग मोकों नहिं भावै

दो० करत अचकरी आय तू, यह नहिं मोहिं सुहाय ।

सूधे खेलहि श्याम सँग, कै तू इत मति आय ॥

सो० ऐसे सहारि रिसाय, सीखदई हरि भावतेहि ।

तव कुल्ल मनमुधिपाय, बोली अति भोरे वचन ॥

मोहिं लीभति वरजत सुन नहिं ॐ निन उठि मोहिं बुलावन जाहीं

मोहिं कहत दिन तोहिं निहारे ॐ रहन न मेरे प्राण सुखों

बोह लगत मोकों सुनि बानी ॐ तव आवन में त्यों वसानी

मुख पावति आवति में तते ॐ तुम कलु लावन आँहिं बातें

यशुमति सुनि प्यारी की बानी ❀ भोरे भाय समुझ सकुचानी
 बांह पकरि उरसों लै लावति ❀ प्यारी मनसों रोष मिटावति
 हँसत कहत मैं तोसों प्यारी ❀ मन में कलू विलग जिन ला री
 सिखवत तोहिं सीख गुणकारी ❀ मैं तेरी जैसे महतारी
 सुनियत महरि सुघर अधिकार्ड ❀ गृह कारज कलू तोहिं सिखाई
 सुनि यशुमति के वचन सप्रीती ❀ बोली अति नागरि शिशुरीती
 मैया मोसों टहल करावै ❀ खीझत जात देखि जो पावै
 सुनि यशुमति राधाकी बानी ❀ श्री बृषभान लाड़िली जानी

दो० अति सप्रेम दुलराय कै, लई बहुरि उरलाय ।

श्री राधा के चिर तें, दीनों क्षोभ मिटाय ॥

सो० कापै बरणी जाय, हरि प्यारी की चतुरता ।

लीनी सहज सुभाय, वातन ही यशुमति भुरै ॥

कहत सखा हरिसों मुसकाई ❀ दुहत कहा तुम आज कन्हाई
 काल्हि दुहत रहे होड़ लगाई ❀ विसरगई सब आज बड़ाई
 गिरत दोहनी कम्पित हाथा ❀ नोवत वृषभ वत्स लै साथी
 सुनि ग्वालन के वचन गोपाला ❀ कलूक सकुचि विहँसे नँदलाला
 बच्छ बोर दियो खरिक चलाई ❀ आप जननिसों कहत कन्हाई
 मुरली मुकुट देहि पट मेरो ❀ सुनि आळ दाळ मोहिं देरो
 जननी हरष तुरत सब दीनो ❀ लै हरि मुकुट शीश धरि लीनो
 चारु पीतपट कटि लपटाई ❀ कर मुरली लै मधुर बजाई
 मुरली में कहि प्यारी प्यारी ❀ गये बुलाय खरिक सुखकारी
 लखि प्यारी हरिकी चतुराई ❀ कहति यशुमति सों अतुराई
 जाति घरहि प्रातहि मैं आई ❀ खरिक दुहावन को निज गाई
 पायो ग्वाल खरिक कोउ नहीं ❀ खोजति मैं आई इत माहीं

दो० इहां अजिर गैया दुहत, देखे आय कन्हाय ।

तनक दोहनी तनककर, देखरही चितलाय ॥

सो० सुनि अति सरस मुभाय, सने प्रेमप्यारी वचन ।

यशुमतिमनमुखपाय, कहति कुँवरि माँ जानघग ॥

जा प्यारी घर आवति रहियो ॥ हमरो मिलन महरि माँ कहियो ॥

यह सुनि कुँवरि चली हर्षाई ॥ मन हरि लीन्हों कुँवर कन्हाई ॥

गई खरिक कर दोहनी लीने ॥ चितवत मग जहँ श्याम नवीने ॥

तहां मिलीं बहु सखी सहेली ॥ वृभक्ति राधहि कहा अकेली ॥

प्रात दुहावन मात पठायो ॥ तहां खरिक कोउ अहिर न पायो ॥

इत आई मैं ग्वाल बुलावन ॥ जात खरिक अब गाय दुहावन ॥

बोली उठे हरि तब इत आवो ॥ हम दुहि देई दोहनी लावो ॥

दुहन देन कहि श्याम बुलाई ॥ सुनत गई प्यारी मुख पाई ॥

कहत सखी सब मन मुसकाई ॥ कहां प्राति इन आय लगाई ॥

बरसाने यह ब्रजहि कन्हैया ॥ आई कहां दुहावन गैया ॥

हरि मुख लखि वृषभानकिशोरी ॥ प्रेम विवश भइ तन गुधि भोगी ॥

मोहन लई दोहनी करतें ॥ प्रिया प्रीति रम वश भइ वने ॥

दो० धेनु दुहावत लाड़िली, दुहत नन्दको लाल ।

सो मुख कापै जाय कहि, देखत ब्रजकी बाल ॥

सो० बद्धरा पद अटकाय, गोथन लीन्हों हाय हरि ।

प्रिया वदन दृगलाय, दूध धार झाड़त छलन ॥

दुहत धेनु अति ही छवि वादी ॥ प्यारी पान दुहावन दादी ॥

एक धार दोहनी में डारे ॥ प्यारी नन डक धार प्यारी ॥

हरि करतें पय धार छुअहीं ॥ लयन छोट प्यारी मुख मार्की ॥

मनहुँ मयंक कलंक प्यारी ॥ शोभिन जहं नहं नन्द मुखारी ॥

कैधों पय बिधि खोरि मयंका ❀ लसत मुधासह खोय कलंका
 लसत नील पट कनक किनारी ❀ मोरत मुखहिं मुदित मन प्यारी
 मनहुं शरद शशिसुधा उदारा ❀ घन दामिनि घेस्यो इकवारा
 इहि बिधि रहसत बिलसत दोऊ ❀ होत हिये थोरे नहिं कोऊ
 मनहुं उभय आनंद सम भारी ❀ मिलन चहत मर्याद विसारी
 हाव भाव रस दम्पति पूरे ❀ निरखत ललितादिक दूर दूरे
 इहि बिधि श्रीबृषभानदुलारी ❀ हरि पै धेनु दुहावत प्यारी
 बिलसत ब्रज विलास ब्रज प्यारे ❀ ये सुख तीन भुवनते न्यारे

दो० दुहूं कुँवर नंद लाड़िले, श्रीराधा की गाय ।

दोहनी देत न हँस प्रिया, सांगत हाहा खाय ॥

सो० त्योंत्यों हँसतकन्हाय, ज्योंज्योंप्रिय हाहाकरत ।

सो सुख बरणि न जाय, अरभे दोऊ प्रेम रस ॥

फिर हाहा कर कहत कन्हाई ❀ अबकै देहों नन्द दुहाई
 फेरि करी हाहा हँसि प्यारी ❀ दई दोहनी बिहँसि बिहारी
 हाव भाव करि मन हरि लीन्हों ❀ कुँवरिहि कान्ह बिदा तव कीन्हों
 यह छवि निरखि सखी हर्षानी ❀ चली अग्र है कल्लुक सयानी
 प्यारी निरखि श्यामसुन्दर को ❀ चलन चहत पग चलत न घरको
 अन्तर नेक न हरि सों भावै ❀ पुरजन सकुच बहुरि सकुचावै
 धिक यह लाज कहत मन माहीं ❀ निरखन देत श्याम जो नाहीं
 कल्लु दिन ज्यों त्यों और बिताई ❀ दूर करौ पुनि यहि दुखदाई
 यह बिचार मन में ठहराई ❀ चली सदन उर राखि कन्हाई
 मुरि मुरि नंदनंदन तन हेरे ❀ आवति बिरह बिथा तन धेरे
 आगे धरत परत पग नाहीं ❀ मन फेरत मनमोहन पाहीं
 चितवत श्याम खरिकि महुँ ठाढ़े ❀ प्यारी तन मन आनंद बाढ़े

दो० भये दृगन ते ओट दोउ, गये सदन मुखगाम ।

बिरहविकलप्यारी गई, ज्यों त्यों सखियन पास ॥

सो० सखियन आवत देखि, श्रीवृषभानकुमारि को ।

उर आनन्द बिशेखि, हर्षि सबै ठाढ़ी भई ॥

बूझत सबै सखी मुखकानी ॥ कहहु राधिका कुँवरि सयानी

और अहिर तुम्हरे कित प्यारी ॥ हरि दुह दीनी गाय तुम्हारी

यह सुनि चकित भई मति भोरी ॥ गिरी धरणि मुखमाय किशोरी

देखि सखी सब आतुर धाई ॥ लई उठाय कुँवरि उर लाई

क्यों नागरी गिरी मुखमाई ॥ दूध दोहनी दई गिराई

यह बाणी कहि सखिन सुनाई ॥ कारे मोहिं डमोरी माई

भई विकल कहु तन सुधि नहि ॥ कहत सखी सब आपस माही

अवहीं देखत नीके आई ॥ कहा भयो कारे किन लाई

यह तो कारे कुँवर कन्हाई ॥ हमहूँ को जिन फूँक लगाई

जाकी मुर मुखकन बिष बाँको ॥ याके रोम रोम बिष नाको

तन मन दृगन साँवरो छायो ॥ देह गेह सब नेह भुलायो

सब सखियन मन यह ठहराई ॥ ले राधिकहिं नदन पहुँचाई

दो० लेहु महरि कीरति सुता, अपनी देखहु आय ।

कहुं कारे याको डसी, गिरी धरणि मुखमाय ॥

सो० ल्यावहु गुणी बुलाय, वेग यत्न याको करहु ।

गयो बदन कुम्हिलाय, ज्यों त्यों हम लाई इहाँ ॥

जननी सुनत उठी अकुलाई ॥ रोवनि धाय कण्ठ लपटाई

प्रात गई नीके उठि घलें ॥ में बरजी मान्यो नहिं धामें

अतिहि हठीली कबो न माने ॥ मोई कनि जो मनमें आने

डरी मात लखि अँग सब जूड़े ॥ अनिही शिथिल न्नेद जन पुड़े

महरि नगर तें गुणी बुलाये ❀ सुनत सकल आतुर उठि धाये
 मन्त्र यन्त्र बहु भांति जगावें ❀ थके सकल कष्ट भेद न पावें
 गारुड़ हरि जो रहे मन माहीं ❀ महरिविकल अतिमनपछिताहीं
 फिर फिर ब्रूकत सखिन बुलाई ❀ कह प्यारी कहि तुमहिं सुनाई
 कहत सखी सव परम सयानी ❀ सुनहु महरि इतनी हम जानी
 हम आगे यह पाछे आई ❀ गिरी धराणि दुहनी दरकाई
 यही कह्यो करे मोहिं खाई ❀ तब हम आतुर लई उठाई
 सो कारो हमहूं पुनि देख्यो ❀ लग्यो सवन विष याहि विशेष्यो

दो० सो अब हम तुमसों कहैं, मानि लेहु यह बात ।

बड़ो गारुड़राय है, नन्दमहर को तात ॥

सो० ल्यावहु ताहि बुलाय, देखतही विष जायगो ।

तुरतहिं लेहिं जिवाय, हम नीके यह जानहीं ॥

देखहु धौ यह बात हमारी ❀ एकहि मन्त्र जियावहिं भारी
 त्रिभुवन गुणी और नहिं ऐसो ❀ है वह नन्द महरि को जैसो
 कीरति महरि सुनी यह बानी ❀ अपने मनहिं सांच कर मानी
 इक दिन राधा हू यह वानी ❀ मो सों कही हती यह जानी
 कीरति चली नन्द के धामहिं ❀ बोलन आतुर गारुड़ श्यामहिं
 महरि यशोदाहि जाय पुकारो ❀ अहो गारुड़ सुवन तुम्हारो
 मेरी सुता लाड़िली गोरी ❀ विहबल विकल परी मति भोरी
 प्रातहिं खरिक दुहावन आई ❀ तहां कहूँ करे ढसि खाई
 नेक पठै सुत काज विचारो ❀ यह यश है है बड़ो तुम्हारो
 सुनि यशुमति कीरति की बानी ❀ कहत महरि तुम भई अयानी
 मन्त्र यन्त्र कह जानै मेरो ❀ अतिहीं बाल बर्ष पट केरो
 किन तुम कों दीनों बहकाई ❀ यह तुम ब्रूभो गुणिन बुलाई

दो० मैं चकित तुम दचन सुनि, यह अचरज की बात ।

श्याम भयो कब गारुड़, तुम आई अतुरान ॥

सो० अबलों सुनी न कान, भयो श्याम कब गारुड़ !

बालक अति अज्ञान, यंत्र मंत्र जाने कहा ॥

महरि गारुड़ कुँवर कन्हई ॥ इक दिन राधा मोहि सुनाई

एक लरकिनी करे खाई ॥ जाकों तुमहि श्याम जियाई

तातें मैं आई अतुरानी ॥ पठवहु सुनहि नेक नंदगना

है मम कुँवरि विकल अधिकाई ॥ प्रात खरिक करे कहु गाई

बड़ो धर्म यशुमति यह लीजै ॥ वेग बुलाय कान्ह को दीजै

यह सुनिकै यशुमति मुसकाई ॥ अवहिं हनी भरे घर आई

है राधा मोहन कहु कारन ॥ रुप ह्वे मन में लगी विचान

वहां सखी ललितादि सयानी ॥ प्यारिहिं देखि हृदय अनुगानी

याहि इसी वंशीधर करे ॥ चितवन फण मुसकन विषयों

प्रेम प्रीति दौं ढाख जारे ॥ लगे न मन्त्र गुणी नच तां

थके सकल करि विविध उपाई ॥ यह विष मोहन बिन नहि जाई

सखी एक हरि पास पठाई ॥ तिन मोहन सों जाय जनाई

दो० अहो महरि के लाड़िले, मोहन श्याम सुजान ।

कित सीखे यह गोदुहन, हमसों कहा बखान ॥

सो० दुहि दीनी जिहि गाय, आज भोगहीं खरिक में ।

वेगविलोको जाय, निज नयनन तार्का दशा ॥

जब तें दुहि दीन्ही तुम गया ॥ अहो अनोखे गाय दुहा

घर को कुँवरि जान नहि पाई ॥ बीचहि धगगि निर्ग सुनाई

देखत संग सखी सब धाई ॥ जेमे तेमे गृह पहुँचाई

सो अब तनकी मुधि न मैभरै ॥ पग विकल नहि दगल उठाई

सक सकात तन स्वेद बहाई ❀ उलटि पलटि भरलेत जँभाई
 कहति मोहिं कारे अहि खाई ❀ कियो यत्न बहु गारुड़ आई
 ताहि कछु उपचार न लागै ❀ तुम्हरो नाम लेत कछु जागै
 हौं पठ्यो इक सखी सयानी ❀ यह विष तुम्हरो निहचै जानी
 यह कारो अहिरूप तुम्हारो ❀ मुसकनि विष ता ऊपर डारो
 अब जो चाहौ ताहि जियावो ❀ बेग चलो जिन गहर लगावो
 अतिहि बिकल वह बिरह अधीरा ❀ दश दिखाय हरौ तनपीरा
 तुम अश्विनीकुमार कन्हआई ❀ बेग चलो हरि लेहु जिवाई

दो० नजर दीठ इह रावरी, ढेर कहत हम कान्ह ।

नहिं जागति तो देहिंगी, नन्द द्वार सब प्रान्ह ॥

सो० व्याकुल जननी तास, घरनि महर बृषभानकी ।

गई यशोमति पास, बेगि जाय सुधि लीजिये ॥

कीरति आगम सुनत कन्हआई ❀ कीनी बिदा सखी मुसकाई
 जो कहूँ डसी भुजंगम प्यारी ❀ तौ हम आय देहिंगे झारी
 ऐसे कहि हरि सदनहिं आये ❀ देखि यशोमति निकट बुलाये
 तू कछु जानत गैब कन्हैया ❀ बूझति विहँसि यशोमति मैया
 कीरति महरि बुलावन आई ❀ कुँवरि राधिका कारे खाई
 आनहुँ झारि बेगि संग जाई ❀ कुँवरि जियाये अतिहि भलाई
 गारुड़ भयो भले सुत जानी ❀ आज सुनी श्रवणन यह बानी
 मैया एक मन्त्र मैं जानों ❀ तेरी सों कहि सत्य बखानों
 अहि काव्यो मो दृष्टि जु आवै ❀ मोपै क्यों हूँ मरण न पावै
 जननि कह्यो सुत जाहु कन्हआई ❀ देव राधिकहि जाय जिवाई
 जननी बचन सुनत ब्रजनाथा ❀ चले हर्षि कीरति के साथी
 चली महरि हरि संग लीवाई ❀ गइ बृषभानपुरा समुदाई

दो० सदितमहरिलखि कुँवरिको, अतिहि गई कुम्हिलाय।

शिथिल अंग बाणी निरखि, लीनों कण्ठलगाय॥

सो० तबहिं श्याम के पांय, परी लायके महरि जव।

मोहन देव जिवाय, अति व्याकुल मेरी मुता ॥

आये गारुड़ कुँवर कन्हई ॥ कुँवरि कान्ह ने यह सुनिपाई

धन्य धन्य आपन कों जानी ॥ हृदय हरष दृग आनंद मानी

प्रगट राम तन खेद बढ़ाई ॥ विह्वल देखि जननि अकुलाई

अन्तर भाव भेद हरि जाने ॥ समिकशिरोमणि मन मुतकाने

तब कछु पढ़िकै कुँवर कन्हई ॥ मुरलि अंग सों दई लुनाई

ततक्षण लोचन कुँवरि उघारे ॥ सन्मुख सुन्दर श्याम निहारै

निरखत दृगन परममुख लीनों ॥ सकुच सँगारि वसन समकीनों

ब्रूकत बात जननि सों प्यारी ॥ आज कहा यह है महनारी

जननी कहति हरषि उरलाई ॥ तोहिं गरनते कान्ह जिवाई

करत लाज तू का री प्यारी ॥ करिवर बड़ी आज विधि तारी

यों कहि महरि हृदय अनुरागी ॥ नंदमुखन के पायँन लागी

बड़ो मंत्र तुम कियो कन्हई ॥ मुता हमारी गरति जिवाई

दो० उर लगाय मुख चूमिकै, पुनि पुनि लेत बलाय।

धन्यकोख यशुमतिमहरि, जहां अवतरे आय ॥

सो० कछु भेवा पकवान, कह्यो खान घनश्याम सों।

बिदा किये दै पान, कीरति श्याम सुजान को ॥

महरि मनहिं मन में अनुमानी ॥ जोगी भली विधाना बानी

ब्रज घर घर यह बात चलाई ॥ बड़ो गान्ह कुँवर कन्हई

सखी कहत हरि सों मुसकाई ॥ भजे भजे हो गान्ह गढ़

प्रगट्यो गारुड़ नाम तुम्हारा ॥ भजे आज तुम विधि जगारे

जननि कहति मेरो अति बारो ❀ अब धौं कौन करै निरवारो
 जान्यो कठिन बसत ब्रज कारो ❀ अब यह मंत्रहिं मतिहि विसारो
 फिरि कारो कहूँ करहि पसारो ❀ हम तव लैहैं नाम तुम्हारो
 यहां गारुडू कहैं तुम पाई ❀ प्यारी एकहि ढेर जिवाई
 अब हम जानी बात तुम्हारी ❀ जाहु आपने सदन धिहारी
 रसिकमुकुटमणि कुञ्जविहारी ❀ हँसि वश कीनी घोपकुमारी
 बिबश भई सब ब्रजकी बाला ❀ गये सदन मोहन नँदलाला
 ब्रजविलास बिलसत ब्रज प्यारो ❀ ब्रजबासी जनके रखवारो

दो० कारो सुत नँदराय को, जाकी लीला नित्त ।

तिनहीं को हरि डसतहैं, जिनको उज्ज्वलचित्त ॥

सो० धन्यधन्य ब्रजबाल, धनिधनि ब्रजके ग्वालसब ।

जिनके सँग नँदलाल, दुहत चरावत गाय सब ॥

प्रात होत मनमोहन लाला ❀ गाय वच्छ सब लै सँग ग्वाला
 चले चरावन ब्रज बन सार्हीं ❀ क्रीड़ा करत सकल मग माहीं
 देखि मुदित सब ब्रजकी बाला ❀ बृन्दावन गये मदनगुपाला
 गैयां बगर गई बन माहीं ❀ बैठे कान्ह कदम की छाहीं
 सखा लिये सँग सुबल सुदामा ❀ क्रीड़ा करत सहित बलरामा
 ग्वाल जहां तहँ गाय चरावैं ❀ आनँद भरे कृष्ण गुण गावैं
 करत बिहार बिबिध सब ग्वाला ❀ गये दूरि बन सघन विशाला
 कोऊ गैयन घेरन धायो ❀ कोऊ बछरन लै बिलगायो
 हलधर रहे कहूँ बन जाई ❀ आप अकेले रहे कन्हवाई
 मनमन कहत श्याम सुखदाई ❀ सखा रहे कत बन विरमाई
 गौ रामन कहूँ सुनियत नाही ❀ गये निकसि धौं कित बन माहीं
 आलस गात जानि मन माहीं ❀ बैठे बंशीवट की छाहीं

दो० सखाचन्द हलधर सहित, लिये बन्ध अल गाय ।

चुन्दावन घन छाड़िके, रहे ताल बन जाय ॥

सो० मन हरपे सब ग्वाल, देखि भूमि सुन्दर परम ।

फरे विपुल तरुताल, अति रसमय सीठे मधुर ॥

अथ धेनुकवध लीला ॥

गोधन वृन्द दिये बगराई लगे खान फल मन हर्षाई

अँचयो बल रसताल रसाला वाद्यों उर आनंद विशाला

सुरत नन्द नन्दन की आई कहो सखन में कहां बन्हाई

ल्यावहु घेरि जाय सब गेया चलो बेगि जहँ कुँवर कन्हैया

सुनत सखा हलधर की बानी बन में श्याम अँकले जानी

आतुर गैयन घेरन धाये देखे दई नव ग्वाल बुलाये

तहां असुर एक धेनुक नामा खर के रूप रहे बन धामा

सोयो हतो विष्णु की छाया सुनत शोर कर नामम धाया

अति बलवान विशाल कराला परम भयकर मानहु काला

दाऊ कहि सब ग्वाल पुकारे भाजे जित नित भयके मोरे

असुर महाबल गर्व बढ़ाई बल के सम्मुख गगनो आते

मत्त ताल के रस बलगाई देखि असुर मन गि उपजाते

दो० बल सँभारि उठि कोपकरि, असुर प्रचार्यो जाय ।

अग्रजभ्राता श्यामको, तिहुँपुर जासु बढ़ाय ॥

सो० बलको आवत जानि, असुर जेरि दोऊ चरण ।

चपर चलाई आनि, बहुगे हट ठाढ़ो भयो ॥

बहुरो फिर मारन को धायो बलजीको नामम नव आयो

जवाहिँ असुर फिर चरण चलायो गहि लीनों करि कोप चलायो

पट्क्यो लै तरुतालहि लाई ❀ भयो प्राणबिन तरुहिं गिराई
 तरु सों तरु टूटे भर्राई ❀ ग्वालवाल सब करत बढ़ाई
 और बहुत धेनुक परिवारा ❀ कीन्हों बल सब को संहारा
 माखो असुर महा दुखदाई ❀ ग्वालवाल सब करत बढ़ाई
 आये सब बृन्दावन माहीं ❀ जहँ तहँ श्यामहिं देखत जाहीं
 चढ़ि चढ़ि द्रुमन पुकारत ग्वाला ❀ आवहु हो मोहन नँदलाला
 ल्याये घेरि मिली सब धेनू ❀ आवहु मधुर बजावहु बेनू
 कोमल चरण कहूँ मति धावहु ❀ कंठक कठिन मही इत आवहु
 ऐसे हरि को देखत जाहीं ❀ तृप्ति भये सब वनके माहीं
 ग्वालवाल सब यमुनिहिं आये ❀ बल रसमत्त न पहुँचन पाये

दो० गोप गाय अँचवत भये, कालीदह को नीर ।

निकसत सब अकुलायकै, बैठगये जल तीर ॥

सो० परे सकल मुरभाय, जहां तहां बिषभारते ।

ग्वाल बच्छ अरुगाय, भये मनौ बिन प्राणसब ॥

हरि ठाढ़े वंशीबट झाहीं ❀ बारहिं बार कहत मन माहीं
 अबहिं रहे सब संग चरावत ❀ निकसि गये धौं कित वनधावत
 गौ रांभन ग्वालन के बैना ❀ अनकत कछु न सुनत बन ऐना
 तरु चढ़ि इत उत गैयन हेरत ❀ लै लै नाम सखन को देखत
 कालीदह तन आहट पाई ❀ शोध लेत उत चले कन्हारि
 बन घन हूँदत हरि तहँ आये ❀ गाय ग्वाल सब मुर्च्छित पाये
 मनमें ध्यान करतही जान्यो ❀ काली अहि ह्यां आय समान्यो
 रहत इहां खगपति भयमानी ❀ अँचयो इन ताको बिषपानी
 अभी दृष्टि प्रभु सकल निहारी ❀ तुरत उठे सब भये सुखारी
 देख कृष्ण को अति सुखपाई ❀ मिले सकल प्रेमातुर धाई

बोले हरि मृदु वचन मुहाये ॥ तुम सब मोहिं चोड़िके आयें
किततें कित इत निकसे आई ॥ में वन हँदि खों पकनाई
दो० खोज लेत आयो इहां, देखे सब बेहाल ।

सुरञ्जि परे काहे धरणि, भयो कहा जंजाल ॥

सो० गाय वच्छ अरु ग्वाल, उठे एकही बार पुनि ।

कहा कियो इहि ख्याल, देखिमोहिं अचरज भयो ॥

मुनि हरि वचन परम सुखदाई ॥ कहत सखा सब मुनहु कन्हाई
अँचयो तृपित यमुन जल आई ॥ तवहिं गिरे सब तट अकुलाई
कारण कलु हम जान्यो नाहीं ॥ भये प्राणधिन सब क्षण माहीं
इक हम जानी कुँवर कन्हाई ॥ तुमहीं हमहिं जिवायो आई
हौ तुम ब्रजजनके रखवारे ॥ जहां तहां तुम हमहिं उचारे
तव हरि बलदाऊ को हेरो ॥ कल्यो चलहु वन होत अंधेरो
सखा बोल ल्याये बलरामहिं ॥ हमें देखि सुन्दर वनश्यामाहिं
बड़ी देर भइ तुम्हें कन्हैया ॥ रहे अकेले वन में भैया
चलहु वेग अब घरको जाहीं ॥ लेहु निवाहि गाय वन माहीं
हेरी देत चले सब ग्वाला ॥ गावत गुण सुन्दर गोपाला
गोधन आगे दये चलाई ॥ मखन मध्य मोहन वनभाई
चले ब्रजहिं ब्रजजन सुखदाई ॥ निरखि बदनअधि मदन लजई
दो० मुनि ब्रजसुन्दरि परस्पर, कहत सुरलि स्वरधोर ।

आवत वनवसि अहरनिश, आगमनन्दकिशोर ॥

सो० धाई गृह तजि काज, निरखन को मनभावता ।

सुन्दर युत ब्रजराज, लाज साज सब चोड़िके ॥

वे देखो आवत बल गोहन ॥ सुबल सुदाम सुदामा गोहन
मेघ श्याम तन गेयन पाछे ॥ शीशमुकुट कटि कन्दर्पा काये

कमल बदन कर बेणु बजावैं ❀ गौरी राग मिले स्वर गावैं
 नयन विशाल कमलते आछे ❀ कोटि मदन की छविको बाछे
 कुंडल श्रवण बदन छबि छाई ❀ गोरज छवि कहूँ चंद छिपाई
 निरखि मुदित सब ब्रजकी बाला ❀ पहुँचे आय सदन नँदलाला
 ब्रजजीवन बल मोहन भैया ❀ निरखि जननि दोउ लेत बलैया
 ग्वाल कहत धनि यशुदामाता ❀ धनिधनि बल मोहन दोउ भ्राता
 नर तन धरे देव ये कोऊ ❀ ब्रज अवतार लियो इन दोऊ
 ये हैं सब ब्रजके रखवारे ❀ गाय गोप के राखनहारे
 गर्दभ रूप असुर इक भारो ❀ ताहि आज हलधर वन मारो
 हम सब यमुना तट मुरझाई ❀ तहां कान्ह सब मरत जिवाई

दो० अब हम काहू डरत नहिं, ये हैं हमें सहाय ।

बल मोहनके बल फिरत, बन बन चारत गाय ॥

सो० परत गाढ़ जब आय, तब तब होत सहाय हरि ।

चिरजीवैं दोउ भाय, यशुमति ये तेरे कुँवर ॥

यशुमति सुनि ग्वालनकी बानी ❀ कह्यो गर्ग सब सत्य बखानी
 नित नव चरित सुनत इन केरे ❀ हैं कोऊ ये बड़न बड़ेरे
 धन्य धन्य ये ब्रज में आये ❀ धन्य धन्य हम सुत करि पाये
 अतुलित कर्म दुहुँन के जानी ❀ दोउ जननी मन मांझ सिहानी
 श्याम राम दोऊ नँदरानी ❀ लिये लाय छाती हरपानी
 भूखो जानि तुरत अन्हवाये ❀ षट्स ब्यञ्जन सरस जिमाये
 भोजन करि अँचये दोउ भाई ❀ लीन्हे पान संत सुखदाई
 पौढ़े सेज दास हितकारी ❀ ब्रज बासी जन हैं बलिहारी
 चिन्तामणि हरिजन सुखदानी ❀ कालीकी चिन्ता उर आनी
 ग्वाल गाय नित वनको जाहीं ❀ दुख पावत कालीदह माहीं

विषध को रहवो जल माहीं ॥ वृन्दावन दिग नाको नाहीं ॥
कालिहि काहि इहां नै दीजे ॥ यमुना को जल निर्मल कीजे ॥
दो० यह विचार मन में करत, भये नौदवश श्याम ।

यशुमति हरि पौढ़ायके, आप लगी गृहकाम ॥

सो० खरे न बोलन देत, घर में काह को महारि ।

बल मोहन के हेत, जागि परं मति नौद ते ॥

शिवसनकादिदिवसनिशिध्यावे ॥ कवहुं जाको अन्न न पावे ॥
ब्रह्म सनातन आनंद खानो ॥ सो नंद सदन सोवन गुणदानी ॥
देखो नंद कान्ह अति सोवत ॥ श्रमिन जानि वनके सुख जावन ॥
मानत नाहिं कहो किन कोऊ ॥ आप हठीले भैया दाऊ ॥
करसों पोंछत सुभग शरीरा ॥ कहियत यह प्रेमकी पांग ॥
निज पलका तहूँ लियो भँगाई ॥ सोये हरि के दिग नंदगई ॥
यशुमति हूँ पोढ़ी ताई ॥ आई ॥ निशि धीने अभिकी अभिकाई ॥
जाग उठे तब कुँवर कन्हैया ॥ कहाँ गई मो दिग नै भैया ॥
सँग सोवत जान्यो बलभाई ॥ अतिही श्याम उठे अकुलाई ॥
जागे नंद अरु महारि यशोदा ॥ हरिको पेंच लियो नंदगोदा ॥
काहे भिभकि उठ्यो अनियागा ॥ तुरन्ति दीपक कियो प्रकासा ॥
सपने गिरो यमुन जल जाई ॥ काहू मोको दिवो गिराई ॥
दो० नितप्रति मैं वरजत रहौं, तू हठि यमुना जाय ।

सुधि रहग ई अन्हानकी, जिन हो लाल डगाय ॥

सो० कोरै लै नंदराय, पौढ़ाये निज मंग तब ।

वृन्दावन तू जाय, केहिकारण जिततितफिरत ॥

अब तू वृन्दावन जिन जाई ॥ तहां कोन धौ रहत बलाई ॥
सोये दम्पति बीच कन्हैया ॥ तुरन्ति गई नौद कि जाई ॥

सपनो मुनि जननी अकुलानी ❀ कहत नंद सों यशुदारानी
 देख्यो धौं कह स्वपन कन्हारै ❀ या ब्रजके जीवन दोउ भाई
 यहै यत्न इनको अब कीजै ❀ गाय चरावन जान न दीजै
 गृह सम्पति द्वै तनक दुयौना ❀ इनहीं लौ बलभोग ठढौना
 ये बन जात चरावन गैया ❀ हँसी करत ब्रज लोग लुगैया
 दम्पति आपस में इहिभांती ❀ करत विचार वीतिगइ राती
 तारागण सब गगन छिपाने ❀ गयो तिमिर अम्बुज बिकसाने
 उठि यशुमति लागी गृह काजा ❀ भूलि गयो निशि शोच समाजा
 प्रात स्नान यमुन नित जाई ❀ नंदहि तुरतहि दियो उठाई
 मथन हार ग्वालनिन सब जागीं ❀ जिततित दही बिलोवन लागीं

दो० हरिप्यारीसुरभीनको, जम्ब्यो जुदधि बिलगाय ।

सो हरिहितमाखनलिये, मथति यशोदा माय ॥

सो० सद माखन निज पानि, मथत तुरत मथनीधख्यो ।

बड़ भागिन नंदरानि, माखन प्यारे लालहित ॥

लगी जगावन हरिको जाई ❀ उठहु तांत माता बलि जाई
 प्रगट्यो तरणि किरण महि छाई ❀ खोलि देहु मुख कमल कन्हारै
 सखा द्वार सब तुमहि बुलावैं ❀ तुम कारण सब धाये आवैं
 उठि तिनको मिलकै सुख दीजै ❀ होत अबार कलेऊ कीजै
 तव हरि उठिकै दर्शन दीनो ❀ माता निरखि मुदित मन कीनो
 दाऊ जू कहि श्याम पुकाख्यो ❀ नीलाम्बर गहि सुखतें दाख्यो
 मनु घन तें शशि भयो नियारो ❀ प्रगट्यो सुन्दर मुख उजियारो
 हँसत उठे सुन्दर दोउ बीरा ❀ गौर श्याम अति सुभग शरीरा
 शयन भवन तें बाहर आये ❀ लखि दोउ जननि परम सुखपाये
 दतवन लै दोउवन कर दोनी ❀ चौकी बैठि सुखारी कीनी

मातन निज निज कर मुख धोयो ॥ नयनन को आग्न नव लोयो ॥
 अँचरन सों मुख कमल अँगोछे ॥ उर लगाय नव धंगन पोरो ॥
 दो० करहु कलेऊ लाल दोउ, तब कहूँ बाहर जाउ ।
 मथ्यो तुरत मीठो मधुर, माखन रोटी खाउ ॥
 सो० दई दुहुँन को मात, रोटी अरु माखन मधुर ।
 हरपि परस्पर खात, माता अंतर हेतु लखि ॥

अथ कालीदमन लीला ॥

अपि नारद हरि भक्त सयाने ॥ प्रभुके मनकी गति पहिचाने ॥
 गावत गुण हरि परम हुलासा ॥ गये तुरत मथुरा नृप पासा ॥
 देखि कंस आदर अति कीनो ॥ करि दगडवन वगवन दीनो ॥
 नारद कह्यो कुशल नृप राई ॥ कलुक शोच वश परत ललाई ॥
 तुम प्रताप मुनि कुशल सदाई ॥ एक शोच मोहि बड़ा गुनाई ॥
 ये दोउ ब्रजमें नन्द कुमार ॥ जानि परत मोहि कोउ अचनाग ॥
 कहत जिन्हें बलराम कन्हई ॥ तिन की गतिमति जानि न पाई ॥
 तृणावर्त से दैत्य पठाये ॥ सो उन पल डकमाहि नशाये ॥
 बकी पठाय दई पहिलेहीं ॥ ऐमन को बल नव ले लीये ॥
 उन तें भयो नहीं कह्य काजा ॥ यह मुनिममुभिहोत मोहिनाजा ॥
 अब मुनि तुम कह्य कहहु विचारा ॥ जिहि विधि मागहु नन्दकुमार ॥
 मुनि हरिके गुण नीके जाने ॥ मुनि नृपवचन मनहि मुनकाने ॥
 दो० तब बोले मुनि नृपतिसों, सत्य कही तुम तान ।
 वे दोऊ अवतार हैं, उन गति जानि न जान ॥
 सो० हैं वे तुम्हरे काल, प्रकट भये ब्रज आयके ।
 नन्द गोपके बाल, तुम इनको गव्यो मनिहि ॥

एक बात मेरे मन आवै ❀ करहु कंस तुमको जो भावै
 काली अहि रह्यो यमुना आई ❀ तहां कमल फूले विपुलाई
 फूल तहांते मांगि पठावहु ❀ दूत पठै नन्दहि डरपावहु
 यह सुनि ब्रजके लोग डरैहैं ❀ यहै बात वेऊ सुनि पैहैं
 जैहैं अवशि फूल के काजा ❀ तहां घात करिहैं अहिराजा
 यह सुनि कंस बहुत सुख पायो ❀ भलो मंत्र मुनि मोहिं वतायो
 धनिधनिकहिपुनिपुनिशिरनावत ❀ हरषि चले मुनि हरि गुण गावत
 तबहिं कंस इक दूत बुलायो ❀ ब्रजहिं नंद के पास पठायो
 दीनों ताको पत्र लिखाई ❀ कहियो यहै नन्द को जाई
 कोटि कमल कालीदह केरे ❀ पहुँचावहु लै काल्हि सवेरे
 कंसराज अति काज मँगाये ❀ बनिहै तुमको तुरत पठाये
 चलो दूत आतुर ब्रजधाई ❀ जानिलई सब कुँवर कन्हाई

दो० आप रहे तादिन घरहिं, बनहिं पठाये ग्वाल ।

ब्रजवासी जनके सुखद, ब्रजजीवन नंदलाल ॥

सो० दूतहि आवत जान, आप गये बहराय हरि ।

सुन्दरश्याम सुजान, खेलत ग्वालन संगमिलि ॥

आये नंद यमुन जल न्हाये ❀ पैठत सदन झींक भइ बांये
 महर मलिनमन असगुन जान्यो ❀ आज कहा उर शोच समान्यो
 तबहीं चलो दूत जब आयो ❀ नंदमहर घरही में पायो
 बोल लिये पाती कर राखी ❀ नृप की कही मुखागर भाखी
 कालीदह के फूल मँगाये ❀ ता कारण अति डाट पठाये
 जो नहिं मोकों फूल पठावहु ❀ तौ कोउ ब्रजमें रहन न पावहु
 गोप नंद उपनंद जितेका ❀ डारौं मार न राखौं एका
 जो नहिं काल्हि कमल में पाऊं ❀ तो दोउ सुत तेरे बांधि मँगाऊं

यह मुनि नन्द गये मुरझाई ॥ और गोप नव नित्य बुलाते
तिन सब को सब बात जनाई ॥ परी आय यह घनि कठिनाई
कोटि कमल कालीदह यहाँ ॥ कहाँ कौन धों काढ़न जाहीं
कह्यो फूल जो काल्हि न पाऊं ॥ तो मुन तेरे बांधि मँगाऊं
दो० मेरे सुत दोउ नृपति उर, खटकत हैं दिनरात ।

आज कही यह बात माँ, बलमोहन पर घात ॥

सो० चढ़िहै ब्रजपर धाय, काल्हिकंस अति कोपकर ।

वन्यो मरण अब आय, को राखें कित जाइये ॥

मोहिं अपने जियको डर नाही ॥ शोच श्याम बलको उर माहीं
अब उबार देखियत नहिं कोई ॥ बल मोहनहिं गायि को मँह
वर मोहिं राखें बांधि नृपाला ॥ रहें सदन बल मोहन नाला
नन्द वचन मुनि सब ब्रजवासी ॥ भये दुग्धित मन परम उदामा
काहू पै कहु बात न आई ॥ अति भय त्रसित गये मुरझाई
चकित महा ब्रजवासी ठाढ़े ॥ मानहुँ चित्र चिह्न लियि काढ़े
नन्द घरनि ब्रजनारि विचारें ॥ अति व्याकुल नयनन जल दाँ
ब्रजहिं वसत सब जन्मसिरान्यो ॥ इहिविधि कंस न कबहुँ गिमान्यो
कालीदह के फूल मँगाये ॥ कहाँ कौनविधि जान गो पाये
अतिहि शोचवश सब नर नारी ॥ भये कंस तें बहुत दुःखी
कोउ कह शरण बलो सब जाहीं ॥ शरण गये कहि है कहु नाही
कोउ कहै देहु जितौ धन चाहें ॥ एते सब भिनि बुझि उपाहें
दो० यहै शोच सब मिलि पगे, नहीं कहें निग्वार ।

ब्रज भीतर नँदभवन में, घर घर यही विचार ॥

सो० अन्तर्यामी जानि, खेलत ते आयें घरहिं ।

देखत ही नँदरानि, दृग भर लिये लगाय उर ॥

चितवत माता कुँवर कन्हाई ❀ बूझत कत रोवत दुख पाई
 बूझहु जाय तात सों बाता ❀ मैं बलि जाउँ वदन जलजाता
 तुमहीं काज कंस अकुलाई ❀ बाहर मत कहूँ जाहु कन्हाई
 जाय तात को शोच मिटावो ❀ अपने मधुरे वचन सुनावो
 आयो श्याम नंद पै धायो ❀ जान्यो मात पिता दुख पायो
 बूझत नंदहिं कुँवर कन्हैया ❀ तात दुखित कत तुम अरु मैया
 मोसों बात कहौ किन सोई ❀ कहा शोच वश हौँ सब कोई
 नंदलाल कनियां बैठारे ❀ कहा कहौँ तुम सों मैं प्यारे
 जब ते जन्म भयो सुत तेरो ❀ करत कंस तुमसे अरु मेरो
 केती करवर टीं तुम्हारी ❀ कुल देवन कीन्ही रखवारी
 प्रथमहिं अधम पूतना आई ❀ शकट तृणा पुनि आयो धाई
 बत्स बका अघ पुनि दुख दीनो ❀ सब तैं तोहिं राखि विधि लीनो

दो० कालीदह के फूल अब, पठये भूप मँगाय ।

सब तैं यह गाढ़ी परी, को करि लेय सहाय ॥

सो० जो नहिं आवैं फूल, लिख्यो कंस मोहिं डाटिकै ।

करौं ब्रजहिं निर्मूल, बांधि मँगाऊं तव सुतन ॥

बाबा तुम काहे दुख पाई ❀ कहत कौन धौं करै सहाई
 सो देवता ब्रजहिं के माहीं ❀ रहत हमारे सङ्ग सदाहीं
 लीन्हो जिन सब ठौर वचाई ❀ करि लेहैं सोई देव सहाई
 सोई कंसहि फूल पठैहै ❀ ब्रजवासिन को शोच मिटैहै
 कंस केश गहि सोई मारै ❀ असुर मारि भू भार उतारै
 सब मिलि सोई देव मनावो ❀ अपने मनतें शोच मिटावो
 सुनत महर हरि मुखकी बानी ❀ भये सुखी धीरज उर आनी
 इष्टदेव को शीश नवायो ❀ तहां तहां तुम श्याम वचायो

शरण शरण प्रभु शरण तुम्हारी ❧ अवहं करहु सहाय हमारी
जाते कंस त्रास मिटि जाई ❧ रहैं सुखी बलराम कन्हई
मात पितहिं हरि इहि ढंगलाई ❧ आप चले खेलन हरपाई
सखन मध्य गये कुँवर कन्हई ❧ कछो खेलिये गेंद मँगाई

दो० श्रीदामा यह सुनतही, गयो धाम निज धाय ।

अपनो गेंद ले आयके, दीनों हरि को आय ॥

सो० चलो खेलिये धाय, बाहर घोष निकास कै ।

जहँ कोउ आवन जाय, गेंदखेल वनिहै तहां ॥

सखन संग लै बाहर आई ❧ रच्यो गेंद को खेल कन्हई

इक मारत इक भाजत जाहीं ❧ रोक लेत इक बीचहि माहीं

आपस मांझ परस्पर मारैं ❧ नाना रंग करिकै किलकारैं

भाजत मारत दूजो जाहीं ❧ मारत धाय बहुरि सो ताहीं

श्याम सखन को खेलत माहीं ❧ यमुनातट तन लीन्है जाहीं

आपन जात कमल को लालन ❧ सखा संग लीने सब ख्यालन

को जानहि यह हरि के ख्याला ❧ यमुना निकट गये सब ख्याला

श्याम सखा को गेंद चलाई ❧ अंग मोर सो गयो बचाई

पड़ो गेंद यमुना जल माहीं ❧ द्वै गयो खेल भंग तिहि ठाहीं

पकरी धाय फँट श्रीदामा ❧ मेरी गेंद देहु तुम श्यामा

जान बूझ तुम गेंद गिराई ❧ वनिहै दीन्है गेंद मँगाई

और सखा मोको मति जानो ❧ मोसों मतिहिं दिठाई ठानो

दो० सखा हँसत सब तारिदै, भली करी तुम कान्ह ।

दीन्ही गेंद बहाय जल, देहु श्रीदामहिं आन्ह ॥

सो० सकल लोक शिरताज, पार न पावैं ब्रह्म शिव ।

ताहि गेंद के काज, फँट पकरि झरत सखा ॥

छांड़ि देहु मेरि फेंट सुदामा ❀ रारि बढावत थोरेहि कामा
 बदले गेंद लेहु तुम मोसों ❀ फेंट न गहौ कहाँ मैं तोसों
 छोटे बड़ो न जानत काहु ❀ करत बराबर पकरत बाहु
 हम काहे को तुमहिं बराबर ❀ तुम उपजे अब बड़े नंदघर
 ऐसे हम अब गये बिलाई ❀ तुमहुँ बराबर नाहिं कन्हारै
 सुनहु श्याम हम तुम इक जोदा ❀ कहा भयो तुम नंद के दोदा
 गेंद दिये ही वनै भँगाई ❀ मोसों चलिहै नाहिं दिठाई
 मुँह सँभारि बोलत नहिं मोसों ❀ करिहौ कहा दिठाई तोसों
 पुनि पुनि करत बराबर आई ❀ तैं नहिं जानत मोरि धुताई
 प्रथम पूतना शकटा माखो ❀ कागासुर अरु तृणा पद्माखो
 बत्स बकासुर बनके माहीं ❀ माखो सो कह जानत नाहीं
 अघ माखो पुनि देखत तोहीं ❀ ऐसो धूत न जानत मोहीं

दो० तुम मारे सो सांच सब, कतही लाल डराहु ।

कंस कमल अब देहु तब, हमहिं मारियो जाहु ॥

सो० कालिहि परिहै जानि, पकरि मँगैहै कंस जब ।

देत फूल किन आनि, बहुत अचकरी करिरहे ॥

सांच कहाँ मैं सुनो श्रीदामा ❀ आयों इहां फूल के कामा
 कितक बापुरो कंस बतायो ❀ जाके भय तुम मोहिं डरायो
 केश पकरि गहि ताहि पद्मारों ❀ देखहुगे तुम देखत मारों
 कोटि कमल तेहि आज पठाऊं ❀ ब्रजतैं ताको त्रास नशाऊं
 कालीदह जल पियत मरे सब ❀ गहि लाऊं सोई काली अब
 लीन्हीं. रिस करि फेंट छोड़ाई ❀ चढ़े कदम पर धाय कन्हारै
 नीचे सखा हँसन सब लागे ❀ श्रीदामा के डर हरि भागे
 रोय चले श्रीदामा घर कों ❀ जाय कहत मैं महरि महर कों

देखत कहि कहि सखा कन्हई ❀ लेहु गेद मैं ल्यावत जाई
 यह कहि नटवर मदन गोपाला ❀ कूदि परे जल में नंदलाला
 हाय हाय करि सखा पुकारे ❀ भये श्याम विन बहुत दुखारे
 रोवत चले ब्रजहिं सव धाई ❀ श्रीदामा को दोष लगाई
 दो० कोमल तन अति सांवरो, साजे नटवर साज ।

जलमें पैठि गये तहां, जहँ सोवत अहिराज ॥
 सो० इहि अंतर हरि माय, भूखे कै हैं जानि हरि ।
 खेलत तैं अब आय, मोसों भोजन मांगि हैं ॥

यशुमति चली रसोई कारिन ❀ तवहीं छींक उठी इक ग्वालिन
 ठिठकि रही उर शोचत ठाढ़ी ❀ भली नहीं कछु चिंता वाढ़ी
 आई अजिर निकसि पछिताई ❀ चली बहुरि सो दोष मिटाई
 मार्जारी तव पंथ कटाई ❀ बहुरो यशुमति वाहर आई
 व्याकुल भई निकरि गई द्वारे ❀ कहँ धौं खेलत मेरे वारे
 वायें काग दाहिने खर स्वर ❀ सुनि आई अति व्याकुल फिर घर
 छिन बाहर छिन आंगन माहीं ❀ देखत हरिहि शांत मन नाहीं
 तवहीं नन्द चले घर आवत ❀ देख्यो श्वान श्रवण फटकावत
 दाहिने काहू रोय सुनायो ❀ माथे पर है काग उड़ायो
 सन्मुख गररी करत लराई ❀ डरे नन्द अशकुन बहु पाई
 आये घर मन मलिन विशेषी ❀ व्याकुल मलिन वदन तिय देखी
 बूमत यशुदाहि नन्द डराई ❀ काहे तव मुख गयो भूराई
 दो० चली रसोई करन हौं, छींक भई मोहिं आज ।

आगे कै मार्जारि पुनि, गई दूसरे आज ॥
 सो० तवते मो जिय शोच, हरि धौं खेलत हैं कहां ।
 समुझ कंस कृत पोच, मेरे मनमें त्रास अति ॥

नन्द कहत पैठत घर माहीं ❀ मोहिं शकुन नीके भये नाहीं
 आज कहा यह समुझि न जाई ❀ हैं धौं कित बलराम कन्हाइ
 महरि महर मन त्रास जनाई ❀ खोजत हरिहि चले अकुलाई
 सखा सकल इहि अंतर धाये ❀ रोवत ब्रजहिं पुकारत आये
 महरि महर सों आय जनाई ❀ यमुना बूढ़े कुँवर कन्हाइ
 सुनि दंपति ब्रूझत अकुलाई ❀ कैसे कहा कहौ समुझाई
 खेलत कदम चढ़े हरि धाई ❀ कूद परे कालीदह माई
 सुनतहि परी धरणि महँ भैया ❀ कीनो सपनो सत्य कन्हैया
 रोवत नंद यमुन तट आये ❀ बालक सब नंदहि सँग धाये
 ब्रज घर जहां तहां यह बाता ❀ ब्रजवासी आये विलखाता
 कहां पखो गिरि कुँवर कन्हाइ ❀ दई बालकन ठौर बताई
 त्राहि त्राहि करि नंद पुकारे ❀ गिरे धरणि नहि अंग सँभारे

दो० लोटत अति ब्याकुल धरणि, परन चलत जल धाय ।

कहत श्याम तुम दियो दुख, मोको बैस बुढ़ाय ॥

सो० लोग उठे सब रोय, दीन बचन सुनि नंद के ।

कहत बिकल सत्रकोय, हरि तुम ब्रज सुनो कियो ॥

नंदहि गिरत सबहि गहि राख्यो ❀ ता बिनको दुख जात न भाख्यो
 कहत गोप नंदहि समुझाई ❀ बन्यो मरण सबही को आई
 हरि बिन को जीवै ब्रज माहीं ❀ कहौ कान्ह किहि जीवन नाहीं
 मोह भगन अति यशुमति भैया ❀ टेस्त भरे लाल कन्हैया
 आज कहां तुम बेर लगाई ❀ माखन धखो खाउ किन आई
 अति कोमल तुम्हरे मुख योगू ❀ जेवहु लाल लेहुँ मैं रोगू
 धौरी दूध धखो औटई ❀ तुम निज कर दुहि गये कन्हाइ
 सदमाखन अति हित मैं राख्यो ❀ आज नहीं तुम नेकहु चाख्यो

प्रातहिं ते मैं दियो जगाई ❀ दँतवन करि जो गये दोउ भाई
मैं चितवत तव पंथ कन्हाई ❀ खेलत आज अवार लगाई
वैठो आय संग दोउ भैया ❀ तुम जेवहु मैं लेहुँ बलैया
शोक सिंधु बूझत नँदरानी ❀ तनकी सुधि बुधि सबै भुलानी
दो० व्रजयुवती सुनि महरिके, बचन प्रेम आधीर ।

अकुलानी रोवत सबै, बढी कठिन उर पीर ॥

सो० बरजत यशुदहिं ग्वाल, यह कहिकहिं हरि हैं भले ।

सुतवियोग विकराल, जात नहीं कहि मात को ॥

चौक परी तनकी सुधि आई ❀ रोवत देखे लोग लुगाई
तव जानी दह गिरे कन्हाई ❀ पुत्र पुत्र कहिकै उठि धाई
व्रजवनिता सब संगहि लागीं ❀ श्याम वियोग विथा सब पागीं
कान्ह कान्ह कहि सकल पुकारैं ❀ तोरत लट उरसों कर मारैं
अति व्याकुल यमुना तट जाई ❀ गिरी धरणि यशुमति अकुलाई
मुरझि परी तन दशा भुलाई ❀ प्राण रख्यो हरि मुरति समाई
व्रजवासी सब उठे पुकारी ❀ जल भीतर कह करत मुरारी
संकट में तुम करत सहाई ❀ अब क्यों नाहिं बचावत आई
मात पिता अतिही दुख पावैं ❀ रोय रोय सब कृष्ण बुलावैं
आय गये हलधर तेहि काला ❀ देखी जननी विकल विहाला
नाक मूँदि जल सींचि जगाई ❀ जननि जननि कहि ढेर लगाई
बार बार जब हलधर देख्यो ❀ भयो चेत कलु बलतन हेख्यो
दो० कइत उठी बलराम सौं, वनहिं तज्यो लघु भ्रात ।

कान्ह तुमहिं विन रहत नहिं, तुमसों क्यों रहि जात ॥

सो० भगन शोच उरमांझ, कहत लै आवहु कान्ह कोउ ।

भूखे हैं गइ सांझ, आज कछु खायो नहीं ॥

कवहुँ कहत बन गयो कन्हई ❧ कवहुँ बतावत घर समुदाई
 कान्ह कान्ह कहि ढेर लगावै ❧ कित खेलत कहि लाल बुलावै
 अति ही मोह विकल नँदरानी ❧ करत बोध हलधर मृदुवानी
 कत रोवत तू यशुमति मैया ❧ नीके हैं धरु धीर कन्हैया
 श्यामहिं नेक कहुँ डर नाही ❧ तू कत डरपत है मन माहीं
 तेरी सों मैं कहत पुकारे ❧ वह काहू के मरै न मारे
 जिन काली भय होहु दुखारी ❧ तू अपने मन देख विचारी
 पहिले बकी कपट करि आई ❧ तब दिन दशके हते कन्हई
 शकटा तृणावर्त्त पुनि आयो ❧ तू देखत हरि तिन्हें नशायो
 बत्स बका अब बन में मारे ❧ बिष जलतें सब श्वाल उवारे
 अब वे काली नाथे लैहैं ❧ कमल पठाय कंस को दैहैं
 मोहिं भरोसो कान्हर केरो ❧ मानो सत्य कह्यो मुनु मेरो

दो० मोहिं दुहाई नंद की, अबहीं आवत श्याम ।

नाग नाथिलै आवहीं, तौ कहियो बलराम ॥

सो० सुनि हलधरके बैन, अति उदार हरिके चरित ।

भयो कछुकउर चैन, जो कछु करहिं सुसोहसब ॥

बांह पकरि बल को बैठाई ❧ लै बलाय उर रही लगाई
 अति कोमल तन धरे कन्हई ❧ पहुँचे काली के ढिग जाई
 हरिको देखि उरग की नारी ❧ रही चारु मुख चिह्न निहारी
 कहत कौन तू इत कित आयो ❧ अति कोमल तन काको जायो
 बारहि बार कहति अकुलाई ❧ बेग भाज इतते कित जाई
 देखै नाग जाग कै जबहीं ❧ हैहै भस्म छिनकमें तबहीं
 सुनत नागनारी की बाणी ❧ बोले हँसि हरि शारंगपाणी
 पठयो मोहिं कंस नृपराई ❧ तू याको अब देहु जगाई

कंस कहा तू इनहिं वतैहै ❀ एक फूंक में तू जरि जैहै
 अजहूं भाजि कह्यो करि मेरो ❀ लगत छोह देखत तन तेरो
 मरहु कंस जिन तोहिं पठायो ❀ तू कत इहां मरणको आयो
 बालक जानि दया अति मेरे ❀ दुख पैहैं पितु माता तेरे
 दो० अरी बावरी सर्प सों, कहा डरावत मोहिं ।
 जैसो मैं बालक प्रगट, अबहिं दिखावहुं तोहिं ॥
 सो० तू किन देत जगाय, देखौं मैं याके बलहि ।
 यापै कमल लदाय, लै जैहों इहि नाथि ब्रज ॥

सुनत बचन अहिनारि रिसानी ❀ छोटे वदन कहत बड़ बानी
 खगपति सों सरवर जिन ठानी ❀ ताहि कहत नाथन अज्ञानी
 देखतही हैहै जर छारा ❀ केतक तू बपुरो सुकुमारा
 बपुरो मोहिं कहत अहिनारी ❀ बोलत नाहिंन बात सँभारी
 अबहीं तोहिं बपुरि करि डारौं ❀ एकहि लात खसम तुव मारौं
 सोवत काहू मारिय नार्हीं ❀ चलि आई है बात सदाहीं
 ताते तू पति देइ जगाई ❀ देखौं मैं याकी मनुसाई
 जोपै तोहिं मरन बुधि आई ❀ तौ तूही किन लेत जगाई
 तव हरि भरकि ताहि दै गारी ❀ दावी चरण पूँछ अहिकारी
 मसकी नेक धरणि सों लाई ❀ काली उरग उठ्यो अकुलाई
 आयो जानि गरुड़ भय बाढ़्यो ❀ देख्यो बालक आगे ठाढ़्यो
 तबहिं क्रोध करि गर्व बढ़ायो ❀ भयकि पूँछ अतिरिसकरि धायो
 दो० दांव घात लाढ्यो करन, सहसौ फेन फटकार ।

बार बार फुंकार कर, डारत विष की भार ॥

सो० जरत यमुन को नीर, जात फेन उतरात विष ।
 परसत नाहिं शरीर, अहिमद भोचन श्यामके ॥

कियो युद्ध बहु उरग अघाई ❀ सुरे नहीं नेकहु यदुराई
 कहत परस्पर अहिकी नारी ❀ देखहु यह बालक अति भारी
 बिष ज्वाला जल जरत यमुनको ❀ याके तन परसत नहिं तनको
 यह कछु मंत्र यंत्र धौं जानै ❀ अति कोमल विष नेक न मानै
 सहसौ फनन करत अहि घाता ❀ अबलौं बच्यो पुण्य पितु माता
 तब अहिराज श्याम तन हेरी ❀ कहत पूँछ दावी इन मेरी
 अतिहि क्रोध करि आतुर धाई ❀ हरिके अंग गयो लपटाई
 नखते शिखलौं अहि लपटाई ❀ कहत करी इन बहुत ढिठाई
 कौतुकनिधि हरि सबगुण खानी ❀ कियो दांव इहि अहि को जानी
 तिहि अवसर सुर सुनि गंधर्वा ❀ अति व्याकुल आये ब्रज सर्वा
 उरगनारि मन मन पछिताहीं ❀ हरिको रूप समुझि मन माहीं
 कहैं गर्व करि अति यह आयो ❀ काल विवश पग इतहि चलायो

दो० काली हरिसों लिपटकै, गर्व कियो मनमाह ।

कहत मोहिं जानत नहीं, मैं सर्पन को नाह ॥

सो० भंजब गर्व गोपाल, गर्व भरे सुनि अहिवचन ।

कीन्ही बपुषविशाल, बिकलभयो अहिराज तब ॥

जबहिं श्याम तन अतिविस्तारो ❀ टूटन लाग्यो अंग सब सारो
 शरण शरण तब उरग पुकारो ❀ मैं नहिं जान्यों रूप तिहारो
 जीव दान प्रभु मोको दीजै ❀ अपनी शरण राखि मोहिं लीजै
 यह बाणी सुनतहि भगवाना ❀ सकुच गये हरि कृपानिधाना
 यहै वचन गजराज सुनायो ❀ गरुड़ छांड़ि ताके हित आयो
 यहै वचन सुनि झुपदमुता को ❀ बसन बढ़ाय दियो पुनि वाको
 यहै वचन सुनि लाक्षाग्रह ते ❀ लीने राखि पाण्डवन जरते
 यह बाणी सहिजात न श्यामहि ❀ दीनबन्धु करुणा के धामहि

लीनों अंग सिकोर कृपाला ❀ देख्योविकल शिथिलजव न्याला
पगसों चापि नाक धरि फोरी ❀ लीनों नाथ हाथ गहि डोरी
कूद चढ़े हरि ताके शीशा ❀ मन मन करत विचार अहीशा
मैं यह सुन्यों हतो विधि पाहीं ❀ कृष्णवतार होहि ब्रजमाहीं
दो० ते गोकुल में अवतरे, मैं जान्यों निरधार ।

ये अविनाशी ब्रह्म हैं, ब्रजै कृष्ण अवतार ॥

सो० किये बहुत नत धात, बार बार पछितात मन ।

अस्तुति करत लजात, रह्यो दीन है सकुच अति ॥

देख्यो ब्याल विहाल कृपाला ❀ दियो दरश निज दीनदयाला
देखि दरश मन हर्ष बढ़ाई ❀ बोल्यो दीन वचन अहिराई
मैं अपराध कियो विन जाना ❀ क्षमौ नाथ तुम क्षमानिधाना
तामस योनि कीट विष जानों ❀ कौन भांति तुम को पहिचानों
अब कीन्हों प्रभु मोहि सनाथा ❀ दीनों दरश जगत के नाथा
अशरण शरण नाथ तव बाना ❀ कहत संत सब वेद पुराना
ते अपराध क्षमा सब कीजै ❀ अब प्रभु शरण राखि मोहि लीजै
आज धन्य यह मेरो माथा ❀ जापर चरण दिये मम नाथा
अब ये चरण पसस प्रभु तेरे ❀ मिटे दोष दुख अघ सब मेरे
जो पद कमल पुनीत तुम्हारे ❀ निशि दिन रहत उमा उर धारे
शिव त्रिशंखि सनकादिक ध्यावैं ❀ जे पद योगी ध्यान लगावैं
जे पद पद्म सलिल मुर सरिता ❀ तीन लोक की पावन करिता
दो० जिन पद पंकज परस ते, गति पाई ऋषिनारि ।

सुर नर मुनि वन्दत तिन्हें, संतन प्राण अधारि ॥

सो० फिरत चरावत गाय, श्री वृन्दावन जे चरण ।

भक्तनके सुखदाय, ब्रजवासी जन दुख हरण ॥

जे पद पंकज परम सुहाये ❀ प्रभु मैं आज सुलभ करि पाये
 गरुड़ त्रास ते इत भजि आयो ❀ भलो कियो मोहिं गरुड़ सतायो
 जाते दरश भयो प्रभु तेरो ❀ अब भयताप मिट्यो सब मेरो
 आज भयो मैं नाथ सनाथा ❀ गहो नाथ मम प्रभु निज हाथा
 सुनत दीन काली की बानी ❀ दीनबन्धु अतिशय सुख मानी
 फनप्रति चरण सरोज छुवाये ❀ ताके सब सन्ताप नशाये
 तब ब्रजनाथ भक्त हितकारी ❀ यह अपने मन माहिं विचारी
 काली को ब्रज देश दिखैये ❀ कमल भार यापै लैजैये
 है हैं ब्रज के लोग दुखारी ❀ करौं जाय अब तिनाहिं सुखारी
 कमल कंस को देऊँ पठई ❀ काल्हि चढ़ैगो ब्रज पर आई
 लीने अहि पर कमल लदाई ❀ चले ब्रजहिं ब्रजजन सुखदाई
 लियो नाथ गहि अहि उचकाई ❀ फन पर ठढ़े कुँवरकन्हाई

दो० उरग नारि कर जोरि कै, प्रभु के सम्मुख आय ।

करत विनय अति दीन है, पतिहित हरिहि सुनाय ॥

सो० इत यशुमति उरमाहिं, उठी लहर सुत प्रेमकी ।

कान्हर आयो नाहिं, कहत रोय बलराम सौं ॥

कहत राम सुनु यशुमति मैया ❀ आवत आवत कुँवरकन्हैया
 नेक धीर धरु मति अकुलाई ❀ यह सुनिके बलकी बलि जाई
 पुनिवह कहत कान्ह नाहिंन अब ❀ भूठहिं मोहिं प्रबोध करत सब
 भई बिना सुत व्याकुल मैया ❀ कहत कहां मेरो बाल कन्हैया
 गिरी धरणि व्याकुल मुरझाई ❀ रोय उठे सब लोग लुगाई
 ब्रजबासी सब भये बिहाला ❀ कहत कहां मोहन नँदलाला
 तुम विन यह गति भई हमारी ❀ आवत नहीं धाय बनवारी
 प्रातहिं ते जल मांझ समाने ❀ तुमहिं बिना युग याम बिहाने

अब को बसै जाय ब्रज माहीं ❀ धिक् धिक् जीवन तुमहिं विनाहीं
अति व्याकुल रोवत नँदराई ❀ विकल मनहुँ फणिमणी गँवाई
यशुमति धाय चलत जलमाहीं ❀ राखति ब्रजयुवती गहि वार्हीं
हलधर सवहिन को समझावैं ❀ विना श्याम कोउ धीर न पावैं

दो० कहत यशोदा नंद सों, धिक धिक बारहिं बार ।

और कितेदिन जियहुगे, मरत नहीं मोहिं मार ॥

सो० कर देखहु मन ज्ञान, ऐसे दुख में मरण सुख ।

नंद भये विनप्राण, मूर्च्छि परे सुनि तिय बचन ॥

तबहिं धाय बल पिता जगायो ❀ बार बार कहि कहि समुझायो
बृथा मरत काहे सब कोई ❀ कान्हर मारन हार न कोई
हलधर कहत सुनहु ब्रजवासी ❀ वे अंतर्दामी अविनासी
सब गुण सागर आनंद रासी ❀ रमा सहित जलही के वासी
मेरो कह्यो सत्य करि मानो ❀ आवत श्याम धीर उर आनो
यमुना के भीतर तिहिकाला ❀ उख्यो सलिल भकभोर विशाला
बोल उठे आतुर बलरामा ❀ वे देखो आवत घनश्यामा
सुनत बचन लखि कै उठि धाये ❀ यमुना नीर तीर सब आये
कोउ जल में कोउ बाहर ठाढ़े ❀ दरशातुर विरहानल वाढ़े
प्रकट भये जल ते तिहिं काला ❀ ब्रजजन जीवन नंद के लाला
कमल भार काली पर लीन्हें ❀ नटवर वेप मनोहर कीन्हें
भये सुखी सब ब्रज के वासी ❀ लखि हरिबदन परम सुखरासी
झं० हरि बदन लखिकै राशि सुखकी मुदित ब्रजवासी भये ।

मनहुँ बूढ़त नाव पाई परम उर आनंद द्यये ॥

मात पिनु लखि जो भयो सुख जात सो कापै कह्यो ।

पुलक तन मन हरपि गद गद प्रेम जल लोचन बह्यो ॥

चाकित हरितन लखत इकटक मिलन को आतुर हियो ।
 श्याम निरतत अहि फनन पर खौर चन्दन तन कियो ॥
 श्रवण कुण्डल लाल लोचन चारु मुकुट विराजहीं ।
 मनहुँ मरकत गिरि शिखर मणि मोर तापर राजहीं ॥
 पीतपट कटि काञ्चनी उरमाल मणि भूषण सजे ।
 नृत्यतांडव करत फणप्रति व्योम दिव दुन्दुभि वजे ॥
 भई जय धुनि गगन वर्षहिं सुमन सुर आनंद भरे ।
 गगन गन्धर्व गुणन गावत तान तालन अनुसरे ॥
 उरग नारी श्याम सम्मुख करत अस्तुति आवहीं ।
 नाथ अब अपराध क्षमि करि कर कृपा पति पावहीं ॥
 राखे चरण निज शीश याके अति बड़ाई इन लई ।
 ऐसी बड़ाई और को प्रभु नाहिं तुम कवहुँ दई ॥
 शेष इक ब्रह्मांड भरि शिर राखि मन गर्वित कियो ।
 कोटि कोटि ब्रह्मांड तव तन अधिक इन यह भरि लियो ॥
 सुर अमुर नर नाग खग मृग कीट जन सब रावरे ।
 क्षमिय अब अपराध अहिके सुभग सुन्दर सांवरे ॥

दो० सुनि अहिनारिन के बचन, करुणामय यहुराय ।

उतरि परे अहि शीशते, यमुना के तट आय ॥

सो० तट पर कमल धराय, काली को आयसु दियो ।

उरगद्वीप अब जाय, करहु बास निर्भय सदा ॥

तब काली कह सुनहु कृपाला ❀ तव वाहन डर डरत विशाला
 धनि ऋषि शाप दियो है तहीं ❀ ताते आय सकत ह्यां नाहीं
 तब मैं भाजि बच्चों इत आई ❀ नातर लेत मोहिं सो खाई
 चरण चिह्न लखि तव फण मेरे ❀ परि है गरुड़ आय पग तेरे

तू अब मति खगपतिहि डराई ❀ अपने द्वीप करहु सुख जाई
याते बड़ो कौन सुख नाथा ❀ अभयदान पद परस्यो माथा
जे पद कमल भजन परतापा ❀ जन प्रह्लाद मिटे सन्तापा
ते पद चिह्न शीश पर धारी ❀ जन्म जन्म को भयों मुखारी
उरगिन सहित नाथ पद माथा ❀ गयो उरगद्वीपहि अहिनाथा
जयजयध्वनि नभ सुरनवखानी ❀ धन्य धन्य जनके सुखदानी
शरण राखि काली अहि लीनो ❀ जल ते काढ़ि कृपाकरि दीनो
फण पर चरण चिह्न प्रगट्यै ❀ कठिन गरुड़की त्रास मिट्यै

दो० धन्य धन्य प्रभु धन्य कहि, मुदित सुमन वर्षाय ।

गये देव निज निज सदन, हृदय परम सुखपाय ॥

सो० द्वीप पठायो ब्याल, सुरगण सुरलोकहि पठै ।

आयो निकसि गोपाल, ब्रजवासी जनसुखकरन ॥

धाय मिले सगरे ब्रजवासी ❀ विरह ताप तनकी सब नासी
माता दौरि कण्ठ लपटानी ❀ पुलक रोम तन गद गद बानी
नयन नीर अति प्रेम अधीरा ❀ उर लगाय भेटत उर परि
कहि कहि मेरो बाल कन्हैया ❀ दुहुं करन सों लेत बलैया
धाय नंद उर सों लै लाये ❀ गये प्राण मानहुँ फिरि आये
गदगद बैन नयन जल दारो ❀ कहत जन्म फिरि भयो तुम्हारो
बार बार उर सों लपटावत ❀ दारुण दुखकी ताप नशावत
प्रेमाकुल देखी बल माता ❀ मिले रोहिणी सों सुखदाता
निरखि बदन कह यशुमति मैया ❀ मैं वरजों नित तुमहिं कन्हैया
यमुना तीर न्हान मति जाहूँ ❀ तुम वरजो मानत नहिं काहूँ
मैं निशि सपने मांझ डरान्यो ❀ सोई कहूँ आय प्रगटान्यो
कंस कमल के फूल मँगाये ❀ ब्रजवासी सब अतिहि डराये

दो० मैं गेंदहि खेलत यहां, आयों यमुना तीर ।

मोहिं डार काहू दियो, कालीदहके नीर ॥

सो० देख्यो उरग विशाल, जाय तहां मैं डरो अति ।

तब पूंछो मोहिं ब्याल, किन पठ्यो तोको इहां ॥

जब ऐसे मैं ताहि बतायो ❀ कमल काज मोहिं कंस पठायो

यह सुनतहि अहि उठ्यो डराई ❀ मो को फणपर लियो चढ़ाई

कमल लियो निज पीठ लदाई ❀ आपहि आय गयो पहुँचाई

ऐसे जननी बोध कृपाला ❀ सुनत वचन सब ब्रजकी वाला

लै लै हरि को उर सों लावैं ❀ कठिन विरहकी शूल मिटावैं

श्याम बिना बहुते दुख पायो ❀ सो हरि तिनको ताप नशायो

लखे सखा सब आरत वाढ़े ❀ प्रेमातुर मिलिये को ठाढ़े

गये दौर तिन पास कन्हई ❀ मिले धाय सब कंठ लगाई

कहत सखा धनि धन्य कन्हैया ❀ जो तुम कह्यो कियो सोइ भैया

तुमहो सब ब्रज के सुखदानी ❀ कंस मारिहौ तुम हम जानी

कहा भयो जो तुमहौ बारे ❀ हैं तुम्हरे गुण सवते न्यारे

भलो यदापि सिंहन को छोटे ❀ कौन काज गज लम्बो मोटे

दो० तुम हमपर रिस करि गये, सो अब देहु भुलाय ।

यह सुनतहि हरि हँसि उठे, मिले बहुरिहरषाय ॥

सो० जबहलधरअरुश्याम, मिलेबिहँसिदोउमनहिंमन ।

निरखि भगन नर बाम, भेद न कोऊ जानहीं ॥

सब कोऊ कहत धन्य बलरामा ❀ तुम जो कही करी सोइ श्यामा

तब हरि कह्यो नंद सों जाई ❀ मेरे मनहिं बात यह आई

आज बसै जो यमुना तीरा ❀ अति रमणीक सुगंध समीरा

इहां कीजिये भोग बिलासा ❀ होत प्रात सब चलाहि अवासा

कमल पठाय कंस को दीजै ❧ सुनहु तात अब विलँव न कीजै
गोप जाय आवैं पहुँचाई ❧ काल्हि चढ़ै नतु ब्रज पर धाई
यह सुनि नंद बहुत सुख पायो ❧ सब ब्रजवासिन के मन भूयो
तुरत ग्वाल बहु घरन पठाये ❧ पटरस भोजन बहुत मँगाये
यमुना तीर गोप समुदाई ❧ भोजन कियो बहुत सुख पाई
नंदराय तब शकट मँगाये ❧ कोटि कमल तिन पर लदवाये
बहुत भार दधि घृतके कीने ❧ ते अहिरन कांधे धरलीने
अपनी सर जे गोप सुहाये ❧ तिनहिँ संग करि नृपहि पठाये

दो० बहुत विनय करि कंसको, दीनो पत्र लिखाय ।

कहियो मेरी ओरते, नृपसों ऐसी जाय ॥

सो० गयो कमल के काज, कालीदह मेरो सुवन ।

तुव प्रताप ते राज, आय गयो पहुँचाय अहि ॥

कोटि कमल नृप मांगि पठाये ❧ तीन कोटि तहँ ते हैं पाये
सो राखे जल मांझ सजाई ❧ आयसु होय तो देखै पठाई
तब गोपन सों कुँवर कन्हाई ❧ ऐसे बोल उठे मुसकाई
नृप सों लीजो नाम हमारो ❧ यह कारज हम कियो तुम्हारो
कमल शकट दधि घृतके भारा ❧ चले गोप लै नृप के द्वारा
राजद्वार ॥ शकटन पहुँचाई ❧ जाय पौरियन खवरि जनाई
तुरत पौरिया भीतर धाई ❧ समाचार सब नृपहि सुनाई
सुनत बात यह मनहिँ डरान्यो ❧ आप निकस आयो अतुरान्यो
देखी शकट भीर अति भारी ❧ भयो चकित सुधि बुद्धि विसारी
कमल देखि भय भयो विशाला ❧ लगे ताहि मनु व्याल कराला
नंद विनय तब गोपन भाखी ❧ दीनों पत्र भेंट सब राखी
गोपन बहुरि कह्यो नृपराई ❧ नंदसुवन यह कह्यो कन्हाई

दो० हम कालीदह जाय यह, कियो राज को काम ।

रूप हमको जानत नहीं, कहियो मेरो नाम ॥

सो० सुनत श्यामसंदेश, देखि कमल अति भय बिकल ।

भीतर गयो नरेश, मन बाढ़ी चिंता बिपुल ॥

मनहीं मन यह करत विचारा ❀ यासों मेरो नाहि उबार

दैत्य गये ते सबहिं नशाये ❀ काली तें ऐसे बचिआये

ताही पर कमलन लै आये ❀ सहस शकटभरि मोहिं पठाये

कबहुँ कहत गोपन कों मारौ ❀ इनको हांते तुरत निकारौ

फेर कछु मन में भय पावै ❀ करत विचार न कछु बनि आवै

पुनि सँभारि धीरज उन कीनों ❀ गोपन बोलि भीतरहिं लीनों

हृदय दुखित ऊपर सुख मानी ❀ पहिराये दीने सनमानी

सरो पाव नंदहु को दीनों ❀ कहियो काज बड़ो तुम कीनों

तेरे सुत बलराम कन्हाइ ❀ एक दिवस देखिहौं बुलाई

यह सुनि अति पुरुषार्थ कीन्हों ❀ कालीदह के फूलन लीन्हों

यह कहि बिदा किये सब ग्वाला ❀ भयो कंस उर शोच विशाला

मनहीं मन शोचत हरि के गुन ❀ रह्यो काठ ज्यों भीतरही घुन

दो० तब दावानल बोलके, कह्यो मरम सब ताहि ।

देखौं मैं तेरे बलहि, तू अब ब्रज को जाहि ॥

सो० जाय कीजियो द्वार, ब्रज सब ब्रजवासिनसहित ।

बचहिं न नन्दकुमार, ऐसो यत्न विचार उर ॥

अथ दावानल लीला ॥

दावानल सुन नृपकी बानी ❀ बल्यो रिसाय गर्व उर आनी

करौ भस्म इक पलमहँ जाई ❀ सहित गोप नंदसुवन कन्हाइ

नृप को काज आज करि आऊँ ❀ जो कहुं एक ठौर सब पाऊँ
 इहां गोप कमलन पहुँचाई ❀ आये यमुन तीर हरपाई
 नंद तुस्त सब निकट बुलाये ❀ सुनत सकल ब्रज जन जुरि आये
 गोपन कही नंद सों आई ❀ लिये कमल नृप अति सुख पाई
 दियो हर्ष तुमको पहिरायो ❀ मुदित नंद लै शीश चढ़ायो
 अपने सब पहिराव दिखाये ❀ लखि सब ब्रजवासिन सुख पाये
 हरि को नाम सुन्यो जब राजा ❀ हरपि कह्यो कीनो इन काजा
 इक दिन बल मोहन दोउ भाई ❀ देखहुं गो में इहां बुलाई
 यह सुनि नंद बहुत सुख पायो ❀ हरपि भूप मो सुतन बुलायो
 करी कृपा अति नृप हरि पाहीं ❀ सब नर नारि हरपि मन माहीं

दो० कहत श्याम बलराम सों, हँसि हँसिकै यह बात ।

नृप हम तुम देखन लिये, कह्यो बुलावन तात ॥

सो० ब्रजजन परम डुलास, इक सुख हरि अहिते वचे ।

मित्यो कंस को त्रास, दुतियकमल पठये नृपहिं ॥

इहिविधिब्रजजनअतिमुखपायो ❀ खान पान करि दिवस वितायो
 सोये सब मिलि यमुना तीरा ❀ राखि हृदय सुन्दर बलवीरा
 जहां अमुर दावानल आयो ❀ चाहत है सब ब्रजहि जरायो
 देखे सब ब्रज जन इकठाहीं ❀ कियो हर्ष अपने मन माहीं
 प्रगटी दावानल चहुँ ओरा ❀ अतिहि प्रचण्ड पवन भकभोरा
 दशहूँ दिशिते घेस्त आवै ❀ तृण तरु खग मृग जीव जरावै
 जागि पड़े सब ब्रज नर नारी ❀ कहैं चहुँ दिशि लगी दवारी
 भये चकित सब अति मन माहीं ❀ काहू दिशि मग दीखत नाहीं
 चहत चलन भजि नहीं निकामू ❀ लेत सवै भरि शोच उसामू
 आय गई दौ अतिहि निकटहीं ❀ चले कहत सब यमुनातटहीं

अब न देखियत कहूं उबारा ❀ बढी अनल पहुँची नभ जारा
ब्रजके लोग अतिहि अकुलाने ❀ जरे सकल मनमाँझ डराने

छं० अति बिकल सब डरे ब्रजजन देखि अनल भयावना ।

मई धरनभ ब्याल पूरण धूम धुन्ध डरावना ॥

लपट झपटत जरत तरुवर गिरत महि भहराय कै ।

उठत शब्द अघात चहुँ दिशि वदत भर भहराय कै ॥

फटत फल फूलत कटक दल जरत वरत लता घनी ।

कांस चटकत बांस पटकत अंगार उचटत नभतनी ॥

हरिण मोर बराह बनपशु बिकल पंथ न पावहीं ।

जरत जहँतहँ जीव खगमृग बिपुल जित तित धावहीं ॥

दो० दावानल अतिक्रोधकर, लियो दशहुँ दिशि घेर ।

उठी अनलज्वाला प्रबल, मानहुँ अचल सुमेर ॥

सो० धूम धुन्ध बिकराल, भयो अँधेरो गगन सब ।

बिचबिचचमकतज्वाल, तड़ितमालजनुसघनघन ॥

भये देखि ब्रजलोग दुखारे ❀ तब सब हरिकी शरण पुकारे

कहत श्याम तुम करो सहाई ❀ जरत सकल ब्रज लेहु बचाई

तृणा शकट बंक अघ तुम मारे ❀ कंस त्रास ते तुमहिँ उवारे

जहँ जहँ परी गाढ़ हम आई ❀ तहां तहां तुम करी सहाई

अब हरि यत्न कछु सो कीजै ❀ हमहिँ बचाय अग्निसों लीजै

व्याकुल गोप नन्द मन माहीं ❀ करत विचार बनत कछु नाहीं

यशुमति सबहिन कहत पुकारे ❀ दर्ई पखो है ख्याल हमारे

नाना रूप असुर बहु आये ❀ कोउ खग कोउ पशु रूप बनाये

कोऊ पवन रूप है आयो ❀ भयो तहां कोउ पुरय सहायो

आज उरग सों बच्यो कन्हाई ❀ मरु करमन नृप त्रास नशाई

अब यह बाढ़ी अग्नि अपारा ❀ होत सकल ब्रज को संहारा
किमि बचि हैं यह बालक दोऊ ❀ मोहिं लखि परत उपाय न कोऊ
दो० सुनि जननीके वचन प्रभु, लखि सब ब्रजके हाल ।

कह्यो सबन धीरज धरौ, मति डरपौ लखि ज्वाला ॥

सो० कौतुक निधि गोपाल, को जानै तिनके गुणन ।

दुखसुख जिनके खयाल, जनके हितकारक सदा ॥

तब हरि कह्यो डरौ मति कोई ❀ विनबहु देव बहुरि सब कोई
जिन सहाय कीनी अवताई ❀ सोई करें सहाय सदाई
हरि हँसि सब सों आँख मुँदाई ❀ करि गये अग्नि पान मुखदाई
हैं गइ चहुं दिसि शीतलताई ❀ रह्यो न अग्नि लेश कहुं राई
खोलि देहु दृग सब हरि बोले ❀ सुनताहि तुरत सबन दृग खोले
देखि चकित सब ब्रज नर नारी ❀ कहत धन्य धनि तुम बनवारी
धरणि अकाश बराबर ज्वाला ❀ लपट भपट अतिही विकराला
नहिं वरस्यो नहिं सींच्यो काहू ❀ गयो विलास कहाँ धौं दाह
कैसे यह सब अग्नि बुझानी ❀ हम यह कहू न काहू जानी
तब हँसि बोले कुँवर कन्हवाई ❀ वह करनी यह कीह न सुहाई
तृणकी आग प्रथम बहु जागै ❀ फिरतिहि बुझत विलंब न लागै
सुनत श्याम की कोमल बानी ❀ भये सुखी सब त्रास नशानी
दो० जीव जन्तु खग मृगजिते, भये सुखी ततकाल ।

हुमबेली तृणहरित सब, प्रफुलितवन सुखमाल ॥

सो० श्याम सहायक जाहि, ताहि कहौ डर कौनको ।

यह न बड़ाई बाहि, पांच तरव उनके किये ॥

कहत परस्पर ब्रज की नारी ❀ हैं सखि बड़े वीर बनवारी
देखत कोमल श्याम सलोनी ❀ यह सखि जानत है कहू येनो

नाथ्यो नाग पतालहि जाई ❀ लायो तापर कमल लदाई
 मांगे कमल कंस नृपराई ❀ कोटि कमल तिहि दिये पठाई
 दावानल नभ धराणि बराबर ❀ घेर लिये ब्रजके नारी नर
 नयन मुँदाय कहा धा कीन्हों ❀ रख्यो नहीं कहु ताको चीन्हों
 ये उतपात सिटै उन्हीं पै ❀ और न होय सकै किनहीं पै
 यह सखि कोउ बड़ो अवतारा ❀ है यहही करता संसारा
 लखि हरि चरित यशोदा मैया ❀ चकित निरखि सुख लेति बलैया
 लखि मुत चरित मुदित नँदराई ❀ करत गोपगण सकल बड़ाई
 कहत देव मुनि अति अनुरागा ❀ हैं ब्रजवासिन के बड़ भागा
 जिनके संग श्याम सुखशीला ❀ करत रहत नित नव रसलीला

दो० एकदिवस निशि यमुनतट, बस सब गोपीगवाल ।

होत प्रात निजनिजसदन, आये सहित गोपाल ॥

सो० हरिजनकेमुखकार, बिलसतविबिधविलासब्रज ।

संतन प्राणअधार, ब्रजवासी जन जाहि बलि ॥

हरि ब्रजजन के दुख बिसरावन ❀ करत चरित सुरमुनि मनभावन
 तुरत सकल ब्रजलोक भुलाये ❀ कौन कंस कव कमल भँगाये
 कब हरि यमुना जलहिं समाये ❀ कालीनाग नाथि कव लाये
 कब दावानल जारन आयो ❀ एक दिवस निशि कहाँ वितायो
 नहिं जानत कछु नंद यशोदा ❀ करत श्याम सोइ वाल विनोदा
 माखन मांगत कुँवर कन्हारि ❀ बार बार जननी सों जाई
 आतुर दधिहि मथत नँदरानी ❀ सदमाखन हरिको रुचि जानी
 कहत तनक तुम रहत ललारे ❀ तुम्हें देऊँ नवनीत पियारे
 मैं बलि भूख लगी तुम भारी ❀ बात वनावत मुतहिं दुलारी
 बूझत बात काहु की कान्हहिं ❀ कहत श्याम सों मुनत न कानहिं

भूठहि देत हुँकारी जननी ❀ भूल गई सब हरिकी करनी
तबलौं मयि दधि माखन कीनो ❀ तुरतहि लै सुतके करदीनो
दो० लै लै अधरन परसि करि, माखन रोटी खात ।
करत प्रशंसा मधुर कहि, सुनत प्रफुल्लित मात ॥
सो० जो प्रभु अलख अपार, दुर्लभ शिवसनकादि कहँ ।
धन्य नंद की नारि, ताको सुत कर मानई ॥

अथ प्रलम्बासुर बध लीला ॥

नित नव लीला करत कन्हई ❀ तात मात व्रजजन सुखदाई
मुदित सकल व्रजके नर नारी ❀ निशि दिन हरि मुखचंद निहारी
इक दिन श्याम राम दोउ भाई ❀ खेलत सखन संग वनजाई
नाना विधि सब करत कलोलैं ❀ भांति भांति की वाणी बोलैं
कवहूँ मोर हंस की नाई ❀ बोलत हँसत श्याम मुखदाई
कवहूँ मधुरे सुर सब गावैं ❀ मध्य श्याम धन वेणु वजावैं
कवहूँ चढ़त तरुन पर जाई ❀ कूदि परत गहि डार नवाई
नाना विधि के खेलन खेलैं ❀ बाल विनोद मोद रस खेलैं
तहां प्रलम्ब असुर एक आयो ❀ कंस ताहि दै पान पठायो
सो बल रूप गोप वपु धारी ❀ मिल्यो आय सबसखन मैभारी
ताको ग्वाल न काहू जान्यो ❀ यह तो असुर श्याम पहिचान्यो
बलदाऊ को दियो जनई ❀ ताहि हतन को रच्यो उपाई
दो० सखा बुलाये निकट सब, तिनहिँ कह्यो नँदलाल ।
फल बुभाय अव खेलिये, भये मुदित सुनि ग्वाल ॥
सो० द्वै बालक करि राये, सखा लिये तब बाँटिसव ।
आधे इकदिशि आय, आधे एक दिशा भये ॥

ना

निजनिजजोट सखन जुरि लीनो ❀ हलधर जोट दनुज सँग कीनो
 आपस में यह होड़ लगाई ❀ जो हारै सो पीठि चढ़ाई
 भांडीर बन लौं लै जाही ❀ फेर इहां पहुँचावे ताही
 फल को नाम बुझावन लागे ❀ बूझदियो बल सबते आगे
 चले सखा चढ़ि चढ़ि निज जोरी ❀ चढ़े दनुज बल घींच मरोरी
 भांडिर बन जब पहुँचे जाई ❀ फिरे सखा सब ठाँव छुवाई
 असुर चल्यो लै बल को आगे ❀ प्रगट्यो दनुज शरीर अभागे
 तब बलदेव कोप करि भारी ❀ मुष्टि एक ताके शिर मारी
 बिकस गयो शिर गिख्यो अधीरा ❀ उतरि परे तब श्री बलवीरा
 भयो पलक में सो विन प्राणा ❀ देखत मुर मुनि चढ़े धिमाना
 भई गगन ते जय जय वानी ❀ फूलन की वर्षा वरपानी
 बहुविधि अस्तुति बलाहि सुनाई ❀ मुदित सकल मुर मुनि समुदाई

दो० ग्वाल बाल चक्रित सबै, दौरिगये बल पास ।

मृतक असुरतन देखिकै, तवमन कियो हुंलास ॥

सो० धन्य धन्य बलराम, धन्य तुम्हारे मात पित ।

बड़ो कियो यह काम, कपट रूप माख्यो असुर ॥

यह शठ गोप भेष बन आयो ❀ हम काहू इहि जान न पायो
 जो यह शठ नहीं जात निपातो ❀ तो काहू लरिकहि लै जातो
 हौ तुम बड़े बीर दोउ भाई ❀ जहँ तहँ हम को होत सहाई
 बनके दुष्ट सकल तुम मारे ❀ हौ तुम हम सबके रखवारे
 ताहि कहो काको डर भैया ❀ जासु मीत बलराम कन्हैया
 देत ग्वाल सब बलाहि बड़ाई ❀ धन्य धन्य ब्रजजन सुखदाई
 दुष्ट मारि बल मोहन लाला ❀ आये सदन सहित सब ग्वाला
 ग्वालन कही आय सब वाता ❀ सुनतचक्रितब्रजजन पितु माता

करत सकल बलराम बड़ाई ❀ जननी मुदित लिये उरलाई
बल मोहन दोउ वीर निहारी ❀ दोऊ जननि जात बलिहारी
भूखे जान बनहिंते आयो ❀ दोउ भइयन भोजन करावयो
जो सुख लहत नंद की रानी ❀ सो शारद नहिं सकैं बखानी
दो० सुतसनेहयशुमतिमगन, निशिदिनजातन जान।

करत चरित सन्तन सुखद, भक्तवत्स भगवान॥

सो० नितनव परम हुलास, ब्रजवासी हरिसँग लहत।
विलसत विविध विलास, बाट घाट गृह बनसघन॥

अथ पनिघट लीला ॥

पनिघट यमुना के तट माहीं ❀ ठाढ़े श्याम कदम की छाहीं
सखा बृन्द चहुँ ओर विराजैं ❀ कोटिकामछवि निरखत लाजैं
शीश मुकुट की लटक सुहाई ❀ सुरंग खौर केसर छवि छाई
कुंडल भलक अलक घुंघरारी ❀ कंठ कनक कंठी द्युतिकारी
चटकीली लटकी बनमाला ❀ परसति चरणसरोज विशाला
मुक्कमाल मणिमाल सुहाई ❀ उर विशाल पै अति छवि छाई
अरुण अधर दशनन द्युतिनीकी ❀ मुरि मुसकान मोहनी जीकी
चटकीलो पटपीत विराजैं ❀ कटि तट क्षुद्र घंटिका राजैं
भुज विशाल भूषणयुत सोहै ❀ कर मुद्रिका मुदित मन मोहै
तन घनश्याम रसीले नैना ❀ हँसि हँसि कहत सखन सों बैना
कनक लकुटि सों पग लपटान्यो ❀ भूषण सहित न जात बखान्यो
गहि डुमडार तिरीछे ठाढ़े ❀ अंग अंग अनुपम छवि बाढ़े
दो० कवहुँ बजावत अधर धरि, करि सुरलीधुनिघोर।

निकटबुलावत बनमृगन, कवहुँ नचावत मोर॥

सो० रहे गगन घन ढाय, सुखद ढाँह शीतल किये ।

वर्षा ऋतुको पाय, निरखत सुत नँदराय को ॥

हरित भूमि चहुँ ओर सुहाई ❀ मनहुँ काम मसनंद विझाई
बहत समीर धीर सुखदाई ❀ शीतल अधिक सुगंध सुहाई
बहत यमुन बाहुल ते पूरी ❀ परत भँवर जहँ तहँ छविस्सी
उठत श्याम जल सुभग तरंगा ❀ छवि तरंग जिमि हरिके अंगा
या छवि सों पनिघट हरि ठाढ़े ❀ संग गोप बालक हित बाढ़े
यमुना जल तिय भरन न जाहीं ❀ ग्वालभीर देखत सकुचाहीं
हरिगुण मन में वे सब जानैं ❀ रोकत ठोकत शंक न मानैं
तातैं जाय सकत कोउ नाही ❀ दरश लालसा अति मन माहीं
सबके अन्तर्यामि कन्हाई ❀ युवतिन के मन की गति पाई
तब इक बुद्धि रची नँदलाला ❀ रसिकशिरोमणि मदन गोपाला
सखन एक तरु तर बैठाई ❀ पनिघट ते सब भीर मिठाई
आप रहे द्रुमओट छिपाई ❀ हेरत युवतिन भग चितलाई

दो० इहिअंतर आवत लखी, युवती इक घनश्याम ।

आप रहे द्रुमओट दुरि, यमुनातट गई वाम ॥

सो० नागरि जलहिँहिलोर, भरि गागरिशिरधरिचली ।

पाछेते चित चोर, घटले दियो लुढ़ाय भहि ॥

गही चतुर ग्वालनिभुज हरिकी ❀ पाई कनक लकुटिया करकी
सबसों तुम करि रहे टिठाई ❀ तैसेहि मोसों लगत कन्हाई
देन लगे तब हरि हँसि गागरि ❀ लेत नहीं ग्वालनि अति नागरि
कहत कि रीतो घट नहीं लेहौं ❀ जलभरि देहु लकुटि तब देहौं
कहा जो तुम नँदमुवन कन्हाई ❀ हमहूँ बड़े बापकी जाई
एक गाँव बस बास हमारो ❀ मैं नहीं सहिहों कह्यो तुम्हारो

एक कहौ तो दश में कहिहों ॥ मैं कहु तुमसों डरिपि न जेहों
 यह सुनि हँसि दीन्हे नँदलाला ॥ लियो चोरि चित मदन गोपाला
 कहत लकुटिया दे री मेरी ॥ मैं भरि देहों गागरि तेरी
 देखत रूप सुनत मृदुवानी ॥ ग्वालिनि तनकी दशा भुलानी
 लागी हृदय मदन की सांझी ॥ मन पर गयो प्रेम की बांझी
 करते लकुटि गिरत नहिं जान्यो ॥ विवश भई चितचेत हिरान्यो
 दो० तव घट भरि हरि भावते, दीनो शीश उठाय ।

नेकहु सुधि ता तन नहीं, चली ब्रजहिं समुहाय ॥

सो० कियो दृगन में धाम, सुन्दर नट नागर सुखद ।

जित देखे तित श्याम, पंथ ताहि दीखै नहीं ॥

उतै अपर ग्वालिनि इक आई ॥ कहत कहा तू रही भुलाई
 मूधे पंथ चलत है नाहीं ॥ कहा शोच तेरे मन माहीं
 अवहीं हँसति भरन जल आई ॥ कहा चली इत आप गँवाई
 ताको देखि कहत मुनु आली ॥ मोपै श्याम मोहनी वाली
 मैं जल भरन अकेली आई ॥ मेरी गागरि कृष्ण लुढ़ाई
 तव मैं कनकलकुटि गहिलीनों ॥ उन मोतन लखिके हँसिदीनों
 वहै हँसनि मोहिं परी ठगौरी ॥ तवहीं ते में हैगइ बेरी
 कहा कहाँ तोसों अब आली ॥ मेरे चित वह चितवन साली
 बस्यो श्याम मेरे दृग माहीं ॥ और कबू मोहिं दीसत नाहीं
 सुनत बात वह ग्वालि सयानी ॥ आप विलोकन को अतुरानी
 ताहि बांह गहि घर पहुँचाई ॥ आप गई जलको अतुराई
 देख्यो जाय श्याम तहँ नाहीं ॥ इत उत लखि शोचत मनमाहीं

दो० हरिदेखत तरुओट है, ग्वालिनि मन दुखपाय ।

चली नीर भरि गागरी, वार वार पड़िताय ॥

सो० मनके जाननहार, देखी ग्वाल्लिनि विकलअति ।
प्रगटे नन्दकुमार, आय अचानक निकटही ॥

गहिलीनी अंकम भरि, ग्वारी ❀ ताके तनकी तपनि निवारी
ता तन चितै कह्यो तू कोरी ❀ तोहिं कबहुँ देखो नहिं गोरी
मन हरि लीन्हों रूप दिखाई ❀ वहुनि भये तरु ओट कन्हवाई
मिलि हरिसों मुख पायो ग्वाली ❀ छकी प्रेमरस लखि वनमाली
नहिं जानत मैं को कित आई ❀ भई मगन मन तन विसराई
धरको पंथ भूल गइ नागरि ❀ इत उत फिस्तशीश लियेगागरि
और सखी इक उततें आई ❀ देखि दशा तिन निकट बुलाई
कहा फिरै भूली मग माहीं ❀ बूझत सखी सुनत कह्यु नाहीं
चौक पड़ी सपने ज्यों जागी ❀ तासों वचन कहन तब लागी
श्याम बदन इक मिल्यो दुटैना ❀ तिन मोकों कह्यु कीनो टोना
मैं भरि गागरि शीश चढ़ाई ❀ औचक मोहिं अंकभरि लाई
मोसों कह्यो कौन तू गोरी ❀ देखी नाहिं कबहुँ ब्रजखोरी
दो० ऐसे कहि चितयो बिहंसि, मैं लखि रही भुलाय ।

तबहिं भयो अंतर कबहुं, मेरो चित्त चोराय ॥

सो० कही सखीसों बात, ग्वाल्लिनि लाज विसारिकै ।

निरखि नन्दको तात, भई जलधिकी बूँदजिमि ॥

सो सखि सावधान करि ताकों ❀ चली आप आतुर यमुनाकों
देखी श्याम युवति ढिग आई ❀ ठाढ़े तरुकी ओट कन्हवाई
तासु अंग छवि रहे निहारी ❀ गोरे बदन चूनरी कारी
छूटी अलक बदन छवि छाई ❀ मनहुं जलज अलिअवलि मुहाई
हाथन चूरी चारु विराजै ❀ कनकमुंदरियन अति छवि छाजै
सहज शिंगार उरोज उठोहैं ❀ अंग अंग मुठि सुन्दर सोहैं

ग्वालिनि हरिको देख्यो नार्ही ❧ जाने कहुं गये वन माहीं
जलभरि चली मनहिं पछिताई ❧ गागरि नागरि शीश उठाई
औचक श्याम गही लट आई ❧ यह कहि कहां चली अतुराई
चिबुक परस उरसों करलायो ❧ ग्वालिनि मनहिं हर्ष अति पायो
ऊपर कहत विंव कर मोहन ❧ छांड़िदेहु मेरी लट गोहन
उर परसत कछु सकुच न मानत ❧ और ग्वालिसी मोकों जानत
दो० छांड़ि देहु लट देखिहै, ब्रजयुवती कोउ आइ ।

हाहा मैं पांयन परति, तुमको नंद दुहाइ ॥

सो० इतनेही को मोहिं, सोंह दिवावत वावरी ।

पहिचान्यों नहिं तोहिं, ताते मुख देखत तनक ॥

यों कहि श्याम छांड़ि लटदीनो ❧ मुरि मुसकनि नागरि वशकीनी
चली भवन मन हरि हरलीनों ❧ जिय यह कहति कहा हरि कीनों
पग द्वै चलत ठिठाकि रहिजाई ❧ भूल गई मारग जिहि आई
प्रेम मगन तन सुधि विसराई ❧ रहे दृगन में श्याम समाई
गृह गुरुजनकी सुधि जब आई ❧ तब कछु जिय में गई लजाई
ज्यों त्यों करि पहुँची गृहमाहीं ❧ उरतें श्याम दस्त क्षण नाहीं
सखी संगकी बूझत आई ❧ कहां यमुन तट धेर लगाई
और दशा भइ है कछु तेरी ❧ कहति नहीं हमसों सखि हेरी
कहा कहों तुमसों री आली ❧ मोह्यो मोहिं श्याम वनमाली
सुनहु सखी री वा यमुना तट ❧ मैं जल भख्यो अकेले पानिबट
लै गगरी शिर सारंग डगरी ❧ कितहुं तें आयो मां दिग री
औचक आनि गही लट मेरी ❧ कह्यो नेक मुख देखन दे री
दो० मैं मृदुवचन अमोल सुनि, देखि वदन जलजात ।

जकी चकीसी है रही, उन परस्यो सों गात ॥

सो० प्रफुलित हिये गुवारि, मनमोहन के रसविवश ।

कुलकीलाजबिसारि, कही सखिनसों बात सब ॥

सुनत बात सब सखी सयानी ❀ श्याम बिलोकन को अतुरानी
इक क्षण श्याम न बिसरत काहू ❀ सुनत भयो यह अधिक उझाहू
घर घर तें धाई सब नागरि ❀ लै लै आई जलकी गागरि
चलीं यमुनतट अति अतुराई ❀ देख्यो कुँवर नन्दको जाई
मोर मुकुट कटि कछनी सोहै ❀ कुरडल चटक लटक मन मोहै
पीत बसन लखि तड़ित लजाई ❀ नयन विशाल अधर अरुणाई
देखत कहौ सरित ढिग जाई ❀ ठगत फिरत हौ नारि पराई
काहि ठग्यो कैसे ठग चीन्ह्यो ❀ तुमरो कहो कहा ठग लीन्ह्यो
कौन ठग्यो कहि कहा बखानै ❀ औरहिं के ठग तुमहिं को जानै
कहा ठग्यो सो हम नहिं मानै ❀ कहौ नाम धरि तब हम जानै
सर्वस ठगत पलक के माहीं ❀ कहा ठग्यो सो जानत नाहीं
ठगके लक्षण मोहिं बतावहु ❀ कैसे मोकों ठग ठहरावहु

दो० ठग लक्षण हमपै सुनहु, फांसी मृदु मुसकान ।

रूप ठगौरी तें ठगत, ब्रजतिय मन धन प्रान ॥

सो० फिरतबिकलबेहाल, लोकलाज कुलकानितजि ।

ठगी नन्दके लाल, भई बिदित तिहुँलोक तिय ॥

अपने लक्षण मोहिं लगावहु ❀ जैसे तुम सब चितहि चुरावहु
कहत कि प्रगटी तिहुं पुरवाता ❀ ब्रजतिय ठगत नन्द को ताता
यह अति कहति कहत सब कोई ❀ सुर नर मुनि बेदहु नहिं गोई
तीन लोक को ठाकुर जोई ❀ ब्रजबनितन बश कीनों सोई
यों मुनि सव ग्वालिन मुसकानी ❀ कहौ सखी मुनि हरिकी बानी
हरि तुम बात उलटि यह ठानत ❀ तुम्हारी नागस्ता हम जानत

अतिहि कान्ह तुम करत दिठाई ❧ आंड़ि देहु अब यह लँगराई
काहूकी दारत हौ गगरी ❧ काहू लगहि करत अचगरी
काहू को अङ्गम भरि लावत ❧ व्रज लोगन पै सवन हँसावत
तुमते मग कोउ चलन न पावत ❧ बाट घाट डरपत सब आवत
यमुना भरन देत नहिं पानी ❧ चहत अचकरी अब तुम ठानी
कहौ तौ यशुदहि जाय सुनावैं ❧ फेरि तुम्हें ऊखल बँधवावैं

दो० यह सुनि हरि रिसकरि उठे, इँडुरी लई छुड़ाय ।

कहो जाय सब मातसों, लीजो मोहिं बँधाय ॥

सो० मोहिं कहत ठग चोर, आप भई साहुनि सबै ।

डारी गागरि फोर, कहत जाहु चुगुली करन ॥

तब युवती सब हरि ढिग आई ❧ कहत इँडुरी देहु कन्हाई
नहिं तो तुमको गहि लै जैहैं ❧ यशुमति पास न नेकु डैहैं
बाट घाट तुम करत दिठाई ❧ काहु न नेक डरात कन्हाई
इँडुरी लै फोरी सब गागरि ❧ आज मिठावैं तुम्हरी लांगरि
तब हरि चढ़े कदम पर जाई ❧ इँडुरी दीन्हीं जलहिं बहाई
बदन सकोरत भौंह मरोरत ❧ मुरि मुसकनि सबके चित चोरत
कहत कहौ मैया सों जाई ❧ सब मिलि लीजो मोहिं बुलाई
तुम सब जुरि मोहिं मारन धाई ❧ तब मैं इँडुरी जलहिं बहाई
ऐसो करि तुम मोकों पायो ❧ मानहु मोकों मोल पैगायो
यह सुनि युवति कहत मुसकाई ❧ कहति यशोमति सों हम जाई
वे दिन बिसर गये मनमोहन ❧ बांधे मात ऊखली मोहन
ह्याँई रहौ तौ बदाहिं कन्हाई ❧ जाउ कहुं तो नंद दुहाई
दो० कान्हहिं सौंह दिवाय कै, लै उरहन सब बाज ।

ऊपर रिस अन्तर सुखी, चलीं नंद के धाम ॥

सो० मथत महारि निजधाम, दधि माखन हरिकेलिये ।

तिहि अन्तर ब्रजबाम, आवत देखी भीर अति ॥

मैं जानति हरि इनहिं खिझाई ❀ ताते सब उरहन लै आई

कहत युवति सब रिस भरि आई ❀ ऐसो दीठ कियो सुत माई

भरन देत नहिं यमुना पानी ❀ रोकत आय करत कुलकानी

काहू की गागरि दरकावै ❀ इँडुरी लै जल माहिं बहावै

काहू को घट डारत फोरी ❀ गारी देत सहै नित को री

महारि कहत तुमसों सकुचार्हीं ❀ हरिके गुण तुम जानत नार्हीं

अब नार्हीं ब्रज वास हमारो ❀ करत अचकरी सुवन तुम्हारो

नेक नर्हीं सकुचत मन यार्हीं ❀ महारि सुतहिं तुम वरजत नार्हीं

यशुमति सबहिन कहत निहोरी ❀ कहा करौं सो तुमहिं कहो री

जो हरिको मैं ह्यां गहि पाऊं ❀ तो तुम सबकों अवहिं दिखाऊं

तुमहूँ जानतहौ गुण हरिके ❀ ऊखल सों बांधे मैं धरिके

मारन लगी सांठि लै जबहीं ❀ बज्यो मोहिं तुमहिं सब तवहीं

दो० अब घर आवहिं जबहिं हरि, तबहिं करौं सोइ हाल ।

लरकाई ते अचकरी, मैं जानत गोपाल ॥

सो० अब जो पकरन जाउँ, ताहि गहन पाऊं कहां ।

सुनतहि मेरो नाउँ, को जानै भजिजाय कित ॥

यह अपराध क्षमो सब हम कों ❀ यहै कहति हौं मैं अब तुमकों

यहि विधि युवतिन बोध कराई ❀ महारि सवन को घरन पठाई

इततैं घरन चलीं सब ग्वाली ❀ उततैं घर आवत बनमाली

हैं गइ भेंट बीच मग आई ❀ तुरत नयन हरि गये लजाई

मात बुलावत जाहु कन्हाई ❀ बहुत बड़ाई करि हम आई

निरखि बदन हँसि कह्यो कन्हाई ❀ मैं समझाय लेउँगो माई

सकुचतही आये घर मोहन ❀ दारहि ते लागे हरि जोहन
देखि जननि घर कारज लागी ❀ गोपिन उरहन के रिस पागी
भीतर रोहिणि पाक बनावै ❀ कहि कहि तिन सों बात सुनावै
हरुवै हरुवै तव हरि जाई ❀ सुनत आप पाछे चितलाई
यहै कहति यशुमति रिसियाई ❀ गयो कहांधों भाजि कन्ह्याई
पनिघट रेंकत धूम मचावत ❀ यमुना जलकोउ भरन न पावत
दो० गारि देत बेटिन बहून, वै आवत ह्यां धाय ।

हाहा मैं सब को करत, क्यों हू खूँट छुटाय ॥

सो० इँडुरी देत बहाय, सबकी गागरि फोरिकै ।
कित धौं गयो पराय, यह कहि धिरवत है सुतहिं ॥

जाति पांति सों कह लैगरी ❀ मारेहु मानत नाहिं कन्ह्याई
तब पाछे ते हरि उठि बोले ❀ मधुर वचन कोमल अति भोले
तू मोहीं को मारन जानै ❀ उनके गुणन नाहिं पहिचाने
कहत जु वै मानत तू सोई ❀ तिनके चरित न जानत कोई
कदम तीर तें मोहिं बुलावैं ❀ बातें गढ़ि गढ़ि आप बनावैं
मटकत गिरै शीश तें गगरी ❀ नाम लगावत मेरो सगरी
फिर चितई देखे हरि पाछे ❀ सुन्दर श्याम पीतपट काछे
कह तू कहां रह्यो मो पाहीं ❀ मैं कह तोको जानत नाहीं
हरि मुख देखतही नँदनारी ❀ तुरतहि भूल गई रिस भारी
कहत कि उरहन सब लै आवैं ❀ झूठहि खोर कान्ह को लावैं
मैं जानत गुण उन सबही के ❀ बातन जोरि बनावत नीके
वै सब यौवन की मदमाती ❀ फिरत सदा हरि सों अठिलाती
दो० कहां श्याम मेरो तनक, वे सब यौवन जोर ।

अब उरहन जे आवहीं, तौ पठऊँ सुख मोर ॥

सो० तू कित उन ढिग जात, मैं बरजत मानत नहीं ।

लावत भूँठी बात, वे सब ढीठ गुवालिनी ॥

यह कहि चूम सुतहिं उर लायो ❀ मनमोहन मन हर्ष बढ़ायो
 ब्रज घर घर यह बात जनाई ❀ पनिघट रोंकत कुँवरकन्हवाई
 श्यामबरण नटवर बपु काञ्छे ❀ मुरली मधुर बजावत आञ्छे
 करत अचकरी जो मन भावै ❀ यमुना जल कोउ भरन न पावै
 बैठत आप कदम की डारी ❀ सबन बुलावत दै दै गारी
 काहू की गागरि गहि फोरै ❀ काहू की इँडुरी गहि बेरै
 काहू को अंकम गहि लावै ❀ काहू को घट भूमि लुटावै
 नयन सैन दै चितहि चुरावत ❀ काहू सों मन अपनो लावत
 ब्रजयुवती सुनि सुनि उठि धावै ❀ विन हरिदरश न क्षण कल पावै
 कोउ बरजै कोउ कहै कोटि विधि ❀ सबके ध्यान श्यामसुन्दर निधि
 मन क्रम वचन तिन्है रति हरि सों ❀ नातो नेह न मानत घरसों
 निशि दिन जागत सोवत माहीं ❀ नंदनंदन क्षण विसरत नाही

दो० यह लीला सब करत हरि, ब्रज युवतिन के हेत ।

कृष्ण भजै जो भावजिहि, ताहितें सब फल देत ॥

सो० चिन्तामणि जेहिनाम, चिंततफल दायकजनन ।

सबही कों सब बाम, जैसो को वैसो सदा ॥

सुनि यह श्रीबृषभानु दुलारी ❀ पनिघट ठाढ़े कुञ्जविहारी
 देखन को चित अति अतुराई ❀ कह्यो सखिन सों कुँवर बुलाई
 चलहु यमुनतट ल्यावहिं पानी ❀ सुनत बात यह सब हर्षानी
 इक इक कलश सबन गहि लीनों ❀ तुरत गमन यमुनातट कीनों
 देखे तहां कुँवर नंदलाला ❀ सुन्दर श्यामल नैन विशाला
 प्यारी मन अति हर्ष बढ़ायो ❀ प्यारिहि देखि श्याम सुख पायो

रहे रीभि हरि दीठि लगाई ❧ भखो नीर प्यारी मुसकाई
चली घरहिं यमुना जल भरिकै ❧ सखिन मध्य गागरि शिर धरिकै
मंद मंद गति चलति सुहाई ❧ मोहन मनहिं मोहनी लाई
चले श्याम संगहि उठि भागे ❧ विवश भये प्यारी रस पागे
सखियन बीच नागरी सोहै ❧ गागरि शिरपै हरि मन मोहै
डुलत ग्रीव लटकत नकवेसर ❧ वंदन विन्दु आइ दिये केसर
दो० लोचन लोलविशालअति, सुरिसुरिचितवतजाय ।

भृकुटी धनुषकटाक्ष शर, हरिदृग मृगनलजाय ॥

सो० अंग अंग छवि समुदाय, मानहुँ सेना कामकी ।

अंचल ध्वजफहराय, ठटुक चलत हरिमनहरत ॥

रीभे श्याम निरखि छवि प्यारी ❧ संगहि चले लागि वनवारी
कवहुँक आगे जात कन्हाई ❧ कवहुँ रहत पाछे चितलाई
नाना भांतिन भाव बतावै ❧ प्यारिहि निजअभिलाष जनावै
कनक लकुट लै करके माहीं ❧ आगे पंथ सँवारत जाहीं
देखत जहां प्रिया परछाहीं ❧ तहां मिलावत निज तन छाहीं
छवि निरखत तनवारि जनावै ❧ पीताम्बर लै शीश फिरावै
कवहुँ श्याम पाछे रहि जाहीं ❧ निरखत कवरी छवि ललचाहीं
गागरि ताकि कांकरी मारै ❧ उचटि उचटि तिय अंगन पारै
ओट पीतपट शीश नवाई ❧ इहि मिस निकसतदिग है आई
प्यारी अपने जिय अनुमानै ❧ मेरे हित हरि भावन ठानै
सखियन मध्य गागरी नाई ❧ नहिं पावत लग लगन कन्हाई
कियो चरित तव रसिकविहारी ❧ सखिन सहित मोही सुकुमारी
दो० मिसकरिनिकसे निकटहै, निरखिवदनमुसकाय ।

मन हरिलीनो सवनको, दियो काम उपजाय ॥

सो० भई बिबश सुकुमारि, अंग उमँग आंगीदरकि ।

मोही नंदकुमार, सुधि बुधि बिसरी देहकी ॥

सखिन संग पहुँची घर जाई ❀ अटक रह्यो मन हरि संग जाई
पुनि पुनि उर यह करत विचारा ❀ कैसे मिलहिं श्याम सुकुमारा
गागरि निज निज गृह पहुँचाई ❀ बहुरि सखी प्यारी ढिग आई
बार बार सब कहत निहोरी ❀ चलिये यमुना जलहि बहोरी
तिनको उत्तर देत न प्यारी ❀ चित उरफो चितवन पर वारी
ठगिसी रही मनहिं मन शोचै ❀ प्रेम बिबश दृगवारि विमोचै
देखि दशा बूझत सब ग्वारी ❀ कहा भयो तोको री प्यारी
शोचति कहा कहै किन सोरी ❀ काहू लियो चोर कछु चोरी
उत्तर हमें देत क्यों नाहीं ❀ कहा ठगी सी है मन माहीं
गहि गहि भुजा कहति सब गोरी ❀ चलहि न यमुन नहावहिं खोरी
तब सखियन बृषभानुदुलारी ❀ लीन्ही सबन निकट बैठारी
जलज नयन जलभरि अनुरागी ❀ हरिके चरित कहन सब लागी

दो० कहौ सखी कैसे चलैं, वा यमुना की ओर ।

गैल न झाँड़त सांवरो, रसिया नन्दकिशोर ॥

सो० धरै न कोऊ नांव, इह शंकनि डरपत हियो ।

एक भांति को गांव, वह चंचल मानै नहीं ॥

मोकों देखत जहां कन्हाई ❀ मेरे संग लगत उठि धाई
इत उत नयन चुराय निहारै ❀ मोकों मग में आनि जुहारै
आगे चलत लकुट कर लाई ❀ मेरो पंथ सँवारत जाई
सो बहु मोहिं निहोरो लाई ❀ फिर चितवै मोतन मुसकाई
जब मैं यमुना को जल भरिकै ❀ चलति गागरी शिरपर धरिकै
तब घट में वह कांकरि मारै ❀ उचाटि लगत तब अंग निहारै

मेरे उर अंचर फहराई ❧ सो वह देखि देखि ललचाई
कवहुं पीताम्बर शिर फेरै ❧ बार बार करि मोतन हेरै
कवहुं आपनि छवि दरशावै ❧ मेरे चितको आनि चुगवै
जब देखौं तब मोतन हेरै ❧ नेक नहीं दृग इत उत फेरै
जहां जाति मेरी परछाई ❧ तहां मिलाय रहत निज छाई
जब लगि लालन पावत नाही ❧ तब वाको जिय अति अकुलाहीं
दो० मोतन छवै हरि चले, ताहि भरत है अंक ।

हौं सकुचत बोलों नहीं, लोक लाज को शंक ॥

सो० ब्रज घर घर यह शोर, को जानै कहियत कहा ।

चितवत यह चितचोर, विवश होत सखि प्राण तब ॥

कहिये कहा सखी जिय जैसी ❧ भइ गति सांप छत्रंदरि कैसी
घर ते निकसत वन नहि आवै ❧ लोक लाज कुलकान मिटावै
जो घर रहौं रखो नहि जाई ❧ तन घर में मन जहां कन्हाई
कितो करों आवत इत नाही ❧ बंध्यो पीतपट आंचर माहीं
अब तो मेरे मन यह रांची ❧ करिहौं प्रीति श्याम संग सांची
ब्रजके लोग हँसौ किन कोई ❧ कुल भर्याद जाउ किन सोई
कहा लाभ सो कहहु सयानी ❧ जामें होय जीव की हानी
सोना कहा कान जिहि टूटै ❧ अंजन कहा आंखि जिहि फूटै
कहा कांच संग्रह ते होई ❧ जो अमोल मणि करने सोई
विष सुमेरु कहु कौने काजा ❧ सुखद बूंद इक औषधि राजा
कुलकी कान कांच किरचाई ❧ चिन्तामणि की खानि कन्हाई
कहा लेहुं कह तजौं सयानी ❧ भिखवहु मोहिं सखी जियजानी
दो० मोकों अब सूझै नहीं, विन वह मृदु सुसकान ।

कापै न्यारो होत री, चूना हरदी सान ॥

सो० भेट लोककी कानि, पतिव्रत राखौं श्याम सों ।

यहै बनी अब आनि, भलो बुरो कोऊ कहौ ॥

सुनत गोपिका राधारानी ❀ हरिअनुराग सिंधु मनमानी

गदगद कण्ठ पुलक तन आये ❀ लोचन जलज प्रेम तन छाये

भई प्रेम बश गोपकुमारी ❀ लोक सकुच कुलकान विसारी

बारहि बार कहत ब्रजनारी ❀ धन्य धन्य वृषभानुदुलारी

हम सब तोसों सत्य बखानै ❀ तैं हरि भलीभांति पहिचानै

यह मोहन सब को मन मोहै ❀ तिय लखि विवश न होय सु कोहै

अंग अंग प्रति अति छवि छाजै ❀ समता काम कोटि द्युति लाजै

सुवन श्याम दोउ पाणि पकरिकै ❀ करत वेणु धुनि अधरन धरि कै

तब यह दशा सवन की होई ❀ जड़ चेतन मोहत सब कोई

बनसृग निकट धाय सब आवैं ❀ खग द्वै मौन न अंग डुलावैं

तृण गहि दंत धेनु रहि जाहीं ❀ थनते क्षीर पियत बद्ध नाहीं

यमुना बहिबे तैं रहि जाई ❀ जलचर प्रगटत बाहर आई

दो० जड़ चेतन चेतन जड़हिं, सुनत होत कल बैन ।

कै बिष कै मद कै अमी, किधौं मरयो रस मैन ॥

सो० गृहबन कछु न सुहाय, सुनत श्रवणवहमधुरधुनि ।

गृहकारज बिसराय, चकित थकित रहियत सबै ॥

बाट घाट जहँ मिलत कन्हाई ❀ मोहत सुन्दर रूप दिखाई

नई नई छवि क्षण क्षण माहीं ❀ भलकावत सब अंगनमाहीं

ऐसी को जु देखि नहिं मोहै ❀ नंदसुवन सम सुन्दर को है

वह सखि सबही के मन भावै ❀ सब कोउ वाहि देखि सुख पावै

लोक लाज कुल कौने कामहिं ❀ जो पावै सुन्दर वर श्यामहिं

पै यह मोहिं अगम अति लागै ❀ यह सुख मिलै नहीं बिन भागै

इन को गर्ग कह्यो नंद पाहीं ❧ विना मुकृत ये प्रापति नाहीं
तुमहूँ इनको तप करि पायो ❧ ऐसे नंदहि गर्ग मुनायो
कहैं सखि इतनो भाग हमारो ❧ जो वर पावहिं नंददुलारो
ताते मो मनमें यह आवै ❧ कीजै जो सब के मन भावै
तप कीजै हरिके हित लागी ❧ पूजि गौरिपति सों वर मांगी
नंदमुवन सुन्दर वर पावैं ❧ और सकल कामना नशावैं

दो० जप तप संयम नेमतें, प्रभु प्रकटत पापान ।

तातें अब तप कीजिये, और उपाय न आन ॥

सो० कीजै यह दृढ नेम, प्रात जाय यमुना नदी ।

पूजहिं सब करि प्रेम, तौ पावहिं पतिकरि हरिहिं ॥

तप करि योगीजन हरि ध्यावैं ❧ मनवांछित फल तप करि पावैं
सकल कामना के शिव दाता ❧ कहत वेद विधि परिउत ज्ञाता
हमको मन वांछित सखि एहा ❧ नंदमुवन पद कमल सनेहा
मुनत सप्रेम सखी की बानी ❧ श्री वृषभानु सुता हर्षानी
यहै मंत्र सब के मन मान्यो ❧ धन्य धन्य कहि ताहि बखान्यो
कहत सखै कीजै सखि सोई ❧ जाविधि नंदनंदन हिन होई
बृथा जन्म जग जान न दीजै ❧ यशुमति सुतसों हित करि लीजै
यहै मंत्र सबहिन दृढ़ कीनों ❧ नंदनंदन सों पतिव्रत लीनों
धन्य धन्य ब्रज गोप कुमारी ❧ जिनके हित पति कृष्ण मुरारी
मन वच क्रम हरिसों मन मानी ❧ लोकल्लाज तिनका समजानी
इक क्षण श्याम न उरते अर्ही ❧ नेम धर्म व्रत हरि हित करहीं
जिनको यश शारद श्रुति गावैं ❧ ब्रजवासी जन कहा वतावैं

दो० जाग्रत स्वप्न सुषुप्तहूँ, ब्रजयुवतिन मन भाहिं ।

सदा एक तुरिया रहत, और अवस्था नाहिं ॥

सो० ऐसे कौन प्रवीन, चहै प्रेम ब्रज तियन को ।
हरिबिजलमनमीन, बिछुरसकतनहिँ एक पल ॥

अथ चीरहरण लीला ॥

भवन खन सबहिन बिसरायो ❀ ब्रजयुवतिन हरि सों मनलायो
यहै बासना सब उर जामी ❀ होय गुपाल हमारो स्वामी
काम बासना करि उर ध्यायो ❀ हरिके हेत तपहि मन लायो
षट्दश सहस गोपकी कन्या ❀ करन लगि तप हरिहित धन्या
रहत क्रिया युत तपको साधे ❀ छाँड़ दई सब भोग उपाधे
प्रात काल यमुना जल जाहीं ❀ प्रहर प्रयन्त रहैं जल माहीं
जपहिँ उमापति हर वृषकेतू ❀ सुन्दर श्याम कृष्णपति हेतू
शीत भीत मनमें नहिँ ल्यावैं ❀ नयन मूँदि के ध्यान लगावैं
बार बार यह कहैं मनाई ❀ हम वर पावहिँ कुँवरकन्हवाई
जलते बहुरि निकसि सब आई ❀ पूजहिँ गोपेश्वर शिव जाई
चन्दन बिल्वपत्र जलधारा ❀ अक्षत सुमन सुगंध अपारा
प्रीति सहित सब शिवहि चढ़ावैं ❀ धूप दीप करि अस्तुति गावैं

छं० करहिँ अस्तुति गान बहुविधि पाणिपंकज जोरहीं ।

बार बार नवाय मस्तक प्रेम सहित निहोरहीं ॥

जय महेश कृपाल शिव आनन्द निधि गिरिजापते ।

कैलासपति कल्याण अगजगनाथ शर्व नमामि ते ॥

जटाजूट त्रिपुरङ्ग शशि कल गंगयुत शोभित शिरे ।

कमल नयन विशाल सुन्दर चारु कुंडल श्रुतिधरे ॥

नीलकंठ भुजंग भूषण भस्म अंग दिगम्बरे ।

अर्द्धग गौरि विशाल उर शिरमालधर करुणाकरे ॥

कर्पूर गौर प्रसन्न आनन पञ्चवक्त्र त्रिलोचने ।

कामप्रद सुखधाम पूरण काम शोच विमोचने ॥
भगवान भौ भव भयहरण भूतादिपति शंभूहरे ।
प्रणतजन पूरण मनोरथ जगतपति मन्मथ करे ॥
वृषभवाहन त्रिपुरअरि मृगराजवर छालाम्वरे ।
शूलपाणि त्रिशूल मूलन मूल कर शिव शंकरे ॥
सुर असुर नर नाग तवपद वन्दि मन वाञ्छित लहें ।
पूजते पदकमल प्रभु हम कृष्णपति चाहति अहें ॥

दो० तुम सर्वज्ञ सुजान शिव, जानत जन मन पीर ।
परमदान दीजै हमें, सुन्दर वर बलवीर ॥
सो० यह वरदान न आन, शिव तुमसों चाहत अहें ।
कृष्ण कमल पद ध्यान, रहै हमारे उर सदा ॥

यहि विधि ब्रजतिय नेम निवाहें ॥ शिव को पूजि कृष्ण पति चाहें ॥
नित प्रति प्रात यमुन जल वोरें ॥ प्रीति रीतिसों मन नहिं मोरें ॥
सविता सों बहु भांति निहोरें ॥ गोद पसार युगल पद जोरें ॥
तेजराशि दिन मणि जगस्वामी ॥ जगत चक्षु सब अंतर्दामी ॥
प्रणत मनोरथ पूरणकारी ॥ हम पर होहु दयाल तमारी ॥
काम हमारे तनहिं जरावै ॥ नन्दसुवन वर हम को भावै ॥
होय हमारो पति नंदलाला ॥ करहु कृपा सो दीनदयाला ॥
ऐसे हरिहित गोप कुमारी ॥ करें नेम व्रत तप तन धारी ॥
गेह देह की सुरत विसारी ॥ कृश तन भई परम सुकुमारी ॥
वर्ष दिवस यों करत विहान्यो ॥ प्रभु अंतर्दामी सब जान्यो ॥
मोहित शिव पूजति ब्रजनारी ॥ और कामना सकल निवारी ॥
सकल भावके हरि हैं ज्ञाता ॥ सकल देव द्वारा फलदाता ॥

दो० देख नेम यह प्रेममय, गोपिन को गोपाल ।

भये प्रसन्न कृपाल चित, जनहित दीनदयाल ॥

सो० मो कारण जलन्हात, भये जलहिमें प्रकट हरि ।

मुन्दर श्यामल गात, नव किशोर वर वपु धरे ॥

न्हात जहां युवती सब आछे ❀ मीजत पीठ सवन के पाछे
चकित सवन पाछे हरि हेरो ❀ देख्यो कान्ह कुँवर नँदकेरो
मन में हर्षित भई सब नारी ❀ व्रत फल प्रकटे कुंजविहारी
गेह देह की सुत बिसारी ❀ कृशतन भई परम मुकुमारी
नवलकिशोर ध्यान मन लायो ❀ सोई प्रकट रूप दरशायो
दृष्टि परत ही सकल लजानी ❀ लागीं अङ्ग दुरावन पानी
एक एक को भेद न जानै ❀ हरि कों सब अपने ढिग मानै
कहत लाज लागत नहिं तुमको ❀ बिना वसन देखत हौं हमको
हँसि निकसे तब कुँवर कन्हाई ❀ चीर हार लै चले पराई
हांक देति सब शपथ दिवावै ❀ फिरहु वसन भूषण हम पावै
डारि वसन भूषण तब दोने ❀ गोपिन तुरत दौरि कै लोने
चीर फटे भूषण सब टूटे ❀ लेत न वनै तहां नहिं छूटे
एक एक की लाज लजार्ही ❀ वसन अभूषण पहिरत जार्ही

दो० लगे श्याम ढीठो करन, यह कहि कहि पछितात ।

अन्तरगति आनन्दअति, झूठहि खीभत जात ॥

सो० लोगन कहत सुनाय, कान्हकरत लँगराइअति ।

यशुमति के ढिगजाय, कहत चलौ कहिये सबै ॥

चलीं यशोमति पै सब ग्वारी ❀ प्रेम बिबश तन दशा बिसारी
पुलक अंग अँगिया दस्कानी ❀ टूटे हार लिये निज पानी
चीर चीरि नख घात वनाई ❀ यह मिस करि उरहन लै आई
देखो महारि श्याम के ये गन ❀ ऐसे हाल किये सबके उन

चोली चीर हार दिखराये ॥ धेर करत इतको भजि आये
और बात एक सुनहुँ न माई ॥ ढीठ भयो अति कुँवर कन्हई
विना बसन हम न्हाति जहां सब ॥ मीजत पीठ जाय पाछे तब
और कहत तुमसों सकुचावैं ॥ उर उधार के तुमहिं दिखावैं
महरि विचारत कहत कहा सब ॥ भयो श्याम यह लायक धों कव
मुनि युवतिन के मुख यह वानी ॥ बोली विहँसि नन्द की रानी
बात कहौ सो जो निवहै री ॥ विना भीति नहिं चित्र लहै री
तुमको कहति लाज नहिं आवति ॥ चोरी रही छिनारो लावति

दो० तुम चाहति हौ गगनते, गहन तरैया वाम ।

सो कैसे करि पायहौ, तुम लायक नहिं श्याम ॥

सो० मैं बूझी सब बात, तुम सों हौं कहिहौं कहा ।

वृथा फिरत अठिलात, मष्ट करो सुनि है जगत ॥

यहि अन्तर हरि आय गये घर ॥ शीश मुकुट लीन्हे मुरली कर
अति कोमल तन भूषण सोहैं ॥ बाल भेद देखत मन मोहैं
जननी बोलि बांह गहि लीनी ॥ कहति सवनसों रिस रस भीनी
देखहु री तुम सब इत आवो ॥ इनहीं को अपराध लगावो
देखहु समुझि लाज नहिं आवत ॥ इनहीं के नख उरन दिखावत
मेरो कान्ह अवहिं सुत वारो ॥ तुम कोउ औरहि जाय निहारो
देखत हरिहिं युवति भई भोरी ॥ कहति महरि कहु तुमहिं न खोरी
देन उरहनो तुम को आई ॥ नीकी पहिरावन हम पाई
आपस में सब कहत सुनाई ॥ देखहु री यह भाव कन्हई
यमुना तीर मिले जब आई ॥ कहां गई तब की तरुणाई
इन के गुण ऐसे को जानै ॥ और करत औरै ही ठानै
घर आवत ही भये नन्हई ॥ ऐसे मन के चोर कन्हई

दो० देखि चरित नँदलाल के, भई बाल मति भोर ।

सुधिबुधिमनकछु थिर नहीं, कहत औरकी और ॥

सो० सकुचीं बहुरि सँभारि, बिबश देखि अपनी दशा ।

चलीं घरनि ब्रजनारि, हरिमुखकमलनिहारिकै ॥

गई घरन ब्रज गोपकुमारी ❀ चित हरि लीनो मदनमुरारी

नेक न मन लागत घर माहीं ❀ धाम कामकी सुधि कछु नाहीं

मात पिता को डर नहिं मानौं ❀ गारि देत कोउ सुनत न कानों

प्रात होत ही गोपकुमारी ❀ गई यमुनतट सब सुकुमारी

देखत तहाँ जाय नँदनंदन ❀ मोर मुकुट शोभित तन चंदन

मकराकृत कुण्डल उर माला ❀ पीत बसन दृगकमल विशाला

दरश देखि अँखियां तृपतानी ❀ भई सुखी उर तपन बुझानी

कहत परस्पर मिल सब ग्वाली ❀ यमुना निकट गये बनमाली

कौन भाँति करि आज अन्हैबो ❀ बनत नाहिं अब यमुना ऐबो

कैसे करि हम बसन उतारैं ❀ कान्ह हमारी ओर निहारैं

मीजत पीठ औचकहिं आई ❀ बसन अभूषण लै भजि जाई

कहौ फेरि कैसे तब पावैं ❀ अब नहिं कान्ह घाटपै आवैं

दो० कहत सकुचकी बात सब, ऊपर मन आनंद ।

अन्तर गति की वृत्तिको, जानत सब नँदनंद ॥

सो० जानी जानन राय, लाजान्तर युवती करत ।

सो अब देउँ मिटाय, अन्तर भलों न प्रेम में ॥

और बात एक श्याम बिचारी ❀ ये जल भीतर न्हात उधारी

जो तिय जल में नांगी न्हाई ❀ ताको दोष देत अधिकाई

ताको दोष नाश तब पावै ❀ नांगी परपति सम्मुख आवै

सो इन को यह दूषण टारौं ❀ और लाज अन्तर निवारौं

करों आज इन सों विधि सोई ॥ इन कों हित सम कौतुक होई ॥
जो कहु चूक दास तें होई ॥ आप सुधार लेत हरि सोई ॥
अन्तर प्रभु को नेक न भावै ॥ भजै निरन्तर जब हरि पावै ॥
अन्तर रहित भक्ति हरि प्यारी ॥ कहत वेद सब सन्त पुकारी ॥
तव हरि मन यह कियो विचार ॥ इनके वसन हों इक वार ॥
प्रभु सबकी तव दृष्टि बचाई ॥ कदम वृक्ष चढ़ि रहे लुकाई ॥
जब गोपिन हरि देख्यो नहीं ॥ चकित विलोकीं इत उत माहीं ॥
जाने सदन गये नँदलाला ॥ न्हान चलीं तव सब ब्रजवाला ॥

दो० धरे उतार उतार सब, तट पर भूषण चीर ।

नग्न होय अस्नान हित, पैठीं यमुना नीर ॥

सो० श्रीवालों जलमाहि, पैठि करत अस्नान सब ।

सुखछवि कही न जाहि, कनककंज फूले मनहुँ ॥

बार बार वृक्षत जल माहीं ॥ प्रेम सहित मन मुदित तहाहीं ॥

शिव सों विनती करत निहोरी ॥ कबहुं रवि बन्दै कर जोरी ॥

यहै कामना करि सब ध्यावैं ॥ नंद नंदन को पति करि पावैं ॥

कामातुर सब गोप कुमारी ॥ धरें ध्यान उर कुंज विहारी ॥

मूंदहिं नयन दरश चितलावैं ॥ शब्द विचार श्रवण सुख पावैं ॥

भुज जोरत अंकम हित लागी ॥ मगन प्रेमरस तिय बड़ भागी ॥

प्रभु अन्तर्यामी सब जानै ॥ देखे कदम चढ़े सुख मानै ॥

कहत धन्य धनि ब्रजकी वाला ॥ मेरे हित तप करत विशाला ॥

प्रीति रीति सबकी पहिचानी ॥ क्षण क्षणकी सेवा हरि मानी ॥

काहु भाव मोहिं कोउ ध्यावै ॥ मोहिं विरद राखे बनि आवै ॥

कियो बहुत श्रम यम हित कारण ॥ अब इनको दुख करो निवारण ॥

उपजी कृपा समुक्ति जन पीरा ॥ उतरे तह तें श्री बलवीरा ॥

दो० प्रेम मगन युवती सबै, रहीं ध्यान मन लाय ।

हरि सब भूषण बसन लै, चढ़े कदम पर जाय ॥

सो० भूषण बसन अपार, सोरह सहस बधून के ।

हरे एकही बार, लै राखे तरुनीप पर ॥

कस्यो नीप तरु अति विस्तार ❀ फूले सुमन सुगन्ध अपार

लै लै बसन डार अटकाये ❀ जहां तहां भूषण लटकाये

नीलाम्बर पाटम्बर सारी ❀ सेत पीत चूनरि अरुणारी

जहां तहां शाखन प्रति सोहैं ❀ देखत छवि बसंत मन मोहैं

सो तरु शाखा परम सुहाई ❀ बैठे छवि की राशि कन्हाई

युवती सुकृति तरुणधरि मानों ❀ पश्यो सुकृति पूरणफल जानों

देखत कदम चढ़े नँदलाला ❀ बसन बिना जलमें सब वाला

ध्यान करत तें जब सब जागीं ❀ तब जल बाहर निकसन लागीं

जलतें निकरि आय तट देख्यो ❀ भूषण बसन तहां नहिं पेर्यो

इत उत चितै चकित भई भारी ❀ सकुच गई फिर जल सुकुमारी

नाभि प्रयन्त नीर में ठाढ़ी ❀ भुज लगाय उर चिंता बाढ़ी

कंपत शीत में अति अकुलानी ❀ बार बार कहि कहि पड़ितानी

दो० ऐसो को भूषण बसन, सबके एकहिं बार ।

तटतें लये चुरायके, लगी न नेकहु बार ॥

सो० हम जानत यह बात, अम्बर हरि हर ले गये ।

और कौन को नात, जो ब्रज में ढीठो करै ॥

दीन होय तब युवति पुकारी ❀ हौ कहूँ श्याम जाहिं बलिहारी

दरश दिखाय बिनय सुनि लीजै ❀ अम्बर देहु कृपा अब कीजै

थर थर कंपत अंग सुकुमारी ❀ देखि श्याम नहिं सके सँभारी

बोली उठे तब मदन गोपाला ❀ कहा कहत मोसों ब्रजवाला

कतहों जल में मरत जड़ाई ॥ लेहु वसन भूषण इत आई
तुम पट भूषण मुरत विसारी ॥ तव में लै कीन्ही रखवारी
अब अपने पट भूषण लीजै ॥ रखवारी कछु हम को दीजै
जब ऐसे हरि बोल सुनायो ॥ तव सबके मन धीरज आयो
सुनि हरि वचन सकल हरपानी ॥ लखे कदम ऊपर सुखदानी
कहत सुनौ सखि हरिकी बातें ॥ वसन चुराय करें ये बातें
हम सब जल के बीच उधारी ॥ मांगत हैं हमसों रखवारी
तव हँसि बोलीं ब्रज की बाला ॥ मुनहु श्यामसुन्दर नँदलाला

दो० तन मन धन अपों तुम्हें, हैं जु तुम्हारे पास ।

अब अम्बर दीजै हमें, जानि आपनी दास ॥

सो० तब हँसि कह्यो कन्हाय, जो तनमनमोको दियो ।

लेहु वसन ह्यां आय, तौ मानौ मेरो कह्यो ॥

मुनहु श्यामघन बात हमारी ॥ नग्न कौन विधि आवें नारी

हम तरुणी अरु तरुण कन्हाई ॥ विना वसन क्यों देहिं देखाई

यह मति आप कहां धों पाई ॥ आज सुनी यह बात नवाई

पुरुष जात यह कहत न जानहु ॥ हाहा ऐसो मन जिन आनहु

कहत श्याम जो नग्न न ऐहौ ॥ तो तुम पट भूषण नहिं पैहौ

जो तन मन दीनो तुम मोही ॥ तौ राखत कत लजा द्रोही

यह अन्तर मोसों जनि राखौ ॥ मान लेहु तुम मेरो भाखौ

शीत सहत कत नवलकिशोरी ॥ लाज देहु जलही में बोरी

जलते निकस वेग इत आवो ॥ हाथ जोरि मोहिं विनय सुनावो

ज्यों जलमें रविते कर जोरो ॥ त्यों द्वै सन्मुख मोहिं निहोरो

यह सुनि हँसीं सकल ब्रजनारी ॥ ऐसी बात न कहो मुरारी

हाहा लागहिं पायँ तिहारे ॥ पाप होत हे जाड़न मारे

दो० छांड़ि देहु यह टेक हरि, बर भूषण तुम लेहु ।

शीत मरत हम नीर में, बसन हमारे देहु ॥

सो० दूषण होत अपार, जो तिय अँग देखहि पुरुष ।

ताते नन्दकुमार, नारी नखन न देखिये ॥

तुमको ओह होत नहिं राई ❀ बड़े निठुर हौं कुँवर कन्हाई

ऐसो करौ जो तुमको सोहै ❀ आज तुम्हारी पठतर कोहै

आजहि ते हम दासि तिहारी ❀ कैसे अँग दिखावहिं नारी

अँग दिखाये भूषण पैहौं ❀ नातरु जल में बैठी रहौं

मेरे कहे निकसि सब आवो ❀ थोरे में मो भलो मनावो

कत अंतर राखत हौं हमसों ❀ वार वार मैं भापत तुमसों

लेहु आय अपने पट भूषण ❀ यह लागै हमको सब दूषण

मो हित तुम कीनो तप भारी ❀ अब कत लज्जा करत हमारी

मैं अन्तर्यामी सब जानी ❀ करिहौं तुमरे मनकी मानी

अब पूरण तप भयो तुम्हारे ❀ अन्तर इतो दूरि करि डारो

सुनि यह मोहन के मुख बानी ❀ सब युवती मनमें हरपानी

तब सबहि न यह बात बिचारी ❀ अब तो टेक परे बनवारी

दो० कहत परस्पर मिलि सवै, हरि हठ छांड़त नाहिं ।

बसन बिना कैसे बनै, कौन भांति घर जाहिं ॥

सो० चलौ लीजिये चीर, इनहीं को हठ राखि कै ।

मनमोहन बलबीर, जो कछु कहैं सो कीजिये ॥

यह बिचार जल बाहर आई ❀ बैठि गई तट अतिहिं लजाई

बार बार हरि निकट बुलावै ❀ त्यों त्यों अधिक लाजको पावै

कहत श्याम अम्बर अब दीजै ❀ हाहा इतनो हठ नहिं कीजै

बहत समीर शीत अति भारी ❀ मानैंगी उपकार तुम्हारी

हम दासी तुम नाथ हमारे ॥ हम सबकी पति हाथ तुम्हारे
 कहत श्याम यह तजो सयानी ॥ छाँड़हु लाज करहु मम बानी
 अपने वसन लेहु ह्याँ आई ॥ देहों तुम को नन्द दुहाई
 आवहु सकल लाज को त्यागे ॥ करहु सिंगार आय मो आगे
 तब सवहिन यह मनमें जानी ॥ करिहैं श्याम आपनी ठानी
 कर कुच अंग दाँकि भई ठाढ़ी ॥ वदन बनाय लाज अति बाढ़ी
 गई कदम तर हरिके पासा ॥ कहति देहु अब हमको वासा
 हरि बोले यों वसन न पावो ॥ हाथ जोरि मोहिं विनय सुनावो
 दो० जो कहिहौ करिहौ सबै, हँसि बोलीं ब्रजवाम ।
 लेहैं दाँव हमहूँ कबहुँ, सुनो श्याम अभिराम ॥
 सो० उभय कमल करजोरि, सलजसहासनिहारिहरि ।
 माँगत सकल निहोरि, कहत देहु अब वसन प्रभु ॥

लखि युवतिन की प्रीति कन्हाई ॥ रीके भक्तन के सुखदाई
 धन्य धन्य बोले गोपाला ॥ निश्चय प्रीति करी तुम वाला
 देखि निरन्तर गोप कुमारी ॥ दीने वसन अभूषण डारी
 अति आतुर सब पहिरन लागीं ॥ प्रेम प्रीति के रस मति पागीं
 तब हँसि बोले कुंजबिहारी ॥ मैं पति तुम मेरी सब प्यारी
 अन्तर शोच दूर करि डारो ॥ मेरो कह्यो सत्य उर धारो
 शरदरात तुम आश पुरैहौ ॥ अंकम भरि सबको उर लेहौ
 अब तप करि तुम मत तन गारो ॥ मैं तुम ते क्षण होत न न्यारो
 करसौं परस सबन सुख दीनो ॥ विरहताप तन को हरि लीनो
 बिदा करी हँसि नन्दके लाला ॥ निज निज सदन गई ब्रजवाला
 गोपिन उर अति हर्ष बढ़ायो ॥ मन मन कहति कृष्ण वर पायो
 ब्रजवासी जन के सुखदाई ॥ आये अपने सदन कन्हाई

दो० इहि विधि ब्रजसुन्दरिनको, हितकरि सुंदरश्याम ।

ब्रजबिलासबिलसतविविध, सकललोकअभिराम॥

सो० सुंदर धन सुखरास, सबविधि करि सबके सुखद ।

नितनवकरतबिलास, मुदितसकलब्रजलोगलखि॥

अथ वृन्दावनवर्णनलीला ॥

हरि लखि मात पिता सुख पावैं ❀ बाल भाव बहु लाड़ लड़ावैं

नवल किशोर सुभग तनश्यामा ❀ निरखत मुदित सकल ब्रजवामा

ग्वाल बाल सब सम करि जानैं ❀ सखा प्राण प्रीतम करि मानैं

नित उठि गाय चरावन जाहीं ❀ क्रीड़ा करें विविध ब्रज माहीं

इक दिन सोवत सदन कृपाला ❀ आये द्वार बुलावन ग्वाला

चलहु श्याम बन धेनु चरावन ❀ यह सुनि जननी लगी जगावन

उठहु तात मैया बलिजाई ❀ टेरत ग्वाल बाल बल भाई

बदन दिखाय सबन सुख देऊ ❀ दतवन करि कल्लु करहु कलेऊ

भई बेर बन को नँदलाला ❀ अब मत सोवहु मदनगोपाला

देखन को अबि अति अतुराई ❀ सखा द्वार सब टेर लगाई

सोवत ते हरि जागत नाहीं ❀ सुनत बात आलस मनमाहीं

कबहुँ बसन दांपि मुख सोवैं ❀ कबहुँ उघारि जननि तन जोवैं

खोलत नयन पलक झुक आवैं ❀ सो अबि निरखि मात सुख पावैं

दो० उठो लाल जननी कह्यो, तब चितये हँसि नन्द ।

पटगहि पुनिपुनि फेरमुख, तबहिं उठे ब्रजचन्द ॥

सो० कबके टेरत ग्वाल, बलदाऊ यह कहि उठे ।

बनको भई अबार, गई गाय आगे निकस ॥

यह सुनि तुरतहि उठे कन्हाई ❀ यशुमति जल भारी भरि लाई

दुहुं भैयन करवाय मखारी ❧ पोछे मुख जननी निज सारी
करहु कलेऊ अरु कछु प्यारे ❧ एक थार दोउ सुत बैठारे
दधि माखन रोटी अरु मेवा ❧ करत प्रात दोउ भ्रात कलेवा
करत निकट बैठे मन मोदा ❧ दृग मुख लूटत महिर यशोदा
मात प्रेम ते अति तृपताई ❧ अचवन करन उठे दोउ भाई
द्वारे ढेर उख्यो यक ग्वाला ❧ वन कहँ वेगि चलहु नँदलाला
बल मोहन आवहु दोउ भैया ❧ आगे निकमि गई हैं गैया
ग्वाल बचन सुनि अति अतुराई ❧ कछु अचयो कछु नहिँ दोउ भाई
सुरली मुकुट लकुट पट लीनो ❧ निकस दौरि वनहीं मन दीनो
केतिक दूरि गईं चलि गैया ❧ ग्वालहि वृक्षत जात कन्हैया
कछु वन पहुँची द्वै हैं जाई ❧ कछु मग मिलिहैं कुँवरकन्हाई

दो० बन पहुँचत सुरभी लई, बल मोहन दोउ धाय ।

कहत सबनसों जात कित, हमहूँ पहुँचे आय ॥

सो० तुम आये अतुराय, जँवतपर लखिके हमैं ।

तुम सँग रहत बलाय, अब हम दूरि चरायहैं ॥

यह सुनि सखा धाय सब आये ❧ हरिको अङ्गम भरि उर लाये
तुमहौ सबहिन के मुखदाई ❧ हमको तजि मति जाहु कन्हाई
आज कुमुदवन चलहु चरावन ❧ शीतल मुखद सघन अति पावन
सुनत कह्यो अति हर्ष कन्हाई ❧ नीकी कही बात यह भाई
अपनी अपनी गाय बुलावो ❧ एक ठौर करि सबन चरावो
यह सुनि ग्वाल सुरभिगण घेरत ❧ लै लै नाम गाय सब डेरत
धौरी धूमरि राती कवरी ❧ पियरी गोरी गैनी कजरी
खैरी फुलही रौची चौरि ❧ धूरी धुमरी मुंडी भौरी
लीली कपिली सुवनजोती ❧ लाखी निकही रतनी तेती

ऐसे सुरभी ठेर बुलाई ❀ सब मिल चले कुमुदवन धाई
 तब बल कह्यो दूर मत जाहू ❀ नन्द रिसै हैं अरु यशुदाहू
 बल को कह्यो मान सुखदाई ❀ बोल लिये सब सखा कन्हाई
 दो० कहत सबन समुभाय हरि, कौन कुमुदवन जाय ।

बुरो मानिहैं नन्द सुनि, और यशोदा माय ॥

सो० ल्यावहु गाय फिराय, चलिये वृन्दावन सुखद ।

सुरभी चरत अधाय, बंशीबट यमुना निकट ॥

यह कहि श्याम चले अगुवाई ❀ फेरी गाय ग्वाल सब धाई
 वृन्दावनहिं चले मनमोहन ❀ हर्षित सखा वृन्द सब गोहन
 करत कुलाहल आनंद भारी ❀ पहुँचे वृन्दावन वनवारी
 सुरभी गण चहुँदिशि बगराई ❀ कहत सखा सब हर्ष बढ़ाई
 जादिन अघ हति श्याम सिधाये ❀ ता दिनते या वन अव आये
 देखत बन सब भये सुखारी ❀ बहत मनोहर त्रिविध बयारी
 बैठन की शोभा चित दीने ❀ देखत श्याम सखन संग लीने
 नव किशलय दल सुमन सुहाये ❀ मनहुँ बसन्त श्रृंगार बनाये
 मधुर मिष्ट सुन्दर सुखकारी ❀ फल के भार रही नै डारी
 मनहुँ देखि श्यामहिं सुखपाई ❀ देत भेंट तरु शीश नवाई
 सुमन भँवर गुंजत छवि पावैं ❀ अस्तुति मनहुँ मधुर स्वर गावैं
 एक पांव ठाढ़े सब आगे ❀ जहँ तहँ थकित मनहुँ अनुरागे
 दो० बेलि विविध लपटीं ललित, फूलरहीं बहुरंग ।

शोभितसहित श्रृंगारजिमि, नारि पतिनके संग ॥

सो० हालि उठत सब पात, मन्द पवन लागत कबहुँ ।

आनंद उर न समात, बार बार पुलकत मनहुँ ॥

कुंज पुंज मंजुल सुख दाई ❀ शीतल सुमन सुगन्ध सुहाई

हरि विश्राम हेत वन जानौ ❧ रचे विचित्र सदन बहु मानौ
बोलत हैं कल खग बहु रंगा ❧ कीर कपोत कोकिला भृंगा
मनहुँ भरे सब आनंद गावैं ❧ जहँ तहँ बरही नृत्य दिखावैं
तरुदल खरक पवनगति साजै ❧ मधुर स्वरन वाजन ज्यों वाजै
क्रीड़त मरकट शुभगति लीने ❧ करत कला ज्यों नट परवाने
मृगगन चितवत आनंद बाढ़े ❧ मनहुँ तमाशगीर सब ठाढ़े
पाय श्याम घन हित बनराई ❧ करी मनहुँ आनन्द बधाई
वनशोभा कलु बरणि न जाई ❧ ऋतु वसंत जहँ रहत सदाई
जहाँ सुभाव काल गुण नार्हीं ❧ वैरभाव नहिँ खग मृग मार्हीं
सदा एकरस परम प्रकाशी ❧ परम सुखद आनंदकी राशी
चिन्तामणि सब भूमि सुहावन ❧ कोमलविमल सुभग अति पावन

दो० शोभा वृन्दाविपिनकी, बरणिसकै अस कौन ।

शेष महेश गणेश विधि, पार न पावत तौन ॥

सो० महिमा अमित अपार, श्रीवृन्दावन धाम की ।

जहँ नित करत बिहार, परब्रह्म भगवान हरि ॥

देखि श्याम वन भये सुखारी ❧ बैठे तरुतर विपिन विहारी
वृन्दावन की करत बढ़ाई ❧ बलदाऊ सों कहत कन्हाई
मैं यह वन देखत सुख पावत ❧ वृन्दावन मोको अति भावत
कामधेनु सुरतरु विसरावत ❧ समा सहित वैकुण्ठ भुलावत
यह यमुना तट यह वन जावत ❧ ये सुरभी अति सुखद चरावत
यह सुख त्रिगुवन कतहुँ न पावत ❧ ताते में तन धर इत आवत
दाऊ जू तुम सच कर मानौ ❧ यह वृन्दावन जड़ मत जानौ
चितवनमें आनंद की रासा ❧ प्रेम भक्ति को इहाँ निवासा
परम धाम मम परम सुहावन ❧ पावनहुँ ते पावन पावन

जे तरु बृन्दावन के माहीं ❀ कल्प वृक्ष तिनकी सर नाही
 कल्प वृक्षके तर जब जाई ❀ तब मांगे वाञ्छित फल पाई
 बृन्दावन तर चिन्तत जोई ❀ प्रेम भक्ति मम पावत सोई
 दो० जाके बश मैं कहतहौं, अपनी प्रभुता त्याग ।

प्रेम भक्तिसो लहत नर, बृन्दावन अनुराग ॥

सो० श्रीमुख बरणयो श्याम, श्रीबृन्दावन को महत ।

सुख पायो बलराम, सुनत कान्हके बचन वर ॥

सखा बृन्द सुनि श्रीमुख बानी ❀ प्रेम मगन तन दशा भुलानी
 चितवत हरि मुख पलक विसारी ❀ जिमि चकोरण शशिहिनिहारी
 कहत चकितसब अति सुखपावत ❀ निज लीला हरि प्रगट जनावत
 पुनि पुनि पुलक कहत शिरनाई ❀ सुनहु श्यामघन कुँवर कन्हवाई
 बार बार तुमको कर जोरैं ❀ हमहिं कान्ह तुम तजहु न भोरैं
 जहां जहां तुम तन धरि आवो ❀ तहां तहां जनि चरण छुड़ावो
 तब हँसि बोले कुँवर कन्हैया ❀ ब्रजते तुम्हें न टारों भैया
 तुम मेरे मनको अति भावत ❀ तुम ते मैं बहुतैं सुख पावत
 या ब्रज सम त्रिभुवन कहूँ नाहीं ❀ तुम्हरे दिग मैं रहत सदाहीं
 मैं तुम हेत देह यह धारी ❀ तुमते ब्रजलीला विस्तारी
 है यह ब्रज मोकों अति प्यारो ❀ ताते कबहूँ होत न न्यारो
 ऐसे हरि ग्वालन के माहीं ❀ गुप्त बात कहि कहि समझाहीं

दो० मधुर बचन सुनश्यामके, सखाबृन्द सुख पाय ।

प्रेम पुलकि तन मुदित मन, रहे सबै गहि पाय ॥

सो० धनिधनिधनि तुमश्याम, धनिब्रजधनिबृन्दाबिपिन ।

तुम्हरे गुण अभिराम, हम सब अज्ञ न जानहीं ॥

सुनहु श्याम घन नंददुलारे ❀ तुम प्रभु हम सब दास तुम्हारे

दुर्लभ यह हरि संग तुम्हारी ❧ कवधों फेरि गोप तन धारो
ना जानिये बहुरि व्रजनाथा ❧ कव तुम फिरिहौ मुर मुनिसाथा
कव तुम आक छीनिकै खेहौ ❧ कवधों फिरि ऐसे मुख देहौ
बलि बलि जइये श्याम तुम्हारी ❧ अब इक विनती मुनहु हमारी
सुन्दर मुरली नेक वजावो ❧ अधर सुधारस श्रवणन प्यावो
तुम्हैं नंदकी सोंह दिवावैं ❧ मुरली धुनि मुनि हम मुख पावैं
तुम्हरे मुख यह वाजत नीकी ❧ हम सबकी जीवन है जीकी
मुनत सखनकी कोमल बानी ❧ प्रेम सुधारस सों लपटानी
गुण गम्भीर गोपाल कृपाला ❧ भक्तवश्य प्रभु दीनदयाला
भये प्रसन्न भक्त सुखदाई ❧ चितये कमल नयन समुदाई
करते लकुटि निकट धरिदीनो ❧ पाछे मुरली को गहि लीनो

दो० पकर दुहंकर अधर धर, मधुरमुरलिधुनिगान।

मोहिलियो चर अचरनभ, जलथलश्यामसुजान॥

सो० भई चकित गति पौन, यमुना जल लीन्हीं शयन।

बै गये खग मृग मौन, रहे जहां तहँ चित्र से ॥

उपजावत गावत गति सुन्दर ❧ राग रागिनी ताल विविध वर
सखा बृन्द मुनि तन मन वारैं ❧ निरखत मुख अवि पलक विसारैं
चलत नयन भृकुटी पुट्नासा ❧ करपल्लव मुरली स्वर स्वासा
मानहुँ निरस्तक भाव बतावैं ❧ शुभगति नायक सैन सिखावैं
कुंचित अलक वदन अविदेई ❧ मनहुँ कमलरस अलिगल लेई
कुंडल झलक कपोलन माहीं ❧ मनहुँ सुधारस भकर भ्रमाहीं
दशन दमक मोतिन लर ग्रीवां ❧ मनहुँ सकल शोभा की सीवां
तिलक विचित्र भाल अविअजै ❧ मनहुँ महाअवि दशन विराजै
चमकत मोर चंद्रिका चारु ❧ मनहुँ सकल शृंगार सिंगार

श्यामगात उर गजमणि माला ❀ सँग शोभित वनमाल विशाला
मर्कट गिरि मनो मुरसरि धारा ❀ बैठी पंगति कीर किनारा
कटि पटपीत तड़ित झुतिहारी ❀ पद पङ्कज नूपुर रुचिकारी

दो० श्रीवालटकन मुरकिपर, शोभित ब्रवि समुदाय ।

प्रेममगननिरखतमुदित, गोपलाल सुख पाय ॥

सो० सुन्दर श्याम सुजान, देत परमसुख सखनकों ।

वारत तनमन प्रान, धन्यधन्य कहि ग्वालसव ॥

रीभूत ग्वाल रिभावत श्यामा ❀ लेत मुरलि में सबको नामा

हँसत ग्वाल सब दै करताला ❀ लेत हमारो नाम गोपाला

कहत श्याम अब तुमहुँ बजावो ❀ ऐसे हमको गाय सुनावो

हँसि मुरली तिनके कर दीनो ❀ अधरन धर अमृत रसलीनो

लै लै निजकर सकल बजावत ❀ हरिके स्वरको रूप न पावत

आस पास सोहत सब बालक ❀ मधि प्रभु प्रीति रीतिके पालक

हँसि हँसि सबके चित्त चुरावै ❀ सब मिल प्रेमानंद बढ़ावै

जैसे श्री मुरलीधर गायो ❀ काहू पै सो रूप न आयो

हँसि हँसि कहत परस्पर भाई ❀ हरि की सम को सकै बजाई

चतुरानन पंचानन ध्यावै ❀ सहसानन नव नित गुण गावै

सुर नर मुनि कोउ पार न पावै ❀ सो ग्वालन सँग बेणु बजावै

ब्रजवासी जन को प्रतिपाला ❀ भक्त बश्य प्रभु दीनदयाला

दो० कारण करण अनंत गुण, निगमनेति जेहि गाव ।

सो ग्वालन सँग गावहीं, देखहु भक्ति प्रभाव ॥

सो० वृन्दावन की रेनु, ब्रह्मादिक बांझित सदा ।

जहां श्याम सुखदेनु, ग्वालनसँग चारत सुरभि ॥

अथ द्विजपत्नीयाचनलीला वर्णन ॥

विहरत वृन्दावन वनवारी ❀ विविध भांति लीला अनुसारी
 कवहूँ सखन संग मिलि गावैं ❀ कवहूँ मुरली मधुर वजावैं
 कवहूँ गैयन घेसत धाई ❀ कवहूँ यमुना के तट जाई
 करत कुलाहल आनंद भारी ❀ देत दिवावत रसकी गारी
 ऐसे लीला करत अपारा ❀ भये लुधारत गोपकुमारा
 कहत भये तव हरिसों जाई ❀ हमको लुधा लगी अधिकाई
 यह सुनि प्रभु भक्तन हितकारी ❀ अपने मन यह बात विचारि
 सुनि सुनि मेरे गुणगण गाना ❀ करतरहत द्विजतिय मन ध्याना
 तिनको दर्शन आज दिखाऊं ❀ तिनके मनकी ताप नशाऊं
 तव हरि ग्वालन कह्यो बुझाई ❀ यज्ञ करत ह्यां द्विजसमुदाई
 तिनके निकट जाउ तुम भाई ❀ प्रथम प्रणाम कीजियो जाई
 कहियो हम को कृष्ण पठायो ❀ तुमपै भोजन मांगन आयो
 दो० यह सुनि ग्वाल गये तहां, जहां विप्र समुदाय ।

यज्ञ करत अहमित लिये, विद्याको बल पाय ॥

सो० ग्वालन करी प्रणाम, कह्यो तिन्हें करजोरिकैं ।

हमैं पठायें श्याम, मांग्यो है भोजन कह्य ॥

वन में राम कृष्ण दोउ भैया ❀ आये इतहि चरावन गैया
 वे कछु आज भये हैं भूखे ❀ यह सुनि विप्र द्वै गये रुखे
 कह्यो यज्ञ हित करी रसोई ❀ अहिरन पहिले देय न कोई
 यह सुनि ग्वाल सकल फिर आये ❀ हरिसों तिनके वचन सुनाये
 सुनि हलधरतन चितै कन्हाई ❀ बोले वचन मंद मुसकाई
 ये द्विज कर्म बर्म लपटाने ❀ बिना भक्ति मोकों नहि जाने
 तव ग्वालनसों कह्यो मुरारी ❀ जाउ जहां इनकी सब नागी

उन को है दृढ़ भक्ति हमारी ❀ वे मानैगी कही तुम्हारी
 उनसों भोजन मांगहु जाई ❀ कहियो भूखे भये कन्हई
 तब द्विजनारिन ढिग ये आये ❀ हाथ जोरि तिनकों शिर नाये
 कह्यो राम अरु कुँवर कन्हैया ❀ बन में भूखे हैं दोउ भैया
 मांग्यो है कछु भोजन तुमसों ❀ आज्ञा देहु सो कहिये उनसों
 दो० ग्वालन के सुनि बचन सब, हर्ष उठीं द्विजवाम ।

कहत हमारी भाग्यधनि, भोजन मांग्यो श्याम ॥

सो० करतरहीं नित ध्यान, सुनि सुनि जिनके गुण श्रवण ।

सुफलजन्म निजजान, तिनको भोजन लै चलीं ॥

षट्सके व्यंजन बिधि नाना ❀ कोमल भांति अमित पकवाना
 खीरखांड सिखरन दधि न्यारो ❀ माखन लियो श्यामको प्यारो
 कहँ लग बरणों कहौ प्रकारा ❀ प्रेम सहित लीने भरि थारा
 बहुते ग्वालनके कर दीने ❀ बहुते अपने शिर धर लीने
 नयनन दरश लालसा बाढ़ी ❀ उपजीचाह हृदय अति गाढ़ी
 चलीं पतिनकी कान बिसारी ❀ देखन कों प्रभु गोप विहारी
 ग्वालन सों पूछत यह बाता ❀ कित हैं हरि जनके सुखदाता
 जिनके पुरुष हते घर माहीं ❀ तिनकों जान देत सो नाहीं
 कहत जात तुम कित अतुराई ❀ लोक लाज तनदशा भुलाई
 तिन सों कहत भई ते नारी ❀ हमकों श्री गोपाल हँकारी
 भोजन मांग्यो है हम पाहीं ❀ तिनहिं देन ग्वालनसँग जाहीं
 तिनको दरश देखि सुख पै हैं ❀ बहुरि तिहारे घर हम रहैं

दो० यह सुनि पति अतिक्रोध करि, तिनहिं दिखायो त्रास ।

कहत भई तुम बावरी, बैठति नाहिं अवास ॥

सो० जिनके उर नंदलाल, वसे लकुट मुरली लिये ।

तिनहिं न भय यमकाल, कौनभांति रोंकेरु कहिं ॥

हरिपै हमें जान पिय देह ॥ कहा रोंकि अपयश शिर लेह
देखन देहु नंदके लालहि ॥ त्रिभुवनपति प्रभु मदनगोपालहि
इतनी बात मान पिय लीजै ॥ हाहा हमें दान यह दीजै
वे हैं यज्ञपुरुष भगवाना ॥ अन्तरयामी कृपा निधाना
करत यज्ञ विधि तिन्हें विसारी ॥ कहा सैगी बात तिहारी
कहैं लगि कहों बात समुझाई ॥ जात दशकी अवधि विहाई
जो तुम स्वामी जानत नाही ॥ तौ हम सत्य कहें तुम पाहों
मनतो मिल्यो जाय नंदलालहि ॥ करिहौ कहा रोंक के खालहि
लेहु सँभारि देह यह सारी ॥ जासों पिय तुम कहत हमारी
को राखै इतने जंजालहि ॥ मिलिहैं प्राण यशोदा लालहि
जो निश्चय नहिं श्याम सनेहा ॥ तौ यह कौन काजकी देहा
सब सखियनके आगे जाई ॥ देखौंगी ब्रवि कुँवर कन्हाई
दो० ऐसे देह अरु गेह तजि, पतिकी कान निवारि ।

पहुँची सबते प्रथमही, जो रोंकी ब्रज नारि ॥

सो० कठिन प्रेमको पंथ, तहां नेम की गम नहीं ।

कहत सकल सद्ग्रंथ, जहां नेम तहँ प्रेम नहिं ॥

ऐसे भोजन लै द्विजवाला ॥ पहुँची वन जहँ मोहनलाला
नटवर भेष चित्रित तन कीने ॥ ठाढ़े सखा संग भुज दीने
मोर मुकुट वैजन्ती माला ॥ करमुखली दृग नैन विशाला
कुरडल अलकतिलकभलकाहीं ॥ कोटिकाम ब्रवि पट्टर नाही
मुखमृदु हँसन लसन पट्पीरो ॥ निरखत नयन ताप भयो सीरो
भोजन लै हरि आगे राखे ॥ अपने भाग्य धन्य करि भाखे
तिन्हें देखि हरि मन सुखमान्यो ॥ वचननिकरि तिनको सनमान्यो

तिनसों बहुरो कह्यो कन्हारै ❀ गृह पति तजि तुम कित इत आई
 कहियत बिप्र बेद अधिकारी ❀ हौं तिनकी तुम पतिव्रत नारी
 वे सब यज्ञ करत वन माहीं ❀ तुम त्रिन यज्ञ होइहै नाहीं
 यह तुम कछू भलो नहिं कीनो ❀ पतिको कह्यो मान नहिं लीनो
 पति आयसु तिय पालै जोई ❀ चार पदार्थ पावै सोई
 दो० पति देवता सुतीयकहँ, वेद वचन परमान ।

जाहु बेगि तुम पतिनपहँ, ताते यह जियजान ॥

सो० सुनि हरि वचन प्रमान, कर्मधर्म मानौ सुखद ।

द्विजतिय परम सुजान, बोलीं सब कर जोरिकै ॥

मुनहु श्यामघन अन्तरयामी ❀ तुमहीं सकल जगतके स्वामी
 यज्ञ पुरुष तुमहीं सुखधामा ❀ तुमहीं सबके पूरण कामा
 विविध यज्ञ करि तुमको ध्यावै ❀ तुमते चारि पदार्थ पावै
 सकल धर्म ते शरण तुम्हारी ❀ है सब जीवन को सुखकारी
 यह हम मुनी पतिन मुखवानी ❀ कहत वेद इतिहास बखानी
 ताते शरण तुम्हारी आई ❀ यह दूषण नहिं हमहिं गुसाई
 तुम मायावश सकल भुलाने ❀ ताते पतिन न तुम पहिंचाने
 तिन को दोष क्षमा प्रभु कीजै ❀ हमको शरण आपनी दीजै
 चार पदार्थहू ते भारो ❀ है प्रभु दरशन शरण तुम्हारे
 ताते नहीं निरादर कीजै ❀ अपने चरण शरण रख लीजै
 मुनि प्रभु द्विजपत्नी की बानी ❀ भये प्रसन्न भक्त सुखदानी
 धन्य धन्य प्रभु तिनको भाख्यो ❀ हितकरि तिनको भोजन राख्यो
 दो० दै अपनी दृढ़ भक्ति हरि, तिन्हें कह्यो घर जाहु ।

कैहैं तुम्हारे दरश तैं, शुद्ध तुम्हारे नाहु ॥

सो० हरि आयसु धरिमाथ, पायभक्ति वरदान वर ।

राखि हृदय ब्रजनाथ, चलीं हर्षद्विजतिय सदन॥

नँदनंदन की करत वड़ाई ❧ द्विजपतनी सब घर को आई
देखत तिन्हें विप्र समुदाई ❧ भये पुनीत विमल मति पाई
धन्य धन्य कहि तियन वखानी ❧ आप कहत हम अति अज्ञानी
जिनके हेतु यज्ञ हम कीनो ❧ तिन मांग्यो भोजन नाहि दीनो
हम विद्या अभिमान भुलाने ❧ अविगाति की गति कैसे जाने
परब्रह्म प्रभु जन सुखदाई ❧ भक्तन हित प्रगटे प्रभु आई
तिनको हम पहिचान्यो नाहीं ❧ बार बार यह कहि पछिताहीं
हैं ये तिय अतिशय बड़भागी ❧ कृष्ण चरण पङ्कज अनुरागी
ब्रह्मादिक खोजत हैं जिनको ❧ देख्यो जाय प्रगट इन तिनको
ऐसे बहुविधि तियन सराहीं ❧ आदर कर लीनी घर माहीं
प्रेम प्रीति करि जो हरि ध्यावै ❧ सो नर नारि अभयपद पावै
नर नारी कहु नाहिं विचारा ❧ प्रभु को केवल प्रेम पियारा
दो० भाव तियन को धारि उर, तहँ हरि कृपानिकेत ।

सखन सहित भोजन करत, रुचिसों प्रीति समेत ॥

सो० ब्रह्मलोक लौं शोर, ग्वालन के सँग खात हरि ।

छीन छीन के कौर, करत परस्पर हास रस ॥

अति हित भोजन तहँ हरि कीनो ❧ सखाबुंद कों अति सुख दीनो
वन में फिरत चरावत गैयां ❧ बैठे आय कदम की छैयां
भये सखा सिंगरे इक ठाहीं ❧ गैयां वगर रहीं वन माहीं
दुपहर घाम जान वन माहीं ❧ लागे चलन सघनवन झाहीं
बैठे ग्वाल बाल चहुं उरियां ❧ आगे धरी दूध की घरियां
मध्य श्यामसुन्दर नँदनन्दा ❧ उड़गण में जिमि पूरण चन्दा
मोर मुकुट कटि कछनी काँचें ❧ कोटि कामकी छविको बाँचें

कबहुं मुरली मधुर बजावैं ❀ कबहुं सखन मिलि सारंग गावैं
 कोऊ सखा नृत्य को करहीं ❀ कोऊ ततकारी उचरहीं
 करत केलि ऐसे बन माहीं ❀ देखि देखि मुरबुन्द सिहाहीं
 कोऊ ताल बजावत नीके ❀ उपजावत कोउ आनंद जीके
 कहत धन्य ये ब्रज की बाला ❀ बिहरत जिन सँग कृष्णकृपाला

दो० धन्य बिटप धनिभूमि यह, धनि वृन्दावनचन्द ।

धनि ब्रज कहि बवैं सुमन, रीभरीभ मुरबुन्द ॥

सो० मनमन देव सिहाहि, बनबिहार हरिको निरखि ।

श्रीवृन्दावन माहिं, हम न भये द्रुम लता तृण ॥

श्रीदामा तब कह्यो बुझाई ❀ खेलहि में सब रहे भुलाई
 गैयां कितहि चरति को जाने ❀ यह सुनि कै सब खेल भुलाने
 जित तित हेरन को उठ धाये ❀ गैयां जाय घेर लै आये
 जे सुरभी आई नहिं जानी ❀ चरत सघन बनमांभ सयानी
 तिनकों तरु चढ़ि कान्ह बुलाई ❀ मुरली ठेर सुनत उठ धाई
 ऐसी गैयां श्याम सधाई ❀ मुरली सुनि सब हरिपै आई
 जब जब गैयन श्याम बुलावैं ❀ हूं हूं करि सब हरि पै आवैं
 तिनपर कर फेरत मनमोहन ❀ पीताम्बर सों झारत झोहन
 करत प्यार तिनपर बनमाली ❀ हस्तकमल की सब प्रतिपाली
 हरिकों निरखि गाय सुख पावैं ❀ तिनके भाग्य कहत नहिं आवैं
 जब हरि गैयन करसों परसैं ❀ लखि लखि कामधेनु मन तरसैं
 कहत कहा जो कामद कीनो ❀ हमकों बिधि ब्रजजन्म न दीनो

दो० धनि धनि ब्रजकी धेनु ये, चारत त्रिभुवननाथ ।

भारत पोंछत दुहत नित, हितकर अपने हाथ ॥

सो० मनहीं मन पछताहि, कामधेनु ब्रजधेनु लखि ।

हम न भई ब्रज माहिं, हरिपद पंकज परसतीं ॥

ऐसी लीला करत अनेका ❧ वन में ललित एक तें एका
वृन्दावन सब दिवस वितायो ❧ संध्या समय निकट जब आयो
तब हरि कछो चलो अब गेहूँ ❧ गैयां सब आगे करि लेहूँ
पहुंची सांभ आय नियराई ❧ वनमें करहु अवेर न भाई
यह सुनि गाय सवन अगुवाई ❧ भली बात यह कही कन्हाई
वनतें निकल चले सब ग्वाला ❧ ब्रज आवत नटवर गोपाला
सुरभी वृन्द गोप बालक संग ❧ अति आनंद गावत नानारंग
अधर अनूप मुरालि मुर कोरी ❧ ऊँचे मुरन बजावत गोरी
सुन्दर श्रवण सुनत ब्रज धाई ❧ गृहकारज तज तज सब आई
कहत परस्पर मोहन आवत ❧ देखि देखि ब्रवि अति सुखपावत
पूरण कला उदित शशि जैसें ❧ कुमुदिनि सर फूलीं तिय तैसें
नयन चकोर रहे टकलाई ❧ दिवस विरह की ताप नशाई

दो० प्रेम मगन आनंद अति, कहत सकल ब्रजवाम ।

देखहुसखियशुमतिसुवन, शोभितअतिअभिराम ॥

सो० श्यामल तनपटपीत, जलजमाल बरहीभुकुट ।

लई मनौ इन जीत, घनदामिनिवग धनुषद्वि ॥

भृकुटि विकट दृग चंचलताई ❧ अति ब्रवि देति वरणि नहिंजाई
धनुष देखि विचि खंजन जानों ❧ उड़न करत डरि उड़त न मानों
प्रफुलित नयन शरद अंजुज से ❧ मनौ कुँडलि रविकरके परसे
गोपदरज पराग ब्रवि ब्रवाई ❧ तामधि आलि बैठ्यो जनु आई
एक कहत देखहु वह शोभा ❧ अति सुख देत लसत मनलोभा
कमलवदन मुरली रस लेई ❧ कुटिल अलक ऐसे ब्रवि देई
मानौ अलिगण साजी सैना ❧ सहि न सकत चाहत निजऐना

अधर सुधा लागि अति दुख पाई ❀ मुरलीसों मनो करत लगई
 शोभित नासा परम सुहाई ❀ तामें सखि उपमा यह पाई
 मनहुँ अनंग सहायक आयो ❀ तिल प्रसून शर ताहि चलायो
 सुनि यह युक्ति सकल हर्षाई ❀ निरखत हरि मुख अवि सुख पाई
 कृपादृष्टि हरि सबन निहारी ❀ आये ब्रजजन मन सुखकारी
 दो० कहत मुदितमन युवतिजन, धनिधनिसखिवेमोर ।

जिनके पांखन को मुकुट, कीनो नंदकिशोर ॥

सो० धनिधनिसखिवे बांस, जाकी मुरली अधर धरि ।

हरि पूरत निज सांस, को पुनीत ताके सदृश ॥

निजनिज सदन गये सब ग्वाला ❀ आये घर हलधर गोपाला
 देखि दुहुँ मातन सुख पायो ❀ हरषि दुहुँन कों कण्ठ लगायो
 काहे आज अबार लगाई ❀ यह कहि बार बार बलि जाई
 रोहिणि सों कह यशुमति मैया ❀ भूखे हूँ हैं दोऊ मैया
 मैं दोउन को देत न्हाई ❀ तुम भोजन को करहु चढ़ाई
 निकट लये मुरली कर लीन्ही ❀ हरि करतें लकुटी धरि दीन्ही
 नीलाम्बर पीताम्बर लीनो ❀ मुकुट उतार श्याम तब दीनो
 प्राण समान यशोमति जानी ❀ धख्यो सँभार सदन नँदरानी
 ओरति अँग भूषण महतारी ❀ मुकुटमाल बनमाल उतारी
 कंठि किंकिणि अँगदभुज छोरै ❀ निरखि गात आनंद न ओरै
 पटलै दोउन के अँग भारे ❀ उर लगाय लीने अति प्यारे
 तुम दोउ मेरे गाय चरैया ❀ और न कोऊ दहल करैया
 दो० लीने तुमहि बिसाहि मैं, तब अति रहे नन्हाय ।

सुनि हँसि हरि बलसों कहत, कहत भूठही माय ॥

सो० यह तो समुझि न जाय, सांच भूठकी बात कछु ।

यशुमति लेत बुलाय, में चोरी हँसि हँसि कहत ॥

सुमनासुत अंगन परसाई ❀ तपत तरणिको जल लें आई
परम प्रीति दोउसुत अन्हवाये ❀ सरस बसन तन पोछि सुहाये
पट्टस भोजन जाय जिमाये ❀ यशुमति के मुख जायँ न गाये
शीतल जेल कपूर रस रचयो ❀ लै भारी दुहुँ भैंयन अचयो
भोर भयो मुख धोय उठे जब ❀ पीरे पान दये जननी तब
वीरा खात मुदित दोउ भाई ❀ ब्रजवासिन जूठनि सब पाई
यशुमति के मुख कौन गनावै ❀ शारदहू कहि पार न पावै
धन्य नन्द धनि यशुमति माता ❀ महिमा नहिँ कहि सकै विधाता
ब्रह्मसनातन हैं प्रभु जोई ❀ जिनके पुत्र कहावत सोई
जो प्रभु सकल विश्वके स्वामी ❀ तीनलोक पति अन्तरयामी
विश्वम्भर निज नाम कहावै ❀ ताहि यशुमति भाय खवावै
रात सुवावै प्रात जगावै ❀ बालक ज्यों फुसलाय लहावै

दो० रहत मगन गुणश्यामके, निशिदिन आठौयास ।

महरि महर के प्राणधन, मोहन सुन्दरश्याम ॥

सो० हरि क्षण बिसरत नाहिँ, ब्रजके नर नारी जिनहिँ ।

मगन प्रेममनमार्हि, निशिदिन जात न जानहीं ॥

अथ गोवर्द्धन लीला ॥

कृष्ण प्रेम ब्रज लोग समाने ❀ देव पितर सब काल बुलाने
कार्तिक सुदि परिवा जब होई ❀ इंद्रहि पूजत ब्रज सब कोई
ताकी सुधि बुधि सवन बुलाई ❀ सबके मनमें ध्यान कन्हाई
सो तिथि अति समीप जब आई ❀ तब यशुमति के उर सुधि आई
कहत नंद सों नंद की रानी ❀ मुरपति पूजा तुमहिँ बुलानी

जाकी कृपा बसत ब्रजमाहीं ❀ एकहु बस्तु कमी कछु नाहीं
जाकी कृपा दूध दधि गाई ❀ सहस मथानी मथत सदाई
जाकी कृपा पुत्र हम पाये ❀ जासु कृपा सब बिघ्न नशाये
भई सकल ब्रज मांझ वड़ाई ❀ कुशल रहौ बलराम कन्हाई
सुरपति हैं कुलदेव हमारे ❀ गोप गाय ब्रज के रखवारे
तिनकी तुम सब सुरत भुलाई ❀ रहे दिवस पांचक अब आई
कहो सकल गोपन के राई ❀ इन्द्रयज्ञ की करो चढ़ाई

दो० भली दिवाई मोहिं सुधि, कहत महरि सों नन्द ।

भूलगये हम देव कों, काज मोह बश मन्द ॥

सो० हाथ जोरि नँदराय, बिनय करत सुरराय सों ।

तुमको गयीं भुलाय, क्षमा कीजियो मोहिं प्रभु ॥

तबहिं नन्द उपनन्द बुलाये ❀ श्रीवृषभानु सहित सब आये
सबकों देखि नन्द सुख पायो ❀ महरि महर कहि शीश नवायो
अति आदर सबहीं को कीन्हो ❀ सादर सब को बैठक दीन्हो
मनहीं मन सब सोध कराहीं ❀ कंस कछू मांग्यो तौ नाहीं
राज अंश उनको जो होई ❀ बिन मांगे हम दीन्हों सोई
बूझत नन्दहि सब सकुचाये ❀ कौन काज हम सबन बुलाये
तबहिं नन्द सबको समझायो ❀ मैं तुमको यहिकाज बुलायो
सुरपति पूजा के दिन आये ❀ सो तुम सबहिन मिलि विसराये
मोहूं राज काज लपटानो ❀ निशिदिन लौं महिमांझ भुलानो
इन्द्रयज्ञ की सुरत भुलानी ❀ अति समीप दिन पहुँचो आनी
तातें अब सब करो चढ़ाई ❀ इन्द्रयज्ञ कीजै सुखदाई
इंद्रहि को हम सदा मनावैं ❀ तिनहीं ते ब्रजजन सुख पावैं
दो० यह सुनि मन हर्षे सबै, देव काज जिय जान ।

हम सब भूले सुरपतिहि, मन लागे पड़तान ॥

सो० भली करी नंदराय, तुम हमको दीनी सुरत ।

सुरपति कों शिरनाय, क्षमा करावत पाप सब ॥

विदा होय सब गोप सिधाये ॥ घर घर वाजन लगे दधाये ॥

पूजाकी विधि करत सब मिलि ॥ जिहिजिहि भांति सदा आई चलि ॥

अमित भांति पकवान मिठाई ॥ होत घरनि घर वरणि न जाई ॥

नन्दमहर घर वजत वधाई ॥ गावत मंगल अति हर्षाई ॥

नेवज करत यशोदा आतुर ॥ आठोसिद्धि घरहिं अति चातुर ॥

मैदा के अनेक पकवाना ॥ वेसन के बहु करत विधाना ॥

घृत मिष्ठान सबै परिपूरण ॥ मिश्री करत पाक को चूरण ॥

विविध भांति पकवान मिठाई ॥ कहँलगि नाम कहों सब गाई ॥

और नारि ब्रजकी सँग लागी ॥ घृत पक करत सबै अनुगामी ॥

जहां तहां कहूँ चढ़ी कढ़ाई ॥ यशुमति सवन सराहत जाई ॥

जो सामा मांगति हैं जोई ॥ रोहिणि ताहि देति हैं सोई ॥

महरि करति रचि और निहारे ॥ धरत जोरि विधि न्यारे न्यारे ॥

दो० सैंति सैंति अतिनियमसों, धरति अछूते जात ।

श्याम कहूँ परसै नहीं, यह मनमाहिं डरात ॥

सो० शंक करत मनमाहिं, सुरपति पूजा जानिजिय ।

यशुमति जानति नाहिं, सब देवनको देव हरि ॥

खेलत ते सन्तन सुखदाई ॥ भीतर आये कुँवर कन्हदाई ॥

जननी कहति इहां जिन आवै ॥ लरिकन को यह देव डरावै ॥

रहे ठिठक आंगनहिं डराई ॥ मनहींमन हँसि कहत कन्हदाई ॥

मैया री मोहिं देव दिसैहै ॥ इतनो भोजन वह सब खेहै ॥

यह सुनि खीझ कहत है मैया ॥ ऐसी बात न कहो कन्हैया ॥

जोरि जोरि कर देव मनावै ❀ बालक को अपराध क्षमावै
 बाहर चले श्याम अनखाई ❀ युवति कहत हरि गये रिसाई
 जान देहु हरि अबहिं अयाने ❀ देवकाज बालक कह जाने
 छू हैं कहूं श्याम यह भोजन ❀ उनकी पूंजी जानै को जन
 और नहीं हम काहू जानै ❀ कै सुरपति कै गोधन मानै
 यह कहि कहि इन्द्रहि शिर नावै ❀ राम श्यामकी कुशल मनावै
 और देव नहिं तुमहिं सुरीशा ❀ कहं नहिं कृपा करी सुरईशा

दो० ऐसे सुरपति यज्ञहित, यशुमति करति बिधान ।

द्वारे बैठे नंद जहं, गये तहां को कान्ह ॥

सो० जुरे नंद ढिग आय, ब्रज के जे उपनंद सब ।

बैठे अति सुख पाय, करत बात बिधि यज्ञकी ॥

दीप मालिका रचिरचि साजत ❀ पुहुपमाल मण्डली चिराजत
 दोल निशान बाजने बाजै ❀ मुदित ग्वालगण जित तित राजै
 गैयन चित्र बिचित्र बनावै ❀ अंगन आभूषण पहिरावै
 सात वर्ष के कुँवर कन्हाई ❀ खेलत मन आनंद बढ़ाई
 द्वारन युवती चित्र बनावै ❀ मंगलगान मुदित मन गावै
 सथिया रचि पुनि थापहिं हाथा ❀ पूजा देखि हँसे ब्रजनाथा
 ब्रज आगे सुरपति की पूजा ❀ मोते और देव को दूजा
 माँ बासी माँको नहिं जानै ❀ माँ अञ्छत सुरपति को मानै
 ब्रज यह भेटौं यज्ञ बिहाने ❀ लीनो भाग बहुत दिन याने
 अब बासिन पै आप पुजारुं ❀ गिरि गोवर्द्धन नाम धरारुं
 यह बिचार मन में ठहराई ❀ गये नंद ढिग कुँवर कन्हाई
 हर्षि नंद कनियां पौदाये ❀ बदन चूमि उर सों लपटाये

दो० तब हरि बोले नंदसों, मधुर मन्द मुसकाय ।

करत पुजाई कौनकी, बाबा मोहिं वताय ॥
सो० कौन देव सो आहि, काहे को पूजत तिन्हें ।

मैं नहिं जानत ताहि, कहौ मोहिं समुभायसव ॥

नंद कह्यो तव सुनहु कन्हारै ❀ इन्द्र सकल देवन को राई
तिन को पूजत गोप सदाई ❀ कुल में यहै रीति चलि आई
ताते तिन्हें पूजियत ताता ❀ जाते कुशल रहौ दोउ आता
या पूजा ते सुखपाति हरषैं ❀ ह्वै प्रसन्न तव जल वे वरषैं
तृण अनाज उपजत है जाते ❀ गाय गोप सुख पावत ताते
याते सदा यज्ञ यह कीजै ❀ जो गोधन धन कंवहुँ न चीजे
तव हरि कह्यो सुनहु नंद ताता ❀ ऐसे तुम जो कही यह वाता
जहां इन्द्र पूजत नहिं प्राणी ❀ तहां कहा वर्षत नहिं पानी
जब हरि ऐसे बचन सुनायो ❀ तब नंदहि उत्तर नहिं आयो
सुनि हरि बचन रहे सकुचाई ❀ मनहिं कहत चतुर्ग कन्हारै
है बालक अवहीं अति नान्हा ❀ देवकार्य कह जानै कान्हा
तव चुचकार कह्यो नंदराई ❀ सदन जाउ तुम कुँवरकन्हारै

दो० ऐसे में जनि जाहु कहूँ, भीड़ बड़ी है तात ।

को जानै किहि भाव को, कितथीं आवत जात ॥

सो० सोय रहो गोपाल, मेरे पलंग जाय तुम ।

मैं हूँ आवत लाल, पाछे ते तुम्हरे निकट ॥

तव हरि मन यक बुद्धि उपाई ❀ बैठे और महर दिग जाई
तिनको हरि यों कहि समुभायो ❀ आज मोहिं सपनो यक आयो
पुरुष पुनीत एक अति चारु ❀ चार भुजा तन सुभग श्रृंगार
तिन मो सों यों कह्यो बुझाई ❀ इन्द्रहि पूजे कहा बड़ाई
मैं तुम को यक देव बताऊँ ❀ गिरि गोवर्द्धन प्रकट दिखाऊँ

यह पूजा तुम इनहिं चढ़ावो ❀ जाते मुहँ मांगे फल पावो
 तुम आगे भोजन वह खैहै ❀ प्रकट आपनो रूप दिखैहै
 चार पदार्थ के ये दाता ❀ अनधन गोधन केतिक वाता
 ऐसे देव छाँड़ि घर माहीं ❀ तुम पूजत सुरपतिहिं वृथाहीं
 कोटि इन्द्र क्षण में वे मारैं ❀ क्षणहीं में पुनि कोटि सँवारैं
 गोवर्द्धन सम देव न दूजा ❀ करहु जाय उनहीं की पूजा
 ताते माँ मन में यह आई ❀ पूजहु गोवर्द्धन सब जाई

दो० चकित गोप सब बचन सुनि, कहत अकथ यह वात।

सुने न अबलौं देव कहूँ, प्रकट होय के खात ॥

सो० सुनी बात यह नन्द, शोचत सब उपनन्द मिलि।

कहा कहत नन्द नन्द, समुभरत नहिं सपन यह ॥

सुनि यह बात सबन ब्रज पाई ❀ देख्यो ऐसो सपन कन्हाइ
 सुरपति पूजा देत मिटाई ❀ गोवर्द्धन की करत वड़ाई
 कोऊ कहत कान्ह कहै सांची ❀ कोऊ कहत वात यह कांची
 बालक जानै कहा पुजाई ❀ कोऊ कहत कहै का भाई
 कोऊ इन्द्रहि कहत सकाने ❀ हम तो कह्यु यह बात न जाने
 हलधर कहत सुनो ब्रजवासी ❀ को महिमा जानत अविनासी
 इनको बालक करि मति जानों ❀ जो हरि कह्यो सत्यकरि मानों
 नन्द निकट जो गोप सयाने ❀ हरिको बल प्रताप सबजाने
 कहत नन्द सों ते सुख पाई ❀ कीजै सोइ जो कहत कन्हाइ
 कहत नन्द तब सबन सुनाई ❀ मेरेहु मनमें यह आई
 हरिको सपन भूठ नहिं होई ❀ है प्रतीति मेरे मन सोई
 काली को सुपनो हरि देखो ❀ भयो प्रातही तामु विशेषो
 दो० ताते सोई कीजिये, कान्ह कहैं जोइ बात।

सब ब्रजवासी पूजिये, गोवर्द्धन चलि प्रात ॥

सो० यहै भंग ठहराय, ब्रूभूत हरिसों हरपि सब ।

कहौ कान्हसमुभाय, कौनभांति गिरिपूजिये ॥

हर्षि कान्ह तब सवन बुलायो ॥ इंदयज्ञ हित तुम जो बनायो

बहु व्यञ्जन पकवान मिठाई ॥ सो सब शकटन लेहु भराई

नाचत गावत सहित हुलासा ॥ चलहु सकल गोवर्द्धन पासा

तहां जाइ गिरिवरहिं मनाई ॥ पूजहु बहु विधि मंगल गाई

मांगि मांगि तुमसों गिरि लैहें ॥ मुँह मांगे तुमको फल देंहें

मेरो कह्यो सत्य तुम जानों ॥ मेरो सपन झूठ मति मानों

यह परचौ तुम आंखिन देखो ॥ तबहिं मोहिं सांचो करि लेखो

जो चाहो ब्रज की ठकुराई ॥ तौ पूजौ गोवर्द्धन राई

कान्हर जो कछु आज्ञा दीन्ही ॥ सवहिन बात मान सो लीन्ही

कहहिं परस्पर सब सुख पाई ॥ चलहु गोवर्द्धन कहत कन्हाई

ब्रज घर घर सब होत कोलाहल ॥ फिरत गोप आनंद उमाहल

मिलत परस्पर अंकम लै लै ॥ शकटन साजत भोजन लै लै

दो० बहु व्यञ्जन पकवान बहु, बहुत मिठाई पाक ।

रस गोरस मेवा विविध, अमित भांति के शाक ॥

सो० षटरस के सब भोग, कछु शकटन कछु कांवरन ।

गृहगृहते ब्रजलोग, लैलै गिरि पूजन चले ॥

नन्द महर के घरकी सामा ॥ कहँलगि वर्ष वताऊं नामा

सहस शकट पकवान मिठाई ॥ रस गोरस बहु भार भराई

नन्द सदन ते लै बहु ग्वाला ॥ चले अग्र उर हर्ष विशाला

पट भूषण सब गोपन साजे ॥ भांति अनेक वाजने वाजे

नन्द महर अरु महरि जितेका ॥ और गोप बहुभीर अनेका

बलदाऊ अरु कुँवर कन्हैया ❀ सुभग श्रृंगार किये दोउ भैया
 सखाबुन्द सुंदर सब लीन्हे ❀ कोटिकाम छवि लजित कीन्हे
 शोभित नंद महर के साथी ❀ चले सकल पूजन गिरिनाथा
 यशुमति अरु रोहिणि महतारी ❀ नंदगांव की अरु जे नारी
 भूषण बसन सँवारि सँवारी ❀ चलीं हर्षि उर आनंद भारी
 पुर बृषभान आदि जे ग्रामा ❀ चलीं सकल गोपनकी वाया
 श्री राधा बृषभानुदुलारी ❀ ललितादिक सब गोपकुमारी

दो० नौ सत साजि श्रृंगार अति, पटभूषण बहुरंग ।

यूथ यूथ जुरिकै चलीं, कीरति के संग ॥

सो० सबके मन यह काम, देखनकों हरिरूप दृग ।

परम मुदित सब वाम, सबके मन मोहन वसे ॥

चन्द्रबदन सी सब मृगनयनी ❀ सकल सुघर सब कोकिलवयनी
 नव यौवन में सबहि प्रवीना ❀ सबको मन मोहन आधीना
 चलीं सकल गोवर्द्धन घाहीं ❀ भई भीर अति मारग माहीं
 शकट बुन्द अरु गोप समूहा ❀ जात चले युवतिन के जूहा
 कौतुक करत गोपगण राजैं ❀ ताल मृदंग अनेकन वाजैं
 कोउ गावत कोउ नाचत जाहीं ❀ कोउ ठाढ़े मग पावत नाहीं
 कोऊ शकटन साज सँवारे ❀ कोऊ एकन एक पुकारे
 गावत मंगल गोपकुमारी ❀ निरखि श्याम छवि होत सुखारी
 होत कुलाहल अति मगमाहीं ❀ कोऊ वात सुनत कहु नाहीं
 कौतुक श्याम देखि हर्षाहीं ❀ अति उत्साह सबन मनमाहीं
 सखन संग खेलत हरि जाहीं ❀ सबकी सुरत श्यामके माहीं
 ब्रजवासिन की भीर सुहाई ❀ उपमा मोपै बरणि न जाई
 छं० उपमा न मोपै जात बरणी भीर अति सुन्दर भई ।

वद्यों आनंदसिंधु को सुख विविध तन धर सोहई ॥

छवि उजागर नगर केशों मुकृत पुंज सुहावने ।

तिन मध्यसबके श्यामनायकसकल लायक पावने ॥

दो० नंदसहर उपनंद सब, श्याम राम दोउ भाय ।

पहुँचे गोवर्द्धन निकट, निरखि शिखर मुखपाय ॥

सो० उत्तरे सहित समाज, चहुँ ओर ब्रज लोग सब ।

मधिशोभित गिरिराज, कोटिकामशोभासरस ॥

चहुँ दिशि फेर कोश चौरासी ॥ उत्तरे घेर सकल ब्रजवासी

ब्रजवासिन की भीर अपारा ॥ लगे चहुँ दिशि चारु वजारा

वस्तु अनेक वरणि नहिं जाई ॥ दिन मोलहि सब सोंज विकारि

ठौर ठौर ब्रज युवती गावैं ॥ जहँ तहँ नटवा नाच दिखवैं

कहूँ विदूषक हांस हँसावैं ॥ हर्ष मांझ अति हर्ष बढ़ावैं

नर नारी सब परम हुलासा ॥ अति आनंद उमग चहुँ पासा

बूमत पूजन विधि नँदराई ॥ अधिकारी तहँ कुँवरकन्हाई

कह्यो कृष्ण तब विप्र बुलाई ॥ प्रथम यज्ञ आनंद कराई

पूछ वेद विधि तिनसों लीजै ॥ वाही विधि गिरिपूजा कीजै

तबहिं विप्र नँदराय बुलाये ॥ आदर सहित गोप ले आये

हरि को कह्यो मानि तिन लीनों ॥ प्रथम अरम्भ यज्ञ को कीनों

परम रुचिर वेदिका बनाई ॥ सामवेद धुनि द्विजवर गाई

दो० देखनकी धाये सबै, ब्रज के नर अरु वाम ।

भयो देवता गिरि बड़ो, ताहि पुजावैं श्याम ॥

सो० बड़े सहर उपनंद, नंद आदि ठाढ़े सबै ।

कहत जो कछु नँदनंद, करत सकल सोई तहां ॥

पंचाश्रुत बहु कलश भरायो ॥ डारि शिखर तँ गिरि अन्हवायो

बहुरो लै गंगाजल ढाख्यो ❀ चन्दन बन्दन तिलक सँवाख्यो
 भूषण बसन विचित्र चढ़ाये ❀ सुमन सुगंध माल पहिराये
 धूप दीप करि आरति सार्जी ❀ घण्टा शङ्ख झालरैं वार्जी
 करत बेद धुनि बिप्र मुहाई ❀ चकृत नभ लखि सुर समुदाई
 सुरपति पूजा कृष्ण मिठाई ❀ थाप्यो गिरि ब्रज तिलक चढ़ाई
 देखि इन्द्र मन गर्व बढ़ायो ❀ ब्रजवासिन के मन कह आयो
 पूजत गिरिहि मोहिं विसराई ❀ गिरि समेत ब्रज देउँ बहाई
 पावहिं मम अपमान सजाई ❀ देखौं तव को करत सहाई
 अब देखौं मैं इनकी करनी ❀ उपजी है इनकी बुधि मरनी
 गिरि को पूजत प्रेम बढ़ाई ❀ सपने को सुख लेत मनाई
 कितक बार पुनि इनको मारत ❀ ऐसे सुरपति मनहिं विचारत

दो० कह्यो कृष्ण तब नंद सों, भोजन लेहु भँगाय ।

गिरि आगे सब राखि कै, अरु यह बिनय सुनाय ॥

सो० यह सुनिकै नंदराय, ल्यावहु ग्वालनसों कह्यो ।

लीन्ही तहां भँगाय, सामग्री सब भोगकी ॥

नाना भांति जात पकवाना ❀ विविध मिठाई अमित समाना
 षट्सस व्यंजन बहु तरकारी ❀ दही दूध सिखरन रुचिकारी
 मधु मेवा फल फूल अनेका ❀ सुंदर स्वाद एकते एका
 खीर आदि बहुभांति रसोई ❀ कहँलुगि बरणि सकै सब कोई
 मूंग भात अरु बरा पकोरी ❀ बहुतक दधिबोरी अरु कोरी
 कियो अन्न को कूट सुहावन ❀ जैसो गिरि गोवर्द्धन पावन
 परसि परसि गिरि आगे राखत ❀ जैसी विधिसों मोहन भाखत
 गिरिपूजत जिहि भांति कन्हाई ❀ तैसे सब ब्रज लोग लुगाई
 गिरि गोवर्द्धन के चहुँ पासा ❀ कीनी बहुविधि सहित हुलासा

ठौरहिं ठौर वेदिका राजे ॥ अन्नकूट चहुँ ओर विराजे
तिन मधि गोवर्द्धन गिरि पावन ॥ परम अनूप स्वरूप सुहावन
चंदन केशर रोरी हाथा ॥ शोभित अति चहुँ दिशि गिरिनाथा
दो० गिरि गोवर्द्धनरायकी, छवि नहिं परत लखाय ।

ब्रजवासी जनके हिये, ध्यान परम सुखदाय ॥

सो० महिमा अभित अपार, श्रीगोवर्द्धन अचलकी ।

जेहि पूजत करतार, शारदविधि नहिं कहिसकें ॥

प्रातहिं ते परसत भोजन सब ॥ गयोदरकि युगयाम तरणि तव
कह्यो श्याम सों तव नँदराई ॥ जेवहिं गिरिसों कहौ कन्हारै
तव हरि कह्यो सवन समुझाई ॥ भोग समर्पहु घंट बजाई
मनमें कछू खटक जिन राखो ॥ दीन वचन मुखतें कहि भाखो
नयन मूंद कै ध्यान लगावो ॥ प्रेम सहित करजोरि मनावो
हरि गोपन पूजा सिखरावैं ॥ अपनी पूजा आप करावैं
जिनपर कृपा करत नँदनंदन ॥ तिनसों आप करावत वंदन
सवन मानि हरि कह्यो जो लीनो ॥ बहु विधिगिरि आराधन कीनो
तव प्रकटे गोवर्द्धन नाथा ॥ यज्ञ पुरुष प्रभु श्रुतिके माथा
सहसभुजा तन श्याम तमाला ॥ मोर मुकुट वैजंती माला
नख शिख भूषण परम सुहाये ॥ अंग अंग छवि भलकन द्याये
भये देखि ब्रज लोग सनाथा ॥ दियो दरश गोवर्द्धन नाथा
दो० जै जै जै कहि देवमुनि, वर्षत सुभन अकास ।

ब्रजवासी जै जै करत, भये अनंद हुलास ॥

सो० सहसों भुजापसारि, लागे भोजन करन गिरि ।

देखत ब्रज नर नारि, अति अद्भुत हरिके चरित ॥

कहत मुदित सब लोग लुगाई ॥ कान्हहिं की शोभा गिरिगई

जैसे कान्हू श्याम तन सोहै ❀ तैसेई गिरिवर मन मोहै
 तैसेई कुण्डल तैसेई माला ❀ तैसेई चंचल नयन विशाला
 तैसेई मुकुट पीत पट तैसे ❀ नखशिख रूप कान्हू को जैसो
 द्वै भुज हरि के परम मुहाई ❀ गिरि की भुजा सहस्र अधिकाई
 देख दरश गिरिवर के रूरे ❀ नंद यशोदा आनंद पूरे
 कहत कि बड़े देव हम पाये ❀ देखहु परगट दरश दिखाये
 ऐसो देव सुन्यो नहिं देख्यो ❀ जीवन जन्म सुफल करि लेख्यो
 ललिता राधहि कहत बुझाई ❀ मैं यह बात समुझ है पाई
 यह लीला सब श्याम बनावैं ❀ आपुहिं जेवत आप जिमावैं
 मैं जानी हरि की चतुराई ❀ इन्द्रहिं मेटि आप बलि खाई
 हैं इन के गुण अगम अगाध ❀ मेरी बात मान तू राधा

दो० इतहि नंदको करगहैं, गोपन सों बतरात ।

उत आपहिं हरि सहस्रभुज, रुचिसों भोजन खात ॥

सो० श्रीराधा सुखपाय, मुदित बिलोकत श्याम छवि ।

भक्तन के सुखदाय, नितनव करत बिनोद ब्रज ॥

इत गोपन सँग हर्षित राहीं ❀ उत सबहिन को भोजन खाहीं
 ग्वालिन एक बिलोकन हारी ❀ रहि बृषभान सदन रखवारी
 तासु नाम बदरीला गायो ❀ तिन घरही ते भोग लगायो
 प्रेमसहित बहु विनय सुनाई ❀ सबके अन्तरयामि कन्हाई
 ऐसे प्रीति लुधित बनवारी ❀ लई तासु बलि भुजा पसारी
 भोजन करत परमरुचि मानी ❀ गुणसागर लीला यह ठानी
 कहत नंद सों कुँवर कन्हाई ❀ मैं जो बात कही सो आई
 अब तुम गिरि गोवर्द्धन जाने ❀ भेरे बचन सत्य करि माने
 तुम देखत भोजन सब खायो ❀ परगट तुमको दरश देखायो

तुम्हरी भक्ति भाव पहिचानी ॥ गिरि तुम्हरी पूजा सब मानी
अब तुम मांग्यो चाहौ जोई ॥ मांगि लेहु इनपे सब सोई
नंद कहत धनि धन्य कन्हाई ॥ यह पूजा तुम हमहि बताई

दो० प्रीति रीति के भाव सों, भोजन सबके खाय ।

हैं प्रसन्न अति नन्दसों, तब बोले गिरिराय ॥

सो० लेहु नंद वरदान, अब जो तुम हम सों चहौ ।

मैं लीनो सुख मान, बहुत करी तुम भक्तिमम ॥

भली करी तुम मेरी पूजा ॥ सेवक तुम ते और न दूजा
तेरे सुत बल मोहन भाई ॥ इनको कुशल अनंद सदाई
मैंहीं इनको सपन दिखायों ॥ मैंहीं सुरपति यज्ञ मिदायों
अब जो सुरपति तुमहिं रिसाई ॥ जल वैंपे ब्रज ऊपर आई
तौ तुम अपने जिय मति डरियो ॥ कान्ह कहै सोई तुम करियो
अब तुम मम प्रसाद लै खाहू ॥ अपने अपने घर सब जाहू
ब्रज में बसो निशंक सदाहीं ॥ और कबू मांगौ हम पाहीं
यह सुनि चकित सकल ब्रजनारी ॥ भोजन कियो प्रथम गिरिधारी
अब बोलत मुख वचन प्रमाना ॥ ऐसे परब्रत देव न आना
नन्द कह्यो कह मांगों स्वामी ॥ देखि दरश भयो पूरण कामी
सकल सिद्धि सुख तुम्हरो दीनो ॥ कृपासिन्धु मैं तुम्हरो कीनो
मोह विवश प्रभु तुमहिं विसारे ॥ भूल फिस्सों देवन के द्वारे

छं० फिस्सों भूत्यो देव द्वारन नाथ तुमहिं विसारके ।

पूजा तुम्हारी कहा जानें हम अहीर गँवारके ॥

आपही करि कृपा दीन्हयो स्वप्न श्यामहि आयकें ।

दई बालक को बड़ाई नाथ यह अपनायकें ॥

अब हमें डर कौनको प्रभु शरण तुम्हरी पायकें ।

इन्द्र कह करि है हमारो नाथ ब्रजपर आयकै ॥
 तुमहिं करता हौ सबन के तुमहिं सबके ईश हौ ।
 कोटि कोटि ब्रह्मांड तुम्हरे रोमप्रति जगदीश हौ ॥
 श्याम हलधर दास तेरे कुशल ये दोऊ रहैं ।
 करि कृपा यह देहु प्रभु हम और कछु नाहीं चहैं ॥
 सुतनलै दोउ डारि गिरिपद आप नँद चरणन परे ।
 बिहाँसि गिरिलखि प्रीति पंकज पाणि दुहुँ माथे धरे ॥

दो० नंद गोप उपनंद सब, श्रीवृषभान समेत ।
 बारबार गिरिराज के, चरण परत अतिहेत ॥

सो० करिसबको सनमान, दै प्रसाद निज पाणिसों ।
 सबन कह्यो घरजान, ह्वै प्रसन्न गिरिराज तब ॥

चलहु घरन तब कह्यो कन्हारै ❀ भये प्रसन्न देव गिरिराई
 भलीभाँति पूजा तुम कीनी ❀ गिरिवर राज मान सब लीनी
 दोउ कर जोरि भये सब ठाढ़े ❀ भक्तिभाव सबके मन बाढ़े
 हरि करि परिकरमा सब गिरिकों ❀ परसत चरण चलत ब्रज घरकों
 देखि चकित गण गन्धर्व सुरमुनि ❀ कहत धन्य ब्रजवासी गुण गुनि
 धन्य नन्द को सुकृत पुरातन ❀ धन्य धन्य पर्वत गोवर्द्धन
 करत प्रशंसा सुर मुनि पुनि पुनि ❀ वरपिसुमनकरिकरि जयजयधुनि
 निज निज लोकन देव सिधाये ❀ ब्रजवासी सब ब्रज को धाये
 मुदित सकल ब्रजलोग लुगारै ❀ गोवर्द्धन की करत वड़ाई
 कहत धन्य यशुमति को जायो ❀ बड़ो देवता कान्ह पुजायो
 अब इन ते ब्रज में सुख पैहैं ❀ गोप गाय सब सुख सों रैहैं
 वर्ष वर्ष प्रति इन्द्र पुजायो ❀ कबहुँ प्रगट दरश नहिं पायो
 दो० प्रगट देत हैं दरश गिरि, सबके आगे खात ।

परम हर्ष नर नारि सव, सवके मुख यह बात ॥

सो० खेलत नितनव ख्याल, भक्तपाल नंदलालव्रज ।

दुष्टनके उरशाल, सुर नर मुनि मोहत निरखि ॥

इन्द्र देखि गोवर्द्धन पूजा ॥ कियो क्रोध मोसम को दृजा

व्रजवासिन मोको विसरायो ॥ मेरो बलि लै गिरिहि चढ़ायो

नेक नहीं शङ्का उर आनी ॥ क्यूँ कानि मेरी नहीं मानी

तैंतिस कोटि सुरन को नायक ॥ मेववर्त्त सव मेरे पायक

कियो अहीरन मम अपमाना ॥ का धौं इन अपने मन जाना

जान बूझ इन मोहिं भलायो ॥ गिरिहि थाप शिर तिलक चढ़ायो

काहू उन्हें दियो वहँकाई ॥ मरणकाल ऐसी मति आई

तुरत इन्हें अब देहुँ सजाई ॥ देखौं धौं को करत सहाई

पर्वत पहिले खोदि बहाऊं ॥ व्रजजन मारि पताल पठाऊं

फूल फूल भोजन जिन कीन्हों ॥ नेक न राखौं ताको चीन्हों

सकल गोप यह नैनन देखें ॥ बड़े देवता को फल लेखें

ता पाछे व्रज देऊँ बहाई ॥ भुव पर खोज रहे नहीं गई

दो० ऐसे सुरपति क्रोध करि, मनमें गर्व बढ़ाय ।

प्रलयकाल के भेघ सव, लीने तुरत बुलाय ॥

सो० तिनहि कह्यो सुरराय, व्रज पर वर्षों जाय तुम ।

पर्वत प्रथम मिटाय, पुनि वोरहु व्रजलोक सव ॥

मोसों अहिरन करी ढिठाई ॥ मेरी बलि पर्वतहि खवाई

ता कारण मैं तुमहिं बुलाये ॥ सेन समेत जाहु सव धाये

गिरि समेत सव देहु बहाई ॥ भूतल खोज रहे नहीं गई

सुरपति वचन सुनत धन तमके ॥ कापर क्रोध करत प्रभु मनके

केतक गिरि व्रज हमरे आगे ॥ तुम प्रभु क्रोध करत केहि लागे

क्षणहीं में ब्रज खोद बहावैं ❀ डूंगर को घर नाम भिटावैं
 होत प्रलय प्रभु हमरे पानी ❀ रहत अक्षयवट तनक निशानी
 आप क्षमा कीजै सुराई ❀ हम करि हैं उनकी पहुनाई
 यह सुनि सुनासीर मुख पायो ❀ हर्षि पान दै तिनहि चढ़ायो
 चले मेघ सब शीश नवाई ❀ आये ब्रज के ऊपर धाई
 क्षणहीं में रवि गगन छिपाने ❀ देखतही देखत अधिकाने
 कीनों शब्द गरज घन भारी ❀ अतिही घटा भयावन कारी

छं० अतिही भयानक घटा कारी कज्जलहु पटतर नहीं ।
 घेर लीन्हो ब्रज चहुं दिशि पवन प्रलय भ्रकोरहीं ॥
 गरजत गगन घनघोर तड़पत तड़ित वारहिं वारहीं ।
 होत शब्द अघात ब्रजनर नारि चकित निहारहीं ॥
 गये बन जे गाय लै ते धाय फिर ब्रज आवहीं ।
 अन्ध धुन्ध अपार खोजत धाम पंथ न पावहीं ॥
 सैतत जहां तहँ वस्तु श्व नर नारि मन शोचत महा ।
 बैर सुरपति सों कियो अब होन धों चाहत कहा ॥

दो० उमड़ि घुमड़ि घहराय घन, परन लगे जल जोर ।
 टेरत सुतको मात पितु, ब्रज गलबल चहुँ ओर ॥

सो० ब्रजजन सकल बिहाल, बिललाने जित तित फिरत ।
 श्याम करत यह ख्याल, देखि देखि मनमें हँसत ॥

अति व्याकुल जहँ तहँ नर नारी ❀ कहत देत पर्वत को गारी
 आये पूजि गोबर्द्धन जाई ❀ सुरपति निज कुलदेव मिटाई
 दीनो गिरिवर यह फल भारी ❀ लेहु सवै अब गोद पसारी
 चढ़यो प्रचारि कोप सुराई ❀ देत पलक में ब्रजहि बहाई
 जो पै बड़े देव गिरिराजू ❀ तौ किन आय बचावत आजू

नन्दमुवन यह पूजा ठानी ❀ ताते इन्द्र चढ़्यो रिस मानी
 कहति यशोमति सों ब्रजवाला ❀ कहा काम यह कियो गोपाला
 सुरपति हैं कुलदेव हमारे ❀ ब्रज ते मेदि दिये ते न्यारे
 चढ़्यो आय ब्रज ऊपर सोई ❀ अब सहाय काहे न गिरि होई
 घन गरजत तरजत अति भारी ❀ देखि देखि डरपत नरनारी
 सकल विकल भयमन पछिताहीं ❀ लरका दुखद गोद के माहीं
 भये शोच वश सब ब्रजलोगा ❀ कहत वन्यो अब मरण संयोगा
 दो० देखि देखि ब्रजकी दशा, नन्दमहर पछितात ।
 कियो निरादर इन्द्र को, मनमें बहुत डरात ॥
 सो० श्यामरामदोउ भाय, लिये निकट शोचत महारि ।
 जुरे गोप तहँ आय, मनहीं मन मुसुकात हरि ॥

कहत कृष्ण सों सब ब्रजवासी ❀ मुनहु श्याम सुन्दर मुखरासी
 तुम तौ सुरपति यज्ञ मित्रयो ❀ ब्रजवासिन पै गिरिहिं पुजायो
 तुम्हरे कहे अहो ब्रजमण्डन ❀ सुरपति मान कियो हम खण्डन
 ताही ते सुरराज रिसाई ❀ दिये प्रलय के मेघ पठाई
 वर्षत ते मधवा के पायक ❀ विषमवूँद लागत जनु शायक
 भीजत गाय गोप गोमुत सब ❀ धरिकीहिं बूड़त हे ब्रज अब
 राखि लेहु अब ब्रजके नायक ❀ तुमहीं यह दुख भेटन लायक
 दावानल ते राखे जैसें ❀ अब जलते राखो हरि तेंसें
 वकी विनाशन शकट संहारन ❀ तृणवर्त वत्सामुर मारन
 अधमर्दन वक्रवदन विदारन ❀ तुमहीं ब्रजजन के दुखग्रस्त
 दीजै अभय वेगि नँदलाला ❀ वर्षत मेघ महा विकगला
 राखि लेहु बूड़त ब्रज खेरो ❀ अब चितवत हरि सब मुख नेरो
 दो० जब जब गाढ़ परी हमें, तब तुम कियो उबार ।

इहि अवसर अब राखिये, मोहन नन्दकुमार ॥

सो० ब्रजजनके सुखदान, देखि बिकल ब्रजलोग सब।

हँसि बोले तब कान्ह, धरहु धीर उर डरहु मति ॥

चलहु सकल मिलि गिरिके पार्हीं * उनको ध्यान धरहु मनमार्हीं
करि लेहैं ब्रजराज सहाई * रहिहैं सुरपति मन पछिताई
यह कहि हरि गोवर्द्धन आयो * अभयवाँह दै सबन बुलायो
गाय बत्स ब्रज लोग लुगाई * गये सकल हरिके संग धाई
सबही के देखत गहि धरतैं * उचक लियो गिरिवर हरि कस्तैं
झिगली बोर बास कर राख्यो * तब हरि ब्रजवासिनते भाख्यो
करो सहाय देव गिरियाया * आवहु तुम सब इनकी छाया
गाय गोप गोसुत नर नारी * भये सकल क्षणमाहिं सुखारी
चकित देखि सब लोग लुगाई * कहत धन्य तुम कुँवरकन्हाई
प्रेम उमँग उर आनँद भरिके * परसत चरण धाय सब हरिके
कान्ह कहत देखहु गिरिसाई * कीन्हीं केहि विधि तुरत सहाई
भक्तन हित हरि गिरिहिं उठायो * तब तैं गिरिधर नाम कहायो

छ० परेउ तवते नाम गिरिधर वामकर गिरिवर धख्यो।

देखि व्याकुल सकल ब्रजको शोच इक क्षण में हख्यो ॥

करत जय जय गोप गोपी सकल मन आनँद भरे।

श्याम सब के मध्य ठाढ़े करजनख गिरिवर धरे ॥

परि अखण्डित धार मूशल सलिल की वर्षा करे।

अन्ध धुन्ध अकाश चहुँदिशि सबन भक्त भोरत खरे ॥

वज्रनीर गँभीर पुनि पुनि गरज परबत पर गिरे।

करत अति उतपात ब्रज पर मेघ परलै के फिरे ॥

दो० बार बार चपला चमकि, भक्तभोरत चहुँ ओर।

अप्रर आकाश ते, जल डारत घन घोर ॥

सो० हरिके मुखदाय, गिरि कीन्हों विस्तार अति।

सब लियो वचाय, बूंद न आवत भूमिपर ॥

कहत गोप मनहिं डराई ॥ गिरिवर नीके धरहु कन्हाई

महाप्रलय पर यह भारी ॥ अति कोमल भुज तनक तुम्हारी

नखतें गिरिवर गीर को धारै ॥ ऐसे बल विन कौन सँभारै

देखि नन्द व्यल मनमाहीं ॥ महाभार गिरि कोमल बाहीं

दावत भुजा रोमति मेया ॥ बार बार मुख लेत बलैया

देखि भार मन अति दुख पावै ॥ पुनि पुनि गोवर्द्धनहिं मनावै

नाथ आपनो भार सँभारी ॥ करियो कान्हार की रखवारी

पय पकवान मिठाई मेवा ॥ बहुरि पूजि हों तुम को देवा

मात पिताहि हर्ष देखि दुखारी ॥ तब इक बुद्धि करी गिरिधारी

कह्यो नन्दसों निकट बुझाई ॥ तुमहूं सब मिलि करहु सहाई

लैलै लकुट राखि गिरि लेहु ॥ मति राखहु उरमें सन्देह

गोवर्द्धन गिरि भया सहाई ॥ आप कह्यो मोहिं लेहु उठाई

दो० यह सुनि जहँ तहँ गोप सब, रहे लकुट गिरि लाय।

कहत राम तब नन्द सों, भले लियो उचकाय ॥

सो० ठाढ़े ठिग बलराम, देखि देखि लीला हँसत।

कौतुक् अनिधिसुखधान, करत चरित संतनसुखद ॥

सात दिवस वीते यहि भांती ॥ वर्षत जल जलधर दिन राती

कोपि कोप डारत जलधारा ॥ मिश्री न ब्रज की नेकु लगाय

जलत जला द जल बीचहिं अंवर ॥ वैसेइ गिरि वैसेइ ब्रज सुन्दर

धर जल पवन अनल नभ जाको ॥ सुरपति कहा करि सकें ताको

भये न जलद जलतें सब रीते ॥ रह्यो एक गुण द्वे गुण वीते

कहत बात आपस में बादर ❀ पठयो इन्द्र हमें दै आदर
 कह्यो देहु ब्रज जाय बहाई ❀ कहिहैं कहा जाय अब भाई
 महाप्रलय जल बर्षे आनी ❀ ब्रजमें बूंद न पहुँच्यो पानी
 भये मेघ मन में सब कादर ❀ अब करिहैं सुरराज निरादर
 अति भय तनकी दशा भुलाने ❀ गये इन्द्र मैं सबै खिसाने
 कहत मेघ सुरपति के पाहीं ❀ सुनहु देव हम कहत डराहीं
 कै मारो कै शरण उबारो ❀ ब्रज पै जोर न चलत हमारो

दो० सात दिवस परलै सलिल, हम वर्षे ब्रज जाय ।

ब्रजबासी भागे नहीं, निदर्यो हमें बनाय ॥

सो० निघट गयो सब बारि, एक बूंद पहुँची न धर ।

यह अचरज अतिभारि, कहत लगत लज्जा हमें ॥

यह सुनि चकित भयो सुरराई ❀ पुनि पुनि बूझत मेघ बुलाई
 कहा भयो परलय को पानी ❀ यह कह्यो ब्रजवर्षी बात न जानी
 सुरपति मन यह करत बिचारा ❀ परबत में कौउ है अवतारा
 तब सुरेश सब देव बुलाये ❀ आज्ञा सुनत सुरत सब आये
 देवन आय सबन शिर नायो ❀ कौन काज सुरराज बुलायो
 तबहीं देवन सों सुरराई ❀ ब्रजवासिन की बात सुनाई
 बीते वर्ष देत हैं पूजा ❀ सो अब देव किथो उन दूजा
 मोहिं मेदि पर्वत को थाप्यो ❀ ताते मैं अति रिस करि कांप्यो
 दिये प्रलय के मेघ पठाई ❀ आवहु ब्रजगिरिसहित बहाई
 ते बर्षे परलै जल जाई ❀ ब्रजमें नीर न पहुँच्यो राई
 आयो मेघ द्वार सब रोई ❀ कारण कहा कहो सो मोई
 देवन कह्यो सुनौ सुरईशा ❀ प्रकट्यो ब्रजहिं ब्रह्म जगदीशा

दो० तुम जानत प्रभु भूमि जब, दुखित पुकारी जाय ।

कह्यो लेन अवतार तव, सो विहरत ब्रज आय ॥

सो० कहै इन्द्र पछिताय, मैं भूल्यों जान्यों नहीं ।

कीनी बहुत ढिठाय, भयकर मन व्याकुल भयो ॥

मैं सुरपति जिनहीं को कीनो ॥ तिन आगे चाहों बल लीनो ॥

रवि आगे खद्योत उजेरी ॥ तैसो बुद्धि भई हे मरी ॥

कीनी बहुतें मैं अधिकाई ॥ कहा क्यों अब मन पछिताई ॥

सुरन कही सुनिये सुरराई ॥ ब्रजहिं चलों नहिं आन उपाई ॥

वै हैं प्रभु दयाल करुणा कर ॥ क्षमा करेंगे श्री सुन्दर वर ॥

सुनि विचार कीनो सुरराजा ॥ यद्यपि वदन दिखावत लाजा ॥

तद्यपि वे स्वामी मैं दासा ॥ करिहैं कृपा अवशि मोहिं आना ॥

अब नहिं वनत रहे मुखगोई ॥ शरण गये जो होय सो होई ॥

यह विचार मन में ठहराई ॥ चल्यो शरण सुरसंग लिवाई ॥

कामधेनु करि अग्र सुहाई ॥ शोचत चल्यो ब्रजहिं नसुहाई ॥

अति सकोच सुरपति मनमाहीं ॥ आगे धरत परत पग नाहीं ॥

जगत पिता सों करी ढिठाई ॥ कहिहैं कहा वदन दिखाई ॥

दो० शरण शरण कहि चरण परि, परिहैं जाय उताल ।

शरणागत पालन विरद, तजिहैं नाहिं गोपाल ॥

सो० दीन वचन सुनि कान, करिहैं कृपा कृपालु प्रभु ।

यहै करत अनुमान, सुरनायक आयो ब्रजहिं ॥

देखि सुरन की भीर अहीरा ॥ अति डरपे उर भये अधीरा ॥

दौरि कृष्ण सों जाय सुनायो ॥ सुरपति आप मेन सजि आयो ॥

कहत श्याम हँसि मतिहि डरावो ॥ गिरिवर तजि किन्हें मति जावो ॥

ब्रज बाहर सेना सब राखी ॥ वाहन ते उतखो सहमाखी ॥

सकुचत चल्यो कृष्ण के पासा ॥ कलुक दुखित मन कलुक उदामा ॥

धाय पखो अरणन पर जाई ❀ कृपासिंधु राखो शरणाई
 बिसखो तुमहिं तुम्हारी माया ❀ अब तुम बिन नहिं और सहाया
 शरण शरण पुनि पुनि कहि बानी ❀ धोये चरण नयन के पानी
 राखि राखि त्रिभुवन के राई ❀ मोतें चूक पड़ी अधिकारि
 मैं अपराध कियो अनजानी ❀ क्षमा करौ प्रभुजन सुखदानी
 जो बालक पितुसों विरुभाई ❀ लेत पिता तेहि गोद उठाई
 ऐसेहि मोहिं करो जन ताता ❀ जैसे सुतहित पित अरु माता
 दो० व्याकुल देखि सुरेश अति, दीनबन्धु यदुराय ।

अभयकियोकरमाथधरि, भुजगहिलियो उठाय ॥

सो० लीनों हृदय लगाय, देखि दीनता इन्द्र की ।

शिर नहिं सकत उठाय, बार बार परसत चरण ॥

कहत इन्द्र सों कुँवर कन्हाई ❀ तुम कत सकुचतहौ सुरराई
 हम तुम सों कीनी अधिकारि ❀ तुम्हरी पूजा हम सब खाई
 भली करी ब्रज वर्षे पानी ❀ हम कछु तुमसों रिस नहिं मानी
 यह दीनी मेरी ठकुराई ❀ तुम नहिं जानत करी ढिठाई
 कहा भयो जो मेघ पठाये ❀ मैं सब ब्रज के लोग बचाये
 तुम कछु उरमें शोच न आनौ ❀ मैं तुम सों कछु बुरो न मानौ
 भली करी ब्रज देखन आये ❀ तुम मेरे मनमें अति भाये
 अपने मनकी शोच मिटाई ❀ देवन सहित करौ सुख जाई
 सुनि हरि बचन देवगण हर्षे ❀ जय जय करि कुसुमांजलि वर्षे
 पुलकि अंग मुख गद्गद बानी ❀ कहत धन्य प्रभुजन सुखदानी
 अशरण शरण तुम्हारो बानो ❀ यह लीला सब तुमहीं जानो
 धन्य धन्य सब ब्रजके बासी ❀ जिनके प्रेम बिबश अविनासी
 दो० प्रभुहिं देखि अनुकूल मन, धीर कियो सुरराय ।

मिटी चास उर तें तरु, वार वार पद्धिताय ॥
 सो० कहत वारहीं वार, तुम गति अगम अगाध प्रभु ।
 मैं भूल्यों संसार, जान्यों व्रज अवतार नहिं ॥

प्रभु आगे चाहौं मैं पूजा ❀ मोते मन्द और को दूजा
 अहो नाथ तुम प्रभु मैं दासा ❀ रवि आगे खद्योत प्रकासा
 मेरो गर्व कितक यह वाता ❀ कोटिन् इन्द्र तुम्हारे गाता
 मैं अपराध कियो यह भारी ❀ प्रभु राख्यो निज ओर निहारी
 दीनबन्धु तुम जन हितकारी ❀ विरद बखानत वेद पुकारी
 कृपा करी प्रभु दर्शन पाये ❀ भयो सुखी तन ताप नशाये
 ये दिन वृथा गये दिन काजा ❀ तुमको नहिं जान्यों व्रजराजा
 धन्य धन्य प्रभु गिरिवरधारी ❀ भञ्जन विपति भक्त हितकारी
 दैत्य दलन प्रभु भार उतारन ❀ संत धेनु द्विज हित तन धारन
 अब प्रभु मोहिं कृपा यह करिये ❀ गिरिवरधर गिरिधर पर धरिये
 सुनि विनती हरि भये सुखारी ❀ तब गिरि करतें धखो उतारी
 सुरन सहित सुरराज अनन्दे ❀ कामधेनु ले प्रभु पद वन्दे

छं० करत अस्तुति जोर कर सुर धेनु आगे राखिके ।
 वन्दि प्रभुपद पुलकि पुनि पुनि नाम गोविंद भाखिके ॥
 जै जै कृपालुं सुकुन्द माधव कृष्ण अगणित गति हरे ।
 गोपपति राजीवलोचन करज नख गिरिवर धरे ॥
 बामुदेव व्रजेन्द्र यदुपति कंस अरि सुर रञ्जने ।
 हरण भव भय भार महि अहिराज विष पद गञ्जने ॥
 बकी तिरणावर्त वत्सामुर बका अब नाशनं ।
 अतिहि दुष्ट अरिष्ट धेनुक अमुर वंश विनाशनं ॥
 चोरि माखन खात व्रज घर भञ्जि तरु जन दुष्ट हरे ।

योगि जन जप तप न पावत धन्य ब्रजजन बश करे ॥
 धन्य गोकुल धन्य यमुना धन्य ब्रज वृन्दावने ।
 धन्य गोपी गोप यशुदा नन्द गिरि गोवर्द्धने ॥
 फिरत चारत धेनु निज पद पद्म फणिअहि प्रति धरे ।
 शकट भंजन भक्त रंजन रास निर्वत गुण भरे ॥
 जनकसुरसरि शिवसनक धनश्री नहीं छांडत घरी ।
 परसते पद भयो पावन जयति जै जै जै हरी ॥

दो० करि अस्तुतिमन हर्षिअति, पख्योशक्रप्रभुपाँय ।
 कै प्रसन्न सुर धेनुपति, विदा कियो यहुराय ॥

सो० पुनिपुनि प्रभुपदबन्दि, सुरलोकहिं सुरपतिगयो ।
 ब्रजजनपरमानन्द, चकितविलोकतश्यामतन ॥

कहत गोप सब आपस माहीं ❀ इन सम और जगत कोउ नाही
 सात वर्ष को बालक जोई ❀ ताहि इतो बल कैसे होई
 हैं ये पारब्रह्म भगवाना ❀ करत चरित्र देह धरि नाना
 दैत्य किते छल करि करि आये ❀ ते सब इन कौतुकि नशाये
 इन्द्र मेदि गिरिवरहिं पुजायो ❀ तामें निज स्वरूप प्रगटायो
 इन्द्र प्रलय धन दियो पठाई ❀ सात दिवस ब्रज वरपे आई
 अति विस्तार बढ़ो अति भारी ❀ लीनो गिरिवर कर पर धारी
 एक बूंद ब्रज में नहिं आई ❀ लीन्हो सब ब्रजलोक वचाई
 हारि मानि सुरपति भय पाई ❀ आन पख्यो चरणन शिर नाई
 कामधेनु देवन को ल्यायो ❀ ताहि अभय करि फेरि पठायो
 अचरज बात जात नहिं बरणी ❀ मानुष सों यह होय न करणी
 परे गोप हरि चरणन आई ❀ कहत धन्य तुम कुँवरकन्हारि
 दो० हम तुमको जानैं नहीं, हौ तुम त्रिभुवनराय ।

व्रजवासिन मुखदेन को, व्रजमें प्रगटे आय ॥

सो० तुम करलेत सहाय, परत जहां संकट विकट ।

लीनों हमें बचाय, विपतें जलतें अनल तें ॥

करत विचार युवति सब ठाढ़ी ॥ प्रेम उमँग मन आनंद बाढ़ी ॥
कैसे गिरिवर लियो उठाई ॥ अति कोमल तन श्याम कन्हाई ॥
लेत धरत जान्यो नहिं काहू ॥ धन्य धन्य हरि को यह बाहू ॥
सात दिवस परलै जल दाख्यो ॥ इन्द्र पख्यो चरणन जब हाख्यो ॥
कहत सखा धनिधन्य गोपाला ॥ कैसे गिरि कर धख्यो विशाला ॥
यह करतूत करत तुम कैसे ॥ हम सँग सदा रहत हौ ऐसे ॥
गाय चरावत हौ मिलि हमसों ॥ केतिक बल है वृक्षत तुमसों ॥
धाय चरण गहि यशुमति मैया ॥ मुख चूँवति अरु लेत बलैया ॥
अतिही नेह नयन भर पानी ॥ तन पुलकित मुख गद्गद बानी ॥
कैसे कर जु धख्यो गिरि ताता ॥ अति कोमल भुज तुम दिन साता ॥
विहँसि मात सों कहत कन्हैया ॥ तेरी सों सुन यशुमति मैया ॥
मैं न उठावत री श्रम पायो ॥ नेक लुयो उठि आपुहि आयो ॥

दो० अब गिरिको पूजौ बहुरि, सबसों कह्यो कन्हाय ।

बूढ़त तें राख्यो उनहिं, कीनी बहुत सहाय ॥

सो० यह सुनि हर्ष बढ़ाय, बहुरो गिरि पूज्यो सबन ।

अति हर्षित नँदराय, दिये दान विप्रन विपुल ॥

अक्षत रोरी पान मिठाई ॥ पुष्प हार दधि दूध मुहाई ॥
यशुमति रोहिणि अरु ब्रजनारी ॥ सजि सजि लाई कंचनथारि ॥
हरिको तिलक कियो दोउ माता ॥ पुलकि प्रेम परिपूर्ण गाता ॥
बहुतक द्रव्य निछावर कीनो ॥ भुजगहि लाय कंठसों लीनो ॥
व्रजतिय हरिको तिलक बनावै ॥ कूल माल गरमें पहिरावै ॥

इहिमिसि अंग परस मुख पावैं ❀ निरखिबदन छवि बिधिहि मनावैं
 होहिं हमारे पति गिरिधारी ❀ मनमोहन सुन्दर बनवारी
 यह कामना सकल उरधारी ❀ हरि छवि निरखति गोपकुमारी
 कह्यो नंद सों तब गिरिधारी ❀ मुनहु तात अब बात हमारी
 गोबर्द्धन को करौ प्रणामा ❀ चलिये अब सब निज निज धामा
 यह मुनि सबनि गिरिहिं शिरनाई ❀ चले ब्रजहि मन हर्ष बढ़ाई
 आये सदन सकल ब्रजवासी ❀ सहित श्यामसुन्दर मुखरासी
 दो० घर घर ब्रज आनन्द सब, गावत मंगलचार ।

आयो सुरपति जीत हरि, गिरिधर नन्दकुमार ॥
 सो० ब्रजमंगल ब्रजमोद, ब्रजआभूषण गिरिधरन ।
 नित नव करत बिनोद, ब्रजवासी ब्रजदासहित ॥

अथ नन्द एकादशी वरुण लीला ॥

इंद्रहि जीति श्याम घर आये ❀ ब्रज घर घर आनंद बधाये
 ता दिन दशमी भई सुहाई ❀ कातिक शुक्ल एकादशि आई
 भक्तिमुक्ति दायक अति पावन ❀ पाप शाप संताप नशावन
 नन्द एकादशि व्रत प्रतिपालैं ❀ वेद विदित सब धर्म सँभालैं
 प्रथमहिं दशमी संगम कोनो ❀ बहुरि एकादशि को व्रत लीनो
 निराहार निरजल दृढ़ नेमा ❀ नारायण पद पंकज प्रेमा
 और काज कलु मनहिं न लायो ❀ भजन करत सब दिवस वितायो
 निशि जागरण करन बिधि ठानी ❀ प्रभु मंदिर लीप्यो निज पानी
 पाठम्बर वर दिव्य विद्याये ❀ बिबिध पुनीत सुगंध सिंचाये
 बांधी वन्दनवार सुहाई ❀ सुमन सुगंध माल लटकाई
 चौक चारु बहु रंगन पूख्यो ❀ सिंहासन तहँ राख्यो रूख्यो
 शालग्राम तहां पधराये ❀ भूषण वसन विचित्र बनाये

दो० धूप दीप नैवेद्य करि, प्रभु पर पुष्प चढ़ाय ।

करी आरती प्रेम सों, धंटा शंख बजाय ॥

सो० प्रभु पद नायो साथ, करि परदक्षिण दण्डवत ।

तुम त्रिभुवनके नाथ, जोरि हाथ अस्तुति करी ॥

आदर सहित करी नंद पूजा ॥ प्रेम भक्ति उर भाव न दूजा

करत कीर्तन भजन सगीती ॥ तीनि याम यामिनि जब बीती

तवहिं महरि नंदराय बुलाई ॥ कल्यो यशोमति सों समुझाई

एक दण्ड द्वादशी सकारे ॥ पारन की विधि करो सवार

यह कहि नंद यशोमति पाहीं ॥ लै भारी धोती कर माहीं

गये न्हान यमुना के तीरा ॥ संग नहीं कोउ तहां अहीरा

भारी भरि यमुनाजल लीनो ॥ बाहर जाय देह कृत कीनो

लै माटी कर चरण पखारी ॥ अति उत्तम सों करी मुखारी

अचमन लै बैठे नंदपानी ॥ वरुणदूत जल बाजत जानी

नन्दहि लैगे पकरि पताला ॥ वरुण पास पहुँचे ततकाला

जान्यो वरुण कृष्ण के ताता ॥ भयो हरष मन गुन यह बाता

अन्तर्यामी प्रभु घनश्यामा ॥ नन्द लेन ऐहें मम थामा

दो० भयो बरुण अतिहर्षमन, पुनिपुनिपुलकितगात ।

नन्दहिं ल्याये भृत्य सम, भली भई यह बात ॥

सो० सो प्रभु कृपानिधान, ऐहें धनि धनि भाग्य सम ।

जाहि धरत सुनि ध्यान, निगमनेति जेहि गावहीं ॥

हर्ष सहित नंदहिं जलराई ॥ भीतर महलन गये लिवाई

सादर विनय वचन बहु भाखे ॥ धीरज दे नीके नंद गाखे

रानी सवन नंद को देख्यो ॥ जन्म सुफल अपनो करि लेख्यो

कहत कि धनि धनि भाग्य हमारे ॥ नन्द हमारे सदन पथारे

जिनके सुत त्रैलोक्य गुसाईं ❀ सुर नर मुनि सबही के साईं
 चितवत पंथ वरुण मन लाये ❀ करुणामय अब आवत धाये
 यशुमति शोच करत मन माहीं ❀ भई वेर आये नंद नाहीं
 खबर लेन तब ग्वाल पठाये ❀ यमुना तट नहिं नंदहिं पाये
 भारी धोती तट पर देखी ❀ भये शोच सब ग्वाल विशेषी
 इत उत खोज ग्वाल फिर आये ❀ कहत महारि सों नन्द न पाये
 भारी धोती तटपर पाई ❀ सुनत महारि मुख गयो भुराई
 निशा अकेले आज सिधाये ❀ काहू जलचर धौ धरि खाये

दो० अतिव्याकुल यशुमतिभई, उठीरोय अकुलाय ।

मुनि धाये ब्रजलोग सब, नंदहिं खोजत जाय ॥

सो० यमुना तट बन गांव, नंद नंद टेरत सबै ।

हूंद फिरे सब ठांव, भये विकल ब्रज लोग सब ॥

सोवत ते हरि हलधर आये ❀ रोवत मात देखि दुख पाये
 ब्रूमत जननी सों दोउ भैया ❀ कत रोवति है यशुमति मैया
 विलखि यशुमति वचन सुनाये ❀ यमुना तट कहूँ नन्द हिराये
 यह मुनि हरि बोले सुनु माता ❀ अबहीं आवत हैं नंद ताता
 मोसों कहिगये अबहीं आवन ❀ मति रोवै मैं जात बुलावन
 प्रभु सर्वज्ञ सकल के स्वामी ❀ जल थल व्यापक अंतरयामी
 जाने नंद वरुण के धामा ❀ वरुण प्रीति पुनि लखि धनश्यामा
 वरुणलोक हरि तुरत सिधाये ❀ सुनत वरुण आतुर उठि धाये
 देखत दरश परस मुख पायो ❀ चरणसरोज आय शिर नायो
 कहत आज धनि भाग्य हमारे ❀ त्रिभुवनपति मम धाम पधारे
 पाटम्बर पांवड़े विझाये ❀ महलन वंदनवार बँधाये
 रत्नजटित सिंहासन धाखो ❀ तापर सादर प्रभु बैठाखो

द्वं० वैठाय सादर प्रभुहिं धोवत कमलपदनिज कर गहं ।

जे पद सरोज मनोज अरि उर सर सदा प्रफुलित रहे ॥

जे पद पदम पदमालया उर रहत निज भूषण किये ।

पाय ते पद जलज जलपति प्रेम परिपूरण हिये ॥

दो० विविधभांति प्रभु पूजि कै, वरुण कहाँ गहिपाय ।

कृपासिंधु अति कृपाकरि, दरशदियो म्वहिं आय ॥

सो० मैं कीन्हों अपराध, सो प्रभु उर नहिं आनिये ।

क्षमा समुद्र अगाध, क्षमा करहु निज जानि जन ॥

जल रक्षक जे दूत कृपाला ॥ ते लै आये नन्द पताला ॥

यह कारज मैं उनको कीन्हों ॥ तिन दूतन प्रभु नंद न कीन्हों ॥

यदपि कियो उन पातक भारी ॥ हें वे सकल दंड अधिकारी ॥

तदपि दूत वे मो मन भाये ॥ जिनते प्रभु के दरशन पाये ॥

देखि नाथ शुभ दरश तुम्हरा ॥ मैं मान्यों उनको उपकारा ॥

अब प्रभु हम सब शरण तुम्हारी ॥ राखि लेहु श्रीगिरिवर भारी ॥

पांयन परीं आय सब रानी ॥ बड़भागिन आपन को जानी ॥

रानिन सहित वरुण अनुगगे ॥ अस्तुति करत जोरि कर आगे ॥

धन्य नन्द धनि धन्य यशोदा ॥ धनि धनि तुमहिं भिलावत गोदा ॥

धनि ब्रज गोकुल के नर नारी ॥ पूरण ब्रह्म जहां अवतारी ॥

गुणातीत अविगति अविनाशी ॥ ब्रज विहार बिलसत सुखराशी ॥

शेष सहस मुख वराणि न जाई ॥ सहज रूप को करत बढ़ाई ॥

दो० करि अस्तुति रानिन सहित, पुनि पुनि धरि पदशीश ।

लै प्रभुको नँदराय ढिग, तबहीं गयो जलीश ॥

सो० हरषि उठे नँदराय, देखि श्यामको शशिवदन ।

लखि प्रभुकी प्रभुताय, रहे सुदित चकित चितय ॥

करत मनहिं मन नंद विचारा ❀ यह कोउ आहि वडो अवतारा
 भयो नन्द मन हर्ष अगारा ❀ ब्रह्म करत मो सदन विहारा
 तबहिं कृपाकरि जन मुखदाई ❀ वरुणहिं दै जलराज वडाई
 जाय नन्द को कर गहि लीनो ❀ चलहु तात ब्रज कहि हंसिदीनो
 कश्यो प्रणाम वरुण मुख पाये ❀ नंदसहित हरि ब्रज गृह आये
 नन्द आय ब्रजको जव देख्यो ❀ तव वह चरित स्वप्न सों लेख्यो
 देखि नन्द को ब्रज नर नारी ❀ गयो दुःख सब भये मुखारी
 बूझत नंदहि गोप सयाने ❀ कितहिं गये तुम हम नहिं जाने
 हारे खोज सकल ब्रजवासी ❀ भये बहुत तुम विना उदासी
 नंदमहर तब सब सों भाख्यो ❀ काल्हि एकादशि व्रत में राख्यो
 आज द्वादशी थोरी जानी ❀ रैन अछत गयो यमुनापानी
 कटिलौं गयो यमुन जल माहीं ❀ लै गयो वरुण दूत गहि बाहीं

दो० वरुण लोकते जाय कै, लाये मोहिं गोपाल ।

ये प्रगटे ब्रज आय कोउ, उत्तम पुरुष विशाल ॥

सो० सहिमाकहीन जात, कोटि भांति वरणी वरुण ।

सांच कहत मैं बात, इनको नर भति जानियो ॥

भयो अधीन बहुत जलराई ❀ पखो चरण कमलन पर आई
 रानिन सहित धोय पद पूजे ❀ जानि जगतपति भाव न दूजे
 ब्रज नर नारी सुनत यह गाथा ❀ कहत भये सब सकल सनाथा
 यशुमति सुनत चकित यह बानी ❀ कहत कहा यह अकथ कहानी
 प्रभु की माया में अरुमानी ❀ कहत नंद सों यशुदा रानी
 मो बरजत निशि न्हात सिधाये ❀ कुशल परी पुण्यन ते आये
 हरि को चूमि लियो उर लाई ❀ ल्याये नंदहि खोज कन्हवाई
 विप्रन बोलि दियो बहु दाना ❀ घर घर बैठी मिठाई पाना

गावत मंगल नारि मुहाई ॥ वाजी नंद अवास बथाई
नंद कहत यशुमति मुन वीरी ॥ तू अवकिनहि करत मन भोरी
जाको त्रिभुवनपति सो ताता ॥ ताहि सदा मङ्गल दिन राता
कही गर्ग मुनि वानी जोई ॥ प्रगट जात बात सब सोई

दो० इनते समरथ और नहिं, ये हैं सब के नाथ ।

ब्रजवासी आनंद सब, सुनि सुनि हरिगुण गाथ ॥

सो० धनि धनि ब्रजनरनारि, कहत हमारे भाग्य सब ।

हमसँग करत विहार, श्री वैकुण्ठ निवास हरि ॥

अथ वैकुण्ठदर्शन लीला ॥

कहत परस्पर सब ब्रजवासी ॥ हरि हैं श्री वैकुण्ठ निवासी
सो वैकुण्ठ अहै धौं कैसो ॥ जन्म मरण भय जहां न ऐसो
जाको वेद पुराण बखाने ॥ हरि जहँ वसत सदा सुख माने
जो हरि हमहिं दिखावैं सोई ॥ तौ बड़ भाग्य होयँ सब कोई
यह मनसा सबके मन आई ॥ जानि लई भक्तन मुखदाई
तबहिं कृपा करि सब ब्रज लोका ॥ पहुंचाये वैकुण्ठ विशोका
धर्म धाम जो वेदन गायो ॥ दिव्य दृष्टि दे सवन दिखायो
देखत भूलि रहे सब ग्वाला ॥ पुर वैकुण्ठ अनूप विशाला
भूमि वज्र मणि युति छवि छाई ॥ परम प्रकाश वराणि नहिं जाई
वापी कूप तड़ाग असी के ॥ विविध नगन बाँधे तट नीके
रत्न की सोपान मुहाई ॥ जहां देव मुनि रहत लुभाई
फूले कमल विपुल बहु रत्ना ॥ करत शब्द खग गुंजत भृङ्गा

दो० कल्पवृक्ष के वाग वन, सुमन सुगंध अपार ।

खग मृग सब तेजोमयी, दिव्य स्वरूप उदार ॥

सो० मंदिर बरणि न जाहिं, चिंतामणि मय खचित सव ।

तैसे ताहि लखाहिं, जैसी जाकी भावना ॥

सकल चतुरभुज तहां के वासी ❀ शुद्ध सतोगुण सव सुखरासी
 राम सहित तहँ प्रभु सुखशीरा ❀ शोभित नव जलदान शरीरा
 भूषण वसन दिव्य परकाशी ❀ सुन्दर सकल सकल अविनाशी
 बदन प्रकाश हास सुखकारी ❀ कोटि चंद्र कीजै बलिहारी
 मणिन जटित शिर मुकुट विराजै ❀ भूषण वसन अनूपम राजै
 दिव्य पारषद चवँर डुलावै ❀ नारद तुम्बुर गुण गण गावै
 चकित विलोकत सव ब्रजवाला ❀ जान्यो प्रभु प्रभाव तिहिकाला
 चारि भुजा तहँ प्रभुहि निहारी ❀ शंख चक्र गद अंबुजधारी
 द्विभुज कान्ह को रूप न देख्यो ❀ मुरली लकुट पाणि नहिं पेर्यो
 नाहिं मुकुट शिर मोर पखौवा ❀ कटि काढनी न गुंज हरौवा
 नहीं भेष नटवर गोपाला ❀ भये विरह वश तव सव ग्वाला
 ब्रजवासी सोइ रूप उपासी ❀ ता सरूप विन भये उदामी

दो० अकुलाने दृग सबनके, देखन को तिहि काल ।

मोर पंखधर गुंजधर, मुरलीधर गोपाल ॥

सो० ब्रजवासिन के ध्यान, नटवर भेष गोपाल को ।

अमितरूप भगवान, तदपि उपासन रूप यह ॥

विरह विवश हरि ब्रजजनजाने ❀ तवहीं तुरत सकल ब्रज आने
 कान्ह देखि सब भये सुखारी ❀ रहे चकित शशि बदन निहारी
 कहत सबै मन अचरज पाये ❀ कहां गये हम कैसे आये
 देख्यो स्वप्न सबै एक बारा ❀ किधौ सांच यह करत विचारा
 यह चरित्र सब मोहन करहीं ❀ पुर बैकुण्ठ दिखायो हमहीं
 धन्य धन्य हम सब ब्रजवासी ❀ ब्रह्म हमारे संग विलासी

हरि के चरण परस सब धाई ❧❧❧ करत गोप सब मुखन बढ़ाई
हँसि हँसि सबसों कहत कन्हाई ❧❧❧ रहे कहां तुम सकल भुलाई
आज कहां ऐसो तुम देख्यो ❧❧❧ सो किन मो सों कहत विशेष्यो
हम कहँ देखत नन्द दुलारे ❧❧❧ तुमहीं सकल दिखावन हारे
भूतल नाग पताल निहारो ❧❧❧ सकल जगत तुम्हरो विस्तारो
यह सुनि श्याम मन्द मुसकाई ❧❧❧ दिये सकल पुनि मोह भुलाई
दो० करत चरित्र विचित्र प्रभु, ब्रज वासिन के माहि ।

लखि रशिवब्रह्मादिसुर, सुनिजनमनहिं सिद्धाहिं ॥

सो० अति आनंदब्रजलोग, हरिकेनितनवचरितलखि ।
सबको सब सुख योग, ब्रजवासी प्रभु नंदसुत ॥

सदा श्याम भक्तन सुखदाई ❧❧❧ भक्तन हित अवतार सदाई
सङ्कट में जन जहां पुकारैं ❧❧❧ तहां प्रगट तिनको निस्तारैं
मुख भीतर जिन सुमिरन कीन्हों ❧❧❧ तिनको तहां दरश हरि दीन्हों
सुख दुख में जो हरि को ध्यावैं ❧❧❧ तिनको नेक न हरि विसरावैं
देव दनुज खग मृग नर नारी ❧❧❧ भक्तिविवश सब ते गिरिधारी
चित दै भजै भाव जो जैसे ❧❧❧ ताको होत प्रगट हरि तैसे
ब्रह्मा कीट आदि के स्वामी ❧❧❧ प्रभु हैं निरलोभी निहकामी
वेद पुराण साखि सब बोलैं ❧❧❧ भाव वश्य सबके संग डोलैं
काम भाव ब्रज गोपी ध्यावैं ❧❧❧ मन बच क्रम हरि सों मन लावैं
इक क्षण हरिका नाहिं विसारैं ❧❧❧ भौनकाज चित हरिसों वारैं
गोरस लै निकसैं ब्रज माहीं ❧❧❧ जहां श्याम तेहि मारग जाहीं
तिनके मन की प्रीति विचारी ❧❧❧ रीझे गोपीजन मन हागी

दो० नव सत साज शृंगार तन, गोरस लै ब्रजनारि ।

बैचन इहि मग आवहीं, मो सों प्रीति विचारि ॥

सो० अब इन संग बिहार, करौं दान दधि लायकै ।
यह मनकियो बिचार, हरि ब्रजमोहन लाडिले ॥

अथ दानलीला ॥

दधि को दान रचौं इक लीला ❀ भक्तनकी मुखदायक शीला
दधि दानी निज नाम धराऊँ ❀ ब्रज युवतिन मन मुख उपजाऊँ
श्याम सखन तब लियो बुलाई ❀ सबसों कहि यह बात सुनाई
ब्रज युवती नित गोरस ल्यावैं ❀ या माग ह्वे वेंचन आवैं
तिन्हें खिमाय दान दधि लीजै ❀ गोरस खाय जान तब दीजै
यह मुनि सखा उठे हरपाई ❀ भली बात तुम श्याम सिखाई
सबहिन मन अति हर्ष बढ़ायो ❀ कहत श्याम दधि दान लगायो
तबहिं जाय घेखो बन घाट ❀ आवत नित ग्वालनि जिहिवाट
कह्यो श्याम सब सों समुझाई ❀ रहो तरुन की ओट लुकाई
जबहीं ग्वालनि दधि लै आवैं ❀ घेर लेहु कोउ जान न पावैं
यह मुनि सखा घेरकै बाट ❀ बैठे ठाठ ठगन को ठाट
उतते बन बन ग्वालि नवेली ❀ वेंचन दधिहिं चलीं अलवेली

दो० हँसत परस्पर आपमें, चली जाहिं जिय मोर ।

पाय घात में सघन सब, घेर लई चहुँ ओर ॥

सो० देखि अचानकभीर, चकितरहीं चहुँदिशि चितै ।

सहमीं कछुक शरीर, कितते आये ग्वाल सब ॥

शंकित है ग्वालनि भई ठाढ़ी ❀ मनहुँ चित्र कैसी लिखि काढ़ी

हाथ पांव अँग भये अडोलैं ❀ कछू बदन ते बचन न बोलैं

तहँ हँसि ग्वालनि दियो जनाई ❀ मति डरपो जिय कान्ह दुहाई

इहां चोर ठग कोऊ नाहीं ❀ अभय कान्ह को राज सदाहीं

आवत जात न भय कछु कीजै ॥ दधि को दान लगे सो दीजै ॥
नाम कान्ह को जव सुनि पायो ॥ तव युवतिन मन धीरज आयो ॥
बोलीं विहँसि तवहिं ब्रजवाला ॥ कहां तुम्हारे प्रभु नँदलाला ॥
चोरी करि नहिं पेट अघायो ॥ अब वनमें दधिदान लगायो ॥
तव अति बालक हते कन्हई ॥ सही जो कछु कनेही लरिकाई ॥
होहु जो कछु वा धोखे माहीं ॥ परिहे समुझि अचहिं क्षणमाहीं ॥
प्रगट भये तव कुँवर कन्हई ॥ देखि सवन बोले मुसकाई ॥
रहि युवती तुम पोच सदाई ॥ करि आई हो बहुत दिठाई ॥

दो० तब लौं हम लरिका हुते, सही बात अनजान ।

सो धोखो अब मेटिकै, बाँड़ि देहु अभिमान ॥

सो० हम मांगत दधिदान, तुम उलटी पलटी कहत ।

करत नन्द की आन, दिये पाइहौ जान सब ॥

तब बोलीं ग्वालनि मुसकाई ॥ अब तुम डर हम तजी दिठाई ॥
नन्दहुं ते कछु तुम्हें कन्हई ॥ भयो जानिये तव अधिकई ॥
कालिहि चोर चोर दधि खाते ॥ घर घर देखत ही भजि जाते ॥
रातहि भयो स्वप्न कछु आई ॥ प्रातहि भई आज ठकुराई ॥
भली कही नहिं ग्वालनि वानी ॥ तुम यह बात कछु नहिं जानी ॥
पिता चरित धन धाम जु होई ॥ पुत्र काज आवत है सोई ॥
तुमसी प्रजा बसाई गांवहिं ॥ तो हम ठाकुर क्यों न कहावाहिं ॥
कह्यो तवहिं ग्वालनि भहराई ॥ बात सँभारे कहत कन्हई ॥
ऐसो को बहि गयो हमारे ॥ जो परजा है बसहि तुम्हारे ॥
कंस नृपति के सब कहवावैं ॥ कहा भयो जु वसत इक गाँव ॥
जो तुम याते हौ गरुआने ॥ तो अब तजिहें गाँव विहाने ॥
यह सुनि विहँसि कह्यो वनमाली ॥ कहा बात बह कहत गुवाली ॥

दो० गांव हमारो छांडिकै, बसिहौ का पुर माहिं ।

ऐसो को तिहुँ लोक में, जो मेरे वश नाहिं ॥

सो० का गनती मैं कंस, जाके हम कहवावहीं ।

देहु दान को अंस, रारि करत वे काजहीं ॥

बड़ी बात छोटे मुख माहीं ❀ आप सँभारि कहत हौ नाहीं

तीनि लोक अस कंस भुवाला ❀ भयो तिहारे वश केहि काला

यह तुम बात कहौ तिन माहीं ❀ जो कोउ तुमको जानत नाहीं

हम इन बातन भय नहिं मानैं ❀ जैसे हौ तुम तैसे जानैं

हमसों लीजै दान गनाई ❀ पहिले थैली लेहु मँगाई

पीताम्बर वोभन फटि जैहै ❀ तव पाछे पछितावो ऐहै

ऐसे कहि ग्वालनि मुसकानी ❀ तव बोले हरि दधि के दानी

तू ग्वालनि हमको कह जानै ❀ हम नहिं भूठी बात बखानै

भूठी हौ तुमहीं सब ग्वारन ❀ सतर होतिहौ विनहीं कारन

अजहूँ मानि कह्यो किन लेहु ❀ लेखो करो दान मम देहु

नन्द सौह यों जान न देहौ ❀ बहुरो छोरि दही सब लेहौ

काहे को अठिलात कन्हाई ❀ छांडि देहु मोहन लरिकाई

दो० पहिली परिपाटी चलौ, नई चलौ क्यों आज ।

जान पाइहैं कंस जो, तौ पुनि होय अकाज ॥

सो० हँसी घरी द्वै चारि, बीतन लाग्यो याम युग ।

बन में रोंकी नारि, बाढ़ि जाइहै बात पुनि ॥

कहा कंस कहि मोहिं मुनावो ❀ अबहीं वाको जाय बुलावो

लरिका कहि कहि मोहिं बखानत ❀ मेरी लरिकाई नहिं जानत

मारि पूतना स्वर्ग पठाई ❀ तृणावर्त महि दियो गिराई

बत्सा बका अघासुर माखो ❀ गिरि गोवर्द्धन करपर धाखो

ऐसी हे मेरी लज्जाई ॥ जान बूझ तुम देन भुजाई
 तुमहीं हँसी करति हों ग्वारी ॥ देत देवावन हों दृष्टि बागी
 बात जानके भापन नार्ही ॥ आपहि बेठी हों वन राक्षी
 चोरी सदा बेच दधि जाहू ॥ विना दान क्यों होत निवाह
 अब तो आज पकरि में पाई ॥ सब घासन को लेहुं चुकाई
 सबै भली तुम करी कन्हई ॥ वधे अमुर सो सुनी भलाई
 गिरि धाखो धलसाय हमारी ॥ जानी हम सब बात तुम्हारी
 मांगि लेहु अबहुं दधि खाहू ॥ होत दान सुनि हमको दाह
 दो० हमैं कहत हों चोरटी, आप भयो जो साह ।
 बड़े भये चोरी करत, अब लूटत हों राह ॥
 सो० लेहु दही बलि जाऊँ, हमकों होत अवार अब ।
 लिये दान को नाऊँ, एक बूंद नहिं पाइहौ ॥

यह तुम मोकों कहा सुनाई ॥ दधि माखन सब लेहुं लिपि
 यौवन रूप अंग जो तुमरो ॥ ताको दान लेउंगो तमरो
 कंचन भार युवति तुम सगरी ॥ आवति जाति हमारी डगरी
 दही मही मोकों दिखरावो ॥ ताहि न यौवन रूप बनावो
 अंग अंग को दान गिनावो ॥ लेखो करि सब मोहिं चुकावो
 यहसुनिसबग्वालिनिभहरानी ॥ भये कन्ह तुम ऐसे दानी
 अंग अंग को दान चुकावत ॥ यौवन रूपहि दीठ बनावन
 जान परी प्रगटी तरुणई ॥ यशुमति सों अब कहिहो जाई
 उर आनन्द उपर रिम करिके ॥ चलीं सबै मटुकी शिर धरिके
 तब हरि पीताम्बर कटि कसिके ॥ धखो धाय आंचर पट हैमिके
 रिसके मटुकी लई छिड़ाई ॥ दधि माखन सब दियो लुकाई
 गहि गहि भुजासवन भूकभोरी ॥ अँगिया फारि तनी गहि नोरी

दो० कहत कह्यो मानत नहीं, ठीठ भई सब आय ।

दान देत भगरो करत, यौवन रूप लदाय ॥

सो० जो कहिहौ घर जाय, जननी नहीं पत्याय है ।

आवहुगी पबिताय, निबहौगी पुनि कालहकिमि ॥

भये कान्ह तुम निपट दुलारे ❀ देखहु फारे वसन हमारे

तापर मांगत यौवन दाना ❀ यह अबलों कहूँ सुन्यों न काना

दधि माखन सब दियो लुटाई ❀ चलो कहैं यशुमति सों जाई

यह कहि ग्वालिन चली सबरिसभरि ❀ अबहि भँगावत हैं तुमको धरि

यह सुनि हरि हँसि भौंह सिकोरी ❀ गई उरहनो लै सब गोरी

यशुमति सों सब जाय सुनायो ❀ कहा महरि सुतकों सिलरायो

अतिही कान्ह भये अब ईतर ❀ रोंकत युवतिन कों वन भीतर

दही दूध सब दियो लुटाई ❀ मांगत यौवन दान कन्हवाई

चोली फार हार सब तोरे ❀ गहि गहि आंचर पट भ्रुकभरे

ऐसो को कुल भयो महरिके ❀ यौवन दान लियो जिन अरिके

नित उतपात जात सहि नाहिन ❀ कहैं लागि पीपर वन दै दाहिन

कैसे गोरस बेचन जैये ❀ हरि पै मारग चलन न पैये

दो० सुनत ग्वालिनी के बचन, बोली यशुमति मात ।

मैं जानी तुम सबनके, उर अन्तर की बात ॥

सो० आप फिरत इतरात, कहत श्याम ईतर भयो ।

उरन लाय नख घात, उरहन को दौरी फिरत ॥

दशहि बरष को कहां कन्हवाई ❀ कहैं सब तुम मातो तरुणवाई

दोष लगावत श्यामहि आनी ❀ कैसे धौं कहि आवत बानी

हरि पर फिरत सबै मड़रानी ❀ यौवन मदमाती इठलानी

तुम को लाज लगत है नाहीं ❀ जाहु सबै बैठो घर माहीं

अहो महरि ऐसो नहिं कीजे ॥ विन वृष्णे गारी नहिं दीजे ॥
 सुत ऐसो मग चलन न देहीं ॥ मांगत दान लूट दधि लेहीं ॥
 तुमहूँ खीभ करत सुत ओरी ॥ ऐसे ब्रजमें वसि हे को गी ॥
 तजि हैं आजहि गांव तिहारो ॥ बहुरि न सुनिहो नाग हमारो ॥
 ऐसे कहा कहत डरपाई ॥ वसत नहीं किन अननहिं जाई ॥
 मेरो कहा कछु घटि जैहे ॥ भूठी बात नहीं कोउ सेंहे ॥
 यौवन दिन छै सवहिन बोरी ॥ तुम बांधति आकाशहि डोरी ॥
 मो सों कहति आप तुम जैसी ॥ को पतियाय बात सुनि तेसी ॥

दो० बोलत नहीं सँभारि तुम, सब मिलि भई गँवारि ।

ऐसी कैसे हरि करै, वृथा बढ़ावति रारि ॥

सो० महरि मनहिं रिसआय, हम भूठी भाषें नहीं ।

जो तुम नहिं पतियाय, वृष्ण न देखो आनसों ॥

तुम सुतके कर्मन नहिं जानो ॥ हठ करि टेक आपनी मानो ॥
 दश गायन करि कहा बड़ाई ॥ अहिर जाति सब एकहि माई ॥
 महा दीठ हरि मानत नाही ॥ वनमें भ्रमरन गहि गहि बाहीं ॥
 सखा भीर सँग लीन्हे डोलें ॥ वन कुञ्जन में करत कलोलें ॥
 नेकु सकुच शंका नहिं, आनै ॥ सोई करत जो कछु मन मानै ॥
 यह मुनि कहत नन्द की नारी ॥ कहत गेलकी बात इहां गी ॥
 और चली कह इहां जातको ॥ भवहिं रिस मुन अनमिलन बातको ॥
 कहां वसत तुम कहां कन्हारै ॥ कव हरि बांह गद्दी वन जाई ॥
 कहत बात नहिं नेक लजाहूँ ॥ मुनि हैं कहीं निहारे नाहूँ ॥
 मेरो कान्ह अवहिं अति वारो ॥ तुम नहिं अपनी ओर निहांगी ॥
 ऐसी बात कहत हो आई ॥ भूयो दोष सखो नहिं जाई ॥
 नेकु नहीं डर करत ईश को ॥ मनो भयो हरि वर्ष दीन को ॥

दो० धन्य धन्य तुव कहत हौ, मोकों आवत लाज ।

माखन मांगत रोय हरि, दोष देत बिन काज ॥

सो० सुनहु महारि तुम बात, हरि सीखे टोना कछ ।

बनहिं तरुण है जात, बालक है आवत घरहि ॥

एक दिवस किन देखौ जाई ❀ वन में तरु की ओट छिपाई
हैं हरि दश कै बीस वर्ष के ❀ देखहु अपने नयन निरखि के
जाहु चली मैं सब देख्यो है ❀ एक एक दिन करि लेख्यो है
दश अरु बीस बात बन आई ❀ डीठ लगावति है घर माई
जरहिं बरहिं ये आंख तुम्हारी ❀ जो हरिको नहिं सकत निहारी
आप करत ढिग चावर जाई ❀ मोकों साख दिखावन आई
अहो महारि कहिये का तुमसों ❀ कहे बिलग मानत हौ हमसों
सुतकी कान मान तुम लीनी ❀ गारी कोटिक हमको दीनी
हमैं कहा मोहन प्रिय नाहीं ❀ जीवहु युग युग हरि ब्रज माहीं
कहा करैं जब बहुत खिभावैं ❀ तब हम तुमहिं कहन को आवैं
भलो बोध हमको तुम कीनों ❀ उलटहि दोष हमारे दीनों
सुतको हटकत नेक न माई ❀ हमहीं सों रिस करति सदाई

दो० कहा करौ तुम आय सब, कहत अटपटी बात ।

मोकों यह भावै नहीं, तरुणिन यहै सुहात ॥

सो० मन आपन गुनखेहु, तुम तरुणी हरि तरुण नहिं ।

ससुभि उरहनो देहु, ऐसी मो सों मति कहौ ॥

महारिवचन सुनि ग्वालिनिसगरी ❀ निरउत्तर है घर को डगरी
यह यशुमति गोपिन को भगरो ❀ कृष्ण प्रेम रस सागर सिगरो
कहत सुनत भक्तन सुखदाई ❀ ब्रजवासी जन जीवन गाई
ज घर घर सबहिन सुनि पाई ❀ मोहन दधि को दान लगाई

सब गोपिन मिलि रुचि उपजाई ॥ जेये दधि ले जहां कन्हाई
 यह अभिलाष सवन मन वाढ़्यो ॥ राख्यो गुप्त न बाहिर काढ़्यो
 श्याम सखन को लियो बुलाई ॥ कह्यो सवन सों यों ममुभाई
 काल्हि उठहु सब ग्वाल सेवें ॥ चलिकै वृन्दावन मग घें
 प्रातहि यमुना के तट जाई ॥ तरु चढ़ि चढ़ि सब रहौ लुकाई
 ब्रजयुवती मिलि आपस माहीं ॥ निनप्रति दधि बेचन कां जाहीं
 राधा चन्द्रावलि को यूथा ॥ ललितादिक नागरी बरुथा
 गोरस लै जवहीं सब आवैं ॥ घेरि सवन तब दान चुकावैं

दो० सुनि मन हर्षे ग्वाल सब, भली कही हरि बात ।

सांभ भई चलिये सदन, काल्हि उठहिंगे प्रात ॥

सो० निज घर घर सब आय, मातपिताको सुखदियो ।

सोये सुखसों जाय, रुचिसों भोजन खाय कै ॥

प्रात उठे सब गोप कुमारा ॥ जहँ तहँ बोले खुले किवारा
 सुनी श्याम ग्वालन की बानी ॥ जागत हू सोवत पट तानी
 नन्द द्वार बैठे सब आई ॥ आवहु उठि घनश्याम कन्हाई
 ग्वाल ठेर सुनि यशुदा माता ॥ दिये जगाय श्याम मुख दाना
 मात वचन सुनि अति अतुराई ॥ उठे सेज ते कुँवर कन्हाई
 लै पट पीत मुकुट शिर धारी ॥ मुरली कर ले चले सुगरी
 सखन सहित यमुनातट आये ॥ कहन सवनसों अति सुख पाये
 भली करी उठि प्रातहि आये ॥ मैं जानत सब तुमन बुलाये
 आवत है हैं अब ब्रजभामिन ॥ घर घरते दधि लै गजगामिन
 हँसे सखा सब तारि बजाई ॥ मन में अति आनंद बढ़ाई
 कहत सवन सों हँसि नँदलाला ॥ जाय दुमन सब चढ़ौ गुवाना
 मुँह मूंदे सब रहौ छिपाने ॥ जेहि विधि सुचि न कोऊ जाने

दो० जबहीं जान्यो युवति सब, आई बनिहि मँभाय ।

कूद परो तब दुमन ते, दे दे नन्द दुहाय ॥

सो० शंख शब्द धहराय, कीजै मुरली शृंग धुनि ।

उरन जाहिं अकुलाय, जैसे युवती गण सबै ॥

घेर सबन इहि विधि डरपाई ❀ बहुरि तिन्हें कहियो समुझाई

नितहिं हमारे मारग आई ❀ दधि माखन बेंचत हौ जाई

हरिको दान मारि नित जावो ❀ आज दिये विन जान न पावो

ऐसे श्याम सखन समुभावत ❀ अपने मनकी प्रीति बढ़ावत

ब्रज बनितन लखिकै सुख पाऊं ❀ तुमसों नाहिंन कछू दुराऊं

यहि मारग बेंचन दधि आवैं ❀ अन्तर गति मो सों हित लावैं

आवत है हैं बन सब वाला ❀ करत वात ऐसे नँदलाला

प्रात उठीं सब गोप किशोरी ❀ चित्र विचित्र वसन तन धोरी

अंग अंग आभूषण साजैं ❀ केश सँवारि चारुदृग आजैं

अँगिया अंग अनूप सँवारी ❀ चित्र विचित्र वसन तन धारी

बेंदी भाल मांग मोतिन की ❀ अंग अंग छवि नगज्योतिन की

दशन दमक अधरन अरुणाई ❀ चिबुक नील कनकी छवि छाई

दो० गोरे तन सुख छवि सदन, नवयौवन ब्रजनारि ।

लै लै दधि निकसीं सबै, सुखमाबढ़ी अपारि ॥

सो० ब्रज के खेड़े जाय, भई ग्वालियकठौर सब ।

निजनिजग्रूथबनाय, दधि मटुकी शिरपरधरे ॥

बेचन दही चलीं ब्रजनारी ❀ षट दश सहस गोप सुकुमारी

सबके मन मग मिलहिं कन्हाई ❀ होत न एकहि एक जनाई

करत जाहिं गुन गान विहासी ❀ पग नूपुर की धुनि अति भारी

हरि जानी युवती आवत जब ❀ कह्यो सखन दुमजाय चढ़ो अब

सुनत श्याम के मुख सों वैंना ॥ धाय चढ़ी हुम बालक सेना
पञ्च सहस्र सखा समुदाई ॥ जहां तहां हुम रहे लुकाई
कलुक ग्वाल सँग राखि कन्हवाई ॥ निकस गये आपुन अगुवाई
ठाढ़े भये घेर वन घांटी ॥ लै लै करन सुमन की सांघी
यहि अंतर आई ब्रज नारी ॥ देवत वन लाग्यो कलु भारी
पाछे हीं ते लई हँकारी ॥ कहन तिन्हें अवहीं तुम हारी
एक संग जुरि भई तरुणि सब ॥ इत उत चकित चलीं चितवत सब
आगे दृष्टि परे नंदनन्दन ॥ मुकुटशीश तन चित्रित चंदन

दो० लिये सखा सँग मग गहे, ठाढ़े यमुना तीर ।

ठठकिरहीं युवती सबै, लखि ग्वालनकी भीर ॥

सो० भयो हरष उरमाहिं, कहत वचन मुख भयसहित ।

आगे कैसे जाहिं, मग में ठाढ़ो सांवरो ॥

कोऊ कहत चलत क्यों नाहीं ॥ कोऊ कहत घरहि फिरि जाहीं
कोऊ कहै का करै कन्हवाई ॥ इनहूं सों कहै जाहिं पराई
कोऊ बोल उठी ब्रज वाला ॥ लूट लई हमै काहि गोपाला
अतिही दीठ भयो है कान्हा ॥ मांगत है गोरस को दाना
सुनि ऐसे मोहन को ख्याला ॥ घरको फिरी सकल ब्रजवाला
तव हरि ग्वालन सैन बतवाई ॥ कूदहु विटपन तें भट्टवाई
जात फिरी युवती ब्रजगाँवहिं ॥ घेर लेहु कोउ जान न पावहिं
तव ग्वालन वनमें चहुंवाई ॥ भर भराय तरु डार हलाई
शंख मृदंग मुरलि करतारी ॥ कीने शब्द सवन इक वारी
चकित हुमन चितई सब वाला ॥ डारन डारन देखे ग्वाला
कूद कूद तरु तरु तें धाई ॥ घेर लई तरुणी सब जाई
कहां नितहिं दधि बेचन जाहू ॥ आज पकरि पायो सब काहू

दो० दान लगत हयां श्याम को, सो सब लेहिं चुकाय ।

अब तौ देहैं जान तब, तुम को नन्द दुहाय ॥

सो० दधि लै जात प्रभात, आवतहौ निशि बेचिके ।

दान मारिनित जात, भली करत यह बात नहिं ॥

ठाढ़े यमुना तीर कन्हाई ❀ जाहु चली निज दान चुकाई

यह सुनि बिहँसिक हयो इक ग्वाली ❀ नई वात इक सुनहु रि आली

मांगत दधि को दान मुरारी ❀ सिखय पठाये हैं महतारी

सो ये सखा लेन सब आये ❀ यमुना तट तें श्याम पठाये

काहे को सब मिल इतराहु ❀ सूधे अपने मारग जाहु

दधि माखन कछु चाहत कोऊ ❀ सूधे मांग लेत किन सोऊ

सूधी बात कहौ सुख होई ❀ बांधत कहा अकाश खरोई

दान बजार हाट में पावो ❀ यह निज कान्हें जाय सुनावो

बोले सखा सुनहु री ग्वारी ❀ हम जानी अब वात तुम्हारी

गांव बसे को यह दुख होई ❀ नहिं सकात चीन्हें सों कोई

मारग अपनो दान उगाहु ❀ कहत मांग किन हम पै खाहु

हाट बाट सब हमहिं उगै हैं ❀ अपनो दान तुमहुं पै चैहें

दो० लेखो करि सब कान्ह को, दीजे दान जगात ।

चली जाहु सुखसों डगर, फेर कहै कोउ बात ॥

सो० तुमको कैसो दान, कौन कान्ह मांगत कहा ।

परिहै अबहीं जान, रोकतहो बन में तियन ॥

आये तबहीं निकट कन्हाई ❀ संग सखन की भीर मुहाई

बोली उठीं लखि नागरि सगरी ❀ कहा श्याम तुम करत अचगरी

नागिन को रोकत हौ बन में ❀ जैहै बात दूरिलौं क्षन में

आजहि दान पहिर तुम आये ❀ कहा आपिकनि तुमहिं पठाये

वैसी चाल चलो नँदलाला ॥ चलत बाप तुम्हरो जिहि चाला
 वृथा न रारि करहु बन माहीं ॥ छाँड़ि देहु दधि बेचन जाहीं
 कहत कान्ह दधि दान न देहो ॥ विना दान दीने नहिं जेहो
 लेहो छीन दूध दधि माखन ॥ देखत ही रहिहो सब आखन
 मात पिता लो उघटत बानी ॥ नहिं जानत मोकों दधि दानी
 जात नितहिं नित बेच चुराई ॥ सब दिवसन को लेहु भराई
 मांगत छाप कहा दिखराऊं ॥ काको तुम को नाम बनाऊं
 ऐसो को मोकों नहिं जानत ॥ एक नहीं मोकों तुम मानत
 दो० नीके हम जानत तुम्हें, गोद खिलाये कान्ह ।

वे दिन अब विसराय सब, भये जगाती आन ॥

सो० करहु नहीं लागि बात, जो निग्रहै सुख पाइये ।

ऐसी क्यों सहिजात, नितहिं हमें दधि बेचनो ॥

अजहं मांगि लेहु दधि देहें ॥ खाहु सहज में हम सुख पैंहें
 दान बचन तुम हमहिं सुनायो ॥ यहै हमें सुनिके नहिं भायो
 होत अवार जान अब दीजै ॥ नई रीति मोहन नहिं कीजै
 गोरस लेत प्रात सध कोई ॥ बहुरि धख्यो रहि है ऐमोई
 दान दिये विन जान न पैहो ॥ जब देहो तवहीं सब जेहो
 तुम सों बहुत लेन है हम को ॥ सो नहिं अबहिं सुनावत तुमको
 नितहिं हमारे मारग आवत ॥ मोकों कवहं नाहिं जनावन
 दिन दिन को लेखो भरि लेहो ॥ अब तो तुम्हें जान तव देहो
 ऐसी हठ कह करत मुरारी ॥ बन में रोकत नारि परारी
 आये दान पहिरि तुम कोपे ॥ चलहु न हम सब चलिहैं नापे
 तुम अपने घरही के राजा ॥ सब को राजा कंस विराजा
 जो कहूं सुनत नेकुसी पैंहै ॥ बहुरि सँभारि अबहिं परिजहै

दो० हम गुहरावैं जाय कहैं, बसत तुम्हारे गाँव ।

ऐसी विधि जो कहत हौ, को रहि है यह ठाँव ॥

सो० करत फिरत उतपात, लिये सखा सँग सेंटके ।

नाहिं न नेकु डरात, कठिन कंसको राज है ॥

यह सुनि कान्ह उठे रिसियाई ❀ लीनो कछु दधि दूध छिनाई

बसन छोरि तरु सों उरभाये ❀ कछु दधि भाजन भूमि लुढ़ाये

कहत जाय कंसहि गुहरावो ❀ आजहिं मोहिं हजूर बुलावो

मारों एक पलक में वाही ❀ मोकों कहा बतावत ताही

अवतो मोसों बैर बढ़ायो ❀ लेहों दान आपनो भायो

मेरे हठ क्यों निवहन पैहौ ❀ देखैं अब धौं कैसे जैहौ

तुम देखत रहिहौ हम जैहैं ❀ गोरस वेंच बहुरि घर ऐहैं

बोले ज्वाव न तुमको दैहैं ❀ नेकहु तुम सों नाहिं डेरहैं

सुनि गृह ते जन ऐहैं जवहीं ❀ नाहिं सँभारि सकिहौ हरि तवहीं

एक बूंद गोरस नहिं पैहौ ❀ देखत ऐसेही रहि जैहौ

धरिके यशुमति पै लैजैहैं ❀ तहां श्याम पुनि वचन न ऐहैं

मानो कछो हमारो अक्हुं ❀ हम पै दान न पैहो कवहुं

दो० गृहजन कहा बतावहु, कंसहि लेहु बुलाय ।

देखतही तुम सवन के, पूजा करौ बनाय ॥

सो० जैहौ धौं केहि भांत, अब देखहुं गो मैं तुम्हें ।

बात कहत अनखात, सूधे देती दान नाहिं ॥

जो मानत नाहिं कंसहि राजा ❀ तौ अब भये तुमहिं ब्रजराजा

तौ सिंहासन बैठत नाहीं ❀ गाय चरावत कत वनमाहीं

मोर पखन को मुकुट उतारो ❀ नृप किरीट माथे पर धारो

पहिरत कहा गुञ्ज के हारा ❀ नृप भूषण किन करत भ्रूंगारा

अत्र चमर शिर ऊपर राजे ॐ अजहुँ मुरलि अब नौवत बाजे
हमहं यह लखिकै सुख लीजे ॐ संगहि संग काज कछु कीजे
भगरत कहा दही के काजा ॐ लखि हमको उपनत है लाजा
ओझी बुद्धि तुम्हारी नीकी ॐ तुम्हरे चित रजधानी नीकी
मेरो दासन दास कहावे ॐ सपनेहं यह ताहि न भावे
कंस मारि शिर अत्र धराऊं ॐ कहा तुच्छ यह साध पुराऊं
ब्रज में मेरो राज सदाई ॐ और इहां काकी ठकुराई
तुम कछु राज बढो करि मानो ॐ मेरी प्रभुता को नहि जानो

दो० हमहूँ जानत हैं तुमहि, लरिकाई ते कान ।

काहे को अपने बदन, कीजत बहुत बखान ॥

सो० फिरत चरावत गाय, कांवे कामरि कर लकुट ।

देखी है ठकुराय, कत बढ़ि बढ़ि बातें करत ॥

यह कमरी कमरी तुम जानो ॐ जितनी बुधि तितनी अनुमानो
या पर वारों चीर पटम्बर ॐ तीन लोक की यह आडम्बर
ब्रह्मा भूल्यो जाहि निहारी ॐ सो कमरी कत निन्दन खारी
कमरी के बल असुर सँहारों ॐ कमरी ते सन्तन उद्धारों
या कमरी ते सब सुख भोगा ॐ जाति पांति यह मम सब योगा
सुनत हँसीं सब ब्रजकी वाला ॐ यह तुम सांच कही गोपाला
धनि धनि यह कामरी तुम्हारी ॐ सब विधि तुम्हें निवाहन हारी
यहै ओढ़ के गाय चरावो ॐ यहै सेज करि भूमि विद्यावो
याही ते वर्षा ऋतु दारौ ॐ शिशिर शीत याते निर्वाण
याते ग्रीष्म धाम वचावो ॐ यहै उटगनी शीश बनावो
यहै जानि यह गृह यह ग्रामी ॐ यहै सिखावत सब परिपाटी
हम जो कहन चहत ही तुम सों ॐ कही सो तुम अपने सुख हमसों

दो० कही जात अपनी प्रकट, नीके हमें हँसाय ।

तापर मांगत दान दधि, युवतिन एक कन्हाय ॥

सो० कामरि ओट निहारि, तुम्हें न छाजत पीतपट ।

कारे तन पर चारि, कारी कामरि सोहई ॥

मोसों बात सुनो ब्रज तिय सब ❀ सत्य कहत उपमान जगत सब

बालक अरु तिय मुख नहिं दीजे ❀ इनसों बहुत हेत नहिं कीजे

मूढ़ चढ़त नेकहि चुचकारैं ❀ जो मन करै सोई करि डारैं

सोई गुण प्रकटत तुम जाहू ❀ कतक कहत गे तुम अठलाहू

जानहुं कहा हमें तुम ग्वारी ❀ सदा छाछ की बेचनहारी

सुनहु कान्ह हम तुमको जानैं ❀ नन्दमहर के सुत पहिचानैं

धेनु दुहत पुनि तुमको देखे ❀ गाय चरावतहू वन पेखे

चोरी करी वहाँ पुनि जाने ❀ फरिका खोलत फिरत विराने

ये ढंग छाँड़ भये अब दानी ❀ यहै बात अब सवहिन जानी

और सुनहु यशुमति जब बांधे ❀ ऊखल सों दोऊ भुज साधे

तब सहाय करि हमहिं बचाये ❀ करके बंधन जाय छुड़ाये

जानत यहै रहत ब्रजमाहीं ❀ हमते दूर बसत कछु नाहीं

दो० कहत कहा तुम बावरी, हँसी लगत सुनि बात ।

कब जन्मत देख्यो हमें, कौन मात को तात ॥

सो० कबै चराई गाय, कत चोरी पक्यो हमें ।

कब बांधे हम माय, दुही गाय किन कौनकी ॥

तुम जानत म्वहिं यशुमति जाये ❀ यशुमति नन्द कहां ते आये

मैं पूरण अविगति अविनासी ❀ बांधे सब माया की फांसी

यह सुनि हँसी सकल ब्रजबाला ❀ ऐसेउ गुण जानत गोपाला

जैसे निदख्यो तुम सब काहू ❀ तैसे निदरत मात पिताहू

तुमको यशुमति महर न जाये ॥ तो तुम कहो कहां ते आवे
घर घर माखन चोखो नार्ही ॥ बांधे मात न उखल माहीं
हाहा करि हम नाहिं लुड़ाये ॥ ग्वालन संग न बन्ध चराये
नहीं गाय तुम दुही हमारी ॥ ये सब बातें भूँठ तुम्हारी
भक्त हेतु जन्मत जग माहीं ॥ कर्म धर्म के में बश नाहीं
योग यज्ञ मनमें नहिं ल्याऊं ॥ दीन गोहार मुनत उठि धाऊं
भावाधीन रहों सब पासा ॥ और नहीं कहू मोकों त्रामा
ब्रह्मा कीट आदि के माहीं ॥ व्यापक हों समान सब ठाहीं

दो० कहां कहांकी बात कहि, डरपावत हो नार ।

स्वर्ग पतालहि एक करि, बांधत वारहि वार ॥

सो० इहां सुनावत काहि, जो लायक तो आपको ।

कौन प्रकृति यह आहि, वनमें रोंकतहौ तियन ॥

केतक दधिको दान कन्हई ॥ जिहि कारण युवती अरुभाई
दधि माखन सबही तुम लेहू ॥ रीती जान हमें घर देह
जो तुम थाही में सुख पावो ॥ काहे को बहु बात बनावो
दधि माखन कह करों तिहारो ॥ सकल वणिजको दान निवारो
जो जो वणिज नितहिं तुमलावो ॥ लेखो करि सब मोहिं चुकावो
अब ऐसे कैसे घर जैहौ ॥ जवलन लेखो भविं न बुझैहौ
करत वणिज तुम नये बनाये ॥ नित उठि जात जगात बचाये
सुनि बाणी हरि नागर नटकी ॥ दे दे सैन युवति सब नटकी
मनहीं मन अति हर्ष बढ़ाई ॥ बोली हरि सों सब मुमकाई
ऐसे कहौ वणिज को अटके ॥ अब लों श्याम कहां तुम भटके
हमहूँ कहि मन मांफ लजाई ॥ कह मांगत दधि दान कन्हई
वणिज हेतु रोकी अब जानी ॥ तबहीं क्यों न कही यह बानी

दो० हँसि बोली राधाकुँवरि, कहा बणिज हम पास ।

कहौ श्याम सो नामधरि, देहिं दान हम तास ॥

सो० भूले कहा कन्हाय, बणिज कहा युवती करत ।

कासों लियो चुकाय, सो हमको बतलाइये ॥

कहौ तुमहिं बूझत कह हमहीं ❧ लै लै नाम बतावो तुमहीं

तुम जानत मैं हूँ कछु जानौं ❧ तुम में माल सुनाहिं छिपानों

देहु जापर जो लागै ❧ फिर न कछु तुमसों कोउ मांगै

इतने हीं को लरत बृथाहीं ❧ देखौ समझ सबै मन माहीं

कहत परस्पर ग्वालि सयानी ❧ समझत हौ कछु इनकी वानी

इनहीं सों बूझौ सब कोऊ ❧ कहत बतावत मुनिये सोऊ

हरि की गूढ़ मधुर रस बातें ❧ मुनि मुनि मुख पावत सब जातें

कोउ काहू को भेद न जानै ❧ लोक लाज डर सब कोउ मानै

मन मन हर्ष भई सब सुन्दर ❧ जानै हरि सब रसिकपुरन्दर

तब बोलीं हँसि के व्रजवाला ❧ कहत नाहिं क्यों तुमहिं गुपाला

कहा माल देख्यो हम पाहीं ❧ जिहि कारण रोकी वन माहीं

बैल लदाये देख्यो हमका ❧ कहौ हमें बूझति हैं तुमकों

दो० लौंग जायफर लायची, गिरी छुहारा दाख ।

कह लादे हम जात हैं, सो कहिये किन भाख ॥

सो० दीजे बणिज बताय, ताकी देहिं जगात हम ।

तुमको नन्द दुहाय, जो अब बेग कहौ नहीं ॥

कौन वणिज कहि मोहिं बतावो ❧ लोन मिरच कहि कहि बहँकावो

तुमतो माल गयन्द लदायो ❧ महिष वृषभ कहि मोहिं सुनायो

बड़े मोल की वस्तु जो होई ❧ कैसे दुरत दुराये सोई

मो आगे तुम कहा छिपावो ❧ देहौ दान जान तब पावो

भये चतुर हरि तुम अब जानी ॥ दधि को दान भेटि यह ठानी
देतीं दही कलुक हम ओहन ॥ खाते लै ग्वालन संग मोहन
इन बातन अब खोयो सोऊ ॥ यह कहि युवति हँसी सबकोऊ
श्याम कही मैं जानत तुमको ॥ सूधे दान न देहो हमको
दधि माखन तो लेहो ॥ ओरी ॥ उठिके भुज गहि गहि भक्तभोरी
तव पीताम्बर भटक्यो प्यारी ॥ कहत भये तुम दीठ सुगरी
हरि रिसकरि अङ्गम गहिलीनी ॥ इहि मिसि भेट प्रेमकी कीनी
टूटि गई प्यारी उर माला ॥ तव घेरे युवतिन नँदलाला

दो० गहिगहि अंकमलेतसव, भगरत रिसहि बढ़ाय ।

हँसत सखा सब तारिदै, पकरे गये कन्हाय ॥

सो० हाँकदर्ई नँदलाल, तवहिं सखन ललकार कै ।

धाय परे सब ग्वाल, लीने श्याम छुड़ाय तव ॥

रिस करि बोले ग्वाल सयाने ॥ भई दीठ हरिको नहिं जाने
हमभई दीठ भलो तुम कीन्हो ॥ देहो ज्वाव दर्ई को चीन्हो
वन भीतर रोंकीं सब वाला ॥ देखो हमें कियो जंजाला
बात कहन को एहू आवत ॥ वड़े सुधर्मा आप कहावत
ऐसी साख सखाकी भरि सब ॥ आवहुगे नृप जीत सधै तव
जानी बात तुम्हारी सब की ॥ तजहु ख्याल लरिकाई तबकी
जो युवतिन को हाथ लगैहो ॥ कियो आपनो तो तुम पैहो
जो यह बात धरन मुनिपैहें ॥ मात पिता हमको कह कहें
तोखो मुक्काहार कन्हाई ॥ घाहि कहा कहिहें हम जाई
आपन भई सधै तुम भोरी ॥ हरिको दोष लगावत गोरी
जव तुम रूपी पीत पिछोरी ॥ तव उन मोनिनकी लग्नोरी
मांगत दान श्याम कव सेती ॥ तुम अठिलात ज्वाव नहिं देती

दो० लेहिं छोरि सब तें अबहिं, देखतही रहि जाहु ।

भक्तभोरा भोरी करत, नँदनन्दनहिं डराहु ॥

सो० को त्रिभुवन के माहिं, मोहन की सर दूसरो ।

तुम सब जानत नाहिं, नँदनन्दन ब्रजराजसुत ॥

कहा बड़ाई इन की सर में ❀ इन को जानति नीके कर में ॥

नृपति त्रास बसुदेव निकारे ❀ नन्द यशोमति ने प्रतिपारे

आये हैं शुभ घरके माहीं ❀ काहू बढत ताहि ते नाहीं

पहिले जब उन भुजा भक्तोरी ❀ तब हम भटकी पीत पिछोरी

यांते दीठ कही तुमको हम ❀ श्यामहि फिरकन हार भई तुम

इतने पर मानत नहिं हारी ❀ तब ते हमें देत हौ गारी

बहुत सही हम बात तुम्हारी ❀ वणिज करत अरु भगरत ग्वारी

ब्रज ऊपर मनमोहन दानी ❀ अबलौं तुम यह बात न जानी

बोल उठे तब कुँवर कन्हाई ❀ अब नहिं छोड़ों नंद दुहाई

अबतौ दांव आपनो लेहौं ❀ तबहीं जान सवन को देहौं

कौन बात यह कहत कन्हाई ❀ मांगत कहा जान नहिं जाई

फिरि फिरि करि करि नन्ददुहाई ❀ डरपावत हौ हम को आई

दो० डरपावहु तुमजायतिन्ह, जोकोउ तुम्हें डेराहिं ।

यहँ डरपावत कौनको, तुम तें घटि हम नाहिं ॥

सो० जैहैं यशुमति पाहिं, तोखो हार भली करी ।

यहौ बनत पै नाहिं, इतनों धन कहँ पाइहौ ॥

एक हार मोहिं कहाँ बतावो ❀ सब अँग भूषण काहि दुरावो

मोती मांग जराऊ दीको ❀ करणफूल बेसर नग नीको

कण्ठसिरी दुखरी तिलरी गर ❀ तापर और हार जो चौसर

सुभग मेल विजोय वाजू ❀ कङ्कण पङ्कचिन मुँदरिन साजू

कटि किंकिणि नूपुर पग देखा ॥ जेहरि विद्रिया ये सब लेखो
शोभा साज और अंग माहीं ॥ सबको नाम लेन वदो माहीं
याहू में कहु बांट तुम्हारे ॥ अचरज आय सुनोगे माने
भूषण देख न सकत हमारे ॥ याही लिये भयो कथागे
आपनहुं कहु दई गढ़ाई ॥ महरि यशोमति के नैदराई
आई पहिर जितो हम जाहीं ॥ याते दूनो हे धर माहीं
देखि परत कहु बहुत झुलाने ॥ वनयाँ सुनो लखि ललचाने
वाट कहा तौलों सब मेरो ॥ जौलों तुम नहिं दान निवेसो

दो० आभूषण को कह कहत, बहुत वस्तु तुम पास ।

मानों में जानत नहीं, सो किन कहत प्रकास ॥

सो० लैहों सबको दान, सक्षुम्भि लेहिंगे बांटी पुनि ।

पैहौ तबहीं जान, मैं तुमसों सांची कहत ॥

भये श्याम ऐसे रस नागर ॥ युवतिन में अब होत उजागर
काल्हिहि गाय चरावन जाते ॥ छाक मांगि ग्वालन मैं माने
कांधे कामरि लकुटी हाथा ॥ वन में फिरत वछरवन साथ
आज पीतपट कटि कसि आये ॥ लैकर लकुटी बड़े कहाये
भये कछू अब नवल सुजाना ॥ मांगत युवतिन सों वह दाना
देहौ दान कि भगरति हौ तुम ॥ बहुत तुम्हारी बात सुनी हम
प्रथम दान जन जाल निवरिये ॥ ता पाछे तुम हमहिं निवरिये
कहत कहा निदरे से हौ तुम ॥ सहजहिं बात कहत तुमसों हम
आदिहि ते तुमको पहिचाने ॥ दान कहा सो हम नहिं जाने
ग्वालिन चलीं सबै रस करिकरि ॥ दधि मटकी साथ पर धरिधरि
तव हरि गाहि अंचर भरकारी ॥ जाति कहाँ हे री वनिजारी
इतनो वणिज लिये तुम जाहू ॥ बिना दान क्यों होत निवाहू

दो० नाम तुम्हारे बणिज के, सब मैं देहुँ बताय ।

देहु दान तब मोहिं तुम, देखहु सब ठहराय ॥

सो० सब क्यों छोड़यो जात, एक होय तो छोड़िये ।

तुम विचार यह बात, देखहु अपने चित्त में ॥

येती वस्तु लिये तुम जाओ ❀ दान देति मेरो खिजराओ

मत्त गयन्द तुंगम तुमसों ❀ कैसे दुरत दुराये हम सों

हंस मोर केहरि मृगवारे ❀ कनक कलश मदरस सों भारे

चमर सुगन्ध कपोत कीरवर ❀ कोकिल बिटुम बज्र धनुष शर

येतो धन खग मृग तुम पाहीं ❀ कैसे निबहत दान विनाहीं

सुनियह चकित कहति ब्रजवाला ❀ कहा बतावत तुम नँदलाला

तिनको नाम लेत हम पाहीं ❀ जो हम सपने देख्यो नाहीं

कहां तुंगम गज हम पाये ❀ कब हम कंचन कलश गढ़ाये

मानसरोवर हंस रहाहीं ❀ चमर धनुष शर कहा कहाहीं

ये सब हम पै कहा बतावो ❀ जहाँ होय तहँ दान चुकावो

इतनो सबै तुम्हारे पाहीं ❀ करि विचार देखौ मन माहीं

अपने सब अंग अंग निहारो ❀ यौवन रूप और है न्यारो

दो० करहु निबेड़ो बेग सब, काहे करत अबेर ।

कहौ तुम्हें कछु हम कहैं, घरको जाहु सबेर ॥

सो० दीजै दान चुकाय, अब जान्यो अपनो बणिज ।

कहौ फेर समुझाय, जो कछु धोखो होय चित ॥

चमर चिकुर भू धनुष सँभारे ❀ शर कटाक्ष मृग दृग कजशारे

कण्ठ कपोत कोकिला बानी ❀ रद हीरा शुक नाक बखानी

अधर सवर बिटुम सो जानो ❀ है मयूर घूँघट पट मानो

कंचन कलश उरोज निहारो ❀ यौवन मद सों भरो बिचारो

कटि केहरि के रूप मुहाई ॥ हम गयन्द चाल छवि आई
सौरभ अंग सुगन्ध मुहायो ॥ यौवन रूप न जान बतायो
इतनो है सब वणिज तिहारो ॥ होय अंश मो देहु हमारे
खरी किये निवहौगी कैसे ॥ लेहां दान देहुगी जेमे
यह मुनि हैंसि बोली ब्रजनागी ॥ अब समुझी हरि वात तुम्हारी
मांगत ऐसो दान कन्हाई ॥ जान परी प्रगट्टी नरुणाई
याही लालच अङ्क भरत हो ॥ पुनि पुनि गहि आंचर भगरत हो
अपनी ओर देख तौ लीजे ॥ ता पाछे बरियाई कीजे

दो० याही लालच फिरत हौ, सदा लिये बन संग ।

घेरत हौ युवतीन को, प्रगट्ट्यो अंग अनंग ॥

सो० बैठरहौ घर जाय, यह मति चितमें मत धरो ।

घट मर्यादा जाय, ऐसी बातन सों लला ॥

यह मुनि विहंसि कह्यो वनमाली ॥ कत हमपर रिस करत गुवाली
मूधे हम इक वात बखानी ॥ तुम कत शोर करत अनखानी
कवहुं घटावत हौ मर्यादा ॥ कवहुं जोइ सोइ करत विवादा
प्रातहिं ते भगरत विन काजे ॥ दान निवेर जात नहिं माजे
हरि यों कवते भये सयाने ॥ उलटहिं तुम हमपर मत राने
बेटी बहू बड़े घरकी हौ ॥ कत विलंब बनमें करती हौ
शुभिय तुमसों हम जो बखाने ॥ सो तुन कह आगे नतगने
कहिये मोहन वात विचारी ॥ कहवावन सर्वज्ञ विहारी
परगट्ट ऐसो दान मुनावत ॥ हमरो ब्रज उपहार करावत
परे वात महाराने जाई ॥ तुमहिं लाजके हमहिं कन्हाई
ब्रज में जो वे वात मुनेगे ॥ जाति पाति के लोग हनेगे
जान देहु अब हमहिं गोपाला ॥ कहियो प्रात फेर नैदला

दो० बोलि उख्योइकसखा तब, सुनहु ग्वालिनी बात।

प्रीति करत नँदलाल सों, कत बावरी लजात ॥

सो० हरिसँग करहु बिहार, नवलश्याम नवला तुमहुँ।

हँसन देहु संसार, भलो मनावो कन्ह को ॥

सुनि बोली ब्रज युवति रिसाई ❀ कहवावत यह बात कन्हाई
आपुन यौवन दान वतावत ❀ तापर जोइ सोइ सखन सिखावत
बन में सबन घेरि बैठाई ❀ करत श्याम तुम अति लँगराई
भूलिगये वे दिवस कन्हाई ❀ घर घर माखन खात चुराई
खीझत ही दृग नीर चुचाते ❀ उर डरात घरकों भजि जाते
बांधे ऊखल जबहिं यशोदा ❀ हमहिं छुड़ाय लिये तब गोदा
अब भये बड़े बड़ी चतुराई ❀ ताते यौवन दान सुनाई
लरिकाई की बात बखानै ❀ कैसी भई कहा हम जानै
कब धौं खायो माखन चोरी ❀ भैया धौं बांधे कब डोरी
नेकहु ताकी सुधि नहिं जानै ❀ मान अमान न तब हम जानै
भले बुरे को ज्ञान न होई ❀ अपनो पर कहु समझ न कोई
खेलत खात हरषही माहीं ❀ बालपने के दिवस विहाहीं
दो० अपनी सुरत करत नहीं, न्हात यमुन के तीर।

कदम चढ़ाये सबनके, जब मैं भूषण चीर ॥

सो० जल में रहीं छिपाय, बिना बसन नांगी सबै।

पुनि पुनि हहा कराय, दिये बसन मैं सबन तब ॥

बिना बसन बाहिर सब आई ❀ हाथ जोरि मोहिं बिनय सुनाई
कैसी भांति भई तब सबकी ❀ सो सुधि भूलिगई अब तबकी
मोकों कहति चोर दधि खायो ❀ ऊखल सों हम जाय छुड़ायो
भेद बचन जब कहे विहारी ❀ सुनि कै हँसि सकुची ब्रजनारी

कहत भये अति निलज कन्हाई ॥ ऐसी कहत न सकुचन गई
जाहु चले लोगन के आगे ॥ झूठी बात बनावन लागे
करत हैंसी तुम सबन सुनाई ॥ निज निजगृह सब कहिहैं जाई
झूठी बात कहा हम जानें ॥ हम तो सांची सदा बखानें
जैसी भांति भजै मोहिं कोई ॥ मानत में ताको तेसाई
जो झूठो मोको तुम जानो ॥ तो कन भरे हित तप ठानो
जो तुम अपने मन में ठानी ॥ में अन्तर्यामी सब जानी
अब क्यों इतौ निदुरमन कीनो ॥ काहे दान जात नहिं दीनो
दो० दान सुने रिस होति है, यह नहिं हमें मुहाय ।

भली बुरी अरु जो कहो, सो सहिलेहि कन्हाय ॥

सो० छांड़ि देहु सब जाहिं, सुनिये मोहनलाल अब ।

भई बेर बनमाहिं, मात पिता खिभिहैं हमें ॥

काहे को तुम करत अवारी ॥ दधि बेचहु घर जाहु सवारी
में कह करौं तुम्हें यह भावत ॥ लेखो करि नहिं दान तुझावन
शुद्ध स्वभाव समुक्त सब कोई ॥ लेखो करि देहो मोहिं जोई
तब सोइ तुम सों में लै लेहो ॥ तबहीं तुम्हें जान पुनि देहो
काहे को हम सों हरि लागत ॥ जान न परत कहा तुम मांगत
बातन कलू जनावत नहिं ॥ लेखो कहा करत हम पार्हीं
निपटहिं परे हमारे ख्याला ॥ इन बातन कन पावन लाला
अब तुम निपट करी बहुतई ॥ सुनि हैंभि हैं ब्रजलोग तुगाई
मारग जिन रोको हम जार्हीं ॥ घर ते लीजो दान उगाहीं
अबलों यह कीयो तुम लेखो ॥ हम तुम्हरो विचार सब देखो
मोको ऐसी बुद्धि सिखावत ॥ कर कंकण दर्पणहिं दिखावत
तुम्हरी बुद्धि दान हम लेहें ॥ काहे न तुम्हें जान हम देहें

दो० आप भई हौ चतुर सब, मोकों करत गँवार ।

उगहत फिरि हैं दानहम, ठाढ़े बै हैं द्वार ॥

सो० तुम्हें देहुँ घर जान, फेरि कहो पाऊं कहां ।

जापै पैहाँ दान, नृपहिँ ज्वाब कह देउँगो ॥

भली भई नृप मान्यो तुमहुँ ❀ चलिहैं कंसहिँ पै अब हमहुँ

तब ते लेन कहत हैं दानहिँ ❀ नंद महर की करि करि आनहिँ

हम हुँ अब लौं ऐसी जानी ❀ भये श्याम घरही ते दानी

अब जान्यो तुम कंस पठाये ❀ नृप ते दान पहिरि तुम आये

सुनि हरि ये गोपिन के बैना ❀ हँसे कछु तिरछे करि नैना

सो अबि निरखि कहत सब नारी ❀ कहा हँसे मुख मोरि मुरारी

सोई कहौ मनहिँ जो आई ❀ तुमको यशुमति महरि दुहाई

और सौह तुमको गोधन की ❀ सांची बात कहौ तुम मनकी

हँसे कहा हम सों कछु रीझे ❀ कैयों कछु मनहीं मन लीझे

यह सुनि अधिक हँसे गोपाला ❀ कहत श्रीदामासों नँदलाला

यह अचरज इनको तुम हेरो ❀ कहत कहा तुम हँसि सुख फेरो

ऐसी बातन सौह दिवावत ❀ ताते अधिक हँसी मोहिँ आवत

दो० तब श्रीदामा तियन सों, बोल उठ्यो सुसकाय ।

हँसत श्याम तुम समझके, बूझत सौह दिवाय ॥

सो० हमन दिवावैं आन, हँसहु तुमहुँ निज संग मिलि ।

यहै आतसी वान, थोरेमें खिसियात तुम ॥

सहज हँसत नाहिँन सकुवैये ❀ नाहिँन लोगन सौह दिवैये

वे हैं दानी प्रभु सबही के ❀ देहु दान मांगत कवही के

हम जानत वे कुँवर कन्हई ❀ प्रभु तुम्हरे मुख अब सुनि पाई

होत नहीं प्रभुता इहि भांती ❀ दही मही के भये जगाती

वे ठाकुर तुम्हरी सेवकाई ॥ जाने प्रभु अरु मय प्रभुनाई ॥
दधि खाये अरु भूषण तोरे ॥ छांड़ि देहु अब दई निहोरे ॥
जो कह्यु वचो सोऊ अब लीजे ॥ वेगहु जान हमें घर दीजे ॥
तब हंसि बोले श्याम मुजाना ॥ तुम घर जाहु देइ के दाना ॥
आयो हों पठयो में जाको ॥ देउं कहा लेके पुनि ताको ॥
अवहीं पठ्यै मोहिं बुलाई ॥ तब ताके मनमुख को जाई ॥
तुम सुख करौ जाय वरमाहीं ॥ नृपकी गारि मार को खाहीं ॥
जब नृपवर मोकों अटकवै ॥ तब पुनि तुम बिन कौन रुड़वै ॥

दो० लेत नाम मुख नृपतिको, जा मुख निदख्यो जाय ।

आपुनतो नृप नृपनके, अब कह समुझेताय ॥

सो० लियो कंसको नायँ, ऐसी तुम्हें न वृम्भिये ।

भलेश्याम बलिजायँ, जिहिनिदियेतिहिबंदियो ॥

जब हम कंस दुहाई दीनी ॥ तब तो नृपपर अति रिस कीनी ॥
अवै कहा नृप की सुधि आई ॥ जो तुम ऐमे डरे कन्हवाई ॥
कहा कह्यो कह्यु जान न पायो ॥ कब हम कंसहि शीश नवायो ॥
कब हम नाम कंस को लीनों ॥ कंस त्रास कव्यों हम कीनों ॥
निपट भई तुम ग्वारि गँवारी ॥ बसत हमारे गांव भँभारी ॥
कितक कंस जाको हम जानें ॥ कहा त्रास ताको उर आनें ॥
तुम्हरे मनैं बात यह आवत ॥ कंस नृपति के हम कहवावत ॥
तौ तुम कहौ कौन नृप जाके ॥ आपुन कहवावत हों ताके ॥
ताको नाम हमहुँ सुनि पावै ॥ हमहुँ पुनि ताके कहवावै ॥
यासे सार लोक त्रय माहीं ॥ दूजो कंस नृपति तें नाहीं ॥
सो नृप बसत कहाँ सोउ जानें ॥ तौ हम सब नाही को मानें ॥
यह सुनि हम अब अति डरपायो ॥ कै थों भूछहि हमहिं डगयो ॥

दो० जा नृप के हम हैं अरी, को नहीं जानत ताहि ।

जड़ चेतन नर नारि सब, तिहूँ भुवन बश जाहि ॥

सो० बसत सुमनपुर मांहि, कहँ लग तिन्हें प्रशंसिये ।

सब मानतहैं जाहि, तिन पठयो म्वहिं पान दै ॥

सुनत द मोहन की बानी ❀ बोलीं ब्रजमुन्दरी सयानी

जात तुम्हारे नृप की पाई ❀ अब लौं राखी कहूँ छिपाई

जैसे तुम तैसे ओऊ हैं ❀ एक रूप गुण के दोऊ हैं

यह अनुमान कियो मनमें हम ❀ एकै दिन जन्मे दोऊ तुम

जैसी प्रजा तैसेई राजा ❀ वन्यो भलो अब संग समाजा

चोरी ठगी निपुण गुण दोऊ ❀ या पट्टर को और न कोऊ

बोलत नहिंन बात सँभारी ❀ ठगति फिरति ठगनी तुम सारी

भई दीठ नहीं नेक बिचारौ ❀ आवत मुख सोई कह डारौ

अपने गुण औरन पर डारी ❀ जाति जनावति दै दै गारी

हम भई ठगनी अरु बटपारी ❀ तुम भये कान्ह सुधर्मा भारी

अपने नृप को यहै सुनावों ❀ ऐंसिय चुगली जाय लगावों

राजा बड़े जान यह पाई ❀ ल्यावहु हम पर धौंस चढ़ाई

दो० तुम तो ठग आछे बने, बन में रोकी नारि ।

हमें कहौ काको ठग्यो, को हम डाख्यो मारि ॥

सो० तुमहीं जानत श्याम, यंत्र मंत्र दोना ठगी ।

'ठगत फिरत सब बाम, आपन ढँग औरन कहत ॥

मौन गहौ बातें सब पाई ❀ यहै जान हम पर चढ़ आई

जो चाहौ सोई कहि डारो ❀ हम नहीं मानहिं बिलग तिहारो

तुम मोहीं को दोष लगायो ❀ मैं तो नृप को पठयो आयो

यौवन रूप लिये तुम इतहीं ❀ आवत हौ इहि मारग नितहीं

लोचन दूतन जाय मुनायो ॐ तव नृप रिमझरि मोहिं बुलायो
 शैशव महलन ते नृपगई ॐ बैद्यो सिंहासन नरणाई
 तुरतहिं मोहिं दान पहिरायो ॐ दे वीरा तुम पास पठायो
 तिनको नाम अनंग भुवाला ॐ उन को दान देहु ब्रज वाला
 तिनकी आनि कहतहों कीने ॐ पैहों जान दान के देने
 मुनि यह मोहन की मुख बानी ॐ प्रेम सिंधु युवती मगनानी
 काम नृपति की फिरी दुहाई ॐ अय्यो यौवन रूपहि आई
 को हम कहां रहति कहँ आई ॐ यह मुधि बुधि तव दशा भुलाई

दो० ब्रसित भई डर सदन के, नयन मूँदि धरि ध्यान ।

कहत कान्ह अब शरण हम, लीजै सरवस दान ॥

सो० ऐसे कहि मनमाहिं, देह दशा भूलीं सबै ।

लेहु श्यामवलिजाहिं, यह धन तुमहित संचियो ॥

यौवन रूप चाहि तुम लायक ॐ सकुचत तुम्हें देति ब्रजनायक
 नवलकिशोर रूप गुण आगर ॐ अहो श्याममुन्दर वर नागर
 यह यौवन धन तुम दिग ऐसे ॐ जलधि निकट जल कणिका जेम
 ध्यान मगन इहिविधि ब्रजनारी ॐ मनहीं मन विनयत बनवारी
 अन्तरयामी हरि सब जानें ॐ मनहीं की करनी सब मानें
 मनही सबन मिले सुखदाई ॐ तनकी सुरति सबन तव आई
 खुल गये नैन ध्यान ते तवहीं ॐ देखे मोहन सन्मुख गवहीं
 तव जान्यो हम वन में ठाढ़ी ॐ सकुच गई अति अचरज वाढ़ी
 कहति परस्पर आपुस माहीं ॐ कहां हती हम जान न जाहीं
 श्याम विना यह चरित करै को ॐ ऐसी निधि करि मनहि हों को
 रहीं चकितसी सब ब्रजनारी ॐ बोलि उठे तव कुंजविहारी
 कहा ठगीसी हौ ब्रजवाला ॐ पखो कहा डर रोच विशाना

दो० कखो दान लेखो कछु, रहीं जहां तहँ शोच ।

प्रगट सुनावो सो सुहीं, दूर करौं सब शोच ॥

सो० बहुरि न रोके कोय, या वनमें कोऊ तुम्हें ।

निशिबासर भयखोय, सुखसों आवहु जाव नित ॥

हमें और रोके सो को है ॥ रोकनहार सुवन नंद को है

येना डारत शीश हमारे ॥ आप रहत ठढ़े हैं न्यारे

जाके काम नृपति को जोरा ॥ ठगत फिरत गुवतिन वरजोरा

सुनत श्याम बूझिय नहिं ऐसी ॥ तुमको वानि परी यह कैसी

कैसेहू अब कृपा करो हरि ॥ जाहिं सबै अपने अपने घरि

दान मान घरको सब जाहू ॥ बहुरि न मैं रोकाँगो काहू

मैंहू जानत हों कछु लेखो ॥ तुमहूँ आप समुक्ति मन देखो

पिछलो देहु निवेर आज सब ॥ आगे पुनि दीजो जानौ जव

अब भैं भली कहत हों तुमको ॥ जो मानों ग्वालिन तुम हमको

को जानै हरि चरित तुम्हारे ॥ अहो रसिक वर नंददुलारे

हमरो सर्वस मन अपनायो ॥ अजहूँ दान नहीं तुम पायो

लेखो करि लीजो मनमायो ॥ खाहु कछू दधि हम सुख पायो

दो० सदमाखन लायेतुम्हें, सखन सहित मिलिखाहु ।

सुख पावैं हम देखिकै, लीजै दान उगाहु ॥

सो० अब दधिदानी नाउँ, तुम्हरो प्रकट बखानि हैं ।

खाहु दही बलिजाउँ, ल्याई हम तुम्हरे लिये ॥

तब हरि हँसि सब सखन बुलाई ॥ बैठे रचि मगडली सुहाई

दोना बहु पलाश के ल्याये ॥ शोभित सब के करन सुहाये

सुन्दर हरि सुन्दर सब ग्वाला ॥ सुन्दर दधि परसाति ब्रजवाला

भक्त भाव के हाथ विकाने ॥ ग्वालन संग खात रुचिमाने

निज निज मडुकिनते सबग्वारी ❀ देति करति उर आनंद भारी
श्याम पतूखिन सों मुख नावैं ❀ निरखिनिरखि ग्वालिन मुखपावैं
धन्य धन्य आपुन को जान्यो ❀ सुफलजन्म सबहिन करिमान्यो
कहत धन्य यह दधि अरु माखन ❀ खात कान्ह जाको अभिलाषन
जो हम साध करतही मनमें ❀ सो मुख पायो हरिसँग बनमें
अति आनंद मगन सब ग्वारी ❀ नंदनंदन पर तन मन वारी
प्यारी सों माखन हरि मांगत ❀ देखैं तुम्हरो कैसो लागत
औरन की मडुकी को खायो ❀ तुम्हरे दधिको स्वाद न पायो

दो० श्री वृषभानुकुमारि तब, दधित्याई मुसुकाय ।

अपने कर अधरन परस, दीनों बिहँसि खवाय ॥

सो० प्यारीको दधिखाय, अलपचितै मोहन बिहँसि ।

मधुरे कह्यो सुनाय, मीठो है यह सबन तैं ॥

गोपिन के हित माखन सारहीं ❀ प्रेमबिबश नहिं नेक अघाहीं
वैसिय गोरस भरी कमोरी ❀ परसत सबै होत नहिं थोरी
ग्वालनसहित श्याम दधिखाहीं ❀ परम हर्ष सबके मनमाहीं
हँसत परस्पर सखा सयाने ❀ मीठो कहि कहि स्वाद बखाने
हरिहँसि सबके चितहि चुरावैं ❀ परमानंद सबन उपजावैं
बिलसत ब्रजबिलास बनवारी ❀ दधिदानी प्रभु कुंजबिहारी
सरगुण तियन सहित नभमाहीं ❀ निरखिनिरखि मनमाहिं सिंहाहीं
धनिधनि ब्रजकी युवति सभागी ❀ खात ब्रह्म जिनतें दधिमांगी
जा कारण शिव ध्यान लगावैं ❀ शेष सहस मुख जाको गावैं
मन बुधि बचन अगोचर जोई ❀ जाको पार न पावै कोई
नारदादि जाके गुण गावैं ❀ निगम नेति कहि अंत न पावैं
गुणातीत अवगति अविनासी ❀ सो प्रभु ब्रजमें प्रकट बिलासी

छं० प्रकटे सो प्रभु ब्रजमें विलासी जाहि मुनिजन ध्यावहीं ।
 योग जप तप नेम संयम करि समाधि लगावहीं ॥
 रूप रेख न वरण जाके आदि अन्त न पाइये ।
 भक्त वश सो ब्रह्म पूरण गोप बल्लभ गाइये ॥
 कोटि कोटि ब्रह्मांड जाके रोमप्रति ।
 कीट ब्रह्म प्रयन्त जल थल आप सब उपजावहीं ॥
 आप कर्त्ता आप हर्त्ता आपही पालन करें ।
 खात सो प्रभु दान दधिलै गोपिकन के मन हरेँ ॥
 धन्य ब्रज धनि गोप गोपी धन्य बन पावन मही ।
 धन्य मोहन दान मांगत दूध दधि माखन मही ॥
 धन्य ब्रज यक पलक को सुख और यह त्रिभुवन नहीं ।
 कहत सुर मुनि हरषि पुनि पुनि सुमन सुन्दर वर्षहीं ॥
 कान्ह गोपी भाल दै नहिँ एकही बहु तन धरे ।
 भक्तजन हित विरद जाको अमित लीला विस्तरे ॥
 ब्रज विलास हुलास हरि को नित्य निगमागम कहै ।
 दास ब्रजवासी सदा यह गाय आनंद पद लहै ॥

दो० दान चरित गोपालको, अति विचित्र रसखान ।
 बेद भेद पावैं नहीं, कबि किमि करै बखान ॥

सो० गावत सुनत सुजान, दधि दानी लीलाश्चिर ।
 प्रेम भक्ति को दान, ब्रजवासी जन पावहीं ॥

ब्रजललना यों हरिहिँ सुनावैं ❀ दूध दही माखन अरु लावैं
 मृदुकिनते लै लै हम देहैं ❀ खाहु श्याम तुम हम सुख लेहैं
 गोरस बहुत हमारे घर बर ❀ लीजै दान पाछिलो भर भर
 यह गोरस जो तुमने खायो ❀ सो तो दान आजको आयो

लेहु सबै अपनो करि लेखो ॥ फिरत पायहो मांगे शेखो ॥
 श्याम कही अब भई हमारी ॥ मनहिं भई परतीत तुम्हारी ॥
 प्रीति भई हमसों तुमसों अब ॥ लेहैं मांगि चाहि हैं जब तब ॥
 निघरक अब बेचहु दधि जाई ॥ घाट बाट कछु ढर नहिं राई ॥
 ग्वालिन भई श्याम वश माहीं ॥ बरको जात बनत है नाहीं ॥
 चकित रही सब ब्रजकी नारी ॥ कहत एक सों एक बिचारी ॥
 सुनहु सखी मोहन कह कीनों ॥ दान लियो कै मन हरि लीनों ॥
 यह तो हम नहिं बदी सयानी ॥ बूझो धौं इन सों यह बानी ॥
 दो० बृम्हन को उमगी सबै, मोहन सों यह बात ।

निकट जातरहि जाति पुनि, सकुच मगन है जात ॥

सो० मनहीं मन सकुचात, कहिये कैसे श्यामसों ।

कहत बनत नहिं बात, प्रेम बिबश तरुणी सबै ॥

सुनौ बात मोहन यक हम सों ॥ दीठो बहुत कियो हम तुमसों ॥
 क्षमा करौ सो चूक हमारी ॥ अहो श्याम हम दासि तुम्हारी ॥
 हँसि हँसि कही कदुक हम बानी ॥ तुम्हें सिम्भावत हित मनसानी ॥
 कछु हमारी उर सों नाहीं ॥ अति आनंद तुम सों मन माहीं ॥
 दधिको दान और जो जान्यो ॥ सबै तुम्हारे कर हम आन्यो ॥
 कहा श्याम तुम यह कह कीनों ॥ दान लियो कै मन हरि लीनों ॥
 हम तुमसों कछु भेद न राख्यो ॥ कीनों सबै तुम्हारे भाख्यो ॥
 यह करनी तुमहीं अब जानौ ॥ भली बुरी जो कछु करि मानौ ॥
 जो जासों अन्तर नहिं राखै ॥ सो तासों क्यों अन्तर भाखै ॥
 नंदनन्दन तुम अन्तर जानी ॥ वेद उपनिषद साखि बखानी ॥
 सुनहु बात युवती सब मेरी ॥ तुम हित करि राख्यो भविष्ये ॥
 तुम ते दूर होत मैं नाहीं ॥ रहत तुम्हारे निकट सदाहीं ॥

दो० तुमकारण वैकुण्ठ तजि, प्रकटतहों ब्रज आय ।

चुन्दावन तुम्हरो मिलन, यह न विसाख्यो जाय ॥

सो० एक प्राण द्वै देह, अन्तर कहूं न जानिहो ।

यह न नयो अबनेह, कत भूलत ब्रजवास वसि ॥

अब घर जाहु दान मैं पायो ❀ जानत यह लेखो निबधायो

हंसि हंसि जो भावत वनवारी ❀ कहत भई तव ब्रजकी नारी

घरतन मनहिं बिना किन जाई ❀ करत कहा मोहन चतुराई

सब तन पर मनहीं है राजा ❀ जो कछु करै होय सो काजा

सो तो मन राख्यो तुम गोई ❀ घरको जान कौन विधि होई

इन्द्री गण मन के आधीना ❀ चलत नहीं तन मनहिं विहीना

जो तुम प्रीति करी मनमोहन ❀ तौ दुविधा क्यों लाई गोहन

यह तो तुम जानी ब्रजनाथा ❀ घर हम जाहिं देहु मनसाथा

मन भीतर में सबै मनायो ❀ तुमहीं लै म्वहिं तहां छिपायो

कहत कहा यह दोष तुम्हारो ❀ अजहूं तजौ होहुं मैं न्यारो

लेहु आपनो मन घर जाहु ❀ लोक लाज डर जो पछताहु

तौ अब हमें छांड़ि किन देहु ❀ हम करिहें अन्तर निज गेहु

दो० जाते घटती होय निज, तजि दीजै सो बात ।

दीनो मन में बास तब, अब मनको पछितात ॥

सो० जब मन दीनो मोहि, तवहीं लीनो मोहि तुम ।

जो लेहै मन खोहि, तौ मैं हूं जैहों अनत ॥

सुनहु श्याम ऐसी नहिं कहिये ❀ सदा हमारे मन में रहिये

तुमहिं बिना धृकमन अरु धृकघर ❀ तुम विन धृककुलकान लाज डर

धृक तुम प्रेम बिना पितु माता ❀ तुम विहीन धृक सुत पितु आता

धृक जीवन तुम विन संसारा ❀ धृक सुख तुम विन नंदकुमारा

धृक रसना तुम गुण नहिं गावै ॥ धृक श्रुति तुम्हरी कथा न भावै ॥
 धृक लोचन जिन तुम न निहारे ॥ धृक विचार जो तुम न बिचारे ॥
 धृक दिन रात तुम्हैं बिन जाई ॥ धृक श्वासा तुम बिना बिहाई ॥
 सो सब धृक जामें तुम नाही ॥ तन धन मन तुम बिना बृथाहीं ॥
 ऐसे कहि तन दशा बिसारी ॥ भई सनेह मगन सब ग्वारी ॥
 कबहुं घर तन जान बिचारै ॥ कबहुं हरि की ओर निहारै ॥
 दधि भाजन लै शिर पर धारै ॥ कबहुं धरणी फेर उतारै ॥
 रीती मटुकिन में कछु नाही ॥ कबहुं विचार रहत मन माहीं ॥
 दो० बिहंसि कछो तब सांगरे, जाहु घरन ब्रजनारि ।
 सकुचत पड़िले दान को, मैं लेहौं निरवारि ॥
 सो० ऐसे बचन सुनाय, सखन सहित हरि बन गये ।
 लै गये चित्त चुराय, युवतिन दान मनाय कै ॥

गोपियोंके प्रेमकी उन्मत्त अवस्था लीला ।

रीती मटुकी शिर पर धारी ॥ चलीं सबै उठि गोप कुमारी ॥
 एक एक को सुधि कछु नाही ॥ जानति नहीं कहां हम जाहीं ॥
 जड़ चेतन कछु नहिं पहिचानै ॥ बन गृह कछु विचार न मानै ॥
 लोक बेद गरयादा दोऊ ॥ आप सहित भूलीं सब कोऊ ॥
 बेचत दधि बनही में डोलै ॥ लेहु दही कबहुं कहि बोलै ॥
 कहत डुमन बोलत क्यों नाही ॥ लेहौ दधि कै हम फिरि जाहीं ॥
 तरु तरु सों पूंछत यहि आंती ॥ बन में फिरत प्रेम रस पाती ॥
 मिलत परस्पर बिबश निहारी ॥ कहति फिरति क्यों बनमें नारी ॥
 तिन्हें कहति अपनी सुधि नाही ॥ सो कछु नहिं समुझत मनमाहीं ॥
 दधि भाजन रीते शिर धारै ॥ भरी प्रेम तन दशा बिसारै ॥
 कबहुं यमुना के तट नाही ॥ फिरति कबहुं कुञ्जन के माहीं ॥

कबहुं बंशीबट तट आवैं ❀ ठाढ़ी है तहँ हरिहि बुलावैं
 दो० लीजै गोरस दान हरि, कहँ धौं रहे छिपाय ।

डर न तुम्हारे जात नहि, तुम दधि लेत झिनाय ॥

सो० लेहु आपनो दान, पुनिरिसकरि उठि धायहौ ।

हमैं न देहौ जान, बन में हम ठाढ़ी सबै ॥

बैठ गई मडुकी धर सबहीं ❀ जानति घरसे आई अनहीं

सखा संग लीने हरि ऐहैं ❀ दधि माखन को दान चुकैहैं

दधिहि दुगवत अंचर तरिकै ❀ दीठ गई मडुकिन में परिकै

रीती मडुकी सबन निहारी ❀ गई भभरि उरमें सब नारी

जहां तहां कहि उठीं गुवाली ❀ गोरस ढरकायो कहूँ आली

कोउ कोउ कहत कान्ह ढरकायो ❀ कोउ कहै सखन संग हरि खायो

भई सुरति कहु तब तन माहीं ❀ गई घरहि हम तब ते नाही

सकुच भई कहु गुरुजन डरते ❀ प्रातहि ते हम आई घरते

रहीं कहां तब ते बन माहीं ❀ यह तो सुरति हमें कहु नाही

जब हरि सखन संग दधि खाई ❀ गये बहुरि बन कुँवरकन्हाई

तब लौं की तो सुधि हम पाहीं ❀ भई कहा पुनि जानति नाही

जान परी हमको तो ह्यारी ❀ डारि गये शिर श्याम ठगोरी

दो० श्याम बिना यह को करै, लायो दधि को दान ।

तन सुधि भूली तबहिं ते, वाकी गृहु सुखकान ॥

सो० मनहरिलीन्हों श्याम, ता बिन निबहै कौन बिधि ।

ऐसे कहि सब बाम, घर को चलन बिचारहीं ॥

मन हरि सों तन घरहिं चलावैं ❀ ज्यों गजमत्त चलत बचि पावैं

श्याम रूप रस मद सों भाख्यो ❀ कुल मरयाद महावत देख्यो

करम नेह बंधन सों तोख्यो ❀ मुरै न लाज कुँजन को मोख्यो

गुरुजन अंकुश जो सुधि आवै ❀ तब तन पर को पाव चलावै
 ऐसे गई सदन ब्रजबाला ❀ नहीं भावत क्षण बिन नंदलाला
 बूझत गुरुजन जब कछु जिनसों ❀ औरै बात बतावत तिनसों
 गारी देत सुनत नहीं कोऊ ❀ श्रवण शब्द हरि पूरे दोऊ
 मात पिता बहु त्रास दिखावै ❀ नेक नहीं सो उर में ल्यावै
 बार बार जननी समभावति ❀ काहे को तुम हमहि ससावति
 जहां तहां काहे तुम जाओ ❀ नहीं अपनी कुलकान लजाओ
 दधि बेचौ घर सूधे आवो ❀ काहे इतनो बिलंब लगावो
 बूझे ज्वाब देति तुम नार्ही ❀ वसी कहा तुम्हरे मनमार्ही

दो० ऐसे सिखवत मातपितु, सो न करति कछु कान ।

लागत हैं तिनके बचन, उर में बाण समान ॥

सो० तिन्हैं कहत मनमार्हि, धृकधृक इनकी बुद्धि को ।

जिन्हैं श्याम प्रिय नाहिं, तिन्हैं बनै त्यागे भले ॥

जिनको हरिकी प्रीति न भावै ❀ तिनको मुख जनि बिधि दिखावै
 ऐसे बिनय करति बिधि पार्हीं ❀ गुरुजनको निंदति मनमार्हीं
 नेकु नहीं घरसों मन लागत ❀ बिसरत श्याम न सोवत जागत
 नयन श्याम दर्शन रस अटके ❀ श्रवण बचन रसते नहीं मटके
 रसना श्याम बिना नहीं बोलै ❀ मन चंचल संगहि सँग डोलै
 नासा अंग सुगंध लुभानी ❀ सुरत श्याम के रूप समानी
 चरण चलत चाहत दिशि तेही ❀ जिहि दिशि सुन्दरश्याम सनेही
 लोकलाज कुलकान मियई ❀ रंगी श्याम के रंग सुहाई
 प्रातचली दधि लै ब्रजमार्हीं ❀ इन्द्रीगण मन बुधि बश नार्हीं
 तनलै निकसी बेचन गोरस ❀ रसनासों अट्कयो हरिको यस
 दधिको नाम भूलिगइ बाला ❀ कहत लेहु कोऊ गोपाला

भीज रह्यो मन मोहन को रस ❀ व्याप गई उरमाहिं दशादस
दो० फँसीं सबै खगवृन्द ज्यों, हरिबिबि लटकनजाल ।

तरफरात तामें परी, निकसि सकति नहिं वाल ॥

सो० बोलत मुख न सँभार, पान किये जिमि वारुणी ।

बिथुरीअलक लिलार, पग डगमग जिततितपरै ॥

दाधि बेचत ब्रजबीथिन डोलैं ❀ अलवल वचन बदनते बोलैं

गोरस लेन बुलावत जोई ❀ तिनकी बात सुनत नहिं कोई

क्षण कछु चेत करत मनमार्ही ❀ गोरस लेत आज कोउ नाहीं

बोलउठत पुनि लेहु गोपालहिं ❀ अटकिरह्यो मनवा हरि ख्यालहिं

लेहु लेहु कोऊ बनमाली ❀ गालिन गालिन बोलति ग्वाली

कोउ कह श्यामकृष्ण बनवारी ❀ कोउ कह लाल गोवर्द्धन धारी

कोउ कहि उठति दान हरिलायो ❀ कबहुं भई कि तुमहिं चलायो

देह गेहकी सुरति बिसारी ❀ फिरति शीश मडुकी दाधिधारी

जाहि देहकी सुधि कछु होई ❀ दधिको नाम लेत तव सोई

इहिबिधि बेचतही सब डोलैं ❀ आप विकानी बिनही मोलैं

श्याम बिना कछु और न भावै ❀ कोऊ कितनो कहि समुभावै

हरि दरशन बिन मति भइ भोरी ❀ अंतर लगी सुरत की डोरी

दो० प्रकट्यो पूरण नेह उर, जित देखैं तित श्याम ।

समुभाई समुभूत नहीं, सिखदै थाक्यो ग्राम ॥

सो० ज्यों दीपक घरमाहिं, बाहर नहिं देख्यो परै ।

गुप्त होत सो नाहिं, जब तृण छ दावा भयो ॥

इहि बिधि मगन सकल ब्रजनारी ❀ कृष्ण प्रेमरस मद मतवारी

सकल प्रेम की मूरति पूरी ❀ कोऊ तिन में नाहिं अधूरी

एक दशा सबही की जानो ❀ कहँलगि सबको प्रेम बखानो

तिनमें श्री बृषभानु दुलारी * सकल शिरोमणि हरिकी प्यारी
नेक नहीं हरि ते सो न्यारी * तिनकी कथा कहत बिस्तारी
दधि भाजन माथे पर धारै * लेहु श्याम कहि बचन उचारै
बूझति तिन्हें और ब्रजनारी * बेवत कहा फिरत तू ग्वारी
प्रातहि ते लीने दधि डोलै * मुख ते नाम कान्ह को बोलै
कहा करत यह हमें बतावो * कछु हमको निज बात सुनावो
उफनत तक्र चुवत अंगमाहीं * ताकी सुरत तोहि कछु नाहीं
इत तें उत उत तें इत जाई * बुधि मर्यादा सब मिटाई
मैं जानी यह बात बनाई * तेरो मन हरि लियो कन्हाई

दो० तिन्हें कहत म्वहि नन्दधर, कहां सुदेहु बताय ।

जहां बसत वह सांवरो, मोहनकुँवर कन्हाय ॥

सो० है धौं याही गांव, कैधौं कहूँ अन्तर बसत ।

कान्हर जाको नांव, मैं खोजत वाको फिरौं ॥

बहुत दूर तें हौं मैं आई * मोहि देहु नंद सदन बताई
नन्दहि के द्वारे पर ठाढ़ी * बूझत अति सम्भ्रमता बाढ़ी
लोक लाज कुलकी सब नासी * मन बँधगयो प्रेम की फांसी
तब इक सखी परम हितकारी * हरिकी प्यारीकी अति प्यारी
प्यारी को निज दिग बैठाई * शिक्षा बचन कहत समुझाई
अहे राधिका कुँवरि सयानी * क्यों ऐसी अब भई अयानी
ऐसे प्रकट प्रेम नहीं कीजै * देखि बिचारि धीर उर दीजै
हैंसिहैं लखि सब ब्रज नरनारी * एकाहि बार लाज तें डारी
ऐसे कहा फिरत बिततानी * मात पिता गुरुजनहि भुलानी
जो पै कृष्ण प्रेम धन पैये * राखिय गुप्त न प्रकट जनैये
ऐसी तोहि बूझिये नाहीं * समुझ देख अपने मनमाहीं

आजहुँ चेत बात सुन मेरी ❀ कहत कुँवरि तेरे हित केरी
दो० कृष्ण प्रेमधन पायके, प्रकट न कीजै बाल ।

राखिय उर यों गोयकै, ज्यों मणिराखत ब्याल ॥

सो० तू अति नागरि नारि, पायो नागर नेह जो ।

तौ कत देति उचारि, कहिहैं तोहि गँवारि सब ॥

मैं जो कहति सुनति कै नाहीं ❀ दैहै ज्वाव कछू मो पाहीं

कहिहै बचन कि मौनहिं रहै ❀ घर अपने जैहै कि न जैहै

लोगनमुख मुनिहैं पितु माता ❀ ब्रज में प्रकटी है यह वाता

मानेगी मम बचन कि नाहीं ❀ कै फिरिहै ऐसेहि ब्रज माहीं

जो यह श्रीति श्याम सों जोरी ❀ लाज किये ह्वे है कह थोरी

ध्यान श्याम को धरि उर माहीं ❀ लाज छाँड़ि कत भ्रमत वृथाहीं

मुखतौ खोल सुनहुँ तुव वानी ❀ कैसो कहति परै कछु जानी

कहा कहत मोसों तुम आली ❀ मन मेरो लीनों वनमाली

तब तें मोको कछु न सुहाई ❀ जित देखों तित कुँवर कन्हाई

अब लौं नहिं जानत मैं वोही ❀ कहा कहत है अब तें मोही

कहां गेह को पितु अरु माता ❀ कहँ दुरजन को गुरुजन आता

कहां लाज कहँ कान बड़ाई ❀ तू कह कहत कहां ते आई

दो० बार बार तू कहत कह, मैं नहिं समझति बात ।

मेरे मन में घर कियो, वा यशुमति के तात ॥

सो० रहत न मेरी आन, अपनी सों मैं कर थकी ।

तू तो बड़ी सुजान, कहा देत सखि दोष स्वहिं ॥

मेरे हाथ नहीं मन मेरो ❀ सुनै कौन सखि सिखवन तेरो

इन्द्रिगण मन की अनुगामी ❀ सब इन्द्रिन को मन यह स्वामी

सो मन हरि लीनो ब्रजनाथा ❀ इन्द्री गई सबै मन साथी

अब मेरे बश में कोउ नहीं * रहीं जाइ सब हरिके पाहीं
नयन दश के लोभ लुभाने * श्रवण शब्द के माहिं समाने
अब ये फिरत न मेरे फेरे * कहा होत सिखये सखि तेरे
मेरे हाथ हाथ में * नहीं * कौन करै घूंघुट पट छाहीं
अब तो प्रकट भई जग जानी * वा मोहन के हाथ बिकानी
मन मान्यो मोहन सों मेरो * जग उपहास करै बहुतेरो
मेरे मन अब बस्यो कन्हई * कै लघुता कै होहु बड़ाई
मैं अपने मन हरिसों जोख्यो * नाचकछयो तब घूंघुट छोख्यो
अब तो मेरे मन यह मानी * मिल्यो श्याम सों ज्यों पय पानी

दो० मेरो मन हरिसँग बस्यो, लोकलाज कुल त्याग ।

और ताहि सूझै नहीं, भो जहाज को काग ॥

सो० ऐसे सखिहि सुनाय, मौन गही पुनि नागरी ।

देह दशा बिसराय, मगन भई रस श्याम के ॥

जाय पखो मन वाही ख्यालहिं * बोलउठी कोउ लेहु गोपालहिं
कहत सखीसों तू को आली * कहँ वह दधिदानी बनमाली
नन्दसदन सखि मोहिं बताओ * नँदनन्दन प्रिय बेग मिलाओ
बिंहबिबश अति व्याकुल बाला * मन हरिलीनो नन्द के लाला
दधि मटुकी लीने शिर डोलै * दारे आय नन्द के बोलै
इत उत जाय तहीं फिरि आवै * लेहु कान्ह दधि टेरि सुनावै
भ्रम भ्रम बिबश भई सब ग्वाली * चलीं बनहिं खोजत बनमाली
बंशीवट यमुना तट जाई * कहत दानदधि लेहु कन्हई
फिरत बिकल बन बन दधि लीने * तन मन हरिको अर्पण कीने
कीन्हो दिनकर प्रेम प्रकाशा * लोकलाज डर तम कर नाशा
तनकी दशा बरणि नहिं जाई * रोम रोम में रमे कन्हई

प्रेम अधिक ब्रज गोपकुमारी ❀ गावत वेद पुराण पुकारी
 दो० कृष्ण राधिका के चरित, अति पवित्र सुखखान ।

कहत सुनत भवभयहरण, रसिकजनन के प्रान ॥

सो० रसिकशिरोमणि राय, गोपीजन मनके हरन ।

कहाँ सु अब सुखदाय, रसलीला जो ब्रज करी ॥

देखि दशा राधा की ग्वाली ❀ शिक्षा करति हती जो आली

चकित रही मनमांझ विचारी ❀ या शिर श्याम ठगौरी डारी

गई सखी सो हरि पै धाई ❀ कहत मुनहु प्रभु कुँवर कन्हाई

ढूँढ़ति फिरति तुम्हें इक नारी ❀ अति सुन्दरी नवलसुकुमारी

पहिरे नीलाम्बर अति सोहै ❀ मुखद्युति चन्द निरखि मनमोहै

प्रातहिं ते लीने दधि डोलै ❀ लेहु गोपाल वदन तें बोलै

भ्रमत भ्रमत अति विकल भई है ❀ वंशीवट की ओर गई है

मन बच कर्म जान मैं पाई ❀ तुम में बाको प्राण कन्हाई

ताहि मिलो कबहुं सुखदाई ❀ कहत सखी करिकै चतुराई

तुमबिन बिरह विकल अतिवाला ❀ मिलहु वेग ताको नँदलाला

सुनत श्याम मन हर्ष बढ़ायो ❀ सांची प्रीति जानि मुख पायो

हरि हँसि बिदा सखी को कीनो ❀ आप दरश प्यारी को दीनो

दो० परम हर्ष दोऊ मिले, राधा नन्दकुमार ।

कुंज सदन मोहति मनो, तनधरि छबि शृंगार ॥

सो० श्यामा अरुघनश्याम, कोटिका मरति द्युतिहरन ।

ब्रजबासी उर धाम, युगलकिशोर बसो सदा ॥

सोहत कुंज कुटी सुखरासी ❀ पिय घनश्याम बाम चपलासी

बिरह ताप तन दूर निवारी ❀ बोली मोहन सों तव प्यारी

कहा कहाँ तुमसों सुन्दर घन ❀ कहत लजाति बाम मनहीं मन

होत चवाव सकल ब्रजमाहीं * सुनत श्रवण सहिजात सुनाहीं
जादिन तुम गैया दुहि दीनी * हाहाकरि दुहनी मैं लीनी
सहज गही बहियां तुम मेरी * मैं हँसि तनक बदन तनहेरी
तादिन ते गृह मारग जित तित * करत चवाव सकल ब्रजजन नित
यहै कहै ब्रज में सब कोऊ * राधाकृष्ण एक हैं दोऊ
यह सुनि घर गुरुजन दुख पावैं * कटुक बचन कहि त्रास दिखावैं
निकसत द्वार जबहिं तुम आई * रहत सबै तब देखि लुगाई
निंदत तुम को मोहिं सुनाई * सो मोपै हरि सह्यो न जाई
कहत मनाहिं सबको तजि दीजै * इन बिमुखन को सङ्ग न कीजै

दो० धृकधृक ते नर नारि हरि, जिन्हें न तुमपद प्रेम।

हितकरि तुम जाने नहीं, कहा निबाहे नेम ॥

सो० मैं लीन्हों दृढ़ नेम, सुनहु श्यामसुन्दर सुखद।

तुम पदपंकज प्रेम, यहै पतिव्रत पारि हों ॥

यह हरि तुम बिन कासों कहिये * ब्रजबसि काके बोल न सहिये
ताते बिनय करति तुम पाहीं * वा पैड़े तुम आवहु नाहीं
जो आवो तो म्वहिं न जनावो * मुरलीधुनि मोको न सुनावो
मुरली की धुनि सुनहु कन्हई * बिन देखे म्वहिं रह्यो न जाई
प्रेमाकुल सुनि प्रियकी बानी * बोले विहँसि श्याम सुखदानी
सांच कहत ब्रजके नर नारी * तुम नेकहु मोते नहिं न्यारी
कहन देहु गुरुजन कह जाने * वे अपने सब मुरत भुलाने
प्रकृति पुरुष एकै हम दोऊ * तुम मोते कछु भिन्न न कोऊ
उभय देह लीला हित ठानी * घट है भेद नहीं कछु पानी
जल थल जहां तहां तन धारों * तुम तज कहूं रहत नहिं न्यारों
देह धरे को यहै विचारा * मानिय कुल कुटुम्ब व्यवहारा

लोक लाज गृह छांड़ि न दीजै ॥ मात पिता गुरुजन डर कीजै
 दो० प्रीति पुरातन राखि उर, जाहु प्रिया अब धाम ।

प्रकट न कीजै बात यह, कहत बिहँसिकै श्याम ॥

सो० सुनत श्यामके बैन, हरष भई मन नागरी ।

भयो हिये अति चैन, प्रीतिपुरातन जानि जिय ॥

अति आनन्द भई मन प्यारी ॥ तब जान्यो हरि पति मैं नारी

भूलि गई काहे पछितानी ॥ यह महिमा हरि की जिय जानी

युग युग प्रभु लीला बिस्तारी ॥ जान लई बृषभानु दुलारी

हरिमुख अलप चितै मुसकानी ॥ रही परम आनंद उर मानी

कहत सुनहु प्रिय अन्तरयामी ॥ तुम कर्त्ता हौ जगके स्वामी

मात पिता गुरुजन हित भाई ॥ कहा नाथ यह नई सगाई

जो कर्त्ता औरै सुनि पाऊं ॥ तौ है प्रभु तिनको पतियाऊं

अरु परतीत जगत की जानौ ॥ तौ परमित छूटत डर मानौ

जो जाको सो ताहि को जानै ॥ कैसे औरन को मन मानै

अब नहीं तजौ कमलपद पासा ॥ मन मधुकर कीनो जब वासा

यह सुनि हरि प्यारी उरलाई ॥ बहुविधि करि प्रबोध समुझाई

तन धरि लोक वेद विधि कीजै ॥ प्रीति रीति उर में धरि लीजै

दो० कहत श्याम अब जाहु घर, तुमको भई अबार ।

प्रीति पुरातन गोय उर, करिये जग व्यवहार ॥

सो० परम प्रेम उर लाय, घर पठई हरि भावती ।

चलीसंग सुखपाय, फिरफिरचितवत श्यामतन ॥

चली संग सुख लूट किशोरी ॥ लसत अंग मरगजी पदोरी

गजगति जाति भवन सुख पाई ॥ रहे रीफि छवि निरखि कन्हाई

प्यारी मन आनन्द बढ़ाये ॥ सुख भर चली लूटसी पाये

मनहिं कहत अति उमँग उछाहू ॥ यह धन प्रकट करौ नहिं काहू
 सखियनहूँ नहिं भेद जनाऊँ ॥ कृष्ण प्रेम धन गुप्त दुराऊँ
 श्याम कछो सोई उर धरिहौ ॥ प्रीति पुरातन प्रकट न करिहौ
 ऐसे मनहिं बिचारति जाहीं ॥ तहँ इक सखी मिली मग माहीं
 अंग अंग छवि लखि मुसकानी ॥ कहत बिहँसि प्यारीसों बानी
 कह फूली सी आवति राधा ॥ आज रूप कछु अंग अगाधा
 बदन सिकोरति मोरति भौहँ ॥ कहति कछू मनहीं मन मोहँ
 देखियत कछू अंग रस भीने ॥ सुलभ मनोरथ हरिसँग कीने
 हम सों सो सब बात उधारौ ॥ दुरत न गन्ध दुरावन हारौ

दो० फिरतहतीब्याकुलअबहिं, जिनकेदरशनलाग ।

कहां मिले नँदनन्द सो, धनि धनि तेरो भाग ॥

सो० नहिं पावत हैं जाहि, योगीजन जप तप किये ।

बश करि पायो ताहि, तैं कैसे कहू नागरी ॥

कहा कहहिं सखि भई बावरी ॥ करन कछू चाहति चवावरी
 तू हँसि कहति मुने जो कोऊ ॥ सो तौ सांवि मानि है सोऊ
 चकित होति मुनि अचरज तेरो ॥ है बिचार पुनि धरि कहूँ मेरो
 ऐसे होय कहति तू जैसे ॥ गुरुजन में निबहौ पुनि कैसे
 कहा भेद कछु तोसों मोसों ॥ मैं दुराव करिहौ सखि तोसों
 को नँदनन्द कहति तू जिनकों ॥ मैं कबहूँ देख्यो नहिं तिनकों
 कै गोरे कै बरण सांवरे ॥ रहत ब्रजहिं कै अनत गांवरे
 मैं तो नहिं जानति वै जैसे ॥ तू वह बात मिलावति कैसे
 जाहि चली जानी मैं तोकों ॥ कहा भुगवति है तू मोकों
 अबहीं फिरति हती बौराई ॥ आजहि पढ़ि लीनी चतुराई
 याही ब्रज हम तुम औ वोऊ ॥ दूर नहीं जो है कहूँ कोऊ

परिहौ कबहू फंद हमारे ❀ करि हैं तबहिं जुहार तुम्हारे
 दो० निपुण भई उनके मिले, वह सुधि गई सुलाय ।

आवति है बनकुंजते, बातें कहति बनाय ॥

सो० रीभे श्याम सुजान, कहे देति अँगकी पुलक ।

मोसों करत सयान, सगि बगि रही सनेहजल ॥

हँसत कहत कैधों सुन रानी ❀ तेरी सों मैं कछुअ न जानी

कह्यो कहा म्वहिं बहुरि सुनावै ❀ तोहिं सौह मेरी जु दुखावै

कबहू कछू भाव यह पायो ❀ तैं देख्यो कै किनहुं सुनायो

ऐसी कहत और जो कोऊ ❀ सुनती मोपै उतर न सोऊ

बूझत मोहिं लगावत ताही ❀ सपने हूँ देख्यो नहिं जाही

ऐसी मोहिं कहौ जिन कोई ❀ भूठी बातनि पर दुख होई

उचटायै पैहै कछु मोसों ❀ बहुरि नहीं बोलोंगी तोसों

तोते और काहि हित पैहौं ❀ जाते हित की बात जनैहौं

यह परतीत न ताको होई ❀ मैं राखति तोते कछु गोई

चतुर सखी मन में जब जानी ❀ मोते तौ कछु नाहिं छिपानी

त्रास भई याके मन माहीं ❀ ताते बात कहति यह नाहीं

तब यह कही हँसत मैं तोसों ❀ जिन मन में दुख मानै मोसों

दो० मानी तेरी बात अब, कहूँ तू कहूँ वे श्याम ।

हमहुँ उन्हें जानै नहीं, बसत कौन धौं ग्राम ॥

सो० हम आगे की आइ, भई सयानी लाड़िली ।

हँसत कह्यो घर जाइ, तैं नहिं हरि कबहूँ लखे ॥

सकुच सहित बृषभानदुलारी ❀ गई सदन गुरुजन डर भारी

जननी कहत कहां हति प्यारी ❀ डोलति फिरति अजहुँ है बारी

घर तुहिं तनक देखियत नाहीं ❀ दधि लै जात फिरत बन माहीं

श्याम संग बैठति है जाई ❀ आज तोहिं धिखत हो भाई
काहे को उपहास करावति ❀ दाधिहि बेच सूधे किन आवति
बृथा करति मैया रिस मोसों ❀ को अब बात कहै री तोसों
ऐसी को बहि गई विधाता ❀ श्याम संग फिरिहै सुन माता
कौने बात कही यह तोसों ❀ ताको नाम लेहि किन मोसों
धन्य भ्रात धनि धनि तू माई ❀ ऐसी बात कहति म्वहिं लाई
तू परधर क्षण क्षण कित जाई ❀ भँवर जाति नहिं नेकु डराई
श्यामा श्याम सकल ब्रजमाहीं ❀ द्वै रहे लाज लगति तुहिं नाहीं
बड़े महरकी सुता कहावति ❀ काहे को पितु मातु लजावति

दो० खेलन को मैं जाउँ नहिं, कहा कहति री मात ।

मोपै जात सही नहीं, यहै अनोखी बात ॥

सो० घरघर खेलन जात, गोपनकी सब लरकिनी ।

तू मोहीं रिसियात, तिनके मात पिता नहीं ॥

मनहीं मन समझति महतारी ❀ अबहीं तो मेरी है बारी
कहा भयो तन बाद भई है ❀ लड़काई अबहीं न गई है
भूठहिं बात उड़ी यह सारी ❀ श्यामा श्याम कहत नर नारी
खेलत देखि कहत सब कोऊ ❀ अबहीं तो बालक हैं दोऊ
सुनत सुता मुख सिखकी बानी ❀ मनहीं मन कीरति मुसक्यानी
तब गहि उर लाई चुचकारी ❀ पसमोधति उरसों रिस दारी
खेलहु संग लरकिनिन माहीं ❀ खेलन को मैं बरजत नाहीं
श्याम संग सुनि होत दुखारी ❀ भूठहि लोग लगावत गारी
जाते कुल को दूषण होई ❀ सुनि प्यारी कीजै नहिं सोई
अब राधा तू भई सयानी ❀ मेरी सीख लेहि जिय मानी
जननी के मुखकी सुनि बानी ❀ श्रीवृषभानु सुता मुसकानी

मन मन विनय करत हरिपाहीं ❀ सुनहु श्याम तुम सब घट माहीं
दो० मात पिता मानत मनहिं, लोकलाज कुलकान ।

नहिं जानत तुमको सुखद, जगतईश भगवान ॥

सो० लेत तुम्हारो नांव, सकुचत हौं इनके निकट ।

यह समुझत पढ़ताव, तुम बिमुखन में क्यों रहौं ॥

तुम भवहिं कह्यो कानिकुल राख्यो ❀ क्यों विष साय सुधा जिन चाख्यो

जिन्हें नाथ तुम पद दृढ़ प्रेमा ❀ कैसें तिन सों निबहत नेमा

अहो श्याम मैं मन क्रम बानी ❀ नाथ तिहारे हाथ बिकानी

ऐसे कृष्ण हृदय में आनी ❀ बोली जननी सों हँसि बानी

तू अब कहति कहा मोकोरी ❀ अकथ बात है मा कछु तोरी

अब हरिसंग न खेलौं जाई ❀ जा कारण तू मोहिं सुगाई

आवन दे बाबा घर माहीं ❀ यह सब बात कहौं उन पाहीं

देति गारि भवहिं श्याम लगाई ❀ ऐसे लायक भये कन्हई

रोकी मोकों काल्हि गली मैं ❀ सखिन संगमें जाति चली मैं

लागे कहन बैसुरिया मेरी ❀ तू लै गई चुराइ सो देरी

छठिआठै मोसों हैं जिन सों ❀ मोहि लगावति है तू तिन सों

सुन सुनकर राधा की बानी ❀ मुख निरखत जननी मुसकानी

दो० कहति मनहिं मन अबहिं लौं, नहीं गई लरिकाय ।

बारेही के ढंग सबै, अपनी टेक चलाय ॥

सो० अब जैहै मचलाय, कापै जाय मनाय पुनि ।

हारिमानि रहि माय, बालकबुधिं जिय जानिकै ॥

बोली लई हँसि कै दुलराई ❀ पुनि पुनि कहि मेरी रिसहाई

कण्ठ लगाय लई अति हितसों ❀ रही चकित शोभा लखि चितसों

चतुर शिरोमणि हरिकी प्यारी ❀ परम चतुर बृषभानदुलारी

वातन हीं माता बहिराई ❀ नीके राखि लई चतुराई
 कृष्ण प्रेम धन पाय छिपायो ❀ संग सखी तिनहुं न जनायो
 जैसे कृपण महा धन पावै ❀ धरत दुराय न प्रकट जनावै
 सखी मिली जो मारग माहीं ❀ कह्यो जाय तिन सखियन पाहीं
 सुनहु सखी राधा की बातें ❀ कैसी आज करी उन घातें
 बृन्दावन ते अबहीं आई ❀ हर्ष सहित मैं लखि भग माई
 औरै भाव अंग छवि छाई ❀ श्यामहिं मिली भई मनभाई
 मोकों देखत ही हँसि दीनों ❀ मैं हूँ हर्ष मनहिं मन कीनों
 जब मैं कही मिले हरि तोसों ❀ तब रिसकरि फेस्यो मुख मोसों

दो० मो सों तब लागी कहन, को हरि काको नाँव ।

कै गोरे कै सांवरे, बसत कौनसे गाँव ॥

सो० मैं तौ जानत नाहिं, लेत नाम तू कौन को ।

लखेन सपनेहुं माहिं, सांच कहति कै हँसत म्बहिं ॥

ऐसे कहि टढ़ी करि भोहैं ❀ चितई नेकु न मो तन सौहैं
 वह निधरक मैं सकुच गई री ❀ और कहौ तौ करत खई री
 तब मैं यह कहि घर पठई री ❀ मैं झूठी तू सांच भई री
 दोऊ एक भये अब जाई ❀ हमहुं सों यह बात दुराई
 घर धौं जाय कहा अब कैहैं ❀ कैसी धौं तहँ बुधि उपजैहैं
 मुनि कै बात सखी मुसकानी ❀ प्यारिहि देखन को अतुरानी
 कहत सबै जबहीं हम जैहैं ❀ तबहीं जाय प्रगट करि दैहैं
 कहां रहै यह बात छिपानी ❀ दूध दूध पानी सो पानी
 आंखिन देखतही लखि जैहैं ❀ कैसे हम सों बात छिपैहैं
 अपना भेद नहीं वह कैहै ❀ मुनि हौं कैसे गाल बजैहैं
 लखहु चरित्र जाय तुम वाको ❀ राधा कुँवरि नाम है जाको

मैं बूझों करि बहु चतुराई ❀ नेकहु थाह न वाकी पाई
 दो० बड़े गुरूकी बुधि पढ़ी, वहू नहीं पतियात ।

एकौ बात न मानि है, सौ सौ सौहैं खात ॥

सो० रहिहौ सब पढ़ताय, सुनत बचन वाके बदन ।

अब जैहै रिसयाय, बातन बैर बढ़ाय हौ ॥

कहा बैर हम सों वह करि है ❀ बातन कैसे हमहिं निदरि है

औरन सों जो करती दरी ❀ तो हमहूँ जानती सयारी

वाकी जाति भले हम पाई ❀ हमहीं सों यह बात चुराई

परि है जब मेरे फँद आई ❀ दूरि करौ वाकी लँगराई

जो नहिं हमसन भेद कहैगी ❀ तौ पुनि कैसे कै निबहैगी

हम सों बैर किये कह पैहै ❀ व्हुरि लिये मडुकी शिर ऐहै

चलौ सब देखैं घर ताको ❀ है निधरक कैधों डर वाको

बूझे वात कहा धौं कैहै ❀ हमसों मिलिहै कै दुरि जैहै

रिस करिहै कैधों हँसि बोलै ❀ वात छिपावै कैधों खोलै

सहज सुभाव किधौं गरवानी ❀ यह कहि चलीं अली सब स्यानी

गई निकट राधे के जवहीं ❀ जानगई नागरि मन तवहीं

ये सब मोपर रिस करि आई ❀ तब इक मनमें बुद्धि उपाई

दो० काहू कर कीनों नहीं, आदर करि चतुराई ।

मौन गही बोलत नहीं, बैठि गई निठुराई ॥

सो० लखि सब सखी सुजान, बैठिगई ढिग आपई ।

औरै वात बखान, आपसमें लागीं करन ॥

राधा चतुर चतुर सब आली ❀ चतुर चतुरकी भेंट निराली

उनतौ गही मौन निठुराई ❀ इन लखिलई तामु चतुराई

मुहां चहीं आपुस में कीन्हीं ❀ याकी वात सबै हम चीन्हीं

कहा भेद हमसों यह भाखै ॥ उलटे हमहीं पर रिस राखै ॥
 वूमहु इनहिं खनट करि कोई ॥ कहा आज इन मौन लयोई ॥
 हमसों कहा ओट इन लीन्हों ॥ साठसई हमहीं कर दीन्हों ॥
 एक सखी तब विहँसि सुनायो ॥ कहौ मौनव्रत किन सिखरायो ॥
 धनि वह गुरु मंत्र जिन दीनो ॥ कान लगतही ऐसो कीनो ॥
 काल्हि और परभाताहिं औरै ॥ अबहिंभई कछु और कि औरै ॥
 मुनि यह बात सबै हम धाई ॥ चकित भई देखन तुहिं आई ॥
 कहा मौनको फल अब कहिये ॥ मुनें कबू तो हमहुं गहिये ॥
 इक सँग भई सबै तरुणई ॥ मंत्र लियो तब हमन बुलाई ॥

दो० अब तुमहीं को हम करें, गुरु देहु उपदेश ।

हमहुं राखैं मौन व्रत, करें तुम्हें आदेश ॥

सो० हम को कियो अजान, चतुर भई तू लाड़िली ।

कहूँ सीख्यो यह ज्ञान, ऐसी विधि लागीं करन ॥

रहत एक सँग हम तुम प्यारी ॥ आजहिं चटकभई तू न्यारी ॥
 कहा भयो तोहिं किनहिं सिखाई ॥ नई रीति यह कहा चलाई ॥
 हम तो तेरे हित की करिये ॥ और कहै तासों सब लरिये ॥
 सुनत कुँवरि सखियनकी बानी ॥ बोली करत सबै यह जानी ॥
 गुणागारि नागरी सयानी ॥ बोली सहित निदुई बानी ॥
 तुम प्रीतम कै बैरिनि मेरी ॥ बूमति तुम्हें कहौ सखि हेरी ॥
 वाको कहति जु गैल मिलीरी ॥ नहीं कही उन मोहिं भलीरी ॥
 कह्यो मोहिं तुम श्याम मिलेरी ॥ मैं चकरही सोह मोहिं तेरी ॥
 मेरे अँग छवि और बताई ॥ तब मैं भई बहुत दुखहाई ॥
 जिनको मैं सपने नहीं जानौ ॥ फिरि फिरि तिनकी बात बखानौ ॥
 मेरो कछु दुराव है तुमसों ॥ तुमहीं कहौ सखी सब हमसों ॥

कहां रहति मैं कहाँ कन्हाई ❀ घर घर करत चवाव लुगाई
दो० और कहै तौ मोहिं कछु, नहिं व्यापहि मनमाहिं ।

तुमहीं कहौ जो बात यह, तौ दुख होय कि नाहिं ॥

सो० तुम पर रिस मोगात, ताते आदर नहिं कियो ।

सुनि प्यारी की बात, रहीं सबै सुखतन चितै ॥

बोली एक सखो तिन माहीं ❀ हम तौ तोहिं कह्यो कछु नाहीं

ताही पर होती रिसहाई ❀ जिन यह तोसों बात चलाई

प्रथमहिं हमें प्रगट यह करती ❀ हमहूं ताही साँ सब लरती

क्यों सखि प्यारिय दोष लगावैं ❀ भूठी बातन बैर बढ़ावैं

तेरे श्याम कहां इन देखे ❀ काहे को सपने हू पेखे

भेदहिं भेद कहत सब बातें ❀ दैदैं सैन करत सब घातें

प्यारी सबके मन की जानैं ❀ सबसों रूखे वचन बखानैं

कौन कौनको मुख सखि गहिये ❀ जाको जो भावै सो कहिये

मन ते गढ़ि गढ़ि बात बनावैं ❀ भूठी को सांची ठहरावैं

बिना भीतही चित्रित केरो ❀ बातन गहि आकाशहि फेरो

नेक होय तौ सबही सहिये ❀ भूठी सबै सुनत उर दहिये

आवत बोलन सुनि सुनि बातें ❀ रहियत मौन सबन ते तातें

दो० वृथा भेर मोसों करत, कहि कहि भूठी बात ।

भलो नहीं उपहास यह, मैं सकुचत दिनरात ॥

सो० मिले सखी जो श्याम, और कहां याते भली ।

सुनियत है अभिराम, नन्दमहरको सुवन अति ॥

कैसे हैं वे कुँवर कन्हाई ❀ जिनको नाम लेत यह माई

नयनन भरि मैं देखे नाहीं ❀ सुनियत सदा रहत ब्रज माहीं

कहत लजाति बात इक तुमको ❀ इक दिन मोहिं दिखावहु उनको

देखहुं धौं कैसे हैं तिनको ❀ तुम सब मोहिं कहति हौ जिनको
 सुनि बृषभानु सुताकी बानी ❀ हँसीं सबै गोपिका सयानी
 सुन प्यारी तैं सीख हमारी ❀ कहन देहि कहि करै कहारी
 तोको झूठ कहे कह पैहैं ❀ आपन को वे पाप कमैहैं
 यह काहू पै जात छिपायो ❀ नेक सुगन्ध न दुरत दुरायो
 तैं काहे को कान्हहि देख्यो ❀ खरि क दुहावन हूं नहिं पेख्यो
 सुनहिं सखी राधा की बानी ❀ कहत कछु यह अकथ कहानी
 रहति सदा ब्रज गांव मँझारी ❀ इन नहिं देखे री गिरिधारी
 जो हम सुनी रही सो नार्हीं ❀ ऐसेहि बायु बही ब्रज माहीं
 दो० सुन प्यारी अब तोहिं हम, दिखैहैं नंद नन्द ।

तब बदिहैं यह राखिहौ, देखि उन्हें छल छन्द ॥

सो० जब अइहैं इत श्याम, तब हम तोहिं बताइहैं ।

ताहि देखिहैं बाम, हैं उनहूँ अभिलाख अति ॥

तब तू चीन्ह लीजियो उनको ❀ कहति नहीं देखे मैं जिनको
 हैं कैसे कारे की गोरे ❀ सुन्दर चतुर किधौं अति भोरे
 तोहिं देखि ओऊ मुख पैहैं ❀ तेरे हित बांसुरी बजैहैं
 नाना भाव करेंगे जबहीं ❀ हम सब तोहिं कहेंगी तबहीं
 तुम हौ चतुर राधिका जैसे ❀ वेऊ श्याम चतुर हैं तैसे
 हँसति कहति सब गोपकिशोरी ❀ चिरजीवहु यह सुन्दर जोरी
 कबहूँ तो फँद परिहौ आई ❀ तबहीं देहिं चिन्हाय कन्हाई
 सुनत व्यङ्ग सखियनकी बानी ❀ मन मन बिहँसत कुँवर सयानी
 चतुराई नीके गहि राखी ❀ सखियन सों ऐसे हँसि भाखी
 जो तुम जिय में औरै जानी ❀ मेरी बात प्रतीत न मानी
 जो अब मोहिं श्याम संग पावो ❀ तब कीजो अपनो मन भावो

कान्ह पीत पट वेसर मेरी ❀ लीजो छोरि तबहिं गहि एरी
दो० यह सुनिकै सब हँसि उठीं, प्यारी बदन निहारि ।

आईही अति गर्व करि, चलीं सखी घर हारि ॥

सो० कहति परस्पर जात, निडर भई अति राधिका ।

कबहुँ तौ हम घात, परिहँ दोऊ आयकै ॥

तीसहु दिन जो चोर चोरै हैं ❀ साहहु पकरि कहू दिन पैहँ

बोली एक सखी तब तिन सों ❀ भेद लियो चाहति तुम उनसों

दूर धरो मन तें यह भाई ❀ बैठि रहो अपने घर जाई

अति बर बोल गई कह कीन्हो ❀ कैसी निडर भई कछु चीन्हो

वह नहिं फन्द तुम्हारे आवै ❀ छन्द वन्द वाके को पावै

वह सबहिन में बड़ी सयानी ❀ मेरी बात लेहु तुम मानी

बोली अपर सखी सुन मोसों ❀ लीक खँचि भापत मैं तोसों

फेर फार देखो हम धरिहँ ❀ ऐसे कैसे हमहिं निदरिहँ

अब तौ भेद कियो है प्यारी ❀ हमहुँ को यह रिस है भारी

तब लगि मनमें धीर न लैहँ ❀ जब लग चोरी पकर न पैहँ

निशि बासर अब हम सब कोऊ ❀ श्यामा श्याम देखिहँ दोऊ

ताही दिन तिनसों हम लरिहँ ❀ जा दिन नीके पकरि निदरिहँ

दो० सब ब्रज गोपिनके बसी, बात यहै मन आन ।

हरि राधा दोऊ मिले, निशिबासर यह ध्यान ॥

सो० सबहिन मुख यह बात, और कछु चरचा नहीं ।

नन्द महर को तात, सुता महर वृषभानकी ॥

यहै चवाव करति सब गोपी ❀ हम सों बात राधिका लोपी

लरिकाई ते हम सब जाने ❀ कीन्ही प्रीति श्याम सों याने

तब सत भाव न हती भुठाई ❀ अब हरिसंग सिखी चतुराई

आज मौन धरि कियो दुगऊ ॥ सदा होत किहि भांति बचाऊ ॥
 दिन द्वै चार भोर अब दारो ॥ रहौ सुभाव शोर जिनि पारो ॥
 करन देहु इन को लँगराई ॥ आपुहि बात प्रगट ह्वै जाई ॥
 तब इक सखी कही यों बानी ॥ कहा कहत तुम बात अयानी ॥
 तुम जु कहति वह जानति नहि ॥ हैं हम सब वाके नख माहीं ॥
 सात बरस ते प्रीति लगाई ॥ तुम तो आज जानि है पाई ॥
 वाकी चतुराई किन जानी ॥ मीन कबहिं धों पीवत पानी ॥
 हरिके ढंग सीखी सब वोऊ ॥ हैं बाहिर बानी वे दोऊ ॥
 देखहु काल्हि केहु पतियानी ॥ फिरि आई हम सब खिसियानी ॥

दो० ऐसे सब ब्रज सुन्दरी, मिलिकै करति चवाव ।

राधा हरि उरमें बसे, और न बात सुहाव ॥

सो० यह रस जान अनूप, ब्रजबासी प्रभु प्रेमको ।

करिकै कृष्ण स्वरूप, होयरही ब्रजकी तरुणि ॥

श्रीराधा प्रातहिं तहँ आई ॥ जहां जुरी सब सखिन अथाई ॥
 आवति लखि सब रहीं चुपाई ॥ पेखत बदन गये सकुचाई ॥
 करति दुर्तां उनहीं की बातें ॥ सकुच गई तरुणी सब तातें ॥
 अति आदर करि कै बैठारी ॥ कही कहां तू आई प्यारी ॥
 कहा हमारी सुधितैं लीन्हों ॥ बड़ी कृपा कहु हमपर कीन्हों ॥
 मैं कह आज अनोखे आई ॥ तुम जु करति आदर अधिकाई ॥
 पहुनी करि करिये पहुनाई ॥ मैं तो आवति जाति सदाई ॥
 कैसी कहति बात तू प्यारी ॥ बैठन को नहिं कहै कहा री ॥
 तू आई करि कृपा हमरें ॥ हमहुं कहा मौन ब्रत धरें ॥
 तब हँसि बोली कुँवरि सयानी ॥ करी तर्क मोसों तुम जानी ॥
 ता दिन को बदलो यह कीनों ॥ मो सों दांव आपनो लीनों ॥

यह मुनि हँसीं सकल ब्रज नारी ❀ कहन लगीं सब सुनुरी प्यारी
दो० दाँव घात जानति तुमहिं, हमतौ शुद्ध स्वभाव ।

तोहिं मान आई सदा, तैसे मानति भाव ॥

सो० तुम राखी मन लाय, तादिन बात भई जु वह ।

हम डारी बिसराय, मान लई तेरी कही ॥

चोर सबै चोरी करि जानै ❀ ज्ञानी सब मन ज्ञानहिं मानै

मुनि यह कुँवरि मनहिं मुसकानी ❀ कह्यो सखी यह सांच बखानी

जैसी जाके मन में होई ❀ बात कहति मुख तैसी सोई

मैं तो सांच कही तुम पाहीं ❀ कैसे धौं हरि जानत नाहीं

हरषि सखिन तब उरसों लाई ❀ कहत कहा तू रिस भरि आई

हँसति कहति तोसों हम प्यारी ❀ तू मति माने विलग कहा री

तुमहीं उलटी पुलटी भाखौ ❀ तुमहीं रिस करि उरमें राखौ

तुमहीं हरिको नाम बखानौ ❀ तब मैं सुन्यो कबू तुम मानौ

जब हरि संग मोहिं कहुँ लहियो ❀ तब मनभावैं सो कबू कहियो

अब कैसेहुं अस्नान चलौगी ❀ कै मो सों कबू फेरि लरौगी

वहै बात गठबंधन कीन्ही ❀ नहिं भूलिहौं जानि मैं लीन्ही

गहि गहि सबकी भुजा उठाई ❀ चलहु न्हान कबकी मैं आई

दो० यहि बिधि हासहुलास करि, सखिन संग सुकुमारि ।

चली न्हान यमुनानदी, श्रीवृषभानु कुमारि ॥

सो० सकल रूपकी रास, नव नागरि मृगलोचनी ।

भरी अनन्द हुलास, कृष्ण प्रेममें एक मति ॥

अथ स्नानलीला ॥

चलीं यमुन सब नवल किशोरी ❀ कनक बरण तन कोमल गोरी

करति परस्पर सब सुकुमारी ❀ हास विलास कुतूहल भारी
 गई यमुन तट गोप कुमारी ❀ संग सोहत बृषभानुदुलारी
 देखि श्याम जल लहरि सुहाई ❀ पैठीं सलिल न्हान अतुराई
 श्यामा सहित न्हात सब नारी ❀ बिहरति जल बिहार मुख कारी
 कंठ प्रमाण नीर में ठाढ़ी ❀ छिरकति जल अति आनंद बाढ़ी
 करति विविधविधिहासविलासा ❀ एक एक गहि करति हुलासा
 लैलै करसों नीर उझरौ ❀ निरखि परस्पर मुख पर डारौ
 मानौ शशि सेना सजि आये ❀ लरत जलज जल अस्त्र बनाये
 सुनि तहँ श्याम युवति मनरंजन ❀ आये कोटिकाम द्युति भंजन
 निरखत तट ठाढ़े छवि भारी ❀ यमुना जल बिहरत ब्रजनारी
 कबहुं मधुर कल बेणु बजावैं ❀ नान्हे सुरन्ह माहिं कहु गावैं

दो० काछे नटवर बेषवर, चित्रित चन्दन अंग ।

ठाढ़े उठँगि कदम्ब ते, कीने अंग त्रिभंग ॥

सो० नवधन सुन्दरश्याम, ब्रजतिय मनचातकमुखद ।

नखशिखअतिअभिराम, ध्यानकामपूरणसकल ॥

पदनख इन्दु प्रभा द्युति हारी ❀ चरण कमल शीतल सुखकारी
 जानु जंघ अति सुभग सुहाई ❀ करभरम्भ लखि रहत सदाई
 कटि पट पीत काछनी काछे ❀ केसर कमल न पटतर आछे
 क्षुद्रावली कनक छवि छाई ❀ नाभि गँभीर वरणि नहिं जाई
 मनहुँ मराल बाल की श्रेणी ❀ सर समीप सोहति सुख देनी
 बड़े बड़े मोतिन की माला ❀ बिच रोमावलि फूलकि विशाला
 मनहुँ गंग बिच यमुना आई ❀ चली धार मिलि तीन सुहाई
 बाहु दंड दोउ तट कमनीया ❀ चंदन अंग रेत रमनीया
 बनमाला तरु तीर सुहाये ❀ फूलि रहे पचँग छवि छाये

कंठु कंठ त्रय रेख मुहाई ❀ तीनि भुवन शोभा जनु छाई
 चिबुक चारु गाढ़ मन मोहै ❀ मुख छवि सिंधु भँवर जनु सोहै
 अघर दशन द्युति बरणि न जाई ❀ तड़ित विंव कह वह छवि छाई
 दो० शुकनासा खंजन नयन, भृकुटि काम कोदण्ड ।

मणिकुण्डलरविछविहरत, सोहतशीशशिखण्ड ॥

सो० उपमा गई लजाय, निरखि श्याम को रूप वर ।

जहँ तहँ रही छिपाय, पटतरको पहुँची नहीं ॥

उपमा हरितन देखि लजानी ❀ दुर्ग भूमि कोउ वन कोउ पानी
 कोटि मदन अपनो बल हारे ❀ मुकुट लटक भूपटक निहारे
 कुंडल निरखि भ्रमत रवि रहहीं ❀ तपन हृदय क्षण धीर न गहहीं
 अलक नासिका कर पद नैनन ❀ अलिशुककमल मीन खंजनगन
 लखि सकुचाय रहत वनमाहीं ❀ कहत हमैं कवि कहत वृथाहीं
 दशन दमक दामिनी लजानी ❀ क्षण प्रगटत क्षण रहति छिपानी
 समुझत सधर झधर अरुणाई ❀ विद्रुम बंधू विंव लजाई
 गगन रत्नो शशिवदन निहारी ❀ घटत घटत नित शोचत भारी
 चारु कंठ लखि अति सकुचानो ❀ रहत शंख जल मांझ छिपानो
 बाहु देखि अहि विवर समाने ❀ केहरि कटिलखि वनहिं पराने
 गज गति गुलफ निरखि शरमाई ❀ ऊंची आंख न सकत उठाई
 निज इच्छा छवि हरि वषु धारी ❀ दीनी पटतर मेटि मुरारी
 दो० अनुपमछवि कवि क्यों कहै, विन उपमा आधार ।

ब्रजतिय मोहन मनहरण, सुन्दर नन्दकुमार ॥

सो० अघर मनोहर वैन, मन्द मन्द वाजत मधुर ।

उपजावत मन भैन, ब्रज सुन्दरि नवनागरिन ॥

जल विहार करि गोप किशोरी ❀ निकरि चलीं तट को सब गोरी

जानु जंघ जललौ सब आई ❀ चुवत नीर अचरन छवि छाई
परे दृष्टि मोहन तट माहीं ❀ ठाढ़े कदम बिग्रप की छाहीं
प्यारी निरखति रूप लुभानी ❀ पंगु भई मति गति बहरानी
इतहि लाज सखियनकी आई ❀ दरशन हानि न उत सहिजाई
मनहिं ज्ञान करि यह अनुमानी ❀ लैहैं आज सखी सब जानो
जान गई यह अली सयानी ❀ जान बूझ सब भई अयानी
बहुरो न्हान लगीं सब पानी ❀ रहीं इतै करि आना कानी
प्यारी कबहुँ श्याम तन हेरै ❀ कबहुँ दृष्टि सखिन तन फेरै
जानी सबै नहात जल माहीं ❀ मेरी दिशि चितवत कोउ नाहीं
तब मन में यह बात विचारी ❀ देखि लेहुँ अब छवि गिरिधारी
यह दरशन कबधौं फिरि होई ❀ ललकिलगीं अँखियां हठि दोई

दो० निरखतिश्यामा श्याम छवि, पारनिमेष न भोर।

नैन बदन शोभित मनो, द्वैशशि चारु चकोर ॥

सो० करत मुदित दोउ पान, रूपमाधुरी अभियरस।

तृप्त न क्योहूँ मान, बिबशभये मन दुहुँनके ॥

यद्यपि सकुच सखिन की गाढ़ी ❀ तद्यपि रुकी न चितवन बाढ़ी
उमँगि गई सरिता की नाहीं ❀ सन्मुख श्याम सिन्धुकेमाहीं
भरी सलिल अनुराग अथाहा ❀ भँवर मनोरथ लहर उद्धाहा
कुल मरयाद अरार दहाये ❀ लोक सकुच तरु तीर बहाये
धीरज नाव गही नहिं जाई ❀ रहे थकित पल पथिक डराई
इकटक ओर अखण्डित धारा ❀ मिली श्याम छवि सिंधु अपारा
कहति सखी सब आपस माहीं ❀ नयन सैन दै दै मुसकाहीं
देखहु री प्यारी उत अटकी ❀ ना जानिये कौन अँग लटकी
काल्हि हमहिं कैसे निदरी है ❀ मेरेचित अब खुटक परी है

बात कहत मेलै मुख तुलसी ❀ देखहु अब देखत किमि हुलसी
 सुन्दरि पियके रूप लुभानी ❀ वे बातें अब सवहिं भुजानी
 इक टक रही नेक नहिं मटकी ❀ को जानै काहु के घटकी
 दो० भई भाव भोरे कछु, देखतही सुखदाय ।

चित्र पूतरी सी रही, देह दशा विसराय ॥

सो० उत बे रहे लुभाय, नागर नवलकिशोर वर ।

प्यारी मुख दृगलाय, नैन नहीं मटकत कहूँ ॥

औरै भाव भई सखि प्यारी ❀ बढ़्यो प्रेम अंकुर तरु भारी
 गई तासु जर सप्त पताला ❀ पहुँच्यो अंतर शिखर विशाला
 बचन पत्र अवलोकन शाखा ❀ सब जग छांह भई अभिलाखा
 गुणविधि सुमन सुगंधि निकाई ❀ लगी गई आनन्द सुहाई
 पूरण आसन बिन भर भारा ❀ भल लाग्यो वर नन्दकुमारा
 रहे रीझि तन मन धन वारैं ❀ अरस परस दोउ खूब निहारैं
 तब इक सखी कछो मुसकाई ❀ प्यारी देखे कुँवर कन्हवाई
 वेई हैं सुन्दर सुखदाई ❀ जिनकी व्रज में होत बड़ाई
 हमैं कहत ही मोहिं दिखावहु ❀ देखिलेहु अब मन सुख पावहु
 बहुत लालसाही मन तेरे ❀ ताही ते हरि आये नेरे
 पूजी आश दरश अब पाये ❀ हमहीं इनको बोल पठाये
 राखौ चीन्ह इन्हें अब नीके ❀ ये मनभावन हैं सबही के
 दो० भले शकुन आई इहाँ, भयो तुम्हारो काज ।

अब कछु हमको देहुगी, मिले तुम्हें व्रजराज ॥

सो० भयो नागरिहि शोच, सुनिसुनि सखियनके बचन ।

कहति करी मैं पोच, इन जानी अब बात सब ॥

मैं हरि तन लखि रूप लुभानी ❀ सो ये देखि सबै मुसकानी

काल्हि कही इन सों मैं वैसे * देखी आज मोहिं इन ऐसे
इन आगे मो बात नशानी * अब वे करत मोहिं बिन पानी
मोहिं पर मेरी चतुराई * परी उलटि उर अति संकुचाई
कहत सखिनसों ज्वाब न आयो * तब मनमें हरि पियको ध्यायो
अहो श्यामसुन्दर सुखदानी * मैं प्रभु तुम्हरे हाथ बिकानी
अब सहाय सुन्दर तुम कीजै * मेरी बात नाथ रख लीजै
ऐसो उत्तर देहु जमाई * जाते मेरी पति रहिजाई
ऐसे हरिको सुमिरि सयानी * तब यक बात मनहिं मन ठानी
उरमें भयो बुद्धि परकासा * तब कीनो मनमाहिं दुलासा
सखिन कह्यो अब घर चल प्यारी * भई यमुन तट बहुत अबारी
कबकी न्हान इहां हम आई * ऐसे कहि कहि सब पछिताई

दो० कियो दरशतुम श्यामको, घरचलिहौं कै नाहिं ।

चीन्हिरहौं मिलियो बहुरि, यह कहि सब मुसकाहिं ॥

सो० तब सखियनके साथ, चली सदनको नागरी ।

उर में धरि ब्रजनाथ, प्रेम मगन बोली नहीं ॥

हंसि बूझति यक गोपकुमारी * कह्यो श्याम कैसे हैं प्यारी
भाये री तेरे मन माहीं * हैं सुन्दर कछु कैधौं नाहीं
कै हम सों फिरि बात लुकैहौ * कै अब मनकी सांच जनैहौ
हम बरणे जैसे तुहि पाहीं * कहु तैसे हरि हैं कै नाहीं
कहति मनहिं बृषभानु दुलारी * मेरे ख्याल परीं सब ग्वारी
बातन बातन करति उधारो * ये चाहति अबहीं निरवारो
मोहूं ते ये चतुर कहावैं * मोको बातन मांझ भुलावैं
ऐसे इनसों बचन बखानो * इनकी चातुरता गहि मानो
मेरे शिर समरत्थ कन्हाई * कहं करि हैं मो सों चतुराई

प्यारी पिय के गर्ब गहेली ❀ अंग अंग मुख पुंज भरेली
मन्द मन्द गति हंस मुहाई ❀ पग दै चलत ठठक रहिजाई
मगन श्याम रस मुख नहिं बोलै ❀ धरणी चरण नखन करि छोलै
दो० चितवत सूधे नेक नहिं, काहू तन अनखाय ।

रही गर्ब पिय श्यामके, गरबीली गरबाय ॥

सो० सखिनकह्यो मुसकाय, क्यों प्यारी बोलत नहीं ।

कै हमसों अनखाय, लियो मौनव्रत आज पुनि ॥

कै कछु बात कही नहिं जाई ❀ कै तेरो मन हख्यो कन्हाई
कबहुं जान पहिचान न तेरी ❀ देखत ही दृग तिनहिं दरे री
सांची बात कहौ अब प्यारी ❀ शोच पख्यो मन तोहिं कहा री
कहा रही ही हरिहि निहारी ❀ यकटक नैन निमेष बिसारी
सुनि सुनि सब सखियनकी बानी ❀ बोली हरि भावती सयानी
कहा कहति तुम बात अलेखे ❀ मोसों कहति श्याम तुम देखे
मैं देखे कैधों नहिं देखे ❀ तुम तौ बार हजारक पेखे
तुमहीं हरि को रूप बतावो ❀ मों आगे सब कहि समुझावो
कैसे बरण बेध हैं कैसे ❀ अंग अंग बरणो तुम जैसे
तब यक सखी कह्यो मुसकाई ❀ हम तो ऐसे लखे कन्हाई
छन्द बेद कछु हमहिं न आवै ❀ सांची बात सबन को भावै
देखे हम नंदनन्दन जैसे ❀ बराणि बतावहुं तुमको तैसे

दो० श्यामसुभग तनपीतपट, चटकीलो द्युतिकारि ।

शोभित घनपर दामिनी, मनु चपलई बिसारि ॥

सो० मन्दमन्द सुखदात, गरजत मुरलीमधुरधुनि ।

चितवत अरुमुसकात, बरषत परमानन्दजल ॥

विविध सुमनदल उरमें माला ❀ इन्द्रधनुष मनौ उदित विशाला

मुक्तावली बीच मन मोहै ❀ बाल मरालपाँति जनु सोहै
 अंग अंग छबि रूप सुहाई ❀ कदम तरे ठाढ़े सुखदाई
 देखत मोहन बदन विभागा ❀ उपजत है अँखियन अनुरागा
 लोचन नलिन नये छबि छाजै ❀ तामधि पुतरी श्याम विराजै
 कहति लजाति बात इक तुमको ❀ इकदिन मोहिं दिखावहु उनको
 देखहुँ धौँ कैसे हैं तिनको ❀ तुम सब देखि मोहति हौं जिनको
 सुनि बृषभानुसुता की बानी ❀ हँसीं सबै गोपिका सयानी
 भृकुटी धनुष तिलक शरधारी ❀ मानहुँ मदन करत रखवारी
 मोरचन्द्र शिर सुमन सुहाये ❀ काम शरन मनौ पक्ष लगाये
 गड़त आनि युवतिन मनमार्हीं ❀ निकसत बहुरि निकासे नाहीं
 बारिज बदन मनोहर बानी ❀ बोलत मनहुँ सुधा रससानी

दो० कुण्डल भलक कपोल छबि, श्रम सीकरके दाग ।

मानहुँ मनसिज मकरमिलि, क्रीड़त सुधातड़ाग ॥

सो० भरे रूप रसराग, ऐसे शोभा के उदधि ।

बिन अँखियनको भाग, अवलोकत हरिको बदन ॥

अंग अंग सब छबि के जाला ❀ हम देखे इहि भाँति गोपाला
 कछु छलछिद्र नहीं हम जानै ❀ जो देखे सो साँच बखानै
 साँचहि भूठ करै जो कोई ❀ तो वह भूठ आपही होई
 हम इतनिन में नहीं दुराऊ ❀ कहत यथार्थ सब सतभाऊ
 यामें जो कोउ भूठी मानै ❀ ताकी बात बिधाता जानै
 हम तो श्याम निहारे ऐसे ❀ तोहिं लगैं प्यारी कहु कैसे
 तुम देखे मैं साँच न मानौ ❀ अपनीसी गति सबकी जानौ
 जिनको बार पार कछु नाहीं ❀ द्वै अँखियन देखे किधि जाहीं
 जो तुम सब अंग अंग निहारे ❀ धनि धनि तो ये नैन तिहारे

मैं तो लखि इक अंग भुलानी ❀ भरिआयो दोउ आंखिन पानी
कुंडल झलक कपोलन छाहीं ❀ रही चकित उतने के माहीं
रुंधे नीर नैन टक लाई ❀ पहिचाने नहिं नेक कन्हाई
दो० मैं तबते अपने मनहिं, यहै रही पछिताय ।

देखनको छवि श्यामकी, चहियत नयननिकाय ॥

सो० अतिछविअंखियाँदोय, उमँगिचलततापरसलिला
कैसे दरशन होय, सखी श्याम के रूप को ॥

द्वै लोचन तुम्हरे द्वै मेरे ❀ तुम देखे हरि में नहिं हेरे
तुम प्रतिअंग विलोकन कीन्हों ❀ मैं नीके एकौ नहिं चीन्हों
काहू को षट्स नहिं भावै ❀ कोऊ भोजन को दुख पावै
अपने अपने भाग्य निकाई ❀ जो बोवै सो लुनै बनाई
जैसे रंक तनक धन पाये ❀ होत निहाल आपने भाये
मोहिं तुम्हें अंतर है भारौ ❀ धनि तुम सब हरि अंग निहारौ
तुम हरिकी संगिन ब्रजवाला ❀ ताते दरश देत नँदलाला
मुनहु सखी राधा चतुराई ❀ आपहिं निंदति हमहिं वड़ाई
आपुन भई रंक हरि धनकौं ❀ हमैं कहति धनवंत सवनकौं
हम हरिकी संगति सब ग्वारी ❀ आपुहि निर्मल होति नियारी
धनिधनि धनिलाडिली पियारी ❀ धृक धृक धृक धृक बुद्धि हमारी
तू पूरण हम निपट अधूरी ❀ हमहिं असंत संत तू पूरी
दो० धनि धनि तेरे मात पितु, धन्य भक्ति धनि हेत ।

तैं पहिंचान्यो श्यामको, हम सब ग्वारि अचेत ॥

सो० धनि यौवन धनि रूप, धनि धनि भागसुहागतव ।

तू मोहन अनुरूप, चिरजीवहु जोड़ी अचल ॥

जैसो तैं हरि रूप बखान्यो ❀ है तैसोई यह हम जान्यो

देखन को हरि रूप उजेरी ❀ आंखि चाहिये जैसी तेरी
तैं जु कहति लोचन भरि आये ❀ सो हरि तेरे नयन समाये
अति पुनीत अस्थल शुभ जानी ❀ करी श्याम अपनी रजधानी
कियो बास हरि तुव दृग माहीं ❀ और बात दूजी कहु नाहीं
ऐसे श्याम संग ब्रजबाला ❀ कहति परस्पर गुण गोपाला
तहां अचानक हरि पुनि आये ❀ कटि कछनी नटबेष बनाये
मुरली अरुण अधरपर राजै ❀ कल धुनि मंद मनोहर बाजै
करति रही मन में जो ध्याना ❀ सोइ अन्तरयामी सब जाना
आप गये तिरछे मगमाहीं ❀ भावाधीन सकत रहि नाहीं
तरु तमालतर तरुण कन्हाई ❀ ठाढ़े भये आय सुखदाई
थकित भई सब ब्रजकी बाला ❀ लगीं बिलोकन नंदको लाला

दो० रत्नजटित पग पांवरी, नूपुर मन्द रसाल ।

चरण कमलदल निकट मनु, बैठे बालमराल ॥

सो० उदितचरणनखचंद, जनुमणिव्योमप्रकाशकरि ।

सुर नर शिव मुनिवृन्द, विरहताप ब्रजतियहरण ॥

जानु काम शत छविन सँवारे ❀ युवतिन करि मनबुद्धि बिचारे
युगल जंघ छवि परम पुनीता ❀ रंभा खंभ मनहुं बिपरीता
ठाढ़े धरणि एक पद लाये ❀ कंचन दण्ड एक लपटाये
तन त्रिभंग की लटक सुहाई ❀ अटकरही युवतिन मन भाई
ब्रजयुवती हरिपद मन लायें ❀ निरखति मुनिदुर्लभ सचुपाये
कुलिशांकुशध्वज चिह्न निकाई ❀ यकटक रहीं चितै चितलाई
अरुण तरुण पङ्कजदल चारु ❀ मानहुं सुखमा करत बिहारु
कटि केहरिकी कटिहि लजावै ❀ सूक्ष्म सुभग कहति नहिं आवै
तापर कनक मेखला सोहै ❀ मणिन जटित सुन्दर मन मोहै

मनहुं बालकन सहित मराला ❀ बैठे सम्पति जोरि रसाला
 किधौ मदन के सदन सुहाई ❀ बांधी बंदनवारि वनाई
 ब्रजतिय निरखि निरखि मुखलेहीं ❀ नैनन पलक परन नहिं देहीं
 दो० शोभित नाभि गँभीर अति, मानहुं मदनतड़ाग ।

रोमावलि तट पर लसत, रस शृंगारको बाग ॥

सो० ब्रजतिय रहीं निहारि, शोभा नाभि गँभीर की ।

मननहिंसकतिनिकारि, पखोजायगहरेखसकि ॥

उदर उदार बरणि नहिं जाई ❀ रोमावलि तापर छवि छाई
 रही अटक छवि तासु निहारी ❀ परखत वनत न निरखत नारी
 कोऊ कहति काम की सरनी ❀ कोऊ कहति योग नहिं वरनी
 कहति एक अलि बालक पांती ❀ जुरि बैठे सब एकहि भांती
 कोउ कहै नीरद नील सुहाई ❀ मूक्षम धूमधार छवि छाई
 एक कहति यह रवि की जाई ❀ मरकत गिरि उरते प्रकटाई
 उदर भूमि शोभित सोइ धारा ❀ जाति नाभि हृद अगम अपारा
 दुहुंदिशि फेण स्वातिमुत माला ❀ उपजत सुखमय लहर विशाला
 शोभा बरणि सकति ब्रजनारी ❀ रही विचारि विचार विचारी
 उर मुक्कन की माल बिराजै ❀ तामधिकौस्तुभमणि छवि छाजै
 निरमल नभ मानहुं उड़गाजी ❀ शशिहि घेरि बैठी छवि साजी
 भृगुपद देखि श्याम उरमाहीं ❀ मनहुं मेघ भीतर शशिछाहीं
 दो० पीत हरित सित अरुणरँग, चटकीली बनमाल ।

प्रफुलित है छबिकी बँवरि, मानहुं चढ़ी तमाल ॥

सो० छवि बरणी नहिं जाय, कंबुकण्ठ मणिकण्ठकी ।

ब्रजतिय रहीं लोभाय, हरिउरबरशोभानिरखि ॥

बृषभकंध भुज दण्ड सुहाई ❀ निंदत अहि गज सँडि निकाई

कर पल्लवन मुद्रिका सोहै ❀ बाहु बिभूषण लखि मन मोहै
 जनु शृंगार त्रिदश की डारी ❀ फूल रही उपजत छवि भारी
 हरिमुख निरखति गोपकुमारी ❀ पुनि पुनि प्रणम करति बलिहारी
 कहति परस्पर अति मन लोभा ❀ देखहु सखी मदनकी शोभा
 विबुध चारु अधरन अरुणाई ❀ पान रेख तापर छवि छाई
 मंद हँसन द्युति दशन निकरि ❀ उपमा कापै जात बताई
 अनुपम छवि चित लेतबुराये ❀ जग मोहनी हमारे भाये
 गोल कपोल अमोल नवीने ❀ मानहुं मुकुर नीलमणि कीने
 बाजत मुरली करकी फेरन ❀ चंचल नयन चपल नति हेरन
 मणिन जटित कुंडलकी डोलन ❀ प्रतिबिम्बित सब मुकुर कपोलन
 सो छवि कापै जात बखानी ❀ लखि ब्रजतिय बिनमोल बिकानी

दो० सुभग नासिका चपलदृग, कुटिलभृकुटिकीरेख।

जनुयुगखंजन बीचशुक, उड़ि न सकतघनदेख ॥

सो० धुंधरारै कचश्याम, बारिजमुखदिगभ्रमरजनु ।

शीशमुकुट अभिराम, कोटि काम शोभा हरन ॥

रूप सुधानिधि वदन बिराजै ❀ दुहुं कर अधर मुरलिका बाजै
 मानहुं युगल कमलपद माहीं ❀ लेत भराय सुधा शशिपाहीं
 हरिमुख निरखत नयनभुलाने ❀ इकटक रहैं तृपति नहिं माने
 घोषकुमारि लखति नंदनन्दन ❀ श्यामसुभग तनु चित्रित चंदन
 कनक बरण पट पीत बिराजै ❀ देखि सखी उपमा यह राजै
 निर्मल गगन शरद घनमाला ❀ तापर अस्थित दामिनिजाला
 अंग अंग छवि पुंज सुहाये ❀ निरखति युवतीजन मन लाये
 कोऊ भालतिलक छवि अटकी ❀ मुकुटलटक छवि पर कोउ लटकी
 कोऊ अलक लखति चितलाई ❀ कोउ लखि भृकुटि मुरति बिसराई

कोउ लोचनछवि लखिललचानी ❀ चितवन में कोऊ उरझानी
 कोऊ कुंडल झलक लुभानी ❀ कोउकपोलद्युति निरखिविकानी
 कोउ नासा कोउ अधर निकाई ❀ कोउ रद चमकनि मांझ भुलाई
 दो० कोउ बोलति कोउमृदुहँसति, कोउमुरलीधुनिलीन ।

कोउ मुरलीपर शीवकोउ, लटकनपर आधीन ॥

सो० चारु चिबुक दर शीव, झोऊ गड़ि तामें रही ।

हरिमुखशोभा सीव, थकी निरखि जहँ सो तहां ॥

कोउ सुन्दर उर बाहु विशाला ❀ निरखि थकी कोउ भूषणवाला
 कोउ कटि कोउ पटपीत निहारी ❀ जंघगुलुफ पर कोउ बलि हारी
 युगलकमल पद नखकी शोभा ❀ ब्रजवासी जन मन की लोभा
 हरि प्रतिअंग निरखि ब्रजनारी ❀ देह गेहकी मुरति विसारी
 अति आनंद मगन मनभूली ❀ शशिमुखलखिजनुकुमुदिनिफूली
 किधौं चकोर रहै टकलाई ❀ पियत सुधा छवि शीतल ताई
 कै रवि कुण्डल छविहि निहारी ❀ विकसत कमल वदन वरनारी
 कै चकईगण मन सुख मानी ❀ निरखि रही अति रति हर्षानी
 कैधौं नवधन तन छवि देखी ❀ भये चातकी मुदित विशेषी
 किधौं मृगी मुरली धुनि मोही ❀ श्यामलखति युवती डुम सोही
 हरिछवि अरुभानि में अरुझानी ❀ मुरझिन सकत युवति विततानी
 रूपराशि मुखराशि कन्हाई ❀ प्रेमराशि जन के मुख दाई

दो० बबिसागरमुखकी अवधि, गुण मंदिररसखान ।

मोहिलियोमनतियन को, रसिकनरेशसुजान ॥

सो० मुरली मधुर बजाय, प्यारी प्यारी नाम कहि ।

अनुपम छवि दरशाय, गये सदन आनंदधन ॥

रहीं ठगीसी गोप कुमारी ❀ मन हरि लेगये नवल विहारी

पुनि पुनि कहति भई सुखमानी ❀ धनि धनि राधा कुँवरि सयानी
 बड़भागिनि तोसी नहिं प्यारी ❀ तेरेही बशरी गिरिधारी
 धनि धनि श्याम धन्य तू श्यामा ❀ धनि जोरी धनि प्रीति ललामा
 एक प्राण द्वै देह तुम्हारे ❀ तुव बिन रहि न सकत हरिन्यारे
 तोको देखि बहुत सुख पावैं ❀ मुरली में तेरे गुण गावैं
 तेरी प्रीति सांच हरि जानैं ❀ ताते तेरे हाथ बिकानैं
 मन बच क्रम निर्मल तू प्यारी ❀ दुरा चारिणी हम सब नारी
 जैसे घट पूरण नहिं डोलै ❀ होय अवधिलौ सो टकडोलै
 परम सुजान नारि तैं धीरा ❀ राख्यो परखि हृदय हरि हीरा
 धनी न अपने धनहिं बतावै ❀ धरत छिपाय न प्रकट जतावै
 धन्य सुहाग भाग तुव प्यारी ❀ कृष्ण सदा पति तू है नारी

दो० सुनि सुनि बानी सखिनकी, प्यारी जिय अनुराग ।

पुलकिरो मगदगद हियो, समुझि आपनो भाग ॥

सो० बचन कह्यो नहिं जाय, प्रीति प्रकट चाहत कियो ।

हरि उर रहे समाय, बाहर करत प्रकाश नहिं ॥

सुनहु सखी तुम करति बड़ाई ❀ सुनि सुनि मेरो मन सकुचाई
 मोहिं कहति श्यामहिते जान्यो ❀ हरिको भले परखि पहिचान्यो
 तब तैं यही शोच मन माहीं ❀ कैसे हरि पहिचाने जाहीं
 नैन दोय छवि अमित अगाधा ❀ तापर पलक करति है बाधा
 क्षणहीं में भरि आवत पानी ❀ श्यामस्वरूप परे किमि जानी
 मरुं करम अँग लखिये कोई ❀ पलक परत औरै छवि होई
 क्षण क्षण में शोभा पलटावै ❀ कहौ सखी उर कैसे आवै
 देखन को दृग अति अकुलार्हीं ❀ प्रकट लखन पहिचान न जाहीं
 यह सखि नहीं परति कछु जानी ❀ बिरह संयोग लाभ कै हानी

कै दुख मुख कै सम रस होई ❀ म्वहिं समुझाय कहौ सखि सोई
 घृत ते होम अग्निरुचि जैसे ❀ मिथति नहीं नयननि गति तैसे
 उत अविखानि नई अविवाने ❀ इत लोभी दृग तृप्त न माने
 दो० बिन पहिचाने कौनबिधि, करौं श्यामसों प्रीति ।

नहिं वह रूप न भाव वह, क्षण क्षण औरै रीति ॥

सो० यह जानी मैं बात, हैं आनंद की खानि हरि ।

पहिचाने नहिं जात, कहा करौं द्वै लोचननि ॥

बड़ौ करौ बिधना यह आली ❀ समझ परी देखत बनमाली
 कर पद उदर ग्रीव कटि कीनी ❀ मुख रद श्रुति नासा शुभ दीनी
 भाल शिखर नख केश बनाये ❀ अधरजीभ अरु वचन सुहाये
 रचिपवि रुचिर अंग सब कीने ❀ रोम रोम प्रति नयनन दीने
 जो ब्रज दीन्हों जन्म हमारो ❀ देखन को मनमोहन प्यारो
 तौ कत नयन दिये शठ दोऊ ❀ बिधिते निदुर और नहिं कोऊ
 जो बिधना को बश कै पाऊं ❀ तौ अब पद्धति और चलाऊं
 रोम रोम प्रति नयन बनावैं ❀ इकटक रहैं पलक नहिं लावैं
 तौ कछु बनै कह्यो सखि तेरो ❀ होय मनोरथ पूरण मेरो
 हरि स्वरूप लखि जानि न जाई ❀ वह छवि द्वै लोचन न समाई
 मैं पचिहारि रही बहुतेरो ❀ एकहु अंग न नीकै हेरो
 जो देखों तो प्रीति करों री ❀ देखन ही की साधन गोरी
 दो० दुरत दुराये कौनबिधि, सखि तुमसों यह बात ।

देखे बिन नंदनन्द के, धीरज धरत न गात ॥

सो० उड़यो फिरत दिनरात, इन नयनन के संगलगे ।

क्षण नहिंमन ठहरात, आकरुई जिमि बातबश ॥

सुन री सखी दशा यह मेरो ❀ जवतैं हरि मूरति मैं हेरो

संगाहि फिरौं दरश नहिं पाऊं ॥ मनहीं मनपुनि पुनि पछिताऊं ॥
जब मैं अपने जिय यह आनौं ॥ निकट जाय हरिछवि पहिचानौं ॥
तब प्रतिबिंब भरोई आई ॥ होत तहां मोको दुखदाई ॥
मेरे मन हरि भूगति भावै ॥ सनमुख दृष्टि तहां यह आवै ॥
मेरिय देह होत म्वहिं बैरी ॥ कितौ दुरावति दुरत न हैरी ॥
मैं अन्तर तजि लाखत कन्हाई ॥ यह अति अन्तर देत बढ़ाई ॥
सखी दोष नहिं काहू केरो ॥ करत श्याम यह सब भक्तभरो ॥
नीके दर्शन कबहुं देहीं ॥ नइ नइ छवि करि मनहरिलेहीं ॥
चपलाहू ते चपल घनेरी ॥ दशन चमक चौधत है एरी ॥
कबहुं अंगन मुकुर बनावैं ॥ कबहुं कोटि अनंग लजावैं ॥
कैसे सब छवि देख जु पड़ये ॥ कौन भांति यह साध पुरइये ॥

दो० मगनदरशरसलाड़िली, पुनिपुनि पुलकितगात।

तृप्तमान तिय देखि छवि, कहत लखे नहिं जात ॥

सो० लीनो सखियन जान, हरिरंगराती लाड़िली।

सुन्दर श्याम सुजान, रोम रोम याके रमे ॥

कहति धन्य प्यारी बड़ भागी ॥ नीके तू हरि सँग अनुरागी ॥
तू है नवल नवल हरि ओऊ ॥ रूप अगाध सिंधु तुम दोऊ ॥
हम जानी यह बात अगाधा ॥ तू हरिकी अर्द्धांगिनि राधा ॥
मिले तोहिं करि कृपा कन्हाई ॥ दिये सकल दुख दूर मिटाई ॥
कहु प्यारी हमसों अद सांची ॥ कहै बनै यह बात न कांची ॥
छांड़ि देहु अब यह चतुराई ॥ कहां मिले कहु तोहिं कन्हाई ॥
खरक मिले कै कुंजन मारहीं ॥ कै दधि बेचन जात जहांहीं ॥
कै जब उरग डसन ते वाची ॥ कहु कैसे तू हरि रंगराची ॥
मुनि सखियन की बात सयानी ॥ बोली परम नागरी बानी ॥

कब री श्याम मिले नहिं जानों ❀ सुनहु सखी में सांच बखानों
 गृह बन कुंज मुरति नहिं मोहीं ❀ दधि वेचन कै खरक विमोहीं
 आज कै काल्हि कहों कह आली ❀ कियो वास उरमें वनमाली
 दो० नयनन ते क्षण टरत नहिं, नीके लखे न जात ।

कहा कहों तुमसों सखी, यह अचरज की बात ॥

सो० मिले मोहिं जब श्याम, सुनो सखी तुमसों कहों ।

करिके उरमें धाम, तब ते मन मेरो हख्यो ॥

मैं यमुना जल भरन सिधई ❀ औचक हरि तहँ परे लखाई
 मो तन चितै रहे मुसकाई ❀ कहा कहों सखि नयन निकई
 जीति आपने बल जनु कीनी ❀ शरद सरोजनकी छवि हीनी
 जीते सकल रूपगुण जाती ❀ नील कोकनद अरु सतपाती
 पै निशि मुद्रित दिवस प्रकाशे ❀ क्षण प्रति होत मलिनद्युतिनाशे
 वे आनन्द कन्द सुख मूले ❀ रहत दिवस निशि छविसों फूले
 निरखि नयन में दशा भुलाई ❀ उन मुसकान मोहनी लाई
 शिथिल अंग भये जैसे पानी ❀ तबहीं ते उन हाथ धिकानी
 सूधे मारग गई भुलाई ❀ ज्यों त्यों करि पहुँची घर आई
 ता दिनते अँखियां ये मेरी ❀ मुख दुख भूलि भई हरि चेरी
 बसीं जाय वा चितवन माहीं ❀ अब वह छवि क्षण विसरत नाही
 कै इन नैननि आप समानी ❀ यह चितवन कहु जात न जानी
 दो० नहिं जानत हरिकह कियो, मंद मधुर सुसकाय ।

मन समुभतरा भतनयन, सुख कहु कह्यो न जाय ॥

सो० तब ते कहु न सुहाय, कासों कहिये बात यह ।

अमलपरयोदग आय, अवलोकन हरि बिधुवदन ॥

निकसे सखी एक दिन आई ❀ द्वार हमारे कुँवर कन्हई

मैं ठाढ़ीही अजिर अकेली ❀ देखिरही छवि यह अलबेली
चंचल नयन चितै चित चोरै ❀ सुभग मृकुटि बिबि बंक मरोरै
कोटि मदन तनद्युति सगवाही ❀ फेरत कमल कमल करमाही
मो हित लागि भये तहँ ठाढ़े ❀ कियो भाव कछु आनँद बाढ़े
ले कर कमल भाव सों लायो ❀ पीताम्बर निज शीश फिरायो
मैं गुरुजन उर शंका आनी ❀ बोलि न सकी कछु सुखबानी
प्रेमसहित तेरे हरि आये ❀ बैसहि उनको फेरि पठाये
तू तौ चतुर हुती अति नारी ❀ सेवा कछु करी नहिँ प्यारी
गुप्तभाव तोसों हरि कीनो ❀ बातन रिझै नहीं क्यों लीनो
काहे कमल भाव सों छायो ❀ काहे पीताम्बरहिँ फिरायो
मैं कछु उत्तर तिन्हें जनायो ❀ घर आये केहि बिधि बिसरायो

दो० कहा करौं गुरुजन सखी, भये मोहिँ दुखदाय ।

सकुचिरहीतिनकीसकुच, सुखकछुबचनबनाय ॥

सो० इतनो कियो सयान, मैं तब बैठी कर परसि ।

उरलाई हित मान, सम्मुख करि करि आरसी ॥

अन्तरायामी चतुर कन्हई ❀ जानि लई मेरी चतुराई
आपन हँसि उत पाग सँवारी ❀ रहे कमल हिरदे पर धारी
रहे चितै अति हित चितलाई ❀ मोते सखी न कछु बनिआई
कहा करौं कछु दोष न मेरो ❀ नयो नेह उत गुरुजन घेरो
रही देखि मन आनँद धरिकै ❀ दियो कमल उर आसन करिकै
आंचर फेरि निछावरि कीनो ❀ अर्घ्यसलिल आखिन सों दीनो
उमँगि कलश कुश प्रगट भये री ❀ टूटि टूटि कुच बन्द गये री
अब मन होत लाज अति भारी ❀ सखी सझुफि करणी वह सारी
ऐसी मेरी मति अज्ञानी ❀ प्रभु जो मंगल करि मैं मानी

अति सुखमान गये सुखदाई ❀ तब तैं मोमन कहु न सुहाई
 कहति सखी राधा सुनि मेरी ❀ सेवा मान लई हरि तेरी
 अब काहे पछितात अनेरी ❀ तो हित श्याम जात करि फेरी
 दो० नीके कीन्हे भाव सब, तू अति नागरि वाम ।

उन लीन्हे सब जानिकै, चतुरशिरोमणिश्याम ॥

सो० भावहिको सनमान, गुरुजन के मधि चाहिये ।

गये श्याम हित मान, अब प्यारी चाहति कहा ॥

तेरे बशहि भये दधिदानी ❀ हम यह बात भले करिजानी
 तैं बेही उन पाग सँवारी ❀ उनको तुम उन तुमहिं जुहारी
 मिली आरसी में तुम उनको ❀ उन उर धरी कमलमिस तुमको
 जाने कहा भेद यह कोऊ ❀ एक प्राण द्वै तन तुम दोऊ
 सुनहु सखी मोहन सुखरासी ❀ अँखियाँ रहत दरश की प्यासी
 निकसत जब सुन्दर इत आई ❀ कमलनयन कर वेणु सुहाई
 ना जानिये सखी तिहि काला ❀ सब तन श्रवण विलोचन जाला
 सुरत शब्द प्रतिरोमन माहीं ❀ नखशिख ज्यों चख देख्यो चाहिँ
 इतने पर समुझत नहिं बैना ❀ चितै रहत ज्यों चित्रित नैना
 सुनहु सखी यह सांचकि सपनो ❀ कै दुख सुख कै संभ्रम अपनो
 कहा करौ गुरुजन डर मानौ ❀ मन मेरो उन हाथ विकानौ
 जबतैं द्वार दरश भवहिं दीनों ❀ तबतैं मन अपनो करि लीनों
 दो० भाग दशा आये सदन, मेरे श्याम सुजान ।

मैं सेवा नहिं करिसकी, गुरुजन को डरमान ॥

सो० यहै चूक जियजान, मोहन मन हरि लै गये ।

अब लागी पछितान, फेरि कौन बिधि पाइये ॥

जब तैं प्रीति श्याम सों कीनी ❀ तबतैं नौद दृगन तजिदीनी

फिरत सदाचित चक्र चढ़यो सो ॥ रहत हिये अति शोच बढ़यो सो ॥
मिलाहिं कवन विधि कुँवर कन्हाई ॥ यहै बिचार बिचारत जाई ॥
यह मुख सखी कौन सों कहिये ॥ पशुवेदन ज्यों आपहि सहिये ॥
मुन प्यारी तू हरि रँग राची ॥ बात कहैं तोसों हम सांची ॥
तोते चतुर और नहिं कोऊ ॥ तुम अरु श्याम एक भये दोऊ ॥
बाकी नहीं कछू अब बांची ॥ कहों बात मैं रेखा खांची ॥
ऐसी भई आप भोरी ॥ उनको मन तैं नाप लयोरी ॥
तैं उनको मन प्रथम चुरायो ॥ तब उन तेरोहू अब पायो ॥
अब काहे को करत सयानी ॥ नन्द नँदन बर तू पटरानी ॥
तोसी और कौन बड़भागी ॥ तेरे संग श्याम अनुरागी ॥
बिलसौ श्याम संग सुखमानी ॥ अब कत बृथा रहत बौरानी ॥

दो० श्यामकरी स्वहिं बावरी, मन करिलियो अधीन ।

बंसी ज्यों वाकी पलक, अटके मो दृगमीन ॥

सो० अब स्वहिं कछु न सुहाय, मन मेरो मेरो नहीं ।

लियो श्याम अपनाय, रूप ठगोरी डारि शिर ॥

बार बार मैं तोहिं सुनाई ॥ तेरे मन यह बात न आई ॥
अपनी सी बुधि जानत मेरी ॥ मैं पाई इतना कहैं एरी ॥
देखतही हरिरूप लोभानी ॥ मोते मुधि बुधि सबहि हिरानी ॥
ऐसे कहि प्यारी अनुरागी ॥ गद गद वचन श्याम रस पागी ॥
पुनि पुनि कहति यहै मुखबानी ॥ मन हरि लियो बैल दधिदानी ॥
तब इक सखी सखी सों बोली ॥ तू कत होति जान कै भोली ॥
यह पुनि पुनि मनको निदरानी ॥ गुप्त बात तिन प्रगट बखानी ॥
तुम जानत श्यामा है छोटी ॥ है यह ज्ञान बुद्धि की मोटी ॥
रहत सदा हरिके संग माहीं ॥ हमसों प्रगट करति सो नाहीं ॥

किये रहत हमसों हठ आयी ❀ बात कहत मुख चोटी पाटी
 भये श्याम याही के बश अब ❀ देखि छके वेंदी छोटी छब
 भली बनी सुन्दर अब जोयी ❀ वे खोंटे उनतें यह खोंटी
 दो० कहति सखी यह तू कहा, निपट गँवारी बात ।

को प्यारीसम दूसरी, जाके बश बलभ्रात ॥

सो० रूपशील गुणधाम, यह सब में ब्रजआगरी ।

दृढव्रतलीनो श्याम, धन्य न याते और कोउ ॥

प्रीति गुप्तही की है नीकी ❀ कहो बात सखि अपने जीकी
 मैं रीभी यापर अति भारी ❀ क्यों खोंटी जो कृष्णपियारी
 जो हरि कोटि मदन मनमोहै ❀ सो मोहन याको मुख जोहै
 जैसे श्याम नारि यह वैसे ❀ भेद करै सो सखी अनैसी
 नागरिनवल नवल के नागर ❀ सुन्दर यह जोरी छवि सागर
 सुनहुँ सखी ऐसे पै राजें ❀ एक प्राण द्वै तन सुख काजें
 एकहु पलक कबहुँ नहिँ न्यारे ❀ सोवत जागत जान हमारे
 पूख नेह नयो वह नाहीं ❀ देखहु सखी समुक्ति मनमाहीं
 मेरो कछो मान यह लीजै ❀ इनसों भाव प्रीति करि कीजै
 इनकी प्रीति प्रीति के माहीं ❀ बिना प्रीति ये जान न जाहीं
 जबलग इनसों प्रीति न मानै ❀ तबलग इनकी प्रीति न जानै
 इनकी प्रीति लख्यो जो चाहैं ❀ तौ करि इनसों प्रीति निवाहै
 दो० सखी बचन सुनि सखिनके, भयो हिये अति चैन ।

धन्य धन्य ताको सबै, कहति सप्रेम सुबैन ॥

सो० धनि धनि तेरो ज्ञान, तैं इनको जानेउ भले ।

हम सब निपट अजान, बात कहति औरैकछ ॥

हम इनको ऐसे नहिँ जाने ❀ ये ब्रज आय गुप्त प्रगटने

श्यामा श्याम एक हैं एरी ❀ तौ इतने उपहास सहेरी
 वे दोउ एक दोष री तूरी ❀ तेरिहु प्रीति श्याम सों पूरी
 इनसों तेरी प्रीति पुरानी ❀ तब ते प्रीति पुरातन जानी
 धन्य श्याम धनि धनि तुव श्यामा ❀ हम सब बृथा भई विनकामा
 श्याम राधिका सहज सनेही ❀ सहज एक दोऊ हैं देही
 सहज रूप गुण पूरण कामी ❀ सुन्दर सहज सहज बन धामी
 देखि दुहुनकी प्रीति विशाला ❀ भई बिबश सब ब्रजकी बाला
 श्यामा श्याम रंग रस पागी ❀ सोवत ते मानहुं सब जागी
 उपजो प्रीति दुहुन की सांची ❀ दूर गई दुविधा मति कांची
 भई युगल रस बश सब गोपी ❀ लाज शंक मर्यादा लोपी
 सबके नैन रूप रस अटके ❀ श्रीश्यामावर नागर नटके

छं० नवल नागर श्याम श्यामा प्रेम मन सबके फँसे ।
 नयन नासा श्रवण रसना अंग प्रति दोऊ बसे ॥
 उठत बैठत चलत सोवत जगत निशि बासर घरी ।
 नहीं बिसरत ध्यान कबहुं सकल ब्रजकी सुन्दरी ॥

दो० गई सकल निजनिज सदन, युगलप्रेमरसलीन ।
 बिछुरत नहीं एकौ घरी, जैसे जल अरु मीन ॥

सो० रहे श्याम उर द्वाय, बिन देखे दृग कल नहीं ।
 गृहकारज न सुहाय, गुरुजन त्रासन कुछ नहीं ॥

वे कछु कहैं करैं कछु औरैं ❀ सास ननंद तब मारन दौरैं
 कहैं यहै पितु मात सिखायो ❀ ऐसोई ढंग तुम्हें बतायो
 कहा तुम्हारे मन यह आई ❀ अपनी सुधि बुधि कहां गँवाई
 तुम कुलबधू लाज नहीं आवै ❀ कहँ लागि कोउ तुम्हें समुझावै
 कबकी यमुना न्हान गई हो ❀ ऐसी अब तुम निडर भई हो

तुम राधा को संग करति हौ ❀ हरिके पाछे वही फिरति हौ
 बड़े महरकी सुता कहावै ❀ यह सब बात उन्हें बनि आवै
 उनको सब उपहास उठावत ❀ ब्रज घर बरप्रति यही कहावत
 ऐसे तुमहूँ नाम धरौहौ ❀ ब्रजलोगन में हमें हँसैहौ
 हम अहीर ब्रजपुर के बासी ❀ ऐसे चलौ होय नहिं हासी
 लोक लाज कुल कानहि करिये ❀ फूँकि फूँकि धरणी पग धरिये
 ऐसे कहि गुरुजन समुझावै ❀ लाज काज मर्याद सिखावै
 दो० सुनि युवती गुरुजन बचन, बिहँसि रहीं धरि मौन।
 हरि राधा उपहास की, महिमा जानै कौन ॥

सो० कहत तैसिये बात, जैसी मति जाके हिये ।

सुख उलूकहीरात, रबि को तेज न मानही ॥

बिष को कीट बिषहि रुचि मानै ❀ कहा स्वाद रस स्वादहि जानै
 ये अहीर इनको प्रिय गोधन ❀ नंदनंदनसुर श्रुतिशिवको मन
 तिनकी महिमा कह ये जाने ❀ जिनके गुण मुनि गर्ग बखाने
 धनि धनि राधाकुँवर सयानी ❀ श्यामहि मिली कर्म मन वानी
 श्याम काम के पूरण हारै ❀ पूरण करि तिनको उर धारै
 धन्य धन्य श्यामा बनवारी ❀ यह रस लीला ब्रज विस्तारी
 ऐसे गोपीगण करि ध्याना ❀ करत श्याम श्यामा गुणगाना
 श्याम रूप श्यामा अनुरागी ❀ रोम रोम ताही रँग पागी
 गई सदन मन लागत नार्हीं ❀ मन मोहनधिन क्षण युग जार्हीं
 मनहीं मन गुरुजन पर लीजै ❀ इन विमुखन को संग न कीजै
 कौन भांति करि इनसों छूटै ❀ क्यों वह दरश सरस सुख लूटै
 बारबार जिय अति अकुलाई ❀ कैसेहुं हरि बिन रह्यो न जाई
 दो० धृकगुरुजनकुलकानि धृक, धृक लज्जा धृकधाम ।

धकजीवन बहुदिननको, विनुसुन्दर घनश्याम ॥
 सो० पलक कलरूप जाय, ब्रजवासी प्रमुदरशबिना
 सदन न नेक सुहाय, मन खिलीनो सांवरे ॥
 अथ बाटके मिलनकी लीला ॥

श्रीवृषभानु कुँवरि बर गोरी * कृष्ण प्रेम उनमत्त किशोरी
 तन बिहल मन हरिके पासा * दुरत न हृदय प्रेम परकासा
 चली यमुन जल आप अकेली * रूप राशि गुण राशि नबेली
 दृगन श्याम दर्शनकी आसा * मन ही मन यह करति हुलासा
 चितको चोरे अबहिं जो पाऊँ * तौ उर को संताप नशाऊँ
 राखौ बांधि हृदय सी लाई * भुजकी दृढ़ करि दाम बनाई
 जैसे लियो चोरि मन मेरो * तैसे लेऊँ छोरि उन केरो
 छाँड़ों नाहिं करै जो कोरी * ऐसे जाति बिचारति गोरी
 इततें प्यारी यमुनहिं जाई * उततें आवत घरहिं कन्हाइ
 नीलजलज तन शोभित आबे * नश्वर बेब काञ्चनी काबे
 दूरिहि तें देखतही जान्यो * जीवनप्राण तुरत पहिंचान्यो
 रही मनोहर बदन निहारी * कोअिमदन जापर बलिहारी
 दो० मन आनंद हुलस्यो हियो, रोम पुलकदृगबारि।
 बोली गदगद बचन सुख, तन बिहल संभारि ॥
 सो० चित चोरे कहँ जात, मैं हूँदति तब ते तुमहिं।
 कहँ सीखी यह बात, अहाँ नंदके लाड़िले ॥
 जानत जैसे माखन चोरी * तब वह बात हती कहु ओरी
 बालक हते कन्ह तब तुमहं * भोरी सहज हुती मन हमहं
 मुख पहिंचान मान सुख लेती * यशुमाति कान जान तब देती

बसौ बास सब ब्रज इकठौरी ❀ गोरस काज कान नहिं चोरा
 अब भये कुशल किशोर कन्हारै ❀ भई सजग ६५ सब तरुणारै
 माखनते अब चितकी जोखे ❀ लागे श्याम करन वरजोरी
 नखशिख अँग चितचोर तुम्हारो ❀ लीनो मन धन छीन हमारो
 सो अब जात कहाँ तुम लीने ❀ भुजा पकरि ठाढ़े हरि कीने
 तुम को नीके करि हम चीन्हे ❀ बनिहै अब मेरो मन दीन्हे
 ब्रजमें ढीठ भये तुम डोलत ❀ मोसों सूखे बचन न बोलत
 अबतौ मोहिं बूझि घर जैहौ ❀ बिना दिये मन जान न पैहौ
 प्यारी यों भगरति पिय पाहीं ❀ देह गेह की सुधि कहु नाहीं

दो० बीच करी कुल लाज तब, सनमुख आई धाय ।

बकसि नागरी चूकयह, मोहिं कहाँ समुभाय ॥

सो० चित लैगयो चोराय, चूकपरी हरिते बड़ी ।

झाँड़िदेहु डरपाय, बड़े महर की कुँवरि तुव ॥

कुलकी लाज अकाज कियोरी ❀ कहा कौं अति जरत हियोरी
 तब यों कहति पीय सों प्यारी ❀ सुनहु प्राणपति गिरिवरधारी
 देखे बिना तुमहिं दुख पाऊं ❀ सो यह तुम विन काहि सुनाऊं
 गुप्त रहन मोकों तुम भाख्यो ❀ सो आयसु मैं शिर धरिगाख्यो
 नहिं सुहात तुम विन दिन राती ❀ प्राणनाथ तुम हित सब भांती
 तुमते बिमुख जनन के माहीं ❀ रह्यो जात मोपै प्रभु नाहीं
 भात पिता अति त्रास दिखावैं ❀ निंदत मोहिं नेक नाहिं भावैं
 भवन मोहिं माटी सों लागै ❀ इक क्षण शोच नहीं उर त्यागै
 कहँलगि अपनी बिपति बताऊं ❀ तुम विन सुख को अंत न ठाऊं
 सुंदर श्याम कमल दल लोचन ❀ करहु कुसंगति को दुख मोचन
 आवहु विनय श्याम मुनिलीजै ❀ चरणन ते न्यारी नाहिं कीजै

कुल की कानि कहाँलागि मानो ❀ यह मन मोहन तुमहिं लुभानो

छं० मन लुभानो तुमहिं मोहन और तेहि भावै नहीं ।

बिन लखे गिरिधरन सुंदर कहूं सुख पावै नहीं ॥

लोकडर कुललाज गुरुजन कानि कहँलौ कीजिये ।

सिंहशरण कृपाल जंबुक त्रास क्यों सहिजीजिये ॥

दो० निरखि श्याम प्यारीबदन, सुनिकै बचनसिहाय ।

प्रेम अधीन बिलोकि अति, हर्षि लई उर लाय ॥

सो० शीतल पंकज पान, परस हख्यो तनबिरह दुख ।

प्रेम बिबश भगवान, बोले प्यारी सों हरषि ॥

कत दुख पावति हौ तुम प्यारी ❀ यह लीला तुम हित बिस्तारी

वसत सदा मैं तुम मनमार्ही ❀ तुम मम उरते बाहर नाहीं

श्रीबृन्दावन घन सुखकारी ❀ है बिहारथल तुम्हरो प्यारी

शीतल सघन कुंज छवि धामा ❀ हम तुम संग मिलैं तहँ भामा

दीजौ दर्शन मोहिं कहँ आई ❀ तब तुमपै ऐहाँ मैं धाई

अब गृह जाउ आईहँ कोऊ ❀ यों संकेत बढ़्यो हित दोऊ

ब्रज यमुना मग बिच दोउ ठाढ़े ❀ प्रेम सकोच अतिहि मन बाढ़े

बिछुरत बनत न रहत तहांहीं ❀ चितवत सखिन चपल चहुँघाहीं

तबहिं युवति ब्रज ते कछु आई ❀ कछु यमुना ते ब्रजमें जाई

दुहुँदिशि तरुणिन आवत जानी ❀ मनहीं मन राधिका लजानी

चले तुरत हँसि कुँवरकन्हई ❀ मिले हांक दै ग्वालन जाई

रहे कहाँ तब ते सब ग्वाला ❀ ऐसे ढेर कल्यो नँदलाला

दो० गये भाव करि श्यामपहँ, लियो नागरी जान ।

कहिहौं यहै सखीनसों, कीनो यह अनुमान ॥

सो० देखिसखी म्वहिं संग, अबहिं आय सब बूझिहैं ।

जानति इनको रंग, मनमन शोचति लाड़िली ॥

उन युवतिन मोहनको देख्यो * जात राधिका दिगते पेख्यो
कहन लगी आपस में बातें * देखहु सखि प्यारी की घातें
बात करति मिलिसंग विहारी * हमहिं लखत दीने हैं दारी
बूझतही कछु बुद्धि उपै है * सांची एकहु नाहिं जनैहै
इतहु उतहु ते आई नारी * कहति कहां तू जाति पियारी
अबहिं लखे तुव दिग बनवारी * कहां गये पछितात कहा री
कहा दुराव बनत अब कीन्हे * हमहुं ते तवहीं लखि लीन्हे
कान्ह कहा बूझत हैं तुमको * सांची बात कहो तुम हमको
मन लै गये तुम्हारे चोरी * सो पायो अपनो तुम गोरी
श्यामहिमिलि अपनोमनलोनो * देखत हमैं दारि क्यों दीनो
सदा चतुरई फवति विनाहीं * अब तो आई परी फँदमाहीं
हमहिं बहुत तुम निदर वहीहों * कहां रहत हरि कहि निवहीहों

दो० कहतिरही जबतबहंतुम, हरि सँगदेखहु मोहि ।

तब कहियो जो भावही, लीनो बेसरि खोहि ॥

सो० अब हम लेहिं बिनाय, बेसरि देहौ की नहीं ।

की करिहौ चतुराय, और कछु हम सों अबहुं ॥

तब हँसि कह्यो नागरी प्यारी * तुम सब भई अजान कहारी
मैं मूख तुम चतुर बड़ेरी * ऐसेहि बेसरि लैहो मेरी
यही कहन मोको तुम आई * इत उतते मिलि उठि तुम धाई
बेसरि एक लेहुगी को को * पीताम्बर दिखरावहु मोको
पीताम्बर अरु बेसरि लीजै * प्रकट जाय तब ब्रजमें कीजै
तारी एक बजति कर दोऊ * इतनो ज्ञान करो सब कोऊ
सुन राधा तोसों हम हारी * धन्य धन्य तेरी महतारी

तेरे चरित कहा कोउ जानै ❀ बश कीनो घनश्याम सुजानै
अबहीं रारि पढ़ायो तिन को ❀ हम देखे तेरे ढिग उनको
तापर निदरत है तू हमसों ❀ कहत न बनत हेंम कछु तुमसों
अँगअँग बिरचि कपट चतुराई ❀ निजकर बिधना तोहि बनाई
इतनी बुद्धि श्यामके नाही ❀ जितनी है प्यारी तुव माहीं

दो० श्याम भले अरु तुम भली, राज करहु घरजाय ।

बेसरि छोरति हैं सखी, बिन काजै उठि धाय ॥

सो० जान्यो तुम्हरो ज्ञान, दौरि परी मोपर सबै ।

जो तुम हती सुजान, गहती बांह दुहूनकी ॥

कहु प्यारी सांची अब हमसों ❀ कछु तो श्याम कहतहैं तुमसों
हा हा बात कहो सो प्यारी ❀ भेद करौ तौ सौह हमारी
तुव ढिगते मोहन हम हेरत ❀ गये उतै ग्वालन को देखत
तू क्यों ठठकि रही मग माहीं ❀ कहा कह्यो मोहन तुव पाहीं
सहज होय हमसों यह भाखौ ❀ उरमें कछु रोष मति राखौ
मैं यमुना तट जात रही री ❀ ब्रजते आवत तुम्हैं लखी री
परखन लगी तुमहिं मगमाहीं ❀ तिरछे आय गये हरि पाहीं
मैं तुमहीं तन रही निहारी ❀ उन पूछो म्वहिं ग्वाल कहां री
मैं सुनि सम्मुख दीठ न खोली ❀ हां नाही कछु मुख नहिं बोली
ग्वालन देखत गये कन्हाई ❀ तुम मेरी बेसरि को धाई
सुनि यह बात युवाति सकुचानी ❀ कछु तो परति सांचसी जानी
ग्वालन देखत गये कन्हाई ❀ यह तो हमहुं श्रवण सुनि पाई

दो० तब हंसिकै सखियन कह्यो, सुनुलाड़िली सुजान ।

हम मानी तेरी कही, तू मति रिस जिय आन ॥

सो० लीनी कण्ठ लगाय, अति निर्मल तू लाड़िली ।

भूठहि करत चवाय, ब्रज घर घर तेरो सबै ॥

अब चलिये यमुना के धामा ❀ संग चलैं हमहूँ सब श्यामा
चूक परी हमसों यह तेरी ❀ नाम लियो वेसरि को एरी
अहो सखी तुम निपट अनैसी ❀ जानति हौं म्वहिं आप हौं जैसी
भूठहि लागी दोष लगावन ❀ अब लागी मोको दुलरावन
क्षणक बुद्धि तुम्हरी धौं कैसी ❀ हो तुम वड़ी पेट की जैसी
यह सुनि हँसति चलीं ब्रजनारी ❀ गई यमुन ते गृह को प्यारी
ऐसे सखियन को बहरायो ❀ कृष्ण सनेह न प्रकट जनायो
नागरि श्यामा श्याम सनेही ❀ चतुर श्याम श्यामा के तेही
श्यामा वसत श्याम मन माहीं ❀ वसत श्याम श्यामा मन पाहीं
बदि संकेत गये घर दोऊ ❀ मात पिता कछु जान न कोऊ
कैसेहुँ करि करि दिवस बितायो ❀ निशि निघटे रस विरह सतायो
अति आतुर दोऊ मन माहीं ❀ क्यों हूँ नींद परति है नाहीं

दो० विरह नदी निशितम सलिल, पैरत थके निहारि ।

बूझ्योमणितमचरकह्यो, मिल्योपारभिनसारि ॥

सो० सुनि तमचरकी टेर, अति आनंद दुहूँन मन ।

अतिही उठे सबेर, लगी चटपटी मिलन की ॥

अथ सङ्केतके मिलनकी लीला ॥

श्याम उठत लखि जननी जागी ❀ हरिमुख कमल निरखि अनुरागी
बूझति मात जाउँ बलि प्यारे ❀ आज कहा तुम उठे सबारे
उत्तम जल भरि दीनी झारी ❀ अति आतुर हरि करी मुखारी
बिबश श्याम प्यारी रस छाके ❀ मगन ध्यान बृषभानुसुता के
उत बृषभानु सुता सुकुमारी ❀ उठी प्रात वह भाव विचारी

ग्रीवा सों मोती लर तोरी ❧ आंचर बांधि मात की चोरी
यहै व्याज अपने उर धार्यो ❧ कुंजधाम बनजान बिचार्यो
आंगन गई भवन फिरि आई ❧ गई भवन ते फिरि आंगनाई
जात बनै न रह्यो नहिं जाई ❧ इत उत फिरत भवन बितताई
मनहिं कहत कब मिलहु कन्हाई ❧ काल्हि गये बनधाम बुलाई
मात कह्यो क्यों उठी सबारी ❧ जाति कहां प्रातहिं तू प्यारी
आज कहा इत उत तू डोलै ❧ मुख तें कछू बचन नहिं बोलै

दो० अति नागरि मोती लरी, राखी प्रथम दुराय ।

ताही मिस करिकै सकुच, बोलति नहिं डराय ॥

सो० पुनि पुनि चितई मात, लखि ग्रीवा भूषण बिना ।

तब जानी यह बात, खोई कहूँ मोती लरी ॥

जननी भई तबहिं रिसहाई ❧ कंठ लरी तैं कहां गँवाई
मोतिन को गजरा छबिछायो ❧ बड़े मोल को परम सुहायो
तेरे लिये महर बनवायो ❧ मैं तोको हितकरि पहिरायो
कौने लियो कहां तैं गेस्यो ❧ काल्ही तेरे तौ गर हेस्यो
बूझै तोहिं जवाब न आवै ❧ कह शोचति किन बेगि बतावै
सुनि राधिका मात की बानी ❧ मन बिहँसति, ऊपर भय मानी
बोलति नहीं हृदय हरषाई ❧ कहति भली बुधि मोकहूँ आई
अबहीं मोको खीज पठै है ❧ या मिसि जान श्याम पै है
कहति मात सों तब भय मानी ❧ मोहिं नहीं सुधि कहां हिरानी
काल्हि सखिन सँग यमुना न्हाई ❧ तहां कहूँ धौं तिनहिं चुराई
कैधौं गिरी कतहुँ जलमाहीं ❧ यह तौ मैं कछु जानति नाहीं
कालिहि ते शोचति पछिताई ❧ तेरे डरते कह्यो न जाई

दो० नेकु नींद नहिं निशि परी, तेरी सों री मात ।

याही डरते आज हों, उठी बड़े परमात ॥

सो० सुनति सुताके बैन, महरि चकित मुख लखिरही ।

कृष्णप्रिया गुणऐन, कोऊ पार न पावई ॥

तब जननी करि क्रोध कही री ❀ मैं बरजति त्वहिं हारि रही री

फिरति नदी बन डगरन माहीं ❀ काहू की शंका त्वहिं नाहीं

बहुत तात त्वहिं लाड़लड़ाई ❀ नोखां सुता महर की जाई

बरजति मैं जु करति तू सोई ❀ भली करी मोतिन लर खोई

एक एक नग परम मुहायो ❀ लाखटका दै मैं जु मँगायो

जाके हाथ पखो सो दैहै ❀ घर बैठे निधि पाय गँवैहै

भरि भरि नयन लेति है माता ❀ मुखते कछू न आवति वाता

रीतौ गरौ निहारति जवहीं ❀ हियो उमँगि आवत है तवहीं

कहा करौ जो खोइ गई री ❀ तू कित खीजति विकल भई री

लैहौ और मँगाय बवासों ❀ देति नहीं ज्यों और डिवासों

करिहै कहा सँति जो राखे ❀ तादिन तेही कितक धौं भाखे

रोवत कहा और है नाहीं ❀ दै निकासि पहिरौं गरमाहीं

दो० सुनु राधा तेरो नहीं, अब पतियारो मोहिं ।

चौकी हार हमेल कछु, नहिं पहिराऊँ तोहिं ॥

सो० लाखटकाकी हान, करी आजतैं लाड़िली ।

अब नहिं दैहौं आन, जबलौं वह ल्यावै नहीं ॥

अब तौ घर पैठन तब पैहौ ❀ जलजसरी जव खोज लै ऐहौ

जाधौं देखि कहूँ जो पावै ❀ तवहीं तोहिं भलाई आवै

यमुना गई संग तब को ही ❀ बूझति नहीं जाय किन ओही

कौन कौन को तोहिं बताऊँ ❀ कहँलगि सबके नाम गनाऊँ

चंद्रावलि ललितादिक नारी ❀ हतीं सकल ब्रजगोपकुमारी

देखहुँ जाय यमुन तट हेरी ॥ जहां रात्र में नहात रहीगी
 युवती एक रही टक लाई ॥ पंखि देखिहो नको जाई
 जैहै कहां जलज लर मेरी ॥ तिनहीं लई भली सुपारी
 आज अबेर लगौगी मोहीं ॥ दूंदौगी ब्रज घर घर ओही
 ऐसे करि माता मति भोरी ॥ हरषि चली बृषभानु किशोरी
 निधरक चली सदन तें प्यारी ॥ मन अश्रयो वन कुञ्जविहारी
 मनहीं मन यों शोचति जाई ॥ कैसे हरिसों देहुँ जनाई
 दो० बार बार नंदनंद इत, आतुर जोहत राह ।

प्यारी मुख शशि उदैकी, नैन चकोरन चाह ॥

सो० भरे बिरहरस माहि, क्षण में घर द्वारे क्षणक ।

फिरिफिरि आवहिं जाहिं, लगीचटपटी प्रेम की ॥

जननी करति रसोई आतुर ॥ लखिलखिलजान श्यामघनचातुर
 कहा अबेर करति तू भैया ॥ भूख लगी म्वाहिं कहत कन्हैया
 यशुमति कह्यो तात बलिजाई ॥ अब बिलम्ब नहिं बैठहु आई
 सखा संग सब लेहु बुलाई ॥ बोलि लेहु अरु हलधर भाई
 सादर कह्यो श्याम बलभइये ॥ दाऊजी जेवन को अइये
 मोको अवहिं नहीं रुचि भैया ॥ सखन संग तुम खाहु कन्हैया
 संग सखन लै तब मन मोहन ॥ जेवन को बैठे सब गोहन
 पटरस व्यञ्जन सरस सँवारे ॥ परसि धरे रोहिणि पनवारे
 श्याम सखन को आयसु दीनो ॥ आपनहुं कर कौरहि लीनो
 तबहीं कोकिल के सम बानी ॥ बोलि उठी राधा सुखदानी
 नन्द महरि पिछवारेहिं आई ॥ झूठहि ललिता को गुहराई
 बृन्दावन मग जाति अकेली ॥ आवहु बेगी तुमहुं संग हेली
 दो० बिन जेबे मोहन उठे, करते कौर गिराय ।

जैवतही नई सखा, चले बनहिं अतुराय ॥

सो० देखि चकित दोउ मात, चौंकि रहे सगरे सखा ।

कहत कहां चलिजात, अतिआतुर गोपालतुम ॥

अवहीं ग्वाल गयो कहि मोही ॥ वन में गाय वियानी लोही

में जैवन बैठ्यो बिसराई ॥ सो सुधि मोहिं अवहिं हैआई

तुम जैवहु मैं देखहुं जाई ॥ करी श्याम तिनसों चतुराई

लोही मेरी गाय वियानी ॥ यह कह चले हर्ष उर आनी

हँसत सखा सब मन मन माहीं ॥ नहीं गाय बछरा ह्वां नाही

है प्यारी रानी हू राधा ॥ हम जानी यह बात अगाधा

जननी नहीं कबू यह जानी ॥ बार बार कहि कै पछितानी

भूखे श्याम गये उठि धाई ॥ राज करो यह गाय वियाई

गई सैन दै वन श्रीश्यामा ॥ पहुँचे जाय तहां वनश्यामा

देखत हरष भये मन दोऊ ॥ फूले अंग समात न कोऊ

मिले धाय गाहि अंकम माला ॥ कनक बेलि जनु लगी तमाला

मिलि बैठे दोउ कुञ्ज सुहाई ॥ कोटि कामरति छविहि लजाई

दो० नवल कुञ्ज नव नागरी, नव नागर नँदनन्द ।

प्रेमसिंधु मर्याद तजि, मिले उमगि आनन्द ॥

सो० बिलसतमदनबिलास, कोटि मदन मनकेमथन ।

युगलरूप की रास, नित्यबिलासबिलासनिधि ॥

नागर श्याम नागरी श्यामा ॥ शोभित कुञ्ज कुटी छविधामा

चितवत दुरदुर नयन लजोहै ॥ सो छवि वराणि सकै कवि को है

रीभे श्याम नागरी छवि पर ॥ नागरि निरखत श्याम सुभगवर

देह दशा की सुरति विसरै ॥ अरस परस दोउ रूप निहारै

शोभित बदन महा छवि छाये ॥ शिथिलअंग श्रमाविन्दु सुहाये

इंदीवर राजीव कमल जनु * फूलिरहे मकरन्द भरे मनु
बैठे कुञ्ज द्वार सुखदाई * कोमल किशलय सेज सुहाई
लटकति चहुँदिशि कुसुमितबेली * फूलिरही तरु द्वार नवेली
हरित भूमि छवि वरणि न जाई * बहत समीर सुखद पुरवाई
आये उलाहि मेघ सुखकारी * परत बूंद शीतल श्रमहारी
भीजत सुगंध चूनरी सारी * मन सकुवत लखि रसिक विहारी
बूंद बरावत मोहन पातन * हँसि हँसि करत प्रेमकी वातन

दो० भीजे रस सों प्रेमसुख, जलभीजे दोउ गात ।

भीजे अम्बर कुंज गृह, श्यामा श्याम गृहात ॥

सो० यह अचरज की गाथ, को मानै को कहि सकै ।

गोपसुता के साथ, रमत ब्रह्मदुम कुंज तर ॥

याहिबिधि करि विलास बनमाहीं * कह्यो श्याम श्यामा के पाहीं
अब गृह जाहु सांझ नियराई * मात पिता करिहैं दुचिताई
यह रसरीति गुप्त की नीकी * तुम प्यारी अति मेरे जीकी
कर ते कौर डारि मैं आयो * तुमरो बोल सुनत उठिबायो
मेरे प्राण बसत तुम पाहीं * एक क्षण तुमको बिसरत नाहीं
सुनि सुनि बातें प्रिय की प्यारी * करति मनहिं मन आनंद भारी
अति सनेह बोली सकुचाई * सुनहु प्राण प्रीतम सुखदाई
कहा करौ पग जात न घरको * मन अटक्यो नहिं मानत डरको
दृग तुमको देखत सुख पावैं * गृह गुरुजन मोहिं नेकु न भावैं
बरजहु अपनीचितवनि तुम हरि * और मन्द मुसुकानि मनोहरि
तुम्हरी नेकु सहज यह बानी * सहियत है हम सर्वस हानी
बशीकरन है इनके माहीं * बिबश भयो मन मानत नाहीं

दो० ऐसी बिधि परगट करत, दम्पतिनिज अनुराग ।

भरे परम आनन्द रस, वदत आपने भाग ॥

सो० श्याम लई उर लाय, प्रिया बोधि पठई घरहि ।

चले आप सुख पाय, सुन्दर घन सुखके सदन ॥

करति जननि अवसेर विशाला ❀ पहुँचे सदन श्याम तेहि काला

लीने धाय लाय उर मैया ❀ कहति लाल की लेउँ बलैया

करते कौर डारि उठि भागे ❀ सुनत गाय व्यानी अनुरागे

लोही गाय आपनी जानी ❀ ताते प्रीति अधिक उर आनी

बहु तौ नाहिंन मेरी गैया ❀ बृन्दाविपिन भ्रम्यो सुनु मैया

गोवर्द्धन यमुना तट सारौ ❀ बृन्दावन दूंदत सब हारौ

कोऊ सखा संग तहें नाहीं ❀ फिखो अकेलो वनके माहीं

युवती एक मिली धौं कोहिं ❀ सो पहुँचाय गई घर माहीं

मुनि यशुदा अतिमन सकुचानी ❀ धोये पद लै ताते पानी

तुरत श्याम को भोजन दीनो ❀ निरखि मुखारविन्द सुख लीनो

लीलासागर कुँवर कन्हारि ❀ सदा सदा भक्तन मुखदारि

ब्रजवासी प्रभु सब गुण आगर ❀ नँदनंदन सुंदर सुखसागर

दो० तब श्री कीरतिनंदनी, रूपराशि गुणखान ।

चली श्याम सुख दै भवन, नागरि नवलमुजान ॥

सो० लई खोलके हाथ, आंचरते मोती लरी ।

सखी मिली यक साथ, बूझति कहँ तू लाड़िली ॥

तासों व्योरो यक समुझायो ❀ गई हती यह काज बतायो

कह्यो सखी तब सुन री प्यारी ❀ ऐसी निधरक भई कहा री

ब्रज घर घर तैं फिरत अकेली ❀ संग नहीं कोइ सखी सहेली

मोको संग बोलि नहिं लीनी ❀ ऐसी तैं करनी यह कीनी

प्रातहि गई अग्रहिं तू आई ❀ बीत्यो दिवस निशा नियराई

पायो हार किधौं पुनि नाहीं ❀ देखहु मोहिं साद मन माहीं
चतुर सखी मनमें यह जानी ❀ मिलवति है यह भूठी बानी
यह तो गई श्याम के पासा ❀ आवति है करि भोग विलासा
कह प्यारी किन हार चुरायो ❀ कैसे जाय तहां तैं पायो
ब्रजयुवतिन सबहिन मैं जानों ❀ कहे तो सबके नाम बखानों
ताको नाम लेहि किन लीन्हों ❀ प्यारी तेरे गुण मैं चिन्हों
चोर तुम्हारे कुँवर कन्हाई ❀ तिनसों जाय बिलसतू आई
दो० रस बश कीने श्याम तैं, कहा बनावति बात ।

कहे देत रस रँग भरे, अरु सोहैं सब गात ॥

सो० कह बहँकावति मोहिं, कहा हार कहँ ग्वालिनी ।

तबते जानति तोहिं, जबते तैं हरिसँग कियो ॥

इन बातनि कछु पावत हैरी ❀ तोहिं यहै नित भावत कैरी
देखत मोहिं अकेली जबहीं ❀ नई बात उपजावति तबहीं
बिनहीं देखे भूठ लगावै ❀ नाहक मोसों बैर बढ़ावै
सौह दिये बूझति मैं तोहीं ❀ जोरि कहत कै देख्यो मोहीं
जब जानी प्यारी बिरुझानी ❀ तब यह चतुर सखी मुसकानी
तब हँसि कह्यो जाय घर प्यारी ❀ तू जीती मैं तोसों हारी
चली भवन बृषभानु दुलारी ❀ अति अवसेर करति महतारी
गई प्रात राधा नहिं आई ❀ दिवस गयो निशियाम बिहाई
हारकाज मैं त्रास दिखाई ❀ तातें रूस रही कहुँ जाई
है है धौं काके घर माहीं ❀ कहां जाउँ मैं ढूँढ़न ताहीं
जोहु हार वह कहि पछिताई ❀ सुता सनेह अधिक अकुलाई
मुनि हैं बात महर कहुँ जबहीं ❀ मोपर अति रिस करि हैं तबहीं

दो० शोचतिजननीबिकलअति, मननलहतबिश्राम ।

उर डराति ताही समय, गई कुँवरि निजधाम ॥

सो० देखतही उठिधाय, हरषि लई उरलाइकै ।

सुता मात उरलाय, शोच मिट्यो धीरज भयो ॥

लेरी मात हार में पायो ❀ जाकारण म्वहिं त्रास दिखायो

मनहीं मन कीरति सकुचाई ❀ पोच करी में याहि रिसाई

अति पुनीत राधिका प्रबीनी ❀ कृष्ण मिलन हित यह मति कीनी

अगम अगोचर है प्रभु जोई ❀ ब्रज बनितन बश कीने सोई

जो प्रभु शिव सनकादिक ध्यावै ❀ ब्रजगोपिन सँग सो सुख पावै

हरिकी कृपा अगोचर भारी ❀ निगमनहुं ते अगमन भारी

प्रीति बिबश सबते गिरिधारी ❀ राजा रंक पुरुष कह नारी

देवकि उदर प्रीतिबश आये ❀ प्रीतिहि ते यशुमति पय प्याये

प्रीति बिबश बन धेनु चराइ ❀ प्रीति बिबश नँदकुँवर कन्हाई

प्रीतिहि के बश दही चुरायो ❀ प्रीति बिबश उखल बँधवायो

प्रीति बिबश गोवर्द्धन धारी ❀ प्रीति बिबश नटवर बनवारी

प्रीति बिबश गोपिन सँग कामी ❀ प्रीति बिबश बृन्दावन धामी

दो० श्याम सदा बश प्रीतिके, तीन भुवन बिख्यात ।

बिना प्रीति नहिं पाइये, नन्दमहर को तात ॥

सो० प्रीति करहु चित लाय, ब्रजवासी प्रभुपदकमल ।

कहत सन्त श्रुति गाय, प्रभुहरिरीमें प्रीतिको ॥

अथ प्यारीके घरमिलन लीला ॥

भये श्याम नागरि बश ऐसे ❀ फिरत छांह संगहि सँग जैसे

बदन कमल रस रूप लुभाने ❀ रहत शिलीमुख ज्यों मड़राने

बचन नाद रस मृग ज्यों गीधे ❀ नयन कटाक्ष बंक शर बीधे

कवहुँ श्याम यमुना तट जाहीं ❀ विन प्यारी देखे अकुलाहीं
कवहुँ कदम चढ़ि मग अवलोकैं ❀ कवहुँ जाय बन कुंज विलोकैं
गृह बन लगत कहूं मन नाहीं ❀ मिलन प्रकार चहत चितचाहीं
तब बृषभानु पुरा तन आवैं ❀ मुरली मधुर बजावैं गावैं
प्यारी प्रकट श्याम गति देखी ❀ देखि मनहिं मन सहत विशेषी
अति अनुराग भरे दोउ नागर ❀ गुण सागर रस रूप उजागर
अरस परस दोउ चाहत ऐसे ❀ शशि चकोर अंबुज अलि जैसे
चली यमुन बृषभानु दुलारी ❀ शोभित संग नवल ब्रजनारी
देखे नन्द सुवन तेहि खोरी ❀ व्याकुल प्रेम विकल मति भोरी

दो० सखिन संग लखि नागरी, मन डरपी सकुचाय ।

श्याम परे फँद कामके, कौन कहै समुझाय ॥

सो० सखियनके संकोच, बोलसकत नहिं मुखबचन ।

हृदयभयो अतिशोच, देखिबिरहव्याकुलहरिहिं ॥

इतहि सखिन सों बात बनावैं ❀ उतहि श्यामको भाव जनावैं
मुख मुसकाय सकुच पुनि लीने ❀ सहज अलक निखारन कीने
एक सखी यमुना सों आवति ❀ ताहि भेंटि यों बचन सुनावति
मेरे सदन आइयो आली ❀ हर्ष भये यह सुनि बनमाली
प्यारी गुप्तभाव जो कीनो ❀ श्याम मुजान जान सो लीनो
हरषि गये तब निज गृह मोहन ❀ प्यारी चली सखिन के गोहन
चतुर सखिन मनमें लखि लीनों ❀ भाव कछु हरिसों इन कीनों
हरवैं आपुस में बतानी ❀ हरि तनु लखि कछु यह मुसकानी
पुनि मुसकाय कमल मुख फेखो ❀ सदन बुलाय सखी को देखो
गये श्याम उत हर्ष बढ़ाई ❀ ये अति चतुर करी चतुराई
और भाव कैसो गन कोऊ ❀ आज रैनि मिलि हैं ये दोऊ

लै यमुना ते जल अतुराई ❀ सखिन संग प्यारी घर आई
दो० भाव दियो निशि आई हैं, मेरे मोहन आज ।

अति हर्षित अंगनसजति, श्रवणवसनसमाज ॥

सो० सहज रूपकी खान, अंग सुधारत लाड़िली ।

को करिसकै बखान, त्रिभुवनपति हरिवल्लभा ॥

अंग शृंगार कियो हरिप्यारी ❀ बेणी रचि निज पाणि सँवारी

मोतिन संग जराऊ दीको ❀ कियो बिंदु बंदन को नीको

लोचन अंजन रख बनाई ❀ श्रवणन तरवन की छवि आई

नासा नथ अतिही छवि छाजै ❀ नाग वेलि रंग अधरन राजै

सुभग अंग सुच नौ सत साजै ❀ सुगंध सुगंध वसन शुभ आजै

मन मोहन को पंथ निहारै ❀ कबहुँ कि उत्कंठा जिय धारै

भयो बाल शशि अस्त निहारी ❀ कहति आज ऐहैं गिरिधारी

आवन पैहैं कै धौं नार्हीं ❀ कै आवत है हैं मगमाहीं

कै धौं तात मात भय करि हैं ❀ कै आवत मेरे घर डरि हैं

आवैगे कै धौं हरि नार्हीं ❀ यों शोचति प्यारी मन माहीं

कबहुँ रचि रुचि सेज सँवारै ❀ हरि ऐहैं मन हर्षति हारै

सुमन सुगंध सेज उर धारै ❀ पुनिपुनिकरि अभिलाषिचारै

दो० आवैं कबहुँ अचानकहि, जो मोगह घनश्याम ।

डारति अति अनुरागभरि, सुभगपांवड़े धाम ॥

सो० प्रकटे कृपानिधान, यों अभिलाषा करतही ।

कोकहिसकै बखान, भयो ज सुखलखि दुहुँनमन ॥

वह छवि कापै जात बखानी ❀ वह रस फिफक मंद मुसुकानी

कह सुदु मधुर परस्पर बानी ❀ वह संयोग प्रेम सकुचानी

वह शोभा वह चितवनि बांकी ❀ वह रस प्रेम उमँग दुहुँ घांकी

वह सुख श्रीराधा माधव को ❀ को कहिसकै आहिजग कविको
जाकी महिमा बेद न जानै ❀ कवि ताको केहि भांति बखानै
श्यामा श्याम सेज पर सोहैं ❀ अरस परस दोऊ मन मोहैं
गुण आगर ब्रविसागर दोऊ ❀ कोटि काम रति सम नहिं सोऊ
मत्त प्रेमरस बिबश बिहारैं ❀ युगल परस्पर अंग सँवारैं
लटपटि पाग सँवारति प्यारी ❀ अलक सुधारत श्रीगिरिधारी
रास विलास दोऊ अनुरागे ❀ आलिंगन चुंबन रस पागे
हास विलास विविध रसरीती ❀ इहि सुख रैन याम त्रयबीती
अति रसमत्त युगल अलसाने ❀ पुनि पौढ़े दोऊ लपटाने

दो० निशिनिघटीतमतामिटी, उडुगणज्योतिमलीन
गये कुसुम कुम्हिलाइकै, भई दीप ब्रवि ब्रीन ॥

सो० बिकसे सरससरोज, भयो पवन शीतल सुरभि ।
उतख्यो नीच मनोज, आय आपने धनुष तैं ॥

सरस बचन बोली तब प्यारी ❀ जागहु प्राणनाथ बनवारी
भयो प्रात को समय कन्हई ❀ प्राची दिशि पीरी परि आई
चन्द मलिन चिरई चुहचानी ❀ अलि छूटे कुमुदिनि सकुचानी
बोले तमचुर जहँ तहँ वानी ❀ मिले कोक कोकी सुखमानी
उठहु प्राणपति सदन सिधारौ ❀ है ब्रज घर घर घेर हमारौ
लगी रहति परखाति ब्रजनारी ❀ जागहिं जनि गुरुजन भय भारी
सुनत उठे मोहन मुसकाई ❀ चले सदन अपने अतुराई
गृहते निकसत सखियन जानी ❀ देखि दरश तनुदशा भुलानी
प्रकट दरश दै गये कन्हई ❀ यह उनकी मनसाध पुराई
शीश मुकुट मोतिन की माला ❀ पीत बसन कटि नैन विशाला
श्याम वरण तनु सुंदर ताई ❀ अँगअँग प्रति गृह कुँवर कन्हई

देखि रूप मन रह्यो लुभाई ❀ निकसि गये गृह कुँवर कन्हारि
 दो० बारबार जिय लाड़िली, यह शोचति पछितात ।

गये श्याम आलस भरे, नेकु न सोये रात ॥

सो० देखै जिन सखि कोय, श्याम गये मो सदनते ।

मैं राखे है गौय, अबलागि यह रस सखिनसों ॥

देखौ जाय पँवरिहै प्यारी ❀ जहां तहां ठाढ़ी व्रजनारी

सकुच गई बिंता उपजाई ❀ बार बार मन मन पछिताई

हरि सों प्रीति गुप्त ही मेरी ❀ सो इन आज प्रकट करि हेरी

निकसे श्याम हमारे घरसों ❀ इन जान्यो ह्वैहैं अटकसिों

नितही नित बूमति ये आई ❀ मैं निदरचो इनको सतराई

अब तौ श्याम प्रकट इन देख्यो ❀ करिहैं मोसों बहुत परेख्यो

यह तौ दाँवँ भलो इन पायो ❀ अब कैसे करि जाय छिपायो

अबहीं बूमहिंगी सब आई ❀ कह कहिहौं अब उनसों जाई

प्रकट करौं तौ होय अनीती ❀ राखन गुप्त कह्यो हरि प्रीती

शोच पर्यो कछु बात न आवै ❀ बार बार मन प्रभुहि मनावै

प्राणनाथ हरि होउ सहाई ❀ जाते मेरी पति रहि जाई

जैसे बोध सखिन को होई ❀ दीजै नाथ बुद्धि अब सोई

दो० ऐसे शोचति लाड़िली, कबहूँ प्रभुहि मनाय ।

कबहूँ प्रभुको सुख समुझि, प्रेम मगन ह्वैजाय ॥

सो० भयो बोध उर आय, सुमिरत ही मन भावनो ।

कहिहौं सखिन बुभाय, मनमन हरषी नागरी ॥

परम कुशल राधे हरि प्यारी ❀ रच्यो सखिन को बोध विचारी

अति आनंद पुलकि तनु आयो ❀ शोच मोह उरते विसरायो

जो छवि सुन्दर कुँवर कन्हारि ❀ गये प्रात सखियन दरशाई

उनसों सोई रूप बखान्यो ❀ यह बिचार प्यारी उर आन्यो
 प्यारी पिय के गर्ब गहेली ❀ अंग अंग छवि पुंज भरेली
 बैठी सदन बिराजत रूरी ❀ श्याम सनेह सुधारस पूरी
 कहति परस्पर सखि परहासा ❀ कहति चलौ राधा के पासा
 है है निधरक घरमें वैसी ❀ देखहिं चलौ बदन छवि कैसी
 कैसे अंग अभूषण कैसे ❀ कछु बदले कैधौ हैं वैसे
 आज रैन हरिसों रति मानो ❀ कहि है कहा सुनौ चल बानी
 राधा पहुँ गमनी ब्रजनारी ❀ गई जहां बृषभानुदुलारी
 देखि नागरी मुख नहिं बोली ❀ जान्यो आपहि करत ठोली

दो० सहज रही बोली नहीं, कछु बदन सों बैन।

निकट बुलायो सखिनको, नयननही की सैन ॥

सो० इत लीनो इन जान, परम चतुर आली सबै।

यह कछु रचत सयान, देखि हमें बोली नहीं ॥

अपनो भेद कछु नहिं दैहै ❀ कहा बोध रचिकै धौं कैहै
 अपनी जांघन चीर चुगवै ❀ कैसेहुँ प्रकट न काहु जनावै
 निधरक भई श्याम सँग पाई ❀ भूलहु मति याकी लरिकई
 निरखौ भृकुटी त्योर निहारी ❀ कहां कहां धौं बात सँवारी
 रखति गर्ब तुमहुँ सब कोऊ ❀ देखहु बोलि नाहिं किन कोऊ
 कह्यो बिहँसि तब इक ब्रजनारी ❀ सुनो अहै बृषभानु कुमारी
 आज कहा मुख मूँदि रही है ❀ कापर रिस करि मौन गहीहै
 हम सों कहति नहीं सों एरी ❀ हम तौ संग सखी हैं तेरी
 कै देवन को ध्यान धखो री ❀ कै सुभाव कछु यहै पखो री
 जब आवति हम तेरे प्यारी ❀ तब तब यहै धरन ते धारी
 तुम दुराव कत राखति हम सों ❀ हमहुँ कछु राखति हैं तुम सों

ऐसो शोच कहा मन माहीं * जो जवाव त्वहिं आवत नाहीं
दो० कछु दिनते तेरी प्रकृति, अरी परी यह कौन ।

निठुर भई हमसों रहति, जब तब साधे मौन ॥

सो० अपने मन की बात, कछु हमसों भाषति नहीं ।

ऐसे कहिं मुसकात, प्यारी सों सब नागरी ॥

मनहीं मन जानति सब प्यारी * मोसों हँसी करति ब्रजनारी

परम प्रवीण सकल गुणखानी * बोली मधुर मनोहर बानी

सुनहु सखी बूझति कह हम सों * कहा बुझाय कहों में तुम सों

आज प्रात इक चरित नयो री * जात इतें कछु दृगन लख्यो री

नीके नेकु न देखन पाई * तवहीं ते मन रख्यो लोभाई

कै धनश्याम कै श्याम कन्हाई * यहै शोच उर रख्यो समाई

बन पंक्ती कै है [गज मोती * पीत दुकूल कि दामिनि ज्योती

इन्द्र शरासन कै बनमाला * शीश मुकुट कै धौं अरि व्याला

मंद मधुर जलधर की गाजन * कै धौं पग नूपुर धुनि बाजन

देखे आज श्याम जवहीं ते * पखो यहै धोखो तवहीं ते

कहा कहों हरिकी चपलाई * ऐसो रूप गयो दरशाई

भरी श्याम रस कुँवर कन्हाई * कहति सखिन सों निधरकताई

दो० सखी कहति सब आपुमें, सुनहुं न याकी बात ।

प्रकट करन आई जु हम, आपुहि प्रकटति जात ॥

सो० हम देखे जिय श्याम तैसेही इनहुं लखे ।

दोष देति बिन काम, यह सूधी हमहीं कुटिल ॥

इत नहिं रहौ और जिनि भाखो * जो चाहौ अपनी पति राखो

इनसों तुम चाहति हो जीतें * मन ते गर्व करौ यह रीतें

यह हरिकी प्यारी पटरानी * को याकी बुधि सकै बखानी

हम याकी दासी सर नाहीं ❀ देखहु सखी समझ मनमाहीं
हम देखति कछु और सुभाऊ ❀ यह देखति हरिको सतभाऊ
याकी अस्तुति कहा बखाने ❀ इनहीं भले श्याम पहिचाने
तब हँसि कह्यो सखिन सुन प्यारी ❀ तैं जो लखे सो हैं बनवारी
प्रातहि ते जो आज निहारे ❀ गये कान्ह वे मेघ न कारे
मोर मुकुट शिर मोर न होई ❀ कटि पटपीत न दामिनि सोई
मुकुमाल बनमाल सुबेसू ❀ नहिं बक पांति न धनुष सुरेसू
पग नूपुर धुनि गरजन नाहीं ❀ मत राखो धोखो मन माहीं
देखे तैं प्रातहि गिरिधारी ❀ काहे को शोचति मन प्यारी

दो० धनि धनि ब्रजकी नागरी, हरिद्विबिलखत अनूप।

मोहिं होत धोखो तबहिं, जब देखति वह रूप ॥

सो० तुम देखति हरि गात, कैसे दृग ठहराय सब।

मोपै लखे न जात, करि हारी केतो यतन ॥

तुम दरशन पावति री कैसे ❀ मोहूं श्याम दिखावहु तैसे
वे तो अति द्विचपल कन्हाई ❀ तुम कैसे देखत ठहराई
कैसे रूप हृदय में राखो ❀ मोसों सखी सांच सब भाखो
मैं देखन पावति हरि नीके ❀ रहति सदा अभिलाषा जीके
धनि धनि तू बृषभानु दुलारी ❀ धनि तुव पिता धन्य महतारी
धनि सो दिवस रैन सो बारा ❀ जब ते लीनो री अवतारा
धनि तेरे बश कुंजबिहारी ❀ धनि तैं बश कीनो गिरिधारी
भाव भक्ति मति रति धनि सोऊ ❀ एक सुभाव धना तुम दोऊ
तोहिं श्याम हम कहा दिखावैं ❀ तू हरिको हरि तोको भावैं
एक जीव द्वै देह तुम्हारी ❀ वे तोमें तू उन में प्यारी
उनकी पट्टर को तू दीजै ❀ तेरी पट्टर उन को लीजै

सुधा सुधा गुण क्यों विलगाई ❀ गूंगे को गुरु कह्यो न जाई
दो० तू उन के उरमें बसी, वे तेरे उरमाहिं ।

अरस परस ज्यों देखिये, दरपन दरपन छाहिं ॥

सो० कही कौनपै जाहि, तुम दोउनिर्मल गात अति ।

वे तेरे रँग माहि, तू उन के रँग में रँगी ॥

नीलाम्बर श्यामा छवि तेरे ❀ तुम छवि पीत वसन उनके

घन भीतर दामिनी विराजै ❀ दामिनि घनके चहुँदिशि राजै

तुम अनूप दोऊ सम जोरी ❀ नँद नंदन वृषभानु किशोरी

सुनि सुनि सखियन के मुखबानी ❀ बोली राधा कुँवर सयानी

मृगलोचनि सांची कहु मोसों ❀ मैं वृक्षति सकुचति हों तोसों

मोसों मानत नेह कन्हाई ❀ मेरी सों कहि मोहिं सुनाई

तुम तौ रहति श्याम सँग नितहीं ❀ मिलति जायउनसों जिततितहीं

उन के मनकी सब तुम जानौ ❀ हांहा मोसों सांचि बखानौ

सुनु राधा इतरात कहारी ❀ तो तैं और कौन है प्यारी

तेरे बश नंदनन्दन ऐसे ❀ रहति पौन पङ्खा बश जैसे

ज्यों चकोर शशि के बश माहीं ❀ है शरीर के बश परछाहीं

नाद विवश मृग देखिय जैसे ❀ मन मोहन तेरे बश तैसे

दो० मिली खरक तू श्याम को, दर्ई धेनु दुहि तोहिं ।

तेरे बश हरि तबहिं ते, कहा भुरावत मोहिं ॥

सो० बरणों कहा सनेह, नेकहुं तुम न्यारे नहीं ।

हौ तुम एकहि देह, वे दक्षिण तुम बाम अँग ॥

अथ गर्वव्याज विरहलीला ॥

सुनु प्यारी ललिता मुख बानी ❀ मेरे जिय में यह अनुमानी

और नहीं कोऊ मो सरिकी ❀ हौ राधा आधा अँग हरिकी
अपनेहो बश पिय को करिहौ ❀ अनत जात देखहु तौ लरिहौ
ऐसे गर्ब कियो जिय प्यारी ❀ घर घर गई सकल ब्रजनारी
इहि अन्तर आये गिरिधारी ❀ गर्ब बिभंजन जन सुखकारी
हरि अन्तर्यामी अबिनासी ❀ जानी प्यारी गर्ब उदासी
उम्हकि भांकि प्यारी तन हेख्यो ❀ प्यारो देखत ही मुख फेख्यो
कह्यो कान्ह तुम मानत नाही ❀ उम्हकत फिरत घरन ब्रज माहीं
मिसही मिस युवतिन को हेरो ❀ नेक नहीं बाँड़त घन घेरो
कोउ जैसे तैसे अपने घर ❀ तुम आवत मानत नाही डर
ऐसे प्रेम गर्ब करि प्यारी ❀ प्राणनाथ तन नाहि निहारी
जान्यो द्वारे लगे कन्हाई ❀ बैठि रही अभिमान जनाई

दो० हृदय श्याम सुख धाम में, राख्यो गर्ब बसाय ।

ठौर तहां पायो नहीं, रहे श्याम सकुचाय ॥

सो० जहां रहत अभिमान, तहां बास मेरो नहीं ।

सो राधा उर जान, आप लगे पछितान हरि ॥

तुरतहिं गमन तहां ते कीनो ❀ नहीं दस्य प्यारी को दीनो
चकित भई प्यारी मन माहीं ❀ यहां श्याम आये क्यों नाहीं
आवत आप द्वार पुनि देख्यो ❀ तहां नहीं नँदलालहि पेख्यो
भांकतही फिरिगये कन्हाई ❀ मनहीं मन श्यामा पछिताई
मोते चूक परी अति भारी ❀ ताते मोहन मोहिं विसारी
एक तो बैठि रही गर्वानी ❀ दूजे मैं हरि सों कहरानी
मेरी बुद्धि जानिकै हीनी ❀ मोसों श्याम निदुस्ता कीनी
वे बहुनायक कुंजबिहारी ❀ मोसी उनके कोटिक नारी
कासों कहौ हरिको को ल्यावै ❀ को अब मोको हरिहि मिलावै

भई विरह व्याकुल अकुलाई ❀ वदन सरोज गयो कुम्हिलाई
 तब आपुन को निठुर कहावै ❀ सुमिरि प्रीति उर भरि भरि आवै
 नेकु नहीं धीरज उर धारै ❀ नैन सरोजन सों जल दारै
 दो० भई बिकल अति नागरी, विरह व्यथाकी पीर ।

खान पान भावै नहीं, सुधि बुधि तर्ज शरीर ॥

सो० घरबाहर न सुहाय, सुख सब दुख दायक भये ।

रह्यो शोच उर द्वाय, ब्रजवासी प्रभु मिलनको ॥

राधा सदन सखी पुनि आई ❀ देखि दशा मन अति भरमाई
 अति व्याकुलतन वदन मलीना ❀ नीर विहीन मीन जिमि दीना
 कर गहि गहि बूझति ब्रजनारी ❀ कहा भयो तोकहु री प्यारी
 ऐसे विवश भई तू जाहै ❀ हमें सुनाय कहति नहिं काहे
 अति प्रसन्न देख्यो त्वहिं तबहीं ❀ क्यों मुरझाय गई री अबहीं
 बहुरि लखे धौं कतहुँ कन्हई ❀ उनहीं तोहिं ठगोरी लाई
 श्याम नाम सुनि श्रवणन जागी ❀ जान्यों हरि आये अनुरागी
 आतुर सखी कण्ठ लपटानी ❀ चूकपरी मोतें कहि बानी
 अब अपराध क्षमो रिस त्यागी ❀ करुणा करि म्वहिं करहु सभागी
 चकित रहीं सब ब्रजकी नारी ❀ रहीं शोचि राधिकहि निहारी
 शीतल जलसे मुख पखरायो ❀ पोंछि आँचरन वचन मुनायो
 आज भई कैसी गति तेरी ❀ परम चतुर ब्रज में तू है री
 दो० भयो अलिन के बचन सुनि, कछु चेत उर आय ।

तब जानी एतौ सखी, गई हृदय सकुचाय ।

सो० क्यों तुम वदन मलीन, काहे तू ऐसी भई ।

कहु प्यारी परवीन, बार बार बूझति सखी ॥

बोली तब सखियन सों प्यारी ❀ तुम सों करों दुगव कहारी

मैं तो हरिके हाथ बिकानी * उन म्वहिं तजी कुटिलमतिजानी
 अपनी कथा श्यामकी करणी * प्रकट कहौं तुमसों सब बरणी
 बैठीही मैं सदन अकेली * भांके आय द्वार हर हेली
 मैं मन में कछु गर्व बढ़ायो * आदर करि नहिं भवन बुलायो
 उन मेरे मन की सब जानी * अंतर्दामी सारंग पानी
 कमलनैन वे गर्व प्रहारी * जातरहे सखि मोहिं बिसारी
 तबतें बिरह बिकल अतिकीनो * अहंकार यह फल म्वहिं दीनो
 चित न रहै कितनो समुझाऊं * अब कैसे करि दरशन पाऊं
 भयो भवन बन मोकहूँ आली * नहीं सुहात बिना बनमाली
 सुनहु सखी लागाति में पाऊं * अब हरि मिलैं धौं करहुँ उपाऊं
 विन मनमोहन कुँवर कन्हाइ * भये सुखद सब म्वहिं दुखदाई

दो० गिरिकन्यापतितिलककर, दाहत अनलसमान ।

शिवसुत बाहन भखनको, भयो हलाहल पान ॥

सो० जलधि सुता सुत हार, भयो इन्द्र आयुध सखी ।

मलयज मनहुँ अँगार, शाखामृगरिपुबसनवर ॥

सखी दशा मेरी यह है री * भयो काम अब मोको बैरी
 बारिज भवसुत प्रियकी चाली * अब नहिं हरिसों करिहौं आली
 ऋतु बिचारि जो मानहिं करिये * सोउ जरिजाहु न उरमें धरिये
 अब सुभाव रहिहौं हरि साथ * मोहिं मिलावहु सखि ब्रजनाथा
 सुनि राधे करनी यह तेरी * हम सों भेद कियो तैं हेरी
 उन के गुण जैसे नहिं जाने * अबहीं ते ऐसे ढँग ठाने
 एकहि बार मिली तू धाई * नहिं राखी मर्याद बढ़ाई
 तैंहीं उन को मूढ़ चढ़ायो * तब नहिं हमको भेद जनायो
 भवन बिपिन सँगडोलन लागी * वे बहु तरुणिरमन अनुरागी

निजकर अपनो महत गँवायो ❀ परवश परि कौने सुख पायो
मेरो कह्यो अजहुँ मन माहीं ❀ हित करि मानैगी धौं नाहीं
धीरज धरु कत मरति बृथाहीं ❀ तूहं मान करत क्यों नाहीं
दो० बात आपनी आपने, करहै देख विचार ।

भई कहा ऐसी विवश, एरी एकहि वार ॥

सो० पुरुष भँवर जियजान, भोगी बहुत प्रसून के ।

बिना किये बहुमान, कौने पियनिजवश किये ॥

कहति सखी तुम तौ यह बाता ❀ कम्प होत सुनि मेरे गाता

मैं तो मान श्याम सों कीनों ❀ ताते इतनो दुख भवहि दीनों

अब तो भूलि मान नहिं करिहों ❀ श्याम मिलैं तो पायँन परिहों

बिनती करि करि उनहिं सुनाऊं ❀ यह अपनो अपराध क्षमाऊं

चूक परी मोतैं मैं जान्यो ❀ उनको यह अपराध न मान्यो

वे आवत हैं मेरे नीके ❀ मेंहीं गर्व धख्यो सखि जीके

मेरे गर्ब ते कहा सख्योरी ❀ मित्यो हृदय सुख दुःख भयोरी

जाते हानि आपनी होई ❀ कहौ सखी कीजै क्यों सोई

मान बिना नहिं प्रीति रहै री ❀ प्रकट देखि भवहिं कहा कहै री

धाय मिले की गति तेरीसी ❀ भई अधीन फिरति चेरीसी

अपनो भेद उन्हें तैं दीनों ❀ तब दुराव हमहूँ सों कीनों

भयविन प्रीति होति नहिं प्यारी ❀ सो जिय मानहुँ सीख हमारी

दो० पुनिपुनिसिखवतितुमसखी, मानकरनको सोहि ।

मन तो मेरे हाथ नहिं, मान कौन विधि होहि ॥

सो० उमगभरतदिनरात, श्यामगुणनिअभिलाषकरि ।

मन नहिं मानत बात, मान सजौं कैसे सखी ॥

मन मोसों अब बाम भयो री ❀ कहा कहौ हरिसंग गयो री

अब अपनो हित उनहीं जानै ❀ मुदित मूढ़ अपमान न मानै
इन्द्री सब स्वारथ रसपागी ❀ गई संग मनहीं के लागी
घरफूटे क्यों रह्यो पैर री ❀ मनहिं बिना को मान करै री
अब कोऊ मेरे सँग नाहीं ❀ रही अकेली में बन माहीं
तापर भयो काम अब बैरी ❀ बिरह अग्नि तन जास्त है री
इतने पर तुम मान करावति ❀ कहौ कौन सखि यह कहनावति
में तौ चूक आपनी मानी ❀ मोहिं मिलावहु श्यामहिं आनी
अब तौ क्योंहूँ मान न करिहों ❀ ऐसी बात कहै तिहि लरिहों
आली म्वहिं नँदनंदन भावै ❀ सोई हितू जो आनि मिलावै
अबजो मिलहिं श्याम बड़भागी ❀ फिरतरहों सँगही सँग लागी
ऐसे कहि प्यारी अनुरागी ❀ दारुण बिरह व्यथा उर जागी

दो० देखिदशा सहि नहिं सकी, अली उठी अकुलाय।

हम राधाकी प्रियसखी, रचिये बेगि उपाय ॥

सो० कहैं श्याम सों जाय, ऐसी चूक परी कहा।

दीजै याहि मिलाय, कुरि कुरि अति पीरी परी ॥

सखिन कह्यो तब सुनि री प्यारी ❀ मतिहि होय व्याकुल सुकुमारी
अबहिं जाय हम श्यामहिं ल्यावैं ❀ नेकु धीर धरु तोहिं मिलावैं
पट सों पोंछि वदन वैठाई ❀ तरक बात बहुभाषि सुनाई
नेकु नहीं धीरज उर धारै ❀ बार बार मुख कान्ह उचारै
सावधान करि सखी सयानी ❀ दौरी गई यहै अतुरानी
लखि हरिमुख ललिता मुसकानी ❀ हरिलखि हँसे दुहूँ मन जानी
तब हरि ललिता सों मुसकाये ❀ वूझत चितवन नैन डुराये
अति आतुर आई कत धाई ❀ काहे बदन गयो मुरझाई
बोली ललिता तब मुसकाई ❀ सुनहु चतुर नँदनंद कन्हलाई

आज एक अचरज लखि पायो ❀ परम विचित्र न जात बतायो
 अतिही अद्भुत रचना जाकी ❀ वरणत बनत भांति नहिं ताकी
 रीझि रही मैं तोहिं निहारी ❀ रीझौ गे लखि कुंजविहारी
 दो० मैं आई तुमसों कहन, चलहु दिखाऊं नैन ।

देखि परममुख पाइहौ, जो मानो मो वैन ॥

सो० एक अनूपमबाग, सुवरण वरण न जाय कहि ।

उपजतलखि अनुराग, अतिविचित्रवानकवन्यो ॥

युगल कमल अति विमल विराजै ❀ तापर राजहंस द्विविद्वाजै
 द्वै कदली तरु तापर सोहै ❀ विन दल फल उलटे मन मोहै
 तापर मृगपति करत विहारु ❀ मृगपति पर सरवर यकवारु
 द्वै गिरिवर सरवर वर राजै ❀ तिन पर एक कपोत विराजै
 निकट सनाल कमल द्वै फूले ❀ शोभित अधर दिशा को भूले
 फूल्यो पुनि कपोत पर नीको ❀ एक सरोज भावतो जीको
 तापर एक अमोफल लाग्यो ❀ कीर एक तापर अनुराग्यो
 तहाँ एक कोयल द्वै खंजन ❀ तिनपर धनुष सुभग मन रंजन
 धनुषर शशि द्वै नागिनिवारी ❀ मणिधरि एक नागिनी वारी
 ऐसो अनुपम बाग मुहायो ❀ घटत नेह जल कछु कुम्हिलायो
 चलि घनश्याम सींचि सो दीजै ❀ शोभा देखि सुफल दग कीजै
 करि विचार देखौ गिरिधारी ❀ बनी ललित सब अंग पियारी
 दो० मनहु श्यामसुंदर नवल, छैल छवीले श्याम ।

तुम्हैंमिलनको नवल बहु, अतिव्याकुलहैं वाम ॥

सो० कहा भयो जो मान, कियो प्रेम के लाड़ते ।

अति सुन्दरी सुजान, प्यारी जीवन जीयकी ॥

वरणौ श्री वृषभानु दुलारी ❀ चित दै सुनहु लाल गिरिधारी

कहाँ प्रथम बेनी रुचिराई * ललित पीठ पाछे ब्रविद्याई
अहिनी मनहुँ कुटिल गति त्यागी * राशिमुख सुधा चुरावन लागी
रेखा अरुण सिंदूर सुहाई * शोभित शीश न जाति बनाई
मानहुँ किरण लाल रवि केरी * तिमिर समूह बिदारि उजेरी
शोभित कुटिल भृकुटि अतिनोकी * मन हरिलेत भावती जीकी
जगत जीत करि निजबश चारी * मनहुँ मदन धनु धरे उतारी
केसर आढ़ लिलाट सुहाई * मनहुँ रूप की बाढ़ बँधाई
नलिन नैन बिच नाक सुहाई * शोभित अधरन की अरुणाई
चोप युगल खंजन शुकशोभा * देखि एक बिम्बाफल लोभा
दशन कपोल विबुध दरग्रीवा * वरणि न जात महा ब्रबिसीवा
सुभग अंग सब भूषण सोहैं * कोटिकाम तिय निरखत मोहैं

दो० अति कोमल सुकुमार तन, सकल सुखनकी सीर।

तुमबिनमोहनलालपिय, व्याकुल अधिकशरीर ॥

सो० भरिभरिलोचननीर, श्यामश्यामसुखकहिउठति।

चलहु हरहु यह पीर, मैं आई लखि धायकै ॥

प्यारी बिकल मुनत सुखदाई * सहि नहीं सके उठे अकुलाई
चले बिहँसि ललिता के साथी * प्रेमहिँ के बश श्री ब्रजनाथा
प्रेम बिबश प्यारी पहुँ आये * देखि दशा मन अति पछिताये
परी बिकल तनदशा बिसारी * प्यारी मुख देखत गिरिधारी
नीलाम्बर निज करते दारी * लोनो सम्मुख बदन सुधारी
जलद पटल मानहुँ बिलगाई * दियो चंद निकलंक दिखाई
भयो चेत परसत पिय पानी * सम्मुख दृष्टि परत सकुचानी
लई उमगि भरि अंक कन्हाई * बिकल देखि अँखियाँ भरिआई
यगल परस्पर लखि सकुचाये * इतनेहि बिरह दोऊ मुरझाये

कंचन बेलि तमाल सोहायो ❀ मनहुँ प्रेमवश सुधा सिंचायो
हरषि दुहंदिश मुसकन फूले ❀ परमानन्द फलन करि भूले
मुरछन बिरह तुरत बिसराई ❀ लखि यह मिलन सखी हरपाई
दो० वह चितवन वह हँसिमिलन, वह शोभा सुखभार ।

भई बिबश ललिता निरखि, यकटक रही निहार ॥

सो० रहे परस्पर देख, अति आतुर दोउ छविहि पर ।

तन नहिं देत निमेख, तृप्त न क्योंहुँ मानही ॥

ललिता कहति सखिन सों बानी ❀ देखहु सखि राधा अतुरानी
कैसे अंग अंग छवि देई ❀ मिले श्याम मन धीर न लेई
तृषावंत जिमि अचवत नीरा ❀ सोऊ तो धारति पुनि धीरा
यह आतुर छवि लै उर धारै ❀ नेक नहीं दृग इत उत टारै
ज्यों चकोर चन्दहि टक लावै ❀ याकी सर सोऊ नहिं पावै
होम अग्नि घृतगति है जैसी ❀ याकी दशा देखियत तैसी
यदपि श्याम सँग श्यामा प्यारी ❀ छवि निरखत अति आनंद भारी
हाव भाव करि पिय मन मोहै ❀ विविधि विलास वदन छवि सोहै
बिरह बिकल मति तदपि भ्रमावै ❀ मिलेहु प्रतीति न उरमें आवै
तृषामध्य जिमि सलिलहि देखी ❀ उपजति अधिकै प्यास विशेषी
चितवत चकित रहत चितमाहीं ❀ स्वप्न कि सत्य ईश यह आहीं
बुधि वितर्क बहुभांति बनावै ❀ देखहु अनदेखे ठहरावै
दो० कबहुँ कहतिहाँ कौन हौं, को हरि करत विचार ।

यह सुख भावत कौनको, सचकित रहति निहार ॥

सो० निपट अटपटीबात, समुझिपरति नहिं प्रेमकी ।

उरभिसुरभि उरभात, उरभनही में सुरभती ॥

उत हरि रूप इतै दृग प्यारी ❀ लखि सखि मनहुँ करतहै रारी

अति अहँकार भरे भट दोऊ * नेकहु हारि न मानत कोऊ
 इत सुदृष्टि करि काम सहाई * सेना सजि सजि दृगन चलाई
 उन उत भूषण जाल अपारा * अंग अंग रचि ब्यूह सँभारा
 इतहि कटाक्ष बाण अति चोखे * बारहिबार हनत रण रोखे
 उत नहिँ वदन व्यथा अति शूरे * पुलकि अंग मानहुँ अति पूरे
 इत अनुराग उतहिँ छबिताई * क्षणक्षणअधिकअधिकअधिकाई
 छवि तापर शशिरित अधिकानी * लोचनजल बिधि तृप्त न मानी
 उत उदार छवि अंग श्यामके * इत लोभी अति नेम बामके
 ललिता संग सखिन को लीने * दम्पति मुख दुखते दृग दीने
 लखि यह मिलन सखी अनुरागी * कहैकि धनि धनि दोउ बड़भागी
 धन्य नवल नवला यह जोरी * धनि धनि प्रीति नहीं रुचि थोरी
 दो० धन्यमिलनधनियहलखन, धनि धनि धनि अनुराग।
 धनिमुख लूटत परस्पर, धनि धनि भाग सुहाग ॥
 सो० धनिधनिपुनिपुनिभाखि, हरषिचलींसिगरीअली।
 युगलरूप उर राखि, एकहि थल राखे युगल ॥
 अथ परस्पर अभिलाष लीला ॥

शोभित श्याम राधिका जोरी * अस परस निरखत तृणतोरी
 हरि रीमे प्यारी छवि देखी * भये बिबश उर हर्ष विशेषी
 कबहुँ पीतपट डारत वारी * कबहुँ मुरलि वास्त गिरिधारी
 कबहुँ माल मुक्कन की वारै * कबहुँ तन मन वारि निहारै
 कबहुँ सिहात देखि मन माहीं * राधासम शोभा कहूँ नाहीं
 इनको पलक ओट नहिँ कीजै * रूप सुधा नैननि पुट पीजै
 कबहुँ निरखि मुख हरिसकुचाहीं * कोटिकाम जिनके बश माहीं
 चपल नयन हरिके अनियारे * हावभाव नाना गति भारे

कोटि कुरंग कमल बलिहारी ❀ खंजन मीन डारिये वारी
लोचन नहिं ठहरात श्याम के ❀ काहू रंग मुख रंग बाम के
भये श्याम प्यारीबश ऐसे ❀ फिरति गुड़ी डोरी बश जैसे
इकटक नयन अंग छवि पोहै ❀ भये बिवश लाखि रूप विमोहै
दो० उठे उठतहैं तुरतहीं, बैठे बैठत पास ।

चले चलत सँग बाम के, ज्यों तन छँह बिलास ॥

सो० रही सुरति कछु नाहिं, देह दशा भूली सबै ।

अभिलाषा मनमाहिं, प्यारीही के रूपकी ॥

मगन श्याम श्यामा रसमाहीं ❀ निज स्वरूपकी सुधि कछु नाहीं
राधा देखि देखि सुख पावै ❀ पुनि पुनि मन अभिलाष बढ़ावै
माँगलेति भूषण प्रिय पाहीं ❀ अपने अंग सम्हारत जाहीं
सजि तरिवन कुण्डलाहिं उतारै ❀ बेसरि लै नासापर धारै
बेनी गूँथ मांग पुनि करहीं ❀ शीशफूल अपने शिर धरहीं
बेदी भाल सँवारत तैसी ❀ शोभित है प्यारी को जैसी
प्यारी दृगते अंजन लेहीं ❀ अति हित करि अपने दृग देहीं
भूषण वसन सजत सब वैसे ❀ प्यारी अंग विराजत जैसे
प्यारी को पियकी छवि भावै ❀ हा हा करि यों बचन सुनावै
कुण्डल मुकुट पीतपट पाऊं ❀ मैं पिय तुम्हरो रूप बनाऊं
हँसतहि हँसत मांगि सब लीनो ❀ पिय को भेष नागरी कीनो
गोरे कान्ह सांवरी राधा ❀ निरखि परस्पर पूरत साधा
दो० कबहुं मुरलि लै नागरी, अधर धरति सुसकाय ।

मन्दमन्द पूरित मुरन, रिभवति पियहि बजाय ॥

सो० कबहुं बजावत श्याम, अरसपरस अधरन धरत ।

पूरण है मन काम, सकल काम पूरण युगल ॥

हरि को अपने रूप निहारी ❀ आपहि हरिस्वरूप लखि प्यारी
 यह अभिलाषा उर तब धारी ❀ कहति सुनो पिय गिरिवरधारी
 तुम बैठो माननि दृढ़ हैकै ❀ तुमहि मनाऊं मैं पद द्वैकै
 मोको यह अभिलाष विशेषी ❀ सुख पैहै नैननि यह देखी
 सुनत श्याम मन मन मुसकाई ❀ मुरि बैठे करि मान रुखाई
 तब प्यारी मन अति अनुरागी ❀ हरि सों मान छुड़ावन लागी
 कहति मान तजि प्राण पियारी ❀ मोते चूक परी कह भारी
 कहतहि में तुम रिस करि मानी ❀ कह प्रकृती तुव परी सयानी
 बृथा हठीली मान न कीजै ❀ अब करि कृपा मोहिं सुख दीजै
 बार बार कर गहि गहि भाखै ❀ शीश नवाय चरण पर राखै
 आनन आनन जोरि निहारै ❀ पुनि पुनि बचन अधीन उचारै
 क्यों इतनों हठ करति नवेली ❀ बोलति क्यों नहिं गर्व गहेली

दो० श्याम कियो हठ जानिकै, यह बिचार ठहराय ।

प्यारीके उर रस बिरह, नेकु देहु उपजाय ॥

सो० बैठि रहे निठुराय, नहिं बोलत मानत नहीं ।

पुनि पुनि परसति पाय, हाहा करि तब लाड़िली ॥

नहीं हँसति नहिं मुखनन जोवै ❀ बार बार नख भूमि करोवै
 लखि यह चरित हँसति मन प्यारी ❀ चकित रहति हरि बदन निहारी
 कहति सुनहु पिय अब हँसि बोलो ❀ तजहु मान यह घूंघुट खोलो
 मोहन अब यह खेल मिटावो ❀ कोटि चंद्र छबि बदन दिखावो
 नागरि हँसति हृदय सुख भारी ❀ मूषे नहिं चितवत गिरिधारी
 लखि त्रिय रूप पीय को प्यारी ❀ बदन बिलोकत चकित भारी
 अपनो रूप पुरुष को देखी ❀ भई मगन रस बिरह विशेषी
 मैं नारी वे पुरुष बिहारी ❀ किधौं पुरुष मैही वे नारी

बड़ी बिरह सम्भ्रमता भारी ❀ भई बिकल तन दशा विसारी
 निरखत श्याम बिरह की शोभा ❀ बोलत नहीं अधिक मनलोभा
 कबहुं कहति वह ख्याल न त्यागत ❀ मान करत नीके नहीं लागत
 कबहुं अंक भरि उर सों लावति ❀ कबहुं फिरि फिरि पायँन लागति
 दो० कबहुं पाछे है रहति, कबहुं आगे जाय ।

कबहुं उठति बैठति कबहुं, कबहुं क लेति बलाय ॥

सो० कबहुं कहति है पीय, कबहुं प्यारी कह कहति ।

धीरज धरत न हीय, भई समीपहि बिरह बश ॥

भई बिरह व्याकुल जब बाला ❀ हरषि हँसे तब पिय नँदलाला
 लई तुरत प्यारी उर लाई ❀ कहति ख्याल में तू अकुलाई
 तुमहीं मान करन म्वहिं भाख्यो ❀ भई बिबश कत धीर न राख्यो
 मैं तो तुमको भाव बतायो ❀ तुम काहे मन में डरपायो
 देखि बिरह व्याकुल मुरझाई ❀ बार बार हरि अंकम लाई
 अभिय बचन कहि शीतल कीनी ❀ बिरहताप उरते हरि लीनी
 तब नागरि पिय लखि सुख पायो ❀ मिथ्यो बिरह मन हर्ष बढ़ायो
 कहति भलो पिय मान दिखायो ❀ मेरे मन अभिलाष पुरायो
 त्रिय के रूप श्याम छवि देखी ❀ पुनिपुनि पुलकित मुदितबिशेखी
 दम्पति हर्ष मनहिं मन कीनो ❀ तब तब कुंज चलन चित दीनो
 प्यारी मुकुर पाणि लै देख्यो ❀ नटवर रूप आपनो पेख्यो
 हँसतहि हँसत मेदि सब डाख्यो ❀ सहज रूप अपनो पुनि धाख्यो
 दो० चले हरषि बनकुञ्ज को, युगल नारिके रूप ।

इक गोरी इक सांवरी, शोभा परम अनूप ॥

सो० अंगअंग छवि जाल, अति बिचित्र भूषण बसन ।

श्री राधानन्दलाल, शोभा अवधिबिलासनिधि ॥

जात चले ब्रज बीथिन दोऊ * लखि नहिं सकत नारि नर कोऊ
नँदनंदन त्रिय छवि तनकावैं * शोभित हैं राधा सँग आछैं
बारबार पिय रूप निहारी * मनहीं मन रीझति है प्यारी
कहति सखी देखैं जिन इनको * बूझते कहिहों कह तिनको
तिहूँभुवन शोभा मुखकी निधि * करिहों तिनको गोप कवनविधि
पग नूपुर बिछिया छविछाजैं * गजगति चलत परस्पर बाजैं
श्याम गौर सुन्दर मुख जोरी * मरकत मणि कंचन छवि थोरी
भुज भुज कण्ठ परस्पर राजैं * या छवि को उपमा नहिं छाजैं
जात युगल बन को सुखदाई * उत तें चंद्रावलि सखि आई
दूरहिते लखि रही निहारी * इकटक नैन निमेष निवारी
पुनि पुनि मन विचार करि जोहै * एक राधिका दूसरि को है
ब्रजयुवतिन इक इक करि जानो * यह धौं कौन नहीं पहिंचानो
दो० और गांव ते यह कहूं, आई है ब्रज माहिं ।

अतिहि सलोनी सांवरी, अबलों देखी नाहिं ॥

सो० राधे मन सकुचाहि, चन्द्रावलि आवति निरखि ।

रही श्याम मुखचाहि, ब्रजहीको फेरति हरिहि ॥

कहतिजाहु पिय फिर मुखमाहीं * कर तें कर छूटत है नाहीं
उत आवत लखि सखी लजानी * इतिहि श्यामके नेह भुलानी
दुख मुख हर्ष न हरि रसमाती * उत चन्द्रावलि इन रंगराती
कहति निकट देखहुं धौं जाई * बूझों याहि कहां ते आई
देखि श्याम मुखछवि मुसकानी * करी चतुर्द इन पहिंचानी
इन ते निधरक और न कोऊ * कैसी बुद्धि रची इन दोऊ
ये दोऊ अति चतुर सयाने * निजकर इन्हें बिधाता जाने
और कहा इनको कोऊ जाने * मोसों नहीं परत पहिंचाने

सकुच छांड़ि अब इनहिं जनाऊं ❀ जान बूझ काहे निदराऊं
 जो इन को मैं टोकत नाहीं ❀ जैहैं जीत मनहिं मन माहीं
 ये चतुरई चले छवि दोऊ ❀ प्रगट करौं इनके गुण सोऊ
 ऐसे बहुरि इनहिं नहिं पाऊं ❀ आज प्रगट कहि लाज लजाऊं
 दो० कह राधे यह कौन है, संग सांवरी नारि ।

कबहुं इन्हें देख्यो नहीं, अति सुन्दरि सुकुमारि॥

सो० को है इनको नाथ, कौन गोप की ये सुता ।

भलो बन्यो है साथ, जैसी ये तैसी तुमहं ॥

मथुरा ते ये आजहिं आई ❀ है इन ते कछु प्रीति सगाई

एक दिना ललिता संगमाहीं ❀ दधि बेचन हम गईं तहांहीं

उनहीं के संग भई चिन्हारी ❀ तबहीं की पहिचान हमारी

वहै सनेह जानि कै आई ❀ ऐसी शील सुभाव सुहाई

मैं गृह तें इत आवन लागी ❀ येऊ संग आई अनुरागी

सुन राधा यह सहज सुहाई ❀ शील सनेह रूप अधिकाई

इनको ब्रजमें क्यों न बुलायो ❀ अपने निकटहि आनि बसायो

कै बृषभानपुरा कै गोकुल ❀ राखहु इनहिं बुलाय सहितकुल

तुम हौ नवल नवल हैं येऊ ❀ दोऊ मिलि श्यामहि सुख देऊ

ऐसी है यह नारि सुहाई ❀ और नारि मन लेति चुराई

हमहं को अब इनहिं मिलावो ❀ नीके इन के बदन दिखावो

हमहिं देखि सकुचत कत प्यारी ❀ हम सों घूंघुट करत कहारी

दो० ऐसीही चन्द्रावली, गह्यो श्याम कर जाय ।

यहकहुं अबलौं नहिं सुनी, तियसों तियसकुचाय॥

सो० आवहिं बदन उधारि, घूंघुट पट हातौ कियो ।

मुखवबि रही निहारि, माने करि लोचन सुफल॥

बारहि बार कहति मुसुकाई ❀ चितवत क्यों नहि बदन उठाई
मथुरा में है वास तुम्हारो ❀ कहा नाम मुख बचन उचारो
कियो राधिका यह उपकारो ❀ दुलभ दर्शन भयो तिहारो
कछुइक मैं पहि चानति तुमको ❀ काहेको सकुचति हौ हमको
कबहुं चिबुक गहि बदन उठावै ❀ कबहुं कपोल परस मुख पावै
कबहुं चुशकि कहति मुख फेरो ❀ नैन उठाइ नेकु इत हेरो
नैन नैन सों हरि नहि जेरैं ❀ रहे लजाय भाव सों भेरैं
चंद्रावली देखि मुसकानी ❀ हँसि बोली राधा सों बानी
ऐसी सखी मिली ये तुमको ❀ तौ काहे न भिसारौ हमको
जबसों इनसे प्रीति लगाई ❀ बहुत भई तुमको चतुराई
अबलौं इनको कहां दुरायो ❀ हमसों कबहुं नाहि जनायो
त्रिभुवन की सुखमा सबगुणनिधि ❀ एकहि इन्हें बनाई है बिधि

दो० तुमहुं कुशल येहु कुशल, क्यों न प्रीति दृढ़ होय।

जाने हौ चले जाहु बन, आप स्मरथी दोय ॥

सो० दंपति कियो बिचार, सुनि चंद्रावलि के बचन।

यासों नाहि उबार, हरषि मिले उरलाय तब ॥

चले कुंज गृह हरषि विशाला ❀ उभय बाम बिच मदन गोपाला
बाम भाग प्यारी को लीनो ❀ दक्षिण भुजा सखीपर दीनो
बिच दामिनि बिच नवधन मानो ❀ रति समेत लखि मदन लजानो
कै धौं कञ्चन लता सुहाई ❀ ललिता माल बिटप लपटाई
गये कुंज बन धन छबि छाई ❀ सुमन पुंज अलिगुंज सुहाई
बरण बरण कुसमित तरु नाना ❀ करति कोकिला मंगल गाना
बहत समीर त्रिविध सुखदाई ❀ पावन मंजुल भूमि सुहाई
लखि छबि पुंज कुंज अनुरागे ❀ सहचरि सहित युगल बड़भागे

नवदल कुसुम तुल्य कमनीया ❀ बैठे नवल रमण रमनीया
करत विलास विविध मनमाने ❀ कोटि कोटि रति काम लजाने
शोभित गौर श्याम शुभ जोरी ❀ निरखति अविहि सखी तृणतोरी
सने रसिक दोउ रसरसकाई ❀ बसे निशा वन कुंज मुहाई

दो० तैसेइ बिपिन मुहावनो, तैसिय पवन सुगंध ।

तैसिय निर्मल चाँदनी, तैस्वइ सुखद सुगंध ॥

सो० तैस्वइ कुंज निवास, तैसोई यमुना पुलिन ।

सकल सुखनकी रास, तैस्वइ रँगभीने युगल ॥

वनहिं धाम सुख रैन बिहाई ❀ उठे प्रात दोउ अवि अधिकई
बैठे युगल रंग रसभीने ❀ आलसयुत अंसन भुजदीने
अरसपरस दोउ अविहि निहारैं ❀ रीझ परस्पर तन मन वारैं
अरुण नैन नखरेख मुहाई ❀ विन गुण माल हृदय अवि छाई
लटपटि पाग रसपसी भौहैं ❀ कुंडल झलक कपोलन सोहैं

प्रिया बदन अवि श्याम निहारत ❀ उरभी लट मुक्कन निरवारत
आरस नैन सुगतिरस पागे ❀ नँदनंदन प्रियसँग निशि जागे

टूटे हार मरगजी सारी ❀ नख शिख सुन्दर पिय अरु प्यारी

चले कुंज ते युगल बिहारी ❀ ब्रजवासी सखि लखि बलिहारी

सुन्दर श्याम सुन्दरी श्यामा ❀ जीते सुन्दर रतिपति कामा

सुन्दर अवलोकनि मृदु बोलनि ❀ सुन्दर चाल डगमगी डोलनि

सब विधि सुन्दर सुख निधि दोऊ ❀ सुन्दर उपमा को नहिं कोऊ

दो० अति बिचित्र नँदलाल की, लीला ललित रसाला ।

जोसुखदुर्लभ शिवसनक, सोबिलसत ब्रजबाला ॥

सो० गयेयुगलब्रजधाम, सखीसहितनिशिरसबिलसि ।

बसत प्रिया उरश्याम, श्याम हृदय प्यारी सदा ॥

अथ शृंगारभूषण वर्णन लीला ॥

बैठी भवन शृंगार किशोरी * बहुरो अंग शृंगारत गोरी
 मानहुं सवन देति पहिराये * रतिरण जीत पिया सों आये
 कटितट किंकिणि बसन नबीने * बाजूबंद भुजन को दीने
 कर कंकण उर हार सुहाये * तखनि चारु श्रवण पहिराये
 नकबेसरि अंजन दीनो * बेंदी ललित भाल पर कीनो
 रची मांग सम भाग सुहाई * तामधि रेख सिंदूर बनाई
 प्रभुसों बिमुख जानि कै कादर * ति कच मनो किये निरादर
 दियो विहँसि अधरन को वीरा * सन्मुख सहे प्रहार सधीरा
 शोभित सदन शृंगार सुहाई * श्री वृषभानु कुँवरि छबिछाई
 नखशिख कुसुमबिशिख कीसैना * किये कान्ह बश पंकज नैना
 शीशफूल शिर अति छवि छाजै * मनहुँ मांगमणि प्रकट विराजै
 खुभी जराव फूल अरुणाई * हरति प्रात रविकी छवि छाई
 दो० चंद्रबदनमृगशिशुनयन, भृकुटी कुटिलकलंक ।
 अलकभलक छविदेतिजनु, शोभितरजनीअंक ॥
 सो० कुंदकली सम दाँत, तिल प्रसून नासा सुभग ।
 जीव बंधुकी भाँत, अधर अनूपम चिबुक तिल ॥
 लखि कलकंठ कपोत लजार्ही * पीक लीक भलकति जेहिमाहीं
 बाहु मृणाल लाल छवि छाये * कोमल पाणि सरोज सुहाये
 कुच युग चक्रवाक जनु नीके * लसति रोमावलि तट तटनीके
 त्रिवली तरल तरंग सुहाई * अतिगत नाभि मनोहरताई
 कृश कटि किंकिणि युत छवि छाई * पृथु नितम्ब शोभा अधिकाई
 रंभ खंभ युग जंघ निकार्ई * पग नूपुर झनकार सुहाई
 चाल बिलोकि कामगज लाजै * मधुर मधुर धुनि पायँन बाजै

बरुँ को पद पंकज शोभा ❧ हरि मन भ्रमर करत जहँ लोभा
 निगम नेति नित गावत जाको ❧ राधा वश कीनो है ताको
 ज्यों चकोर चन्दा को आतुर ❧ त्यों नागरि वश गिरिधर चातुर
 देखे बिन क्षण रह्यो न जाई ❧ सदा प्रेमवश त्रिभुवन राई
 उभकि भरोखा भाँके आई ❧ कत शृंगार प्रिया मनलाई
 दो० अंग अंग भूषण बसन, रचि रचि सकल शृंगारि ।
 लै दर्पण देखति छविहि, श्रीवृषभानुदुलारि ॥
 सो० दीठ भरोखा लाय, रहे श्याम इकटक निरखि ।
 उर आनन्द बढ़ाय, देखत प्यारी की छविहि ॥
 इक कर दर्पण इक कर अँचरा ❧ पुनिपुनि दगनि सँवारति कजरा
 कबहुं शीश को फूल सँवरै ❧ कबहुं कुटिल अलक निखारै
 कबहुं आड़ रचति केसरिकी ❧ कबहुं छवि देखति बेसरिकी
 कबहुं रचति सुमन सों वेणी ❧ कबहुं मांग मुक्कन की श्रेणी
 कबहुं रिस करि भौंह सकोरै ❧ कबहुं नैन नैन सों जोरै
 इकटक दर्पण ओर निहारै ❧ नेकु वदन इत उत नहिँ दारै
 निरखि आपनी छवि मुकुमारी ❧ रही विवश प्रतिविम्ब निहारी
 अति आनन्द भई मति भोरी ❧ विसरी मुरति देह की गोरी
 कहति मनहिँ मन अतिसकुचाई ❧ यह सुन्दरी कहाँ ते आई
 करते मुकुर दूर नहिँ दारै ❧ कछू रोप करि हृदय विचारै
 कहूँ श्याम देखैं जो याहीं ❧ तुरत होयँ याके वश माहीं
 जो मोहन यासों अनुरागे ❧ कहा चलै मेरी या आगे
 दो० यह आई किहि लोकतें, अति सुन्दर वरनारि ।
 ब्रजमें तौ ऐसी नहीं, कोऊ गोपकुमारि ॥
 सो० काऊ ल्यायो याहि, कै धौँ आई आपही ।

सो बैरी मम आहि जो लाई याको ब्रजहि ॥

सुनी कहूं इन हरि की शोभा ❀ आई है ताही के लोभा
जसे सुन्दर कुँवर कन्हई ❀ तैसी सुन्दर यह ब्रज आई
मनहीं मन पुनि पुनि पछिताई ❀ पूछति निज प्रतिबिंबहि आई
तू है कौन कहां ते आई ❀ यहां कौन तोको लै आई
नाम कहा है सुन्दरि तेरो ❀ तुम जहँ रहति कौन सो खेरो
कहौ न मुखते बचन सुनाई ❀ मति सकुचौ कहि सौंह दिवाई
हम तुम दिननि एक हैं गोरी ❀ तू कछु रूप अधिक नहि थोरी
इहां अकेली तू क्यों आई ❀ काहू संग और नहि लाई
सुन्यो नहीं अन्याय इहांको ❀ ऐसे कहि डरपावति ताको
करत कान्ह ब्रजमें बरजोरी ❀ लेत तियन के भूषण छोरी
जो अपनी पति चहति सयानी ❀ तौ घर जाहु मानि मम बानी
लेहु बसन ते अंग छिपाई ❀ देखैं नहि कहूं श्याम कन्हई
दो० तेरे हित की कहति हों, मान चहै मति मान ।

आई है ब्रज आजही, तू उनको कह जान ॥

सो० ऐसो ठीठ न आन, त्रिभुवन में कोऊ कहूं ।

जैसो ब्रजमें कान्ह, मनभायो सबसों करत ॥

नेक नहीं काहू डर मानै ❀ मथुरापति जेहि रहत सकानै
उनके गुण नीके मैं जानौं ❀ तोसों अपनी दशा बखानौं
हम मथुरा दधि बेचन जाहीं ❀ घेरि लई उन मगके माहीं
गोरस लियो छोरि बरिआई ❀ हार तोरि दीने बगराई
हम अनेक तू एक किशोरी ❀ तातें जाहु बेगि गृह गोरी
सुनि सुनि श्याम प्रियाकी बानी ❀ मनहीं मन बिहँसत सुखमानी
प्यारी चकित रूप निज देखी ❀ श्याम चकित पुनि बचनविशेखी

जान दूसरी तिय प्रियपाहीं ❀ जात निकट मोहन सकुचाहीं
 पुनि पुनि दृग ठहराय निहारै ❀ बोलत नहिं उर हर्ष विचारै
 देखत मुकुर प्रिया करमाहीं ❀ अंकम लेवे को ललचाहीं
 प्यारी के रस बश गिरिधारी ❀ लेत दृगन छवि भरि भरी भारी
 सुनि सुनि बचन हृदय सुख पावै ❀ पुलकि अंग आनन्द बढ़ावै

छं० बचनसुनि आनन्द अतिमन निराखि छवि सुखपावहीं ।
 धनि धन्य राधारूप धनि हरि नैन इकटक लावहीं ॥
 धन्य वह प्रतिबिम्ब धनि छवि धन्य मुकुर निहारहीं ।
 धन्य भ्रम धनि प्रेम पूरण धन्य तन मन वारहीं ॥
 धन्य सुख जेहि लागि राधा कान्ह ब्रज तन धारहीं ।
 रमा सहित विलास नित बैकुण्ठ बांस विसारहीं ॥
 मिलन बिछुरन सुखविरहरस क्षणहिं प्रति उपजावहीं ।
 ब्रजविलास हुलास हरिको नितनयो श्रुति गावहीं ॥

दो० नवल प्रीति नितनवलसुख, नितनवरूपरसाल ।
 नितनवरस बिलसत नवल, श्रीराधा नँदलाल ॥

सो० कहतरसीलीबात, ज्यों ज्यों तिय प्रतिबिम्बसों ।
 त्यों त्यों सुनि हरषात, ब्रजवासी प्रभु रसभरे ॥

प्यारी नित प्रतिबिम्ब निहारै ❀ भई विवश नहिं सुरति सँवारै
 बार बार पूछति ता पाहीं ❀ क्यों सुन्दरि तू बोलति नारहीं
 हँसे हँसति हेरति है हेरे ❀ फेरति भौंह भौंह के फेरे
 करति परस्पर हमसों हाँसी ❀ अपनो नाम कहति प्रकासी
 परम चतुर तुम को मैं जानी ❀ हमसों तुम कहु करत सयानी
 अतिही सुन्दर रूप निहारो ❀ देखि होत मन मुदित हमारो
 शोभित बेसरि नाक मुहाई ❀ अति अनूप अधरन अरुणाई

दशन दमक दामिनी लजावति ❀ चिबुकनीलकण्ठ अतिछविपावति
काहे ऐसे मुख की बानी ❀ हमें सुनावति नाहिं सयानी
कहो बचन काकी हौ घरनी ❀ काकी सुता सहज मनहरनी
कै रिस कै रिस कै इत हेरति ❀ भरे सम्मुख लोचन जोरति
कछु रिसि कछु घरको मनमाहीं ❀ धीर धरति नागरि जिय नाहीं
दो० यह तो बोलति हैं नहीं, अति गरबीली बाम ।

देखतही यहि रीभिहैं, छैल छबीले श्याम ॥

सो० भई सवति यह आय, अब हरि याके बश भये ।

याँ बियोग उपजाय, उपजायो उर बिरहदुख ॥

रही दीठ दरपनहि लगाई ❀ टरति नहीं छबिकी अधिकाई
उरमें भयो बिरह दुख भारी ❀ देखि दशा रीभे गिरिधारी
कबहुँ चलति तिय ढिगहि कन्हआई ❀ कबहुँ रहति लखि छबिहि भुलाई
औचक पाछे ते सुखदाई ❀ मूंदे नयन कमलकर आई
चौकि चकित भइ मनमें भारी ❀ जानों आये छैल बिहारी
दरपति रही जो मनमें ताको ❀ मिले आय सुंदर हरि वाको
तब कछु सुरति भई मनमाहीं ❀ वह तो है मेरी परछाहीं
सकुचि दुराव करति पियपाहीं ❀ मनहीं मन दोऊ मुसकाहीं
जानि बूझिके पिय घनश्यामहिं ❀ लेति बिपुल सखियन के नामहिं
श्याम प्रिया लोचन भरिलायो ❀ अतिहित बेंदी उर परसायो
शोभा कहा कहै कबि कोऊ ❀ मेचकमाणि सुमेरु अँग दोऊ
ता बिच मनहुँ पन्नगी आई ❀ रही कनक गिरिसों लपटाई

दो० बेष्टित भुज मूंदे करन, दीरघ खंजन नैन ।

मनौ भखलीनो धाय अहि, नहिं समान फणिऐन ॥

सो० करति सखिन सों रोष, मनहरषत खीजत बदन ।

भरी चतुरई कोष, लूटति मन कामनफलन ॥

अति आनंद भरे दोउ राजें ❀ उपमा कहत कवीश्वर लाजें
मरकत मणि कुंदन सँग जोरी ❀ किधौं लिये घन तड़ित अँकोरी
कै शोभा मुख तन धरि सोहैं ❀ ब्रजवासो भक्तन मन मोहैं
कोमल कर तियनयन कन्हाई रहे मूँदि छवि वरणि न जाई
अतिहि विशाल चपल अनियारे ❀ नहिं समात प्रियपाणि पसारे
खिन खोलत खिनढकत बिहारी ❀ मुखरिस मन मुसकात पियारी
ज्यों मणिधर मणि प्रकट कन्हाई ❀ फिरि फिरि फणतर धरत छिपाई
श्याम उँगरियन अंतर माहीं ❀ चंचल नयन दुरे दरशाहीं
मरकत मणि पिंजरा में मानों ❀ तरफरात विव खंजन जानों
कर कपोलदिग तरल तरोना ❀ शोभा सहज सुभाय करोना
मनोयुगकमलमिलनशशिआये ❀ विवर विवंग सहायक पाये
कुँवरि नागरी नागर नायक ❀ उपमा काहि कहौं को लावक

दो० अपने कर पिय कर पकरि, लीने नैन छुड़ाय ।

रबि शशिचार सरोजजनु, द्वैचकोरमिलिजाँय ॥

सो० कीन्हे सम्मुखआन, पाणि पकरिकै लाड़िली ।

भले भले जू कान, मैं सखियन धोखे रही ॥

भले आय औचक बिनजाने ❀ मूँदिरहे दृग अतिहि पराने
कैसे दौरि पैठि गृह आये ❀ नेकहु आवत जानि न पाये
तुम हौ पिय मनहरन कन्हाई ❀ तुम्हरी गति कछु जानि न जाई
तब हरि हरषि प्रिया उर लाई ❀ मुकुर कथा सब भापि मुनाई
मुनि नागरि हरि तन मुसकानी ❀ चितै नैन कछु मनहिं लजानी
मैं तो अपने मन्दिर माहीं ❀ सहज लखत दरपन में छाहीं
तुम्हरी महिमा पिय को जाने ❀ एक सुन्दर अरु परम सयाने

हँसत चले जब कुँवर कन्हवाई ❀ रसिक पुरंदर जन सुखदाई
हरषित गये सदन नँदलाला ❀ इत नागरि उर हर्ष विशाला
जब प्रतिबिंब सुरति जिय आवै ❀ समुझि सुदशा सकुच तब पावै
तिहि अंतर सँग सखिन लिवाई ❀ चंद्रावलि राधा ढिग आई
लखि प्यारी आदर अति कीनो ❀ तुरत सबन को बैठक दीनो

दो० सादर सनमानी सबै, दिये हरषि कर पान ।

पियसँग सुखचाहति करन, रहित सकुच पुनिमान ॥

सो० गदगद मुख गर बैन, बार बार भाषति हरषि ।

भलक प्रेम जल नैन, पुलकि गात पूरे सबै ॥

कहति सखी सुनु राधा गोरी ❀ आज कहा अति हर्ष किशोरी
हम तेरे नितही प्रति आवैं ❀ इतनो आदर कबहुँ न पावैं
पायो आज पखो कछु तैं री ❀ कैधों मिले श्याम कहुँ हैं री
उमग्यो प्रेम हरष उमार्हीं ❀ हमें सुनावति है क्यों नाहीं
सुनि सखियन के बचन सयानी ❀ बोली प्रिया हरषि कै बानी
आये आज सखी हरि मेरे ❀ कहे जात नहिं गुण उनकेरे
जैसी भांति मिले हरि हमसों ❀ सो हित कहौं सुनहु सखि तुमसों
मैं अपने सब अंग सिंगारति ❀ लिये मुकुर कर बदन निहारति
पाछे आनि भये हरि ठाढ़े ❀ चतुर शिरोमणि छबि सों बाढ़े
भाव एक भोरे मैं साजा ❀ ताहि कहत सखि लागत लाजा
लखि अपनो प्रतिबिंब भुलानी ❀ जानि और तिय मनहिं डरानी
पाछे तैं यह जानि कन्हवाई ❀ मूँदे नयन औचकी आई

दो० तबहीं चौंकि चकृत भई, मैं समझी निजभोर ।

लगी देन उरहन तुम्हें, भई फिरति हौ चोर ॥

सो० सुनि राधासुख बात, हिय हरषीं सब गोपिका ।
पुलकि प्रफुल्लितगात, कहति धन्य तू लाड़िली ॥

श्यामसंग सुख लूटति हैरी ❀ अब उनसों नहिं छूटति तें री
श्याम भये तेरे अनुरागी ❀ भली भई हरि संग रसपागी
अब हरि तोते अति रति मानै ❀ तेरो अंतर हित पहिचानै
आवत जात रहत घर तेरे ❀ क्षण नहिं रहत तोहिं विन हेरे
चतुर रूप गुण तुम दोउ नीके ❀ परम भावते हो सबहीके
आज लाल भेरे गृह आये ❀ बड़े भाग्य मोहित करि पाये
देखि दरश नैनन सुख पायो ❀ करों काज आनंद बधायो
यह उपकार तुम्हारे आली ❀ मोहिं मनाय दिये बनमाली
तुस्त लाय हरि मोहिं मिलाये ❀ मैं अपने अपराध क्षमाये
नंदनंदन पिय नैन समाये ❀ भावत नहीं नेक विसराये
सुनि यह राधा की रस वानी ❀ देति अशीश सखी हरपानी
नंदनंदन बृषभान किशोरी ❀ चिरजीवहु सुन्दर यह जोरी
दो० प्रेम भरे छबि सों भरे, भरे अनन्द हुलास ।

युगल माधुरी रस भरे, ब्रजमें करत विलास ॥

सो० करत अनेक बिहार, रूपरसिक गुणनिधि युगल ।
राधा नन्दकुमार, ब्रजवासी जन सुख करन ॥

अथ नैनअनुरागलीला ॥

हरि अनुराग भरीं ब्रजनारी ❀ लोक सकुच कुल कानि निवारी
सास ननंद गारी दै हारी ❀ सुनत नहीं कोउ कहत कहारी
सुत पति नेह जगत यह छोखो ❀ ब्रज तरुणिन तिनका सम तोखो
बेद लोक मर्यादा डारी ❀ ज्यों अहिकंचुलि फिरिननिहारी

ज्यों जलधार भरे तृण नाही ॥ जैसे नदी समुद्रहि जाहीं ॥
जैसे सुभट खेत चढ़ि धावै ॥ जैसे सती बहुरि नहि आवै ॥
जैसेहि भजी नन्द नन्दन को ॥ नेकहुँ डरी नहीं गृहजन को ॥
तैसेहि प्रेमविश गिरिधारी ॥ ज्यों गज पंक न सकहि निहारी ॥
ब्रजबनिता मन नहि बिसरावै ॥ क्षणप्रति तिन्हें देखि सुख पावै ॥
आये पुनि तेहि ओर बिहारी ॥ सखिन सहित बैठी जहँ प्यारी ॥
भीर देखि सकुचे मनमाहीं ॥ ताते निकट गये हरि नाही ॥
ताही मग निकसे सुखदाई ॥ सुन्दर नटवर रूप दिखाई ॥

दो० शीश मुकुट कुंडल श्रवण, उर चटकीली माल ।

पीतवसन कटिकावनी, तनद्युति श्याम तमाल ॥

सो० चलत लटकनी चाल, बंकबिलोकनिमृदु हँसनि ।

अंग अंग छविजाल, रसिक नवल नागरिछयल ॥

औचक देखि श्याम ब्रजनारी ॥ भई चकित तन दशा बिसारी ॥
जात चले ब्रजखोरि अकेले ॥ कोटि काम की छवि पर हेले ॥
पग द्वै चलत बहुरि फिरि हेरै ॥ कमल सनाल कमल कर फेरै ॥
मृगमद तिलक अलक घुँचुरारी ॥ तन बन धातु चित्र रुचि कारी ॥
मृदु मुसकाय मरोरत भौहैं ॥ नयन सैन दै दै मन मोहैं ॥
निरखत ब्रज युवती बिथकानी ॥ दुखमुख व्याकुल मन अकुलानी ॥
गये कल्प तरु छाँह कन्हाई ॥ रूप ठगौरी तियन लगाई ॥
लागी कहन परस्पर बानी ॥ लोचन मन अनुराग कहानी ॥
सुनहुँ सखी यह नन्ददुलारो ॥ हठ करि हरि मन लेत हमारो ॥
क्षण क्षण प्रति छवि और बनावै ॥ शोभा कछू कहत नहि आवै ॥
मन तो इनहीं हाथ बिकानो ॥ हम सखि यह कछू भेदन जानो ॥
नैनन साट करी नैनन सों ॥ कियो मोल सैनन वैनन सों ॥

दो० बेचि दिये मन आपुही, मृदु मुसकन धन पाय ।

परी रही हों बीचही, नैना बड़ी बलाय ॥

सो० भयो श्याम को जाय, अब रुचिमानी मन तहाँ ।

मैं पचिहारि बुलाय, फेरि नहीं इतको फिरे ॥

अब मन हित हरिही सों कीनों ❀ भेद हमारो सब कहि दीनों

मन तो गयो नैन हैं मेरे ❀ तिनहूँ बोलि कियो हरि चरे

अब ये रहत वहाँ सबकाई ❀ सोई करत जु कहत कन्हाई

जितहि चलत वे तितही जाहीं ❀ हरि के सम्मुख रहत सदाहीं

भये वे जाय गुलाम श्याम के ❀ रहे न काहु और काम के

ताको कछु अपमान न जानो ❀ फजे फिरत अधिक सुख मानो

जग उपहास सुनत बहुतेरो ❀ लाज फाँस दीनो सब डेरो

आरज पथ मर्याद बड़ाई ❀ लोक वेद कुलकानि गँवाई

मैं समुझाय रही बहुतेरो ❀ नेकहु कह्यो सुनत नहिं मेरो

ललित त्रिभंगी छबि पर अटके ❀ मोसों तोरि सगाई सटके

हरि अब छोड़त तिनको नाहीं ❀ बैठे रहत आप तिन माहीं

राखे बाँधि अलक की डोरी ❀ भाज जाहिं मति कबहुँ कहोरी

दो० अब ये लोचन श्याम के, सखी हमारे नाहिं ।

बसे श्यामरस रूप ये, श्याम बसे इन माहिं ॥

सो० कहा करें सखि श्याम, नैननही को दोष यह ।

हठ करि भये गुलाम, तनक मंद मुसकान पर ॥

बोली अपर एक ब्रजनारी ❀ सखि लोचन लोभी अति भारी

जबहिं लखत कमनीय कन्हाई ❀ तबहीं सँग लागत उठि धाई

मेरो हट्यो नेकु न माने ❀ लखत जाय वह छबि ललचाने

ज्यों मृग छूटत फन्द अधिक तें ❀ भाग चलत उड़ि बेग अधिक तें

पाछे फेरि न फिस्त डराई ❀ जाय सघन बन माँझ समाई
 त्यों दृग मोते छूटि पराने ❀ हरि छबि बिन घन जाय समाने
 अब वे इतको नाहिं निहारै ❀ वह छबि निराखि हरषि उर धारै
 यदापि सुधा छबि पियत अघाई ❀ तदापि तृप्ति नहिं मानत राई
 भई सखी नयनन गति ऐसी ❀ भरे भवन तस्कर की जैसी
 देखि श्याम छबि घन अधिकारि ❀ अति लालची रहे ललचाई
 लेत न बनै तजौ नहिं जाई ❀ चकित भये निज सुधि बिसराई
 रहे विचारहि माँझ भुलाने ❀ नहिं कछु लियो न त्याग पराने

दो० नैन चोर हरिमुखसदन, छबिघन भाँति अनेक ।

तजत बनत नहिं एकहू, लेत बनत नहिं एक ॥

सो० सखि ये नैना चोर, हरिमुख छबि चोरन गये ।

बाँधे अलकनि डोर, हरि की चितवन पाहरू ॥

भली भई हरि इनहिं बँधायो ❀ निदरि गयो तैसो फल पायो
 ये नहिं मानत कह्यो हमारो ❀ सखि इनहीं सब काज बिगारो
 कहति और एक गोप कुमारी ❀ सखि ये नयन किधौ बटपारी
 कपट नेह हम सों करि भारी ❀ करी हमैं गुरुजनते न्यारी
 श्याम दश लाडू कर दीनो ❀ हमैं आपने बश करि लीनो
 प्रेम ठगोरी शिरपर छाई ❀ फिस्त संगही संग लगाई
 बिरह फाँस गर डारि हमारे ❀ करी बिकल नहिं अंग सँभारे
 कुल लज्जा सम्पदा हमारी ❀ सो इन लूट लई सखि सारी
 कहरति परी मोह बनमाहीं ❀ लगन गाँठ दृग छूटत नाहीं
 क्योंहूँ नेह जीव नहिं जाई ❀ सुमिरि नयन गुण मन पछिताई
 कासों कहैं सखी यह वाता ❀ भये नयन हमको दुखदाता
 हमको बिरह दुसह दुख देहीं ❀ आप सदा दरशन मुख लेहीं

दो० यहिविधिनिदरति दृगनको, भरी प्रेम ब्रजनारि ।
होतिमगनमुख बिरहरस, नैननिश्यामनिहारि ॥

सो० यही भजनयहि ध्यान, श्यामरूपरसगुणकथा ।
नहिं जानतिकछु आन, निशिदिनब्रजकीसुंदरी ॥

कोऊ कहति नयन खग भरे ॥ फँसे अलक फन्दा हरि केरे ॥
अबिकण चारा लखि ललचाने ॥ फन्द गये चितवन लपटाने ॥
हरि अबि अटक परे दृग जाई ॥ अतिहि विलाप भये बिसाई ॥
रहत दीन सनमुख लटकाये ॥ दुख मुख समुझ सबै बिसराये ॥
कहवावत हैं बड़े सयाने ॥ वह अबि लेन गये अतुराने ॥
सोतो कछू हाथ नहिं आयो ॥ आपन यों इन जाय बँधायो ॥
ऐसे को त्रिभुवन जो जाई ॥ आवै सखी समुद्र अथाई ॥
हार जीत ये नयन न जानैं ॥ मानपमान कछू नहिं मानैं ॥
परे रहत शोभा के द्वारे ॥ नेकहुँ लाज नहीं उर धारे ॥
जाकी बानि परी सखि जैसी ॥ धरी टेक उर में तिन तैसी ॥
इत अँखियन यह टेक परी री ॥ लुब्ध तज्यो कमलन भ्रमरी री ॥
जों शुक नलिनी के बश जाई ॥ जिमिकपि मुठी छोड़ि नहिं जाई ॥
दो० लोभैवश जिमि मीन नृप, आपबँधावत आय ।

रूप लालची नैन तिमि, भये श्यामवश जाय ॥

सो० सकै न कोऊ बिंधु, लोक लाज कुलकान गिर ।

श्याम सलोने सिंधु, मिले त्रिबेनी हैं नयन ॥

सखी नयन अब हरि सँग लागे ॥ मन बच क्रम उनसे अनुरागे ॥
सन्मुख रहत सदा मुख पायें ॥ भूल गये मग दहने बायें ॥
ज्यों मणि देखि उरग मुख पावैं ॥ ज्यों चकोर चंदहिं लटकावैं ॥
मुदित रंक जैसे धन पाई ॥ वैसी इनकी गति अवसाई ॥

अब ये नयन फिरत नहिं फेरे ❀ किये सखी हम यतन घनेरे
देखे सुभग श्याम इन जबतें ❀ निठुर भये हम सों ये तबतें
जब मैं घूँघुट पटहि धेरी ❀ तब ये शिशु की आन भेरी
हरि अँग संग लागि उठि धाये ❀ मनहुँ उनहिं प्रतिपाल कराये
मृदु मुसकन रस पाय मिठाई ❀ क्षणही मैं मति गति विसराई
अति हठ परे न नेक बिचारैं ❀ निमिष रुदन बल धीर न धारैं
लाज लटक उरमें पाये ❀ वे राखि एकहु डर न डराये
फिरे न मैं बहु भांति बुलाये ❀ गये यतन हरिके फुसलाये

दो० अब हम तलफत उन बिना, मरत यही अफसोस।

ग्रथ खोटौ सखि आपनो, कहा पारखिहिं दोष ॥

सो० प्रेम बिबश त्रियबुंद, ऐसे दोषति दृगन को।

तबहिं खेल ब्रजचंद, टेरि सुनाई बांसुरी ॥

अथ मुरली लीला ॥

कृष्ण प्रेम रस पूरण तातें ❀ करत हुतीं नैनन की बातें
परी श्रवण इहि अंतर जाई ❀ हरि की मुरली देख सुनाई
भई चकृत मुनि सब ब्रज गोरी ❀ परी आय मनो शीश ठगोरी
भूलि गई सुधि अखियन केरी ❀ ह्वै गइ मानो चित्र लिखेरी
दुख सुख मनको बराणि न जाई ❀ इकटक रहीं पलक विसराई
देह दशा सब तुरत भुलानी ❀ स्वेद चल्यो बहि मानहुं पानी
भई बिबश मति की गति भूलीं ❀ प्रेमहिं डोर गोपिका भूलीं
कबहुं सुधि कबहुं सुधि नाहीं ❀ कबहुं मुरली नाद सुनाहीं
कछुक सँभारि धीर उर धारी ❀ कहति परस्पर गोप कुमारी
अखियन ते मुरली हरि प्यारी ❀ है बैरिन यह सवति हमारी
ब्रज में धौं किततें यह आई ❀ भई कठिन हम को दुखदाई

आवत ही ऐसे ढंग जाके ❀ भये श्याम तुरंतहिं बश ताके
दो० जा रसको हम तप कियो, षट् ऋतु सब ब्रजवाम।

सोरस मुरली लेति अब, सहजहि बश करि श्याम॥

सो० गावत मीठी तान, मुरली संग अधरन धरे।

अब जाके बश कान, औरन बिबश करी वही॥

ऐसी त्रिभुवन कौन सयानी ❀ जो न मोह सुनि याकी बानी

यह तो भली नहीं ब्रज आई ❀ अरी सवाति हरिके मन भाई

अब याके बश गिरिवरधारी ❀ अधरनते करते नहिं न्यारी

याही के अब रंग रंगे री ❀ मधुर बचन सुनि रीझ गये री

कर पल्लवन ताहि बैठाई ❀ रहत श्रीव तापर लट्काई

बारहि बार अधर रस प्यावै ❀ तासों अति अनुराग जनावै

देखहु री याकी अधिकाई ❀ पियत मुधा रस हमहिं दिखाई

परी रहत वनमें धौं कैसी ❀ भई ढीठ आवतही ऐसी

दिनहीं दिन अधिकात जात री ❀ सखी नहीं यह भली बात री

आवतही हमरो धन लीनो ❀ चाहत और कहा धौं कीनो

मैं जो कहति सुनो री गोरी ❀ सजग रहो सब नवलकिशोरी

मुरली दूरि कराये बनि है ❀ कलू दिननमें हमहिं न गनि है

दो० फिरि हैं याके संग लगि, लोकलाज गृह त्यागि।

जब जब जहँ यह बाजि है, मोहनके सुहँ लागि॥

सो० करि है नाना रंग, यह जानत टोना कछु।

या मुरली के संग, देखहु हरि कैसे भये॥

यह सुनि कहति एक ब्रजनारी ❀ सखी बात तू कहति कहा री

अब यह दूरि होति है कैसे ❀ जाके बश नंदनन्दन ऐसे

एक पायँ ठाढ़े ता आगे ❀ रहत त्रिभंग अंग अनुरागे

अधर सेज पर शयन कराई ❀ कर पल्लवन पलोदत पाई
कबहुं क मिल गावत हैं तासों ❀ होत बिबश पुहुमी सब जासों
मुरली अति मोहन को भावै ❀ ताके गुण सखीन को पावै
जानत राग रागिनी जेते ❀ हरि संग मिलि गावति हैं तेते
नाना विधिकी गति न बजावै ❀ तान तरंग अमित उपजावै
जैसेही रीकत मनमोहन ❀ तैसिय भांति रिभावति गोहन
रहति सदा मुखही सों लागी ❀ अधर पिषूष स्वाद रस पांगी
मधुर मधुर कल बचन सुनावै ❀ पुनि पुनि हरिके मनहिं चुगवै
ऐसो को अब हरिके करते ❀ दूर करै याको निज बरते

दो० अब मुरली छूटै नहीं, याके बश भये श्याम ।

प्रकट कियो सब जगतमें, मुरलीधर निजनाम ॥

सो० हरिको करि बशमाहिं, मुरली लूटै अधररस ।

उर डरमानति नाहिं, हम सबतें बोलति निठुर ॥

निठुर बचन अब हमहिं सुनावै ❀ हरिको मन हम ते उचटावै
आरज पथ कुलकानि छुड़ावै ❀ हम सबहिनको निलज करावै
ऐसे ढंग मुरली के आली ❀ हम ते निठुर किये बनमाली
यह तो निठुर काठकी जाई ❀ प्रकट किये अपने गुण आई
अपनोई स्वारथ यह जानै ❀ कपट राग हरिके संग गानै
मुरली निठुर किये बनवारी ❀ मुरली ते हरि हमन बिसारी
बनकी व्याध कहा यह आई ❀ ऐसे कहि कहि तिय पछिताई
कहा भयो मोहन मुख लागी ❀ अपनी प्रकृति नहीं इन त्यागी
एक सखी बूझति भई ऐसे ❀ मुरली प्रकट भई यह कैसे
कहां रहत काकी है जाई ❀ कौन जाति कैसे यह आई
मात पिता हैं याके कैसे ❀ जैसी यह तेऊ धों ऐसे

बोली अरु इक तिया सयानी ❀ अबलौं तुम यह बात न जानी
 दो० सखितुम अबलौं नहिं सुन्यो, मुरलीको कुलधर्म ।

सुनो सुनाऊँ मैं तुम्हें, याको जातरु कर्म ॥

सो० तुमसों कहौं बखान, मैं जानति याके गुणन ।

सुनि सुख पैहौ कान, या मुरलीकी कुल कथा ॥

वन में रहति बांस कुल जाई ❀ यह तौ याकी जाति सुहाई

जलधर पिता धरणि है माता ❀ तिनके गुणन करौं विख्याता

वनहुं ते तिनको घर न्यारो ❀ निपटहिं जहां उजाड़ अपारो

गुणन एक ते एक उजागरि ❀ मात पिता अरु मुरली नागरि

पर अकाज बिन और न जानै ❀ ये ही इनके कुलहि बखानै

ना जानिये कवन फल आली ❀ कृपा करी यापर वनमाली

सुनहु सखी याके कुल धर्मा ❀ प्रथम कहौं मेघन के कर्मा

वे वर्षत जल सब जग माहीं ❀ गिरि वन सर सरिता सब ठाहीं

चातक सदा रहत करि आसा ❀ एक बूंद को मरत पियासा

धरणी सबही को उपजावै ❀ आपन सदा कुमारि कहावै

उपजत पुनि बिनशत ताही में ❀ सो कहु छोह नहीं वाही में

ता कुल सुता मुरलिका जानौ ❀ अब आगे गुण प्रकट बखानौ

दो० तनहीं ते प्रकटत अनल, ऐसी याकी भार ।

प्रकट भई जा बांस में, करति जारि तेहि द्वार ॥

सो० ऐसे गुणकी आहि, यह मुरली सखि बांसकी ।

आई निजकुल दाहि, और कौन याते निठुर ॥

याकी जाति श्याम नहिं जानी ❀ बिन जाने कीनी पट्टानी

कहिये चलौ श्याम सों जाई ❀ सुनत तजेंगे कुँवर कन्हाई

सखी कहा यह बात बखानौ ❀ श्यामहिं कहा भलो तुम जानौ

निजकुल जारति बिलम न लाई ॥ है है तासों कौन भलाई ॥
जाको हम षट ऋतु तप कीनो ॥ सो फल तुरत मुरलि यह दीनो ॥
जे सन्मुख ते विमुख कहावैं ॥ विमुख तुस्त उत्तम फल पावैं ॥
घर के बन बनके घर कीन्हे ॥ कपटी परम श्याम को चीन्हे ॥
एक अंग की प्रीति हमारी ॥ वे कपटी बहु तरुणि बिहारी ॥
ज्यों चकोर चंदा हित मानै ॥ चंद्र नहीं नेकहु उर आनै ॥
जल के तीर मान तन त्यागै ॥ जलको तनक दया नहिं लागै ॥
ज्यों पतंग उर ज्योति जरै री ॥ ज्योति नहीं कछु कृपा करै री ॥
चातक एक मेघ को जानै ॥ वह कछु ताकी प्रीति न मानै ॥
दो० इनसबहिन ते हरि निठुर, तैसिय मिली सहाय ।

अब मुरली अरु श्याम की, जोरी बनी बनाय ॥

सो० ये अहीर वह बैन, काहे न प्रीति बढ़ाव हीं ।

दुहुअन को मन ऐन, जैसे वे तैसी वहु ॥

मुरली ने हरि को पहिचान्यों ॥ हरि को मन मुरली सों मान्यों ॥
निठुर निठुर मिलि बात बनावैं ॥ याही के बल धेनु चरावैं ॥
वाही की लकुटी कर धारी ॥ वाही की बंशी अति प्यारी ॥
हम सों बैर सदा हरि कीनो ॥ दधि लै मारग जान न दीनो ॥
पुनि भेदहि मन हस्यो हमारो ॥ कीनो कुल कुटुम्ब ते न्यारो ॥
बहुरि बोलि अखियन को लीनी ॥ तापर सवति मुरलिया कीनी ॥
सुनि सजनी बिन काज जरौरी ॥ कर्म करै सो कोउ न करौरी ॥
यह महिमा कर्त्ता सब करई ॥ कौने विधि धौं कापर परई ॥
हम तप करि इतनो पचिहारी ॥ सो घर कुल ते भई नियारी ॥
बन की घास इतौ सुख पावै ॥ श्याम अधर शिरछत्र धरावै ॥
भये नृपति हरि मुरली रानी ॥ और नारि हरि को न मुहानी ॥

बनते ल्याय सुहागिनि कीन्हों ॥ जाति पांति कुञ्ज कञ्चू न चीन्हों
दो० तप तीरथ जो पूरबहि, कठिन किये हरि हेत ।

अब मुरली ता कष्ट को, बैठि अधर फल लेत ॥

सो० भेटति पिछलो दाग, जो तप करि तायो तनहिं ।

धनि धनि मुरली भाग, अबगरजति अधरनचढ़ी ॥

मुरली कौन मुकृत फल पायो ॥ सब कलंक हरि परसि गँवायो

तन कठोर मन जड़ रसहीनी ॥ अंतर मूनो सार विहीनी

लघुता अंग न कछु गरुवाई ॥ वांस वंश कछु नाहिं निकाई

छिद्र विशाल विपुल तन छाये ॥ हरि हि परस सब भये मुहाये

विधिते प्रबल भई यह मुरली ॥ हरि मुख कमल वरासन जुरली

चारु वदन विधि श्रुतिमति भाखे ॥ नीति संहित जड़ चेतन राखे

आठ वदन मुरली कहि नादा ॥ उलटिई विधि की मर्यादा

जड़न चेत चेतन जड़ कीन्हे ॥ थिर चर करि चर थिर करि दीन्हे

एक नारि श्रीपति सिखरायो ॥ तब ते ज्ञान विधाता पायो

वाको तो नँदमुवन कन्हाई ॥ लगे रहत हैं कान सदाई

याते को अरु प्रबल प्रवीना ॥ कियो सकल जग निज आधीना

कहिये काहि और को ऐसी ॥ भई श्याम सँग मुरली जैसी

दो० अबसुरनरमुनिसुरशशि, स्वगमृगसलिलसमीर ।

यामुरली के वश सबै, धुनि मुनि धरत नधीर ॥

सो० रही विश्ववर जीति, मोहन मुख लागि वांसुरी ।

भेटि सकल श्रुति नीति, रीति बलावति आपनी ॥

सखि मुरली को दोष न देहों ॥ करि विचार अपने मन लेहों

हरि हित इन श्रम कीनो जोई ॥ सो श्रम और कौन पै होई

जो अकुलीन तऊ बड़ भागी ॥ कियो कठिन व्रत हरिहित लागी

जब अति दृढ़ याको हरि जान्यो * तब बन भीतर ते गृह आन्यो
जब याकी करतूति सुनौगी * तब धनि धनिकरि याहि गनौगी
जनमहिं ते कीनी मति गाढ़ी * बन में रही एक पग ठाढ़ी
शीत उष्ण वर्षा सह लीनी * नेकहु मनसा मलिन न कीनी
कसकी नहीं नेक जब काटी * पत्र मूल शाखा जब छांटी
राखी डारि घाम में आनी * शोच शोच सब देह सुखानी
मुखो न मन तन अंग दगाये * विक बेह अंग अंग करवाये
ताय सुलाख परखि हर लीनी * तब मुरली पट्टानी कीनी
मुरली सही इती कठिनाई * तब पाई ऐसी ठकुराई

दो० मुरली तपफल भोगवै, वृथा करत तुम रार ।

निजगुणरिभयेश्यामउन, गुणियनगुणीपियार ॥

सो० तुमते यह नहिं होय, जो करनी मुरली करी ।

ताकीसम नहिं कोय, अतिश्रमकरिहरिबशकरे ॥

परम पुनीत प्रीति जब जानी * तब मुरली हरिके मनमानी
देखहु री याकी अधिकाई * कहँ लगि याकी करहिं बड़ाई
जवहीं श्याम अधरको परसैं * तब अति हरषि नादरस बरसैं
तान तरंग रंग उपजावैं * अति आनंद सब जगत जनावैं
जियत श्याम अधरासृत पाई * छूटत मौन रहत मुरझाई
क्यों नहिं श्याम करैं हित ताको * अधरासृत जीवन है जाको
मुरली जो हरिहित तप कीनो * परम चतुर पूरण तप लीनो
तबलगि हरि को नहिं पतियानी * सहे कष्ट बोली नहिं बानी
जबलगि जीवनकर नहिं पायो * अधरासृत रस मन को भायो
जब हरिसों बांछित फल पायो * तब सब पर अधिकार जनायो
या सम और चतुर को आली * जिन बश किये श्याम बन माली

क्यों नहिं त्रिभुवन को मन मोहै ❀ जाके बश पति त्रिभुवन कोहै
 दो० मुरली की सरि मत करौ, कह्यो हमारो मान ।

धनि धनि ताहि बखानिहैं, सुनि ताको यश कान ॥

सो० अधरामृत करि पान, मौन भई अब मुरलिका ।

तिहुं पुर होत बखान, शारदादि यश गावहीं ॥

हमहुं सब मिलि कै तप कीनो ❀ ताको फल हरि हमको दीनो

लीने भूषण बसन चुराई ❀ युवतिन लाज छुड़ाय बुलाई

तब अम्बर दे धन्य बखान्यो ❀ हम भोरी इतनो मुख मान्यो

अपनो अपनो भाग्य सखी री ❀ मुरली सों विन काज खिजौ री

अब मुरली सों हेत करौ री ❀ नहिं जीतौगी मतिहि लरौ री

मुरली हम तें तप अधिकाई ❀ मुरली के बश कुँवर कन्हाई

तनक आश दरशन की है री ❀ सोऊ पुनि कर तें जैहै री

हैं बहु तरुणी रमण कन्हाई ❀ यह भिस एक तियन को आई

मुरली को जिन डाह करौ री ❀ तुम नहिं अपने प्रेम त्रौ री

प्रेमहिं ते हरि मानि रहेंगे ❀ वे सुजान सब जानि रहेंगे

सब तजि भज्यो जन्मते ताही ❀ तज्यो जात कैसे अब वाही

मुरली सों कह काज हमारो ❀ जीवहु मोहन नन्ददुलारो

दो० हम हित कीनो श्यामसों, मेढि लोककुलकान ।

ताहीसों हित चाहिये, जासों है पहिचान ॥

सो० हम को है यह आश, वे हैं अन्तर्यामि हरि ।

करि हैं नाहिं निराश, उर अन्तर की जानिकै ॥

कहा भयो मुरली हरि राखी ❀ अपने करसों ताहि सुलाखी

गुणके काज क्षणक दुख पाई ❀ दे अधरामृत तुरत जिवाई

हमते अधिक कियो उन नाहीं ❀ करि बिचार देखहु मन माहीं

वर्ष पांच सात की जबतें ❀ कियो सनेह श्याम सों तबतें
 पुनि षट्शतु तपसों मन लायो ❀ अबलों बिरहानल तप तायो
 कैसे ये सब फलन फलैगे ❀ क्यों नहिं हमको श्याम मिलैगे
 तब यों कह्यो एक ब्रजनारी ❀ मुरली श्याम अधरपर धारी
 जो अवगुण होतो या माहीं ❀ तो याको हरि छुवते नाहीं
 सुनो सखी यह है यहि लायक ❀ अतिही भली श्रवण सुखदायक
 तुमहौ कहति बृथा जोइ सोई ❀ जैसी यह ऐसी नहिं कोई
 जो यह भली भरी गुण केरी ❀ तौ याको दुरि श्याम मिले री
 काहे न प्रीति करें हरि ऐसी ❀ है यह तिहूं भुवन में जैसी

दो० एक युवति अरु गुण भरी, बोलति मधुरे वैन ।

श्रवण सुधा प्यावत तहूं, क्यों हरि अधरधरैन ॥

सो० हरि बरजो मति कोय, देहु बजावन बासुरी ।

बिरह बिरसते होय, रस कीने रस होत है ॥

आप भले तो जगत भलोई ❀ नातरु सखी भलो नहिं कोई
 मुरली सगी श्याम के मुख री ❀ तौहू है हम सों सन्मुख री
 सुनहु कानदै कहति कहा री ❀ श्रीराधा श्रीराधा प्यारी
 तुम जानति हरि हमहिं बिसारी ❀ तुम हरिसों नहिं नेक नियारी
 जब जब मुरली श्याम बजावैं ❀ तब तब नाम तुम्हारोइ गावैं
 मुरली भई सबति जो आई ❀ तो हरि तेरिय टहल कराई
 तू अर्द्धगिनि वह है दासी ❀ मेरे मन यह बात प्रकासी
 मुरली तुम्हरो नाम बतावैं ❀ वाके मुख हरि तुमहिं बुलावैं
 तुम प्यारी हरि तुम को प्यारे ❀ मुरली सों यह कहत पुकारे
 हर्षी सकल सुनत यह बानी ❀ हम मुरली ऐसी नहिं जानी
 बृथा बैर यासों हम मान्यो ❀ याको शील अबै हम जान्यो

मुरली सों ऐसे मुख पाई ❀ करति सकल ब्रजनारि वड़ाई

दो० धनि धनि बंशी बाँस की, धनि याके मृदु बोल ।

धनिल्याये गण जांचि कै, बनते श्याम अमोल ॥

सो० धनिधनि याको बंस, धनिमुरली हरिमुख लगी ।

सखिन सहित परशंस, श्रीमुख श्रीराधा कह्यो ॥

मुरली श्री मुरलीधर केरी ❀ महिमा कापे जात निवेरी

जाको यश गुण गंधर्व गावैं ❀ वेद भेद जाको नहि पावैं

सुनत नाद त्रिभुवन मन मोहैं ❀ देव दनुज नर खग मृग जोहैं

बाणी ललित श्रवण सुखदाई ❀ बाजति हरि मुख ताहि मुहाई

ब्रह्मादिक मन मोह करावैं ❀ शिवसनकादि समाधि लगावैं

माया योग कृष्ण की जोई ❀ शोभित अधर मुरलिका सोई

हरि की श्वास जासु की बानी ❀ ताके गुण को सकै बखानी

जब मुरली नंदनंद बजावैं ❀ ब्रजललना सुनि कै मुख पावैं

चकित होय तन दशा भुलावैं ❀ प्रेम विवश मुधि बुधि विसरावैं

जकी थकी जहँ तहँ रहिजाहीं ❀ मानहुं लिखी चित्र की आहीं

कबहुं दुख कबहुं सुख मानैं ❀ कबहुं निंदहिं कबहुं बखानैं

ऐसी दशा होति घट घट की ❀ बाजति मुरली जब नटवरकी

अं० तरलतान तरंग अगणित गति अमित उपजावहीं ।

जबहिं मुरली श्याम करगहि अधर राखि बजावहीं ॥

रहत सुनि धनि मगन जलथल जीवजहँ सो तहँ सहीं ।

कहत ब्रह्मानन्द सों जासों प्रसंग पूजत नहीं ॥

सबै ध्यान ज्ञान समान सद्गुण सुनहु तबहीं लों अहैं ।

लोक वेद मर्याद पतिव्रत चारफल तबलों चहैं ॥

तबहिलों मन चपल बुधिवल सकल रुचि धन धामकी ।

सुनो सपनेहु नाहिं जयलों श्रवण मुरली श्याम की ॥

दो० धनिधनितेनरनारिजग, धनिधनि तिनके भागि ।

ब्रजबासी प्रभु बाँसुरी, जिनके मनमें लागि ॥

सो० राखत हैं यह आस, जन ब्रजबासीदास हू ।

करहु हिये में बास, मुरलीधर मुरली धरे ॥

अथ रासलीला ॥

बंदों युगल चरण सुखदायक ॥ श्रीसराशि नायिका नायक

नंदनंदन बृषभानु नंदनी ॥ सुर नर मुनि ब्रह्मादि बंदनी

रास रासिक सरास बिलासी ॥ नित्य धाम बृन्दावन बासी

रूपराशि आनंदनि धामा ॥ मंगल पद मुन्दर श्री श्यामा

बहुरि रासपति पद शिर नाऊं ॥ रास चरित मंगल अब गाऊं

बेदव्यास जो रास बखानो ॥ सो गंधर्व व्याह विधि जानो

ब्रजगोपिन हरि हित तप कीनो ॥ श्याम होयँ पति यह व्रत लीनो

नंदनंदन तिनको बर दीनो ॥ चीरहरण लीला तव कीनो

करि हैं तुम्हरे मन की भाई ॥ शरद रैन शुभ लगन भगाई

सो जब शरद सुखद ऋतु आई ॥ राका रजनी परम सुहाई

भक्त मनोरथ पूरण कारी ॥ गावत विरद विदित श्रुति चारी

गये श्याम बृन्दावन माहीं ॥ जहाँ बसंत ऋतु रहत सदाहीं

दो० श्रीबृन्दावन धाम की, शोभा परम पुनीत ।

बरणिसकैकविकवनविधि, मनबुधिबचनअतीत ॥

सो० तब चैतन्यस्वरूप, भूमिलता हुम गुल्म तृण ।

धारि रह्यो जड़रूप, सुन्दर श्याम विहार हित ॥

जाकी महिमा शिव मुनि गावैं ॥ ब्रह्मादिक रज छुवन न पावैं

जाकी महिमा शिव मुखबानी ❀ संकर्षण प्रति श्याम बखानी
 विंतामणि मय भूमि सुहाई ❀ कोमल विमल रम्य सुखदाई
 सकल सुमंगल की जननीसी ❀ कृष्ण चरण पंकज रमनीसी
 फिरत श्याम जहँ नांगे पावन ❀ चरण चिह्न अंकित सब ठावन
 पावनहूँ की पावन कारी ❀ ब्रजवासी प्रभुकी अति प्यारी
 बरन बरन बर बिटप सुहाये ❀ परम अनूप न जाहिं बताये
 सदा सुमन फल संयुत सोहैं ❀ अमित सुगन्ध स्वाद मन मोहैं
 नव पल्लव दल परम सुहाये ❀ जगमगात नगज्योति लजाये
 विपुल कांति शोभित बहु रंगा ❀ अतिबिचित्र छवि उठति तरंगा
 परम प्रकाश दशहु दिशि माहीं ❀ कोटि सूर शंशि पटतर नाहीं
 पत्र पत्र प्रति बिम्ब श्याम को ❀ मोहत लखि मन कोटि कामको

दो० ठौर ठौर शोभित परम, तैस्यइ लता वितान ।

बृन्दावन तरु बेलि सब, नख शिखतरु की खान ॥

सो० और सकल सुख धाम, बैकुण्ठादिक श्याम के ।

यह बिहार विश्राम, ताते अति सुन्दर सुखद ॥

विपुल कुंज मञ्जुल छवि छाई ❀ जिन्हें सवाँरत काम सदाई
 बहाते समीर धीर सुख दाई ❀ शीतल परम सुगन्ध सुहाई
 चित्र बिचित्र विहँग मृगनाना ❀ बोलत डोलत बिबिध बिधाना
 गुंजत भृंग लुब्ध मकरन्दा ❀ अति छवि पुंज मञ्जुवन बृन्दा
 तैसिय यमुना परम सुहाई ❀ पुलिन पुनीत बराणि नहिं जाई
 देति महा छवि झलकन रेती ❀ मानहुँ परम कांति की खेती
 फूले बनज विपुल बहु रत्न ❀ गुञ्ज करत मधुमाते भृङ्गा
 श्री बृन्दावन छवि समुदाई ❀ सम्यक बराणि कौन पै जाई
 जाकी पटतर को नहिं आना ❀ बन अनूप अद्वैत बखाना

ऐसी कछू परत है हेरी * है स्थूल वपुष प्रभु केरी
गोपी जन इन्द्री गण तामें * हैं चैतन्य आप हरि जामें
नित्य धाम ताही तें गायो * यह पंटर मेरे मन भायो

दो० सुखनिधिरसनिधिरूपनिधि, वृन्दाबिपिनउदार।

शारद नारद शेष शिव, वरणत विधि श्रुतिचार।

सो० सुखद न कोऊ आन, वृन्दावन सम दूसरो।

सकल बिश्व सुख दान, सुख पावत मोहन जहाँ ॥

तहँ बिस्तृत इक शंख सुहाई * मणिमय सुभग श्रुतिनमें गाई

तापर अद्भुत कमल बिराजै * षोडश पत्र चक्रसम राजै

योजन पंच तामु परमाना * रास स्थान सुबेद बखाना

मध्य करणिका अति रमनीया * बैठे तहाँ कान्ह कमनीया

शोभा अमित नेति श्रुति बानी * तातें गिरा कहति सकुचानी

कोमल श्यामल अंग सुहाये * निराखि कोटि शत काम लजाये

नटवर भेष साज सब साजै * अंग अंग भूषण छवि छाजै

शिखी शिखण्ड मनोहर माथे * बीच बीच मुक्ता मणि गाथे

जलज माल बनमाल सुहाई * कुंडल फलक अलक छवि छाई

कटि पट पीत काञ्चनी काञ्छे * ललित भ्रूंगार सुभगतन आछे

मणिन जटित नूपूर छवि नीके * चरण कमल भावत जननीके

रविशशि आदिक द्युतिधर जेते * नख उपमा पूजत नहिं तेते

दो० अति अद्भुत लावण्य निधि, श्रीवृन्दावन चंद।

निगम नेतिकिमिवरणिये, रसिक नवल नंदनंद॥

सो० जेहि गावत श्रुति चार, ब्रह्म पूरणानन्द हरि।

सो पूरण अवतार, वृन्दावन रस रास पति ॥

देखि श्याम बन धाम निकरि * तैसिय शरद रैन छवि छाई

प्रफुलितकुमुदिनि बन चहुँ पासा ❀ ललित मालती करति सुवासा
 जैस्वइ यमुना पुलिन मुहायो ❀ तैस्वइ पूरण शशि छविछायो
 तैसिय जगमग ज्योति हुमन की ❀ तैसिय ललित सुगंध सुमनकी
 लखि बन मुख समुदाय कन्हारै ❀ हरषि रास रुचि मन उपजाई
 तब कर लई सकल गुण जुरली ❀ ललित योग मायासी मुरली
 नाद ब्रह्म की उतपति जासों ❀ निगम अगम उपजै पुनि तासों
 विश्व बिमोहन मंत्र कलासी ❀ हरिमुखकमल लसति कमलासी
 राग रंग रस रास विलासी ❀ सकल गुणन में आनँदरासी
 श्याम अधर धरि ताहि बजाई ❀ त्रिभुवन मन सुनि धुनि छविछाई
 धरणि पताल जीव सब मोहे ❀ नभ सुरगण सुर सुनत विमोहे
 चकित चन्द्र चल मार्ग भूले ❀ वरषत अमृत कनक अनुकूले

दो० शिवबिरंचिसनकादिमुनि, तजितजिब्रह्मसमाधि ।

भये नाद सुरली मगन, चकित श्रवण रहेसाधि ॥

सो० रहे सबै मन भूल, सिध चारण गंधर्व सुर ।

तन सुधिरही न मूल, सुनि सुरली नंदनंदकी ॥

थकितपवन गतिगवन भुलानी ❀ रह्यो प्रवाह नदिन थकि पानी
 झरना झरहि पषाण कठोरा ❀ नाचि उठे चहुँ दिशि बन मोरा
 थकित विलोकत मृग सब ठाढ़े ❀ खग रहे मौन मनहुँ लिखि काढ़े
 रहीं धेनु तृण गाहि मुख माहीं ❀ थकित वत्स पय पीवत नाहीं
 सरकिसकत नहिं अहि धुनिमोहैं ❀ उकठे विट्प हरित सब सोहैं
 तरु बेली सब चंचल पाता ❀ नव अंकुर दल प्रफुलित गाता
 सुनि धुनि शेष नाग अनुरागे ❀ नाग सकल सोवत ते जागे
 जड़ चेतन गति भइ बिपरीता ❀ हरिमुख मुरली सुनत पुनीता
 जे नर नारि तिहूँ पुर माहीं ❀ भये नाद बस तन सुधि नाहीं

सुनि धुनि चकित भई अतिभारी ❀ जे ब्रजसुन्दरि गोपकुमारी
यदपि मुरलि धुनि त्रिभुवन परसी ❀ तदपि यथाविधि तिन हीं दरसी
या रस की तेई अधिकारी ❀ नंदनंदन पियकी अति प्यारी
दो० सुनतहि बौरी सी भई, बिसरीं सबै सयान ।

लगीं ठगोरी सी मनहुं, मुरली की धुनि कान ॥

सो० रह्यो न उरमें धीर, बाजी बाजी कहि उठीं ।

आकुल बिकल शरीर, सुनि मुरली ब्रज की तरुणि ॥

षट्दश सहस गोपिका गोरी ❀ मुरली सुनत भई सब भोरी
कोउ धरणी कोउ गगन निहारैं ❀ कोउ मनहीं मन बुद्धि बिचारैं
घर घर तरुणि सबै बित तानी ❀ आरज पथ गृह काज भुलानी
लै लै तिनके नाम बजावैं ❀ मुरली में हरि सबन बुलावैं
रहि न सकीं धुनि सुनि अकुलाई ❀ जो जैसे तैसेई धाई
लोक लाज गुरु जन डर डायो ❀ चलीं सकल गृह काज विमायो
काहू दूध उफन ते छांड़े ❀ काहू दधिहि जमावत भांड़े
काहू करति रसोई त्यागी ❀ कोऊ पतिहि जिमावत भागी
बालक गोद संभार न लीनो ❀ दूध पियावत ही तजि दीनो
कोउ शृंगार करत उठि धाई ❀ उलटे भूषण बसन बनाई
बाजूबन्द पगन सों बाँधे ❀ लै मञ्जीर उरन में साँधे
किंकिणि डार लई गर माहीं ❀ हार लपेटत कर सों जाहीं

दो० शीश फूल करणन धरे, करणफूल धरे भाल ।

चलीं सकल मुरली सुनत, बिभ्रमताकी बाल ॥

सो० अंजन करि दृग एक, एक रह्यो अंजन बिना ।

रह्यो न कछु बिबेक, भई बिबश मुरली सुनत ॥

मुरली सों हरि ढेर बुलाई ❀ उपजी प्रीति सकल उठि धाई

मुरली धुनि मारग गाहि लीनो ❀ और कलू उर शोच न कीनो
 प्रेम स्वरूप सकल ब्रजनारी ❀ पञ्च भूत अवगुण ते न्यारी
 रोंकि रहे सुत पति पितु माता ❀ ते किमि रुकहिं अगम यह वाता
 चलीं ध्यान धरि हरि उरमाहीं ❀ गृह वन कुञ्ज रुकीं कहुँ नाहीं
 जो प्रारब्ध करम बश कोई ❀ राखी रोंकि पतिन गृह सोई
 भयो विरह दुख तिनको ऐसो ❀ कोटिन जन्म कर्म फल जैसो
 पुनि धरि ध्यान हरिहि उर लायो ❀ कोटि स्वर्ग फल मानहुँ पायो
 यों करि भोग त्याग तन वाला ❀ दिव्य देह धरि मिलीं गोपाला
 इहिविधि वन सब चलीं किशोरी ❀ लोक वेद मर्यादा तोरी
 आतुर निकसि चलीं सब ऐसे ❀ जरत भवन तजियत है जैसे
 एक एक की सुधि कलू नाहीं ❀ भुगडन चलीं श्याम पहुँ जाहीं

दो० गृह गुरुजन तजि लाजतजि, ब्रजसुन्दरी निकाय ।

मुरलीधुनि रसरँगरंगी, मिलीं श्याम वन जाय ॥

सो० नटवर बपु गोपाल, अधर सधर मुरली धरे ।

सम्मुख सब ब्रजवाल, देखि दरश आनंद भरीं ॥

ब्रजयुवतिन लखि मुदित बिहारी ❀ मोर मनहुँ छवि घटा निहारी
 कनक वरण शशि मुख सब वाला ❀ पहुँचीं निकट जाय नँदलाला
 विपिन सुहावन अति छवि वाढ़ी ❀ भई जाय सम्मुख सब ठाढ़ी
 रहे चकित हरि छवि अवलोकी ❀ अटपट तन शृङ्गार विलोकी
 अद्भुत रूप देखि मुख पायो ❀ मनहीं मन अति हर्ष बढ़ायो
 अति आदर करि कुँवर कन्हवाई ❀ बोले मन्द मधुर मुसकाई
 वाके वचन प्रेम रस साने ❀ प्रेम प्रतीत कसौटी साने
 कहौ अहो तिय ब्रजकुशलाई ❀ निशि काहे वनको उठि धाई
 अर्द्धराति कलू डर नहिं कीनो ❀ ऐसो कहा काज मन दीनो

यह तुम भली करी कछु नाहीं ❀ निज पति तजि धाई बन माहीं
 बेद पंथ निदख्यो तुम भारी ❀ जाहु अजहुँ घर बेगि सबारी
 यह सुनिकै गुरु जन दुख पै हैं ❀ बहुरो तुम को त्रास दिखै हैं
 दो० निजपतितजिपरपतिभजै, तिय कुलीननहिं होय ।

मरे नरक जीवन जगत, भलो कहै नहिं कोय ॥

सो० युवतिन को पति देव, कहत बेद हमहुँ कहत ।

करहु तिनिहिं की सेव, जो तुम चाहत सुख लह्यो ॥

और कछू जिय में जनि राखो ❀ करिये बेद बचन जो भाखो
 तजि कै कपट करहु पतिसेवा ❀ तिय को पति तजि और न देवा

कूर कुपूत भाग्य बिन रोगी ❀ बृद्ध कुरूप कुबुद्धि बियोगी
 ऐसेहु पति को तिय जो त्यागै ❀ बड़ो दोष ताके शिर लागै

ताते मानहु कही हमारी ❀ जाहु सकल घर को ब्रजनारी
 मात पिता तुम्हरे धौं नाहीं ❀ ऐसे कहि कहि हरि पछि ताहीं

कैसे उन तुम आवन दीनी ❀ कैसी धौं यह बिधि तुम कीनी
 कै धौं कहि आई उन पाहीं ❀ कै धौं वे कछु जानत नाहीं

नव यौवन तुम सब सुकुमारी ❀ निशि बसिबो बन अनुचित भारी
 जो यह बात सुनै ब्रज कोऊ ❀ हमें तुम्हें दूषण दिशि दोऊ

अब ऐसी कीजौ मति कबहुँ ❀ करि बिचार देखौ मन तुमहुँ
 बार बार युवतिन भरमाई ❀ ऐसे सब सों कहत कन्हवाई

दो० निठुरबचन सुनि श्यामके, युवति उठी अकुलाय ।

चकित भई मन गुनिरहीं, मुख कछु बचन न आय ।

सो० बदन गयो मुरभाय, जनु तुषार कमलन पख्यो ।

शोचिरहीं शिरनाय, सोई निधि जनु पाय कै ॥

बिह बिफल चिंता अति बाढ़ी ❀ रहीं चित्र पुतरीसी काढ़ी

कपट खेल यह गिरिधर ठान्यो ❀ प्रेम विवश युवतिन नहिं जान्यो
 मनही मन बिहँसत नँदलाला ❀ भई विरह व्याकुल ब्रजवाला
 सहि नहिं सकीं दुसह यह पीरा ❀ वोलीं गदगद गिरा अधीरा
 सुनहु श्याम सुन्दर वरनायक ❀ यह जनि कहौ नाहिं तुम लायक
 कोमल सुभग कमल मुख तातैं ❀ कैसे कहत कटुक ये बातैं
 लै लै नाम बुलायो सब को ❀ धरम सिखावत हौ अब हमको
 छाँड़ि देहु पिय यह चतुराई ❀ करहु देव जेहि भांति बुलाई
 कर्म धर्म श्रुति नाहिं बखाने ❀ जो कोउ कर्म धर्म विधि जाने
 हम तो लोक बेद विधि त्यागी ❀ चरण कमल तुम्हरे अनुरागी
 सकल धर्म यह चरण तिहारे ❀ बसत सदा सो हृदय हमारे
 कहवावत हौ अन्तर्यामी ❀ काहे यह सम तुमहीं स्वामी

दो० अबयहतुमकोउचितनहिं, सुनहुश्यामसुखराश ।

मन हमरो अपनाइकै, हम को करत निराश ॥

सो० पाप पुण्य कह नाथ, यह तौ हम जानैं नहीं ।

बिकीं तुम्हारे हाथ, अधरामृत के लोभ लागि ॥

अरु यह मृदु मुसुकान हमारी ❀ सकल धर्म की मोहन हारी
 ऐसी को तिय ब्रज के माहीं ❀ जाको मन इन मोह्यो नाहीं
 जैसिय मुरली मिली सहाई ❀ जिन विधि की मर्याद मिटाई
 अब तो मृदु मुसुकन मनमाहीं ❀ पाप पुण्य जानत नहिं काहीं
 हम तो पति यक तुम को जानैं ❀ धृक जो और दूसरो मानैं
 कोटि करो अब भवन न जाहीं ❀ तुम तजि हमहिं और प्रिय नाहीं
 जानत हौ सब अन्तर्यामी ❀ काहे यह समुक्त नहिं स्वामी
 मन बच कर्म तुम्हारी दासी ❀ मृदु मुसुकान तुम्हारी प्यासी
 जस्त सकल बिरहानल ज्वाला ❀ सींचहु अधरामृत नँदलाला

दीन कृपानिधि नाम तुम्हारो ❀ हमते दीन न और विचारो
मृदु मुसुकान दान अब दीजै ❀ दारिद बिरह दूर पिय कीजै
जो नहिं मानत बिनय हमारी ❀ तो यह तन करि हैं बलिहारी
दो० बिरहविकल लखि गोपिकन, कृपासिंधु भगवान् ।

उमँग उठे दृग भरिलिये, दीन बचन सुनि कान ॥

सो० धनि धनि धनि ब्रजबाल, कहत मनहिं मन हर्षि उर ।

सदय हृदय गोपाल, बोले दुहुँ कर जोरि तब ॥

बोले प्रभुता डारि गोपाला ❀ धन्य धन्य तुम ब्रज की बाला
तुम सम्मुख मैं विमुख तुम्हारो ❀ दूर करो यह दोष हमारो
मैं निर्दय बहु बचन बलाने ❀ तुम अपने जिय एक न आने
मो कारण गृह कुटुंब विसारो ❀ धनि धनि धनि यह नेम तुम्हारो
लोक लाज शंका सब त्यागी ❀ मन बच क्रम मोसों अनुरागी
यों कहि बिहँसि मिले नँदलाला ❀ अंकम भरि लीनी सब बाला
यदपि अकाम सदा सुखरासी ❀ तदपि भये रस प्रेम विलासी
एकहि बार युवति सब भेटी ❀ दुसह ताप बिरहानल मेटी
कह्यो बिहँसि सबसों गिरिधारी ❀ करहु रास रस मिलि सुखकारी
कृपादृष्टि अवलोकत नयनन ❀ हँसि हँसि सींचत अमृत बयनन
चहुँ दिशि हर्ष भरीं सब ग्वारी ❀ मध्य श्याम सुन्दर बनवारी
बिहस्त बन बिहार सुखदाई ❀ नवल गोपिका नवल कन्हाई
दो० हँसत करत बहुरस चरित, युवति बृंद लिये संग ।

गये यमुन तट श्याम तब, क्रीड़त कोटि अनंग ॥

सो० सोहति अति कमनीय, कोमल उज्ज्वल रेततहँ ।

करी परम रमनीय, यमुनाजी निजपाणि रचि ॥

बहत समीर त्रिविध सुखदाई ❀ कुसुम धूरि धूंधरि अविछाई

उड़त सुगंध लपट चहुँओरा ❧ गुंजत भँवर चारु चितचोरा
 बैठे तहां श्याम सुख सागर ❧ कोटि काम मन मथन उजागर
 करत विलास हास रस लीला ❧ कोटि अनंग रंग सुख शीला
 परि रंभन चुंबन कुंच परसन ❧ हिय हुलास आनंद रस वरसन
 काम भाव गोपिन हरि ध्यायो ❧ कियो सवन के मनको भायो
 अस अद्भुत रस प्रेम बढ़ायो ❧ बहुरि रास रस रंग उपजायो
 मुनि पिय वचन सकल अनुरागी ❧ भूषण वसन सँभारन लागी
 लखि उलटे भूषण सकुचानी ❧ निरखि परस्पर पिय मुसकानी
 नवसत साजि भई सब ठाढ़ी ❧ परम प्रेम आनंद रस वाढ़ी
 बंशीबट छवि धाम अनूपा ❧ कोटि कल्प तरु सम सुखरूपा
 तहां रच्यो रस रास कन्हारै ❧ भइ कपूर मय भूमि सुहारै

छं० भई भूमि कपूर मय रज वर्षि जल कुमकुम सिंची ।
 परम कोमल सुभग शीतल ज्योतिमणि कंचन खिंची ॥
 हरषि तहँ घनश्याम सुन्दर रासमंडल विधि रची ।
 बरणि कापै जाय सो छवि निरखि शारदगाति लची ॥
 एक एकहि युवति के बिच मधुर मूरति श्याम की ।
 तिनमध्य जोरी रासनायक राधिका घनश्याम की ॥
 एक रूप अनेक बपु धरि सवन के बिच राजहीं ।
 करी यह लीला प्रकट प्रभु परम कोउ न जानहीं ॥
 भई सकल करजोरि ठाढ़ी जात नहिं मुख छवि भनी ।
 सहस बत्तिसउदितशशि मनु मध्यघन दामिनि बनी ॥

दो० तेहि अवसर ललना सहित, आये सुरमुनि सर्व ।

देव नटी किन्नर बधू, तुम्बुरादि गन्धर्व ॥

सो० देखत चढ़े बिमान, हरषि हरषि वर्षत सुमन ।

करत मुदित मन गान, धन्य धन्य ब्रज युवति कहि ॥

सुर गण सबै निशान बजावैं ❀ निरखति ब्रज सुन्दरि छबि पावैं
नूपुर कङ्कण किङ्किणि बाजैं ❀ मन्द मधुर मुरली सुर गाजैं
ताल मृदंग बीन मुरचंगा ❀ सुर मण्डल सारंग उपंगा
तन्त्र अनेक बिबिध गति बाजैं ❀ मिले एक सुरसों सब साजैं
निर्तत पिय सँग चञ्चल बाला ❀ जनु कीड़त घन दामिनि जाला
बिच बिच श्याम बीच ब्रज गोरी ❀ मरकत मणि कञ्चन की जोरी
सुभग तमाल तरुण नँदलाला ❀ कनक लता सम सब ब्रजबाला
करसों कर जोरे छबि छाजैं ❀ कोटि काम छबि निरखत लाजैं
बृन्दावन उर मनहुँ विशाला ❀ लसत रासमण्डल की माला
हरि ब्रजनारि परस्पर सो हैं ❀ कोटि काम रति के मन मोहैं
मठकि चलत गति नागर नटकी ❀ लटकन मुकुट लटक घूंघुट की
जनु नवघन दामिनी बरूथा ❀ निरखि नचत मोरन के यूथा

छं० नचत मानौ मोर यूथन मुकुट लटकन यों फवै ।
चलति गति लै नागरिन सँग श्याम नटनागर जबै ॥
धरणि पग पटकनि भ्रष्टकि कर भौह मटकन कहि परे ।
श्रीव चालन हलनि कुण्डल करजु फेरन मन हरे ॥
मणि कण्ठ मुक्तामाल उर बनमाल चरणनलों बनी ।
बदनपंकज अलकश्रमकण भलक छविसकै कोभनी ॥
पटपीत फरकत काछनी कटिलाल किंकिणि सोहई ।
मलय चित्रित बाहु भूषण श्याम तन मन मोहई ॥
लखि रहत नँदलाल तिय छबिबिबिधबिधिबेणीगुही ।
सुभग पायी मांग मुक्ता शीश फूलन छबि रही ॥
जडित भाल जराव बेंदी उदित द्युति भ्रूबंक की ।

ललित बेसर नाक अंजन नैन श्रुति ताटंककी ॥
अधरदशन कपोल चिबुकन कण्ठ भूषण अतिबने ।
करत रास विलास अद्भुत हरत मनमोहन बने ॥

दो० कबहुँ ललितगति लै चलत, नवलसुधरनंदनन्द ।
निरषि हरषि तैसेइ चलत, नवल नागरीबृन्द ॥

सो० कबहुँ विचक्षण बाम, लटकिलेति नूतन गतिहि ।
रीभरसिक घनश्याम, तापर तन मन वारहीं ॥

निर्तत अस परस पिय प्यारी ❀ बोलत बलिहारी बलिहारी
कोउ कल धुनि पियके गुण गावैं ❀ कोउ अभिनय करि भाव बतावैं
कोउ संगीत कला गुण धारी ❀ कोउ उधटत चटकत करतारी
निर्तत ताल भेद गति लीनी ❀ सुधर एक ते एक प्रवीनी
जात रसिक पिय बिक बिन मोलैं ❀ जब थेइ थेई थेई बोलैं
तान तरंग रंग उपजावैं ❀ लेत उपज अतिरस बर्षावैं
कबहुँक उधटत बैल कन्हाई ❀ फिरत लुब्ध जिमि बाल सुहाई
गिरत मणिन के भूषण तन तैं ❀ भरत फूल जनु रूप लतन तैं
लटकि लटकि निर्तत अलबेली ❀ ग्रीव ग्रीव मंजुल भुज मेली
कोउ पियके सँग मिलि करि गावैं ❀ कोउ मुरली को ब्रीन बजावैं
काहुहि श्याम लेत भुज भरिकै ❀ तजैं कमल मुख चुंबन करिकै
रमत रास पियसंग ब्रवीली ❀ परम प्रेम रस रंग रंगीली

बं० रसरंग रंगीली प्रेम के बर रासरस पिय सँग करैं ।
निशखि देव प्रमून बरषहिं हरषि उर आनंद भरैं ॥
धन्य ब्रजधनि बालब्रज की धन्य बन पुनिपुनि कहैं ।
करत रास विलास पूरण ब्रह्म जहँ परकट अहैं ॥
शम्भु अज सनकादिनारद मुदित गुणगण गावहीं ।

निरखि छबिनिधिश्यामश्यामा ब्रह्ममुख बिसरावहीं ॥
 देवनारि बिसारि पति गति परस्पर कहि शोचहीं ।
 ब्रजबधू बिधिहम न कीनी निरखिमुख मन लोचहीं ॥
 कह भयो ऊरधवसीं अरु अपर पदवी जो लहीं ।
 करति मुख जो श्यामसँग ब्रजनारिसो त्रिभुवन नहीं ॥
 बार बार मनाय बिधना कहति यह बर दीजिये ।
 होयँ दासी ब्रजबधुन की कृष्ण पद रति कीजिये ॥

दो० धनिधनि कहि वर्षहिं सुमन, मुदित सकल सुरनारि ।
 धनिमोहन धनि राधिका, धनि ब्रज गोपकुमारि ॥

सो० धनिधनि रासबिलास, धनि सुन्दरता धन्य सुख ।
 धनि वृन्दावन बास, सुर ललना बिथकीं कहति ॥

रमत रास रस गोपकुमारी * नंदनंदन पियकी सब प्यारी
 करति गान कोकिला लजावैं * हाव भाव करि पियहि रिझावैं
 राग रागिनी समय सुहाये * सहज बचन जिनके मन भाये
 गति सुगंध निर्वृत सब गोरी * सहज रूपनिधि नवलकिशोरी
 पग महि पटक भुजन लटकावैं * फंदा करन अनूप बनावैं
 निरखि लेत उपजति छवि भारी * रीझ रहत लखि छवि गिरिधारी
 बेनी छुटी लटैं बगराहीं * अलकैं बेसरि सों उरझाहीं
 श्रमजल बिंदु बदन श्रुतिकारी * मनहुँ सुधाकण चंदमँझारी
 अति बश होत निरखि मनमोहन * फिरत सबनके गोहन गोहन
 नारि नारि प्रति रूप प्रकासैं * एक एक हिल बनको भासैं
 अद्भुत कौतुक प्रकट दिखायो * कियो सबनके मनको भायो
 निर्वृत अंग थकित भई नारी * रूप प्रेम गुण परम उजारी
 छं० भई निर्वृत थकित तरुणी रूप गुणन उजागरी ।

उमंगि तब उर लाय लीनी श्याम लखि नवनागरी ॥
 गिस्त उरते हार टूटे निरखि प्रभुहिं जनावहीं ।
 लेति बीचहि गहि तिन्हैं महिमांभ परन न पावहीं ॥
 अति प्रीति श्रमजल पीतपट्सों पोंछि पवन डुलावहीं ।
 उरभि बेसरिसों रहीं लट कमलकर सुरभावहीं ॥
 देखि बिह्वल गात भूषण शिथिल अंग सँवारहीं ।
 कहि बचन मृदुता परमते निज पाणि श्रमहिं निवारहीं ॥

दो० ऐसी बिधि ब्रज सुन्दरिन, देत परमसुख श्याम ।
 लखिपतिगतिस्वाधीन अति, भई गर्विता वाम ॥

सो० परम प्रेमकी खान, रूप शील गुण आगरी ।
 क्यों न करैं अभिमान, जिनके बश त्रिभुवनधनी ॥

कहति भई निज निज मनमाहीं ❀ हमसम और युवति जग नाहीं
 अब गिरिधर हम बश करिपाये ❀ कहत हमारे मनके भाये
 अब हमते नहिं द्वैहैं न्यारे ❀ रहिहैं सदा समीप हमारे
 जोई हम कहि हैं स्वइ करिहैं ❀ सदा हमारे संग विचरिहैं
 कोउ पिय अंग भुजन को दीनो ❀ कहति बचन यों गर्वहि लीनो
 सुनो श्याम मैं अति श्रम पायो ❀ अब तौ मोपै जात न गायो
 एक कहति मम पाँय पिराहीं ❀ मोपै नृत्य होत अब नाहीं
 एक कंठ भुज मेलि सयानी ❀ रही लटकि बोलति नहिं बानी
 ऐसे भाव गर्ब के कीन्हे ❀ अंतर्यामी सब हरि चीन्हे
 गर्ब देखि मोहन मुसकाने ❀ मैं अविगति मोको नहिं जाने
 करत सदा भक्तन मन भाई ❀ एक गर्ब श्यामहिं न मुहाई
 सो युवतिन के मन में जानी ❀ दूरिकरनहित यह जिय आनी
 दो० प्रेम अभूषण कनक सब, मलिन गर्ब तैं होय ।

बिरह अग्नि ताये बिना, निर्मल होय न सोय ॥
 सो० यह बिचार जिय आन, लैष्टभानुकुमारि संग ।
 कै गये अन्तर्द्वान, ब्रजवासी प्रभु संग ते ॥

अथ अन्तर्द्वानलीला ॥

प्रेम बढ़ावन हित सुखदाई ॥ अंतर करि बन दुरे कन्हाई
 गोपिन जब हरि देखे नाही ॥ चकित भई तब सब मन माहीं
 कहति एक कित कुँवर कन्हाई ॥ उठी सकल जहँ तहँ अकुलाई
 भई बिकल कछु मरम न पायो ॥ पाय महाधन मनहुँ गँवायो
 खोजत जहँ तहँ दृष्टि पसारै ॥ अति आतुर चहुँ ओर निहारै
 तब सबहिन मिलि के यह जानी ॥ लैगइ हरिको कुँवरि सयानी
 कछु हर्ष कछु रिस उरधारी ॥ देति भई हँसि रसकी गारी
 इन समान कपटी कोउ नाही ॥ करत सदा दुविधा हम पाहीं
 चलहु खोजि कुञ्जन में लैहैं ॥ जान कहां हमतें बन पैहैं
 दूँदन चली सकल बन माहीं ॥ चरण चिह्न खोजत सब जाहीं
 देखति जहँ तहँ फिरति अधीरा ॥ कोउ बन घन कोउ यमुनातीरा
 कोउ कुंजन कोउ पुंजन हैरैं ॥ श्याम श्याम करि कोऊ ठैरैं

दो० इहि बिधि सब खोजति फिरैं, बिरहातुर ब्रजबाल ।

भई बिकल पावत नहीं, कहुँ खोजत नैदलाल ॥

सो० यदपि कियो हरि ख्याल, नेकु दुरे बन कुंजमें ।

तदपि भई बेहाल, युवति श्याम देखे बिना ॥

पलकांतर बिधिको दिन जिनको ॥ बन अंतर अति बड़ दुख तिनको
 भई बिरह व्याकुल चित जवहीं ॥ हरि पद चिह्न लखति भई तवहीं
 कुलिश कमल ध्वज अंकुश जामें ॥ जगमगात बन घन महि तामें

निकट चिह्न प्यारी चरणन के ❀ अरुण कमल दल हैं वरणन के
 बंदन करन लगीं रज जोई ❀ शिव विरंचि याचत हैं सोई
 कहु यक धीर धखो मन माहीं ❀ खोज लेति ताही मग जाहीं
 कुँवर कन्ह प्यारी सँग लीने ❀ फिरत सकल कुञ्जन रस भीने
 कबहुँ कुसुम बन माल बनावैं ❀ निरखि हरषि प्यारिहि पहिरावैं
 कबहुँ सुमन सँवारत बेणी ❀ परम सुभग शोभाकी श्रेणी
 कबहुँ सरोज सुगंध सुँघावैं ❀ नागरि मन अभिलाष बढ़ावैं
 कण्ठ कण्ठ भुज दोऊ जोरैं ❀ धन दामिनि छूटति नहिँ छोरैं
 अति प्यारी के रस बश मोहन ❀ भौंह निहारत बोलत मोहन

दो० अतिहितलखि अनुकूलअति, हरीलाडिलीहीय ।

तामें उपज्यो गर्ब जिय, मैं अति प्यारी पीय ॥

सो० एक प्राण है देह, तहां गर्ब कहूँ पाइये ।

यामें नहिँ संदेह, देह धरे को भाव यह ॥

तव प्यारी के मन यह आई ❀ मेरे ही बश कुँवर कन्ह आई
 मेरे हित बांसुरी बजाई ❀ मेरे हित सब तियन बुलाई
 मेरे हितहिँ रास उपजायो ❀ सबही तजि मोसों मन लायो
 मो सम सुंदरि चतुर उजागरि ❀ और नहीं युवती कोउ नागरि
 ऐसे गुणति मनहिँ मन माहीं ❀ ठठकि रहति गहि पियकी बाहीं
 बैठि जात कबहुँ मग माहीं ❀ कहति कि मेरे पायँ पिराहीं
 चलन कहत तुम जहां कन्ह आई ❀ मोपै पगन चल्यो नहिँ जाई
 नृत्य करत मैं अति श्रम पायो ❀ तातें पग नहिँ जात उठायो
 सुनहु मित्र मोहन सुखदाई ❀ कंध लेहु पिय मोहिँ चढ़ाई
 ऐसे तिय जब वचन बखाने ❀ गर्व जानि गिरिधर मुसकाने
 जहां गर्व तहँ रहत न कबहीं ❀ अन्तर्द्वान भये हरि तबहीं

तुरतै बिकल भई अति प्यारी ❀ देखत दुरे चरित गिरिधारी
दो० चकित भई तब नागरी, गये कितै भजि श्याम ।

मनहीं मन पछतात अति, भूली तन सुधि बाम ॥

सो० मैं कीनो अभिमान, नारि बुद्धि ओछी सदा ।

वे पिय परम सुजान, जान लई मो जीव की ॥

भई बिकल समझति निज करणी ❀ सो वह दशा जाय नहिं बरणी

बिरह बिथा बाढ़ी अति तनमें ❀ परम अकेली रोवति बन में

नैन सलिल भीजत तन सारी ❀ कासि कासिपिय कहति पुकारी

हा हा नाथ अनाथ न कीजै ❀ बेगि श्याम मोहिं दर्शन दीजै

मैं तुम कृपा पाय गरबानी ❀ ताते सखी समार न बानी

सो अपराध क्षमा अब कीजै ❀ यह दूषण मनमाहिं न दीजै

बेगि कृपाकरि मिलहु दयाला ❀ अहो कमलदल नैन रसाला

बिरह बिकल यों बहत अकेली ❀ रोवत सुन खग मृग हुम बेली

तहँ खोजति आई सब नारी ❀ दूरिहि ते देखी तिन प्यारी

मुख शशि ज्योति रूपकी रासी ❀ जनु घनते बिछुरी चपलासी

हुम शाखा अबिलंबिन ठाढ़ी ❀ रुदन करति बिरहा दुख बाढ़ी

ब्याकुल चकित चहँ दिशि जोवैं ❀ कमल चरण नख भूमि करोवैं

दो० जित तित तें धाई सबै, ब्रज सुन्दरि अकुलाय ।

ब्याकुल लखि अतिलाड़िली, लीनी कंठ लगाय ॥

सो० कहां गये गोपाल, बार बार बूझत सबै ।

मुखित तन भइ बाल, मुखते बचन न आवई ॥

देखि दशा सब तिय अकुलानी ❀ बैठारी अंकम गहि पानी

कहु राधा क्यों बोलति नाहीं ❀ काहे मुखि परी महि माहीं

या बन में कैसे तू आई ❀ कहां गये तजि तोहिं कन्हाई

निरखि बदन सबहिन मुख कीनों ❀ मानहुं अमिनिधि अमृत दीनों
 कोऊ लगी सँवारन अलकैं ❀ कोऊ अंचरते पोछति पलकैं
 नैन नीर कछु सुधि नहिं देही ❀ अतिव्याकुल बिन श्याम सनेही
 बूझति युवति कहां बनवारी ❀ चलिये तहां तोहिं लै प्यारी
 मुनत नाम पियको अनुरागी ❀ बिरह मोह निद्रा ते जागी
 जान्यो आये कुँवर कन्हाइ ❀ नैन उधारि मिलन को धाई
 जो देखै तौ सब ब्रजबामा ❀ अतिही बिलखि उठी तब श्यामा
 कहति मोहिं त्यागी नँदनन्दन ❀ तुमहुं नहीं मिले जगबंदन
 मैं अपने जिय गर्ब भुलानी ❀ नहिं उनकी महिमा कछु जानी

दो० बोली पियसों मंदमति, मैं अभिमान बढ़ाय ।
 लीजैकंध चढ़ाय म्वहिं, मोपै चलयो न जाय ॥

सो० वे प्रभु परमसुजान, बिहँसि कह्यो म्वहिं चढ़नको ।
 कै गये अन्तर्धान, अपनी चूक कहा कहौं ॥

गये श्याम धौं कित बन माहीं ❀ मेरी दृष्टि परे कहुं नाहीं
 कहति बिकल नैनन जल ढारी ❀ मोको त्यागि गये गिरिधारी
 मुरझि परी धरणी अकुलाई ❀ श्यामबिरहदुख सह्यो न जाई
 देखि दशा व्याकुल सब नारी ❀ कहति निठुरी अति बनवारी
 त्रिया पुरुषसों मान जु करहीं ❀ पुरुष नहीं ऐसी उर धरहीं
 देखहु श्याम तजी हम कैसे ❀ नाहिं बूझिये उनको ऐसे
 कहति राधिका सों ब्रजनारी ❀ मिलिहैं श्याम धीर धरु प्यारी
 चलीं आप खोजन सब बन में ❀ बिरहबिकल कछुसुधि नहिं तनमें
 ऐत जहँ तहँ घोसकुमारी ❀ अहो रासपति कुंजबिहारी
 कहां दुरे पिय हमते भजिकैं ❀ तुम बिन प्राण जातहैं तजिकैं
 क्षमा करौ प्रभु चूक हमारी ❀ मिलहु कृपा करि बेगि मुरारी

तुम बिन हम को सुनहु कन्हई ❀ क्षण क्षण कल्प समान बिहाई
दो० जरतसकल तुम दरश बिन, बिरहअग्नि तन बाम ।

मंद मधुर मुसकान सुख, बरषि बुझावौ श्याम ॥

सो० सकलविश्व सुखधाम, गावत तुमको जगत सब ।

तिन्हैं होत कत बाम, जो दासी बिन मोलकी ॥

सदा हमारी रक्षा कीन्ही ❀ गरल अनल जल तैं रखलीन्हीं

अब कत निठुर होतहौ प्यारे ❀ बिरह जरावत गात हमारे

कतहि फिरत बन चरण उघारे ❀ गड़िहैं कुश कंटक अनियारे

तुम पद बसत हमारे हिय में ❀ ते कंटक शालत हैं जिय में

अहो नाथ यह जिय उर धारी ❀ सुख दैकै दुख देत मुरारी

ऐसे कहति सकल ब्रज डोलैं ❀ अलबल बचन बदनते बोलैं

अति अकुलाय गई बनमाहीं ❀ जड़ चेतन कछु समुझत नाही

बूझति बन बिटपन सों धाई ❀ तुम कहूँ देखे कुँवरकन्हई

अहो कदम अहो अम्ब तमाला ❀ हमहिं बतावो कित नँदलाला

अहो जुही मालती निवारी ❀ लखे कहूँ इत जात बिहारी

हे चम्पक हे श्रीफल कदली ❀ हे दाड़िम हे जामुन बदली

तुम देखे मनमोहन लाला ❀ श्याम कमलदल नैन विशाला

हे पलाश हम दासि तुम्हारी ❀ कहो कहां सुखराशि बिहारी

दो० हे अशोक हरि शोक तुम, सत्य करौ निजनाम ।

लेत नहीं यश हे पनस, क्योंन कहत कित श्याम ॥

सो० हे मंदार उदार, हे पीपर हरु पीर मम ।

कहि कित नन्दकुमार, सुन्दरघन तन सांवरो ॥

हे चन्दन तन जरत जुड़ावो ❀ नँदनंदन पिय हमहिं बतावो

हे अवनी चित चोर हमारे ❀ कित राखे नवनीत पियारे

तुमते दूर कहौ हरि नार्ही ❀ क्यों न मिलायदेत हमपाहीं
 कहिधौ कुंद मुकुंद कहां हैं ❀ हमको देउ बताय जहां हैं
 हे बट नट नागरहि बताओ ❀ कहूं निकट नंदमुवन दिखाओ
 कहुधौ मृगी मयाकरि हमको ❀ पूछति हम हा हा करि तुमको
 देखियत डहडहे नयन तुम्हारे ❀ तुम कहूं मोहनलाल निहारे
 हे दुख दवन पवन सुखकारी ❀ कहियत गति सर्वत्र तुम्हारी
 जहां होयँ बलबीर बिहारी ❀ कहति जाय किन व्यथा हमारी
 हे तुलसी तुम तो सब जानो ❀ क्यों नहिं हरिसौं प्रकट बखानों
 तुम तो सदा श्याम की प्यारी ❀ कहत नहीं यह दशा हमारी
 बोलत नहिं कोउ कहत तरुन को ❀ लै गये श्याम इनहुं के मनको

दो० इहिबिधि बनघन हूँदसब, ब्रजतिय विरहउदास ।

इत उत में फिर आवहीं, कुँवरि राधि का पास ॥

सो० मनहुं नीरबिन मीन, अतिव्याकुल तलफतपरी ।

श्यामबिरह अति दीन, कनक लतासी नागरी ॥

व्याकुल कहति सकल ब्रजबाला ❀ अजहं नहिं आये नंदलाला
 कहा करै अब कित को जैये ❀ श्याम बिना कैसे सुख पैये
 तब सब बहुरि यमुन तट आई ❀ जहां रसिक पिय रास रमाई
 बैठौ सब राधा दिग धामा ❀ कहन लगीं हरिगुणगण ग्रामा
 सब के दिग हरि सोहत कैसे ❀ दृष्टि वन्द करि नटवर जैसे
 युवाति नहीं कोउ उनको देखैं ❀ हरि सब ही की लीला पेखैं
 देखि देखि मन अति सुख पावैं ❀ परम रीति रसरीति बढ़ावैं
 करत चरित्र बिचित्र बिहारी ❀ सदा श्याम भक्तन सुखकारी
 विरह अग्नि तन गर्ब जरावैं ❀ निर्मल प्रेम भक्ति उपजावैं
 गोपीजन सब हरि की प्यारी ❀ नेक नहीं कहूं हरिते न्यारी

कहति श्याम ब्रज प्रकटे जबते * देत सवन को सब सुख तबते
तिन में हम सब उनकी दासी * क्यों हम तजि हरि भये उदासी
दो० व्याधहु ते करणी कठिन, हम तैं कीनी श्याम ।

बेणु बजाय बुलाय सब, बधत मृगीलों बास ॥

सो० कीजै कौन उपाय, मोहन मुख देखे बिना ।

मरति मसोसा साय, यह मन गीध्यो माधुरी ॥

सदा हमारे मन को भावै * तिखी चितवन चितहि चुरावै

जब अति बालक हते मुरारी * बाल विनोद किये सुख कारी

खेलत में बहु असुर सँहारे * विघन अनेकन ब्रज के दारे

अद्भुत चरित मनोहर कीनो * गिरिवर धर ब्रजको रखलीनो

हलधर सखन संग मुरली धरि * गोचारन बन जात जबहिं हरि

तब हमको बीतत दिन जैसे * जानत है हमरो मन तैसे

कुण्डल मुकुट केश भुँघारो * गोरज रंजित दृग अनियारो

पीतबसन बनमाल विशाला * बेणु बजावत मधुर रसाला

सखन मध्य गौवन के पाछे * चन्दन चित्र सुभग तन आछे

सांभ समय आवत जब देखैं * तब हम जन्म सुफल करिलेखैं

ऐसे कहत सकल ब्रजनारी * हरिगुण रूप कथा विस्तारी

समुझत कहत श्याम गुण रूपा * उपजीउर अति प्रीति अनूपा

दो० भूलि गई सुधि देह की, भयो बिरह दुख औन ।

केवल तनमय हैं गई, नहिं जानति हम कौन ॥

सो० भुंगी कीट समान, मगन ध्यान रस नागरी ।

बिसरो सकल सयान, भई आपुही कृष्ण तन ॥

लागीं करन चरित सब हरिके * पूरण प्रेम भई गिरिवर के

ये लीला उनहीं को सोहैं * नेक नहीं जानति हम को हैं

एक भई दधि चोर कन्हई ❀ एक पकरि गहि भुज लै आई
 एक यशोमति को बपु धरिकै ❀ बांधति है ऊखलसों हरिकै
 इक भई गाय एक गोपाला ❀ बोलति वैसेइ वचन रसाला
 कारी धौरी धूमरि कहि कै ❀ हटकति फिरति लकुट कर गहिकै
 कहती एक अमर गिरिधारी ❀ गाय गोप सब रहौ सुखारी
 कहति एक मूंदौ सब लोचन ❀ मैं करिहौं दावानल मोचन
 एक यमल अर्जुन तरु भंजै ❀ एक वकासुर वदन विभंजै
 एक बस्त्र को नाग बनाई ❀ तापर निरत करत हर्षाई
 एक दही को दान चुकावै ❀ इक त्रिभंग द्वै वेणु वजावै
 मगन भई सब या रस माहीं ❀ तन अभिमान रह्यो कछु नाहीं

दो० अंतर नेक रह्यो नहीं, भई श्याम ब्रजवाम ।

तब अंतर करिनहिं सके, भये निरंतर श्याम ॥

सो० प्रकट भये ततकाल, तिनहीं मधि नँदलाड़िले ।

सुन्दर नैन विशाल, गोपी जनबल्लभ सुखद ॥

प्रेम मगन अति आतुर ताई ❀ श्रीबृषभासु कुँवरि उर लाई
 देखि प्रकट दरशन गोपाला ❀ मिलीं धाइ आतुर ब्रजवाला
 ज्यों धनराशि परी कहूँ पावै ❀ लोभी जन लूटनको धावै
 लपटी एक धाय उरमाहीं ❀ एक मिलत ग्रीवा दे वाहीं
 कोऊ परी चरण पर धाई ❀ कोऊ अंग रही लपटाई
 कोऊ गहि कर पंकज लावै ❀ तपत बिरह की ताप सिरावै
 कोऊ लटकी गहि भुजा नवेली ❀ जनु शृंगार विटप छवि वेली
 कोऊ मुख छवि रही निहारी ❀ कोऊ रही चरण उर धारी
 कोऊ अंकम भरि कहत भले हरि ❀ एक पीत पट छोरि रही धरि
 हरि सों मिलीं लसति यों भामिनि ❀ जनु बन घन घेख्यो बहु दामिनि

कहुँ अंजन कहुँ कुंकुम रेखा ॥ कहुँ पानकी लीक सुबेला
युवतिन मध्य लसैं हरि प्यारे ॥ कृपादृष्टि सब ओर निहारे
दो० पुनि बैठे हरि हरषि तहँ, युवाति वृन्द चहुँ ठाम ।

सबके सम्मुख राजहीं, सुन्दर ब्रवि घनश्याम ॥

सो० बोले बिहँसि गोपाल, हँसत कियो यह ख्याल हम ।

कतहि भई बेहाल, तुम प्राणनते मोहिं प्रिय ॥

सकुची सुनि प्यारी यह बानी ॥ मन जान्यो नहिं प्रकट बलानी
कहि कहि कोमल बचन कन्हाई ॥ सबको दुख बाख्यो बिसरई
अति आनंद सबनको दीनों ॥ सुफल मनोरथ सबको कीनों
जाके साध हती जिय जैसी ॥ पूरण करी श्याम मन तैसी
भये कान्ह प्रीतम अनुकूले ॥ बढ़यो अनंद सकल दुख भूले
तब हरि सों सब नवलकिशोरी ॥ पूछन लगि बिहँसि कर जोरी
प्रेम प्रीति की रीति सुहाई ॥ हमें कहौ समझाई कन्हाई
इक जो प्रीति परस्पर कहिये ॥ एक एकही दिशितें लाहिये
एक दुहुन को मानत नाही ॥ ताको कहा कहत जग माहीं
उत्तम प्रीति कहावति जोई ॥ कहहु श्याम हम सों तुम सोई
हम अबला जानति कहु नाही ॥ तातें पूँछतिहैं तुम पाहीं
सुनि गोपिन के बचन रसाला ॥ भये प्रेम बश परम कृपाला

दो० यदपि जगत गुरु अजित प्रभु, जानराय ब्रजचन्द ।

प्रेम बिबश हारे तदपि, अपने मुख नँदनन्द ॥

सो० कहत भये तब कान्ह, सुनहु प्राणबल्लभ प्रिया ।

नहिं तुम समकोउ आन, निपुण प्रेमके पंथमें ॥

तद्यपि तुम पूँछति हौ जैसे ॥ प्रकट करौ लक्षण सब तैसे
एक जो प्रीति परस्पर होई ॥ स्वारथ हेतु करत सब कोई

जैसे पशू पशू को जानै ❀ आपुस में सब हित करि मानै
 सो वह प्रीति कनिष्ठ कहावै ❀ जासों सब संसार बँधावै
 दूजी प्रीति एक दिशि जोई ❀ करनि धर्म अधिकारी सोई
 जैसे मात पिता चित धरिकै ❀ रक्षत हैं सुतके हित करिकै
 सो वह मध्यम प्रीति कहावत ❀ उत्तम गति तातें जन पावत
 जो यह दोउन को नहिं जानै ❀ गुण दूषण कहु उर नहिं आनै
 तिन्हें सुनो मैं कहत वखानी ❀ कै कृतघ्न कै पुनि अज्ञानी
 उत्तम प्रीति जानिये सोई ❀ अनायास उपजत उर जोई
 दुहुं दिशि हठ कर प्रीति बढ़ावै ❀ नहिं निमित्त तामें कहु आँख
 अंतर नेक परै नहिं कोई ❀ प्रीति पुनीत जानिये सोई

छं० नहीं अंतर नेकु जामधि नीति उत्तम सो कही ।

करी मोसों तुम सबन सोइ मैं ऋणी तुम्हरो सही ॥

करहुं जो उपकार तुम प्रति कोटि कोटिन जगभरी ।

कबहुं होहुं न उच्छ्रण तुमतेँ हे प्रिया ब्रजसुन्दरी ॥

करै ऐसी कौन जैसी तुमन जो करणी करी ।

लोक बेद मर्याद ममहित तोरि तृणसम परिहरी ॥

करहु मनते दूर अब यह दोष मैं तुमते कियो ।

कियो अन्तर परमसुख में विरह दुख तुमको दियो ॥

दो० ऐसे प्रेमाधीन हैं, कहि कहि बचन रसाल ।

दूर करी युवतीन के, मन ते गांस गुपाल ॥

सो० बाढ़यो परमानंद, ब्रजबासिन प्रभु बचन सुनि ।

परम मुदित तियचन्द, प्यारी प्रिय नँदनंद की ॥

अथ महामंगल रासलीला ॥

सुनि पियके मुखकी रस बानी ❀ गोपीजन सब मन हरषानी

हँसि हँसि बहुरि लाल उर लाये ॥ मनते सब संदेह मिटाये ॥
 देखि सबनकी प्रीति कन्हई ॥ बहुरि रासरस रुचि उपजाई ॥
 वैसोइ मुख सबको उपजायो ॥ वही भाव सबके मन आयो ॥
 यह जान्यो सबहिन तबहींतें ॥ करत रासरस पिय सबहींतें ॥
 अंतर्धान चरित सब भूली ॥ वैसेइ आनंद के रस फूली ॥
 वहै रासमण्डल विधि जोरी ॥ बिच बिच श्याम बीच बिच गोरी ॥
 वैसेइ मधि नायक हरि राधा ॥ वहै परस्पर प्रीति अगाधा ॥
 वैसेइ मुरली श्याम बजाई ॥ वैसेइ थकित भयो उडुगई ॥
 वैसेइ सुर विमान नभ सोहैं ॥ वैसेइ सुर मुनि गंधर्व मोहैं ॥
 वैसेइ खगमृग नव डुम बेली ॥ वैसेइ यमुना पुलिन सहेली ॥
 वैसेइ पवन त्रिविध मुखदाई ॥ वही रासरस रूप निकाई ॥

छं० करै वैसेइ रासरस पुनि युवति अति छबि छाजहीं ।

गौर अंग किशोर बैस मुदेश मुख शशि राजहीं ॥

जोरि पंकज पाणि बाहु मृणाल मण्डल लाजहीं ।

मध्य सबके श्याम श्यामा रूपराशि बिराजहीं ॥

मुकुट कुण्डल बसन भूषण वरण अंगन राजहीं ।

अंग अंग अनंग रति लखि कोटि कोटिन लाजहीं ॥

चरण नूपुर किंकिणी कटि चलत नूपुर बाजहीं ।

वीन ताल मृदंग चंग उपंग सुर मुख साजहीं ॥

दो० अरस परस निरखत छबिहि, भरे प्रेम आनंद ।

नवल नागरी ब्रजबधू, नवनागर नंदनंद ॥

सो० रहे निरखि सुरभूल, सहित सुन्दरी मगन मुख ।

पुनिपुनिबरषत फूल, धन्यधन्य ब्रजकहि मुखन ॥

सोहाति हरि मुख मुरली कैसे ॥ करि दिगविजय नृपति वर जैसे ॥

बैठि पाणि सिंहासन गाजै ❀ अधरछत्र शिर ऊपर राजै
 चँवर चह्वाँदशि चिकुर सुहाये ❀ वेतपाणि कुण्डल छविझाये
 बलि बलि वरजत हैं सब काहू ❀ कहत निकट कोऊ मति जाहू
 दूरहि ते सब करत सुहारै ❀ सन्मुख आदर सहित निहारै
 मधुकर पिक बंदी गुण गावैं ❀ मागध वदन प्रशंसि मुनावैं
 मान महीपति बल मथि मान्यो ❀ युवतीयूथ जात गहि आन्यो
 विनहिँ पनच विनहीं कोदण्डा ❀ सुर सुर भेद कियो ब्रह्मण्डा
 ब्रह्मा शिव सनकादिक ज्ञानी ❀ बोलत हैं सब जय जय बानी
 नारि पुरुष जड़ जंगम जेते ❀ किये सकल अपने वश तेते
 थक्यो पवन जल अनल सिरानी ❀ विधिकृत मेदि आपनी जानी
 निज निज ठकुरायन की रेखा ❀ बाँचि सकल वश भये विशेषा

दो० रच्यो राजसू यज्ञरस, रास बिपिन शुभ धाम ।

तहँ अधिकारी सांवरो, मोहन सुन्दर श्याम ॥

सो० सबही को सुख देत, दान मान रस प्रेम को ।

बढ़यो माधुरी हेत, परमानंदित लोक सब ॥

गावत गोपी सँग सब जुरली ❀ बाजत मधुर मधुर सुर मुरली
 राग रागिनी प्रकट दिखावैं ❀ जे सब रूप अनूपम गावैं
 अति प्रवीण पियको मन मोहैं ❀ नृत्य करत सुन्दरि सब सोहैं
 नाचत कवहुं श्याम अरु श्यामा ❀ रीभत निरखि सकल ब्रजवामा
 लै गति चलत परस्पर दोऊ ❀ सो छवि वरणि सकैं कहैं कोऊ
 होड़ा होड़ी रंग बढ़ावैं ❀ तरापि लेत शोभा अति पावैं
 उरभी कुण्डल बेसरसों लट ❀ पीत वसन वनमाल रही सट
 उरभे मन मन बैनन बैना ❀ लटकीली छवि उरभे नैना
 नाचत युगल चपल गतिवारी ❀ प्रेम उरभ उरभे पिय प्यारी

उरझीं गोपीजन लखि शोभा ॥ नहिं निरवार सकल मन लोभा ॥
अति रस रंग बढ़यो सुख भारी ॥ थेइ थेइ बढ़ति सकल ब्रजनारी ॥
मगन सकल रस सिंधु निहारै ॥ रीझ रीझ तन मन धन दारै ॥

छं० मगन सब रसरास सुख निधि हरषि तन मन बारहीं ।
हिय हुलास न जाय कहि अबिराज युगल निहारहीं ॥
कियो युवतिन हेतु बारह मास सो पति पाइयो ।
तब मंत्र कीनों व्याह को सब सखिन मंगल गाइयो ॥
ललित कुंज बितान सुभग लतान मंडप द्युति बनी ।
बहु रंग बंदन माल चहुँदिशि चारु सुमनन अबि धनी ॥
अति विचित्र पवित्र यमुना पुलिन शुभ बेदी रची ।
वर्णन सकै अबि कौन बिधि तिहुँ लोक शोभा की सची ॥

दो० तहँ नंदनन्दन लाड़िलो, श्रीवृषभानु कुमारि ।
दूलह दुलहिनि राजहीं, शोभा अमित अपार ॥

सो० भरीं परम उत्साह, ललितादिक ब्रज सुन्दरी ।
प्रीति रीति की चाह, लागीं करन विवाह बिधि ॥

मोर मुकुट रवि मौर बनायो ॥ सो शिर धर गिरिवरधर आयो ॥
तन घनश्याम पीत पट सोहै ॥ घन दामिनि ताके ढिग कोहै ॥
बनमाला गर माहिं बिराजै ॥ निरखत इन्द्र धनुष द्युति लाजै ॥
ललित अंग तन भूषण जाला ॥ कुण्डल फलकनि नैन विशाला ॥
सकल कला गुण रूप निधाना ॥ त्रिभुवन सुन्दर परम सुजाना ॥
जाके मनमथ सैन बराती ॥ फूले बिटप सुमन बहुभांती ॥
करि कोलाहल पिक शुक बोलै ॥ मंजु मोर निरत संग डोलै ॥
नभ सुरपति दुन्दुभी बजावै ॥ नाचत किन्नर गन्धर्व गावै ॥
वरषत सुरगण सुमन सुहाये ॥ ब्रजतिय करति सकल मन भाये ॥

कुँवरि लाड़िली सुभग सँवारी ❀ गोरे अंग चूनरी कारी
नख शिख मणि भूषण छवि राजें ❀ मुखशोभा लखि उड़पति लाजें
प्रीति नीति जिहि हित करि गानी ❀ सो शुभ घरी विधाता बानी

छं० शुभ घरी सो बानी विधाता हेतु जिहि दृढ़ व्रत लियो ।

शरदनिशिपूनोबिमलशशिनिरखि अतिप्रफुलितहियो ॥

अधर मधु मधुपर्क कहिकै पाणिग्रहण सुविधि करी ।

पढ़त नभ विधि बेद बाणी सुरन जय धुनि उच्चरी ॥

तब अलिन हँसिकै गांठ जोरी प्रेम गांठ हिये परी ।

सहस सोरह संग सखियाँ फिरति भाँवरि रस भरी ॥

बढ़यो अति आनन्द उरमाधि साध सख पूरण भई ।

मदन मोहनलाल दूलह राधिका दुलहिनि नई ॥

दो० निरखि देव बरषैं सुमन, हरष न हिये समात ।

बृन्दावन रस रास सुख, लखि सुरबधू सिहात ॥

सो० हमसों यह सुख दूरि, कहत परस्पर सुरनगण ।

क्यों उड़ि लागै धूरि, धनि ब्रजबासी धन्यब्रज ॥

सोहति युवति बृन्द मधि जोरी ❀ नवनागर वर नवल किशोरी

शोभा अमित पार को पावै ❀ निरखत बनै कहत नहिँ आवै

दूलह श्याम दुलहिनी राधा ❀ रूप सिन्धु दोउ परम अंगाधा

रंग भीनी रंग भीने दोऊ ❀ अति आनन्द उमँगि सब कोऊ

प्रेम रंग भीनी ब्रजनारी ❀ निरखि युगल छवि होहिँ सुखारी

भरी प्रीति रस गारी गावैं ❀ लखि लखि पिय प्यारी सुख पावैं

हास विलास मोह उपजावैं ❀ वार वार दम्पति गुण गावैं

विविध भाँति दुन्दुभि नभ बाजैं ❀ निरत कला रम्भादिक साजैं

हंस मोर पिक चातक बोलैं ❀ बन मृग निकर संग सब डोलैं

वारति तिय भूषण हर्षाई ॥ बनके मृगन देत पहिराई ॥
तब इक सखी भई नँदराई ॥ इक वृषभानु रूप धरि आई ॥
अति हित मिले महर दोउ धाई ॥ तब बिनती वृषभानु सुनाई ॥

छं० तब जोरि कर वृषभानु बिनयो सुनहु श्री नँदराय जू ।
हम भये सकल सनाथ अब प्रभु कृपा तुम्हरी पाय जू ॥
अति बड़े पुण्य ते मिले तुम से सगे सुख के सिंधु जू ।
शिरमौर गोकुलचन्द आनँद कन्द सब जग बन्द जू ॥
तुम गेह मञ्जन हेत कन्या हम न तुम सम योग जू ।
निज दास करि सब जानिये वृषभानुपुर के लोग जू ॥
अष्टसिद्धि नवनिधि सम्पति सकल सुख के खान जू ।
ऐसे बिनय करि नन्द के चरणन गहे वृषभानु जू ॥
तब नन्द अतिआनन्द भरि बोले सहित अनुराग जू ।
सुनहु श्री वृषभानु जू तुम धन्य अति बड़ भाग जू ॥
तुमसे समुद्रन सो सुनहु सम्बन्ध मांगि न पाइये ।
परम निर्मल यश तुम्हारो लोक लोकन गाइये ॥
अति नेह कान्हर सों तुम्हारी प्रीति पहली यह भई ।
दई कन्या करि कृपा गुण रूप सुख शोभा मई ॥
पूरे मनोरथ सकल अब हम बड़े सब भांतिन भये ।
वृषभानु नँद आनन्द प्रसुदित परस्पर चरणन नये ॥

दो० मन मन हर्षित नागरी, नागर नवल किशोर ।
लखि रसरीति सखीन की, प्रेम प्रमोद न थोर ॥

सो० बिलसत अतिआनन्द, ब्रजविलास ब्रजनागरी ।
प्रीति बिबश ब्रजचन्द, कोकहिसकैमुहागसुख ॥

करत मनोरथ सब मन भाये ॥ त्रिभुवन पति दूलह करि पाये ॥

व्याह रीति सब करि ब्रजनारी ❀ गावति यशुमति को रसगारी
 तब कङ्कण झोरन बिधि कीनी ❀ रचि पचिगांठि चतुर तिय दीनी
 कहत श्याम सों झोरो कङ्कन ❀ परमानन्द मुदित गोपी जन
 बड़े चतुर तो खोलहु गिरिधर ❀ यह न होय धरिवे गिरिको कर
 कै झोरो कै दोउ कर जोरो ❀ दुलहिनि के परिपायँ निहोरो
 बड़े कहावत हो ब्रजनाथा ❀ काहे कँपन लगे दोउ हाथा
 झोरहु बेगि कि सुनहु कन्हार्ई ❀ पठवहु यशुमति माय बुलाई
 दोऊ परस्पर कङ्कण झोरैं ❀ प्रेम उमँग उर हर्ष न थोरैं
 पचिहारे कङ्कण नहिं बूझत ❀ निरखि हर्षि ब्रजतिय मुख लूटत
 कहति सहाय करहु जिन कोऊ ❀ कङ्कण झोरहिं आपहि दोऊ
 दुलहिनि दूल्ह कङ्कण खोलैं ❀ कै बृषभानु ववा को बोलैं

दो० कमल कमल परसौ जनौ, पानि लाड़िलीलाल।

लखि कबिकुल सांचेलगत, रोम कटीली नाल ॥

सो० दूल्ह नन्द कुमार, दुलहिनि श्री राधा कुँवरि।

सन्तन प्राण अधार, अबिचल यह जोड़ी सदा ॥

यह रस रास चरित हरि कीनो ❀ ब्रजयुवतिन वाञ्छित फल दीनो
 ब्रजतिय मुख हित कुञ्ज बिहारी ❀ करी मास निशि पट उजियारी
 साध नहीं युवतिन मन राखी ❀ श्रीभागवत कह्यो शुक भाखी
 वेद उपनिषद् साख वतावैं ❀ ब्रह्मा शम्भु सहस मुख गावैं
 नारद शारद ऋषिय अनन्ता ❀ कहत सुनत गावत सब सन्ता
 सोरह सहस गोप सुकुमारी ❀ तिनके संग लाल गिरिधारी
 कियो रास रस रहस अगाधा ❀ पूरण करी सवन की साधा
 हाव भाव रस रास विलासा ❀ नैन सैन मुख बचन प्रकासा
 भुजभरि मिलन अधर रस चाखन ❀ नृत्य गान रस रुचि सम्भापन

क्षण क्षण बढ़ति अधिक रसरीती ❀ यहि विधि रैन करत सुख वीती
भयो समय ब्रह्मी शुभकाला ❀ रास रमत भई श्रम सब बाला
तब श्रीयमुना गये नँदलाला ❀ सोहत संग सकल ब्रजबाला

छं० सोहत सकल ब्रजबाल संग नँदलाल तब यमुना गये ।

शरद निशि रस रास करि पूरण मनोरथ सब भये ॥

जैसे महा मद मत्त गजबर यूथ करणी संग लिये ।

फिरत बन सर सरित क्रीड़तनिदरि अति निर्भय हिये ॥

जिमिनन्दसुत जगबन्द आनँदकन्द रसनिधि श्यामये ।

मेढि बेद मर्याद ब्रज तिय प्रेम सब आनँद भये ॥

रमत वृन्दावन यमुन रस केलि अति सुख मानई ।

दास ब्रजवासी प्रभू गुण नाग बर सुर गानई ॥

दो० धनिवृन्दावन धन्यसुख, धन्यश्याम धनिरास ।

धनिधनिमोहन गोपिका, नितनवकरतविलास ॥

सो० नहिं सुर पुर सम तूल, वृन्दावन सुख एक फल ।

कहि कहि बरषहि फूल, सुरगण मन आनँद भरे ।

यमुना जल क्रीड़त नँदलाला ❀ सोरह सहस संग ब्रजबाला

मधि राजत दोउ बाँहा जोरी ❀ दम्पति गौर साँवरो जोरी

कोउ कटिलौ जल में सुख साजै ❀ कोउ उर श्रीबालौ छवि आजै

ताकी उपमा कवि किमि कहहीं ❀ अति अपार छवि पार न लहहीं

छिरकत पाणि परस्पर सोहैं ❀ नंद नँदन पिय को मन मोहैं

सलिलशिथिलसोहतनँदनन्दन ❀ सेंदुर भाल कुंकुमा चन्दन

पँचरँग भयो यमुन जल जातें ❀ छवि मय लहरि उठत हैं तातें

रूप छटासी तिय गण जामें ❀ करति बिहार लिये घनश्यामैं

एक एक अँग भरि भरि लेहीं ❀ हास विलास करत छवि देहीं

एकन लै अथाह जल डारै ❀ मुख व्याकुलता रूप निहारै
 इक भाजति इक पाछे धावै ❀ एक श्याम ढिग पकरि लयावै
 कण्ठ लगाय लेत पिय ताही ❀ सो मुख कवि सों कह्यो न जाही
 दो० करत केलिय मुना सलिल, ब्रजललना संग श्याम ।

निशि श्रम मिट आलस गयो, भये सुखी सुख धाम ॥

सो० अलखलखी नहिं जाय, अविगतिकी गतिको कहै ।

योगी सकत न पाय, सो भोगी ब्रज तियन को ॥

जल बिहार बिहरत मुख पाई ❀ रास रंग मनते नहिं जाई
 युवती मण्डल करि कर जोरै ❀ श्यामा श्याम मध्य करि खोरै
 वही भाव मन में उपजावै ❀ निरखि निरखि मोहन मुख पावै
 बिहरति नारि हँसत नँदनन्दन ❀ अंकम भरि भरि लेत अनन्दन
 प्यारी श्याम अंजली डारै ❀ सो छवि तिय मुख पाय निहारै
 मानहु कमल और इन्दीवर ❀ छिरकत हैं मकरंद परस्पर
 जलक्रीडा मुख करत कन्हारै ❀ वर्षत सुमन देव भरि लाई
 लीला सागर परम अपारा ❀ कवि किहि विधि करि पावै पारा
 करियत केलि संग ब्रजनारी ❀ आये जल तट निकसि बिहारी
 भीगे पट लिपटे तन माहीं ❀ पट अंतर लट चीर चुचाहीं
 ठाढ़े यमुना तीर कन्हारै ❀ पुलिन पवित्र परम छवि छाई
 निरखत निर्मलतन की शोभा ❀ अरस परस बिहसत मन लोभा
 दो० तब इकतरुको बिहँसिकै, आयसु दीनों श्याम ।

नाना भूषण बसन बर, तिन वर्षे अभिराम ॥

सो० निजनिज रुचि अनुहारि, लै लै ब्रजकी सुन्दरी ।

कीनों नवल श्रृंगार, उर आनंद नहिं जाय कहि ॥

करि श्रृंगार तन नवल किशोरी ❀ हरि सम्मुख ठाढ़ी सब गोरी

निरखि श्यामझबिमनललचानी ❀ बिदा करत घर को सकुचानी
 हाँसि बोले तब मदन गुपाला ❀ जाहु सदन अब सब ब्रजवाला
 अति आदर दै दै सुखदाई ❀ पाणि परस सब सदन पठाई
 निशि सुख छत न काहु मन तैं ❀ चली सदन सब बृन्दावन तैं
 अति आनन्द रह्यो उर भरिकै ❀ भाँवरि दै आई सँग हरिकै
 मन के सुफल मनोरथ कीने ❀ नन्दसुवन हित पति करि लीने
 गई सदन सब हर्ष बढ़ाये ❀ घर घर लोगन सोवत पाये
 जग स्वामी हरि यह मत ठानी ❀ ब्रजयुवतिन सबहिन घर मानी
 प्रातकाल सब ब्रज जन जागे ❀ निज निज कारज में सब लागे
 नन्द धाम गये नँद के लाला ❀ काहु नहिँ जान्यो यह ख्याला
 यह रहस्य लीला बनवारी ❀ सन्त जनन मन आनँदकारी

छं० यह रहसलीला श्याम की सब संत सुर मन भावनी ।
 ज्ञान ध्यान पुराण श्रुतिमति सार परम सुहावनी ॥
 यह मंत्र यंत्र अनंत व्रतफल ध्यान दंपति को कहै ।
 भाव करि नित भाव मन बिनु भाव यह सुखही लहै ॥
 धन्य श्रीशुकदेव मुनि भागवत यह रस गाइये ।
 निगम नेति अगाध श्रीगुरु कृपा बिन नहिँ पाइये ॥
 सरुचि कहि जे सुनै सीखैं प्रीति करि जे गावहीं ।
 ऋद्धि सिद्धि सब कह गनाऊं भक्ति अनुपम पावहीं ॥
 उर बढै रस नेम दृढ़ पद प्रेम राधा श्याम को ।
 अब होइ अचल निवास बृन्दाबिपिनघननिज धामको ॥
 यहै आशा राखि कै उर सदा ब्रजवासी कही ।
 कृपा कीजै श्याम श्यामा शरण पद पंकज गही ॥

दो० चरित ललित गोपाल के, रास बिलास अनेक ।

कापै बरणे जात सब, इतनो कहा विवेक ॥
 सो० इकसी तरै अघाय, ज्यों पिपीलिका सिंधुते ।
 कह्यो यथा मति गाय, तिमि ब्रजबासीदास हू ॥

अथ मानचरित्रलीला ॥

नित्य श्याम श्यामा सुखकारी ❀ करत नित्य नव चरित बिहारी
 निर्गुण निर्बिकार अबिनासी ❀ भक्त मनोरथ सदा विलासी
 नित बुन्दावन धाम सुहायो ❀ नित्य रासरस बेदन गायो
 भक्तन हेत विविध तन धारै ❀ भक्तन हित लीला विस्तारै
 सदा भक्तवश कृष्ण कृपाला ❀ दयासिंधु प्रभु दीनदयाला
 शरदरैन रस रास उपायो ❀ युवतिन प्रभु निज रूप बनायो
 सुफल मनोरथ सबको कीनो ❀ पतिहित करि सबको सुख दीनो
 तब कृपालु उरमें यह आनी ❀ सदा भक्त बांझित फल दानी
 गोपिन गर्व रास में कीनो ❀ सो मैं अन्तर करि हरि लीनो
 रही साध इन के मन माहीं ❀ हम को श्याम मनायो नाहीं
 ये ब्रजभक्त परम हित मेरी ❀ करौं साध पूरण इन केरी
 अब एक मान चरित्र उपाऊं ❀ पाँयन परि परि सबन मनाऊं
 दो० करि बिभेद रस रीति में, देहुँ मान उपजाय ।

इनके मुख मंडित बचन, कहवाऊं सुखदाय ॥

सो० सकलगुणन केधाम, परमविचक्षण रसिकमणि ।

नवरस सागर श्याम, एक प्रेम रस बश सदा ॥

श्रीराधा मन मोहन प्यारी ❀ नव नागरि नव रूप उजारी
 रास नित्य रिक्त्ये गोपाला ❀ ता रस मगन फिरत नँदलाला
 करत भवन श्रृंगार पियारी ❀ औचक तहाँ गये गिरिधारी

देखि प्रिया पियको हँसि दीनो ❀ हर्षि श्याम अंकम भरि लीनो
 रहे थकित छवि अंग निहारी ❀ जात कमल मुख पर बलिहारी
 यहि अन्तर पियके उर माहीं ❀ देखि तीय निज तन परछाहीं
 भभकि उठी प्यारी भइ न्यारी ❀ अति सनेह भ्रम तुरत बिहारी
 और नारि पियके उर जानी ❀ आपुन बिषे प्रीति बड़ि मानी
 राखत सदा हिये में वाही ❀ ल्याये मोहिं दिखावन ताही
 कियो मान यह भ्रम उपजाई ❀ कहत बचन पिय सों अनखाई
 अब जानी पिय बात तुम्हरी ❀ ऊपर ही की प्रीति हमारी
 हम सों मुँह की बात मिलावत ❀ यह प्यारी उरमाहिं वसावत

दो० धनि धनि याको भाग्य है, बसत तुम्हारे हीय ।

याही सों हित राखिये, अब मनमोहन पीय ॥

सो० भली करी सुख मानि, मोहिं दिखाई आनिकै ।

यह प्यारी सुख दानि, उरतें जनि न्यारी करौ ॥

ऐसे कहि मुसकाय किशोरी ❀ कछुरिस करि जिय भौंह सिकोरी
 चकित श्याम लखि मुनि मुख बानी ❀ कहत कहा नागरी सयानी
 साँच कहति कैधों करि हाँसी ❀ कत रिस करि तिय होत उदासी
 समझी नहीं कहा जिय आई ❀ भभकि उठी कै अति भ्रम पाई
 हँसि भुज गहन लगे मनमोहन ❀ बैठत क्यों नहिं मम प्रियगोहन
 मोहिं छुयो जनि दूर रहौ जू ❀ बसत हिये किन ताहि गहौ जू
 तुमहिं चतुर अरु सबै अयानी ❀ हम दासी अरु ये पट्टानी
 उरमें मन भावती बसाई ❀ हँसी करन को हमें बताई
 लखि लखि प्रिया बदन सुखकारी ❀ हँसत मनहिं मन कुंजबिहारी
 कहति कहा भामिनि भइ भोरी ❀ तो बिन उर को बसत किशोरी
 तू मम श्रवण नैन मुख बानी ❀ जीवन प्राण आधार सयानी

बृथा क्रोध कत जिय में आनै ❀ मेरो कह्यो नहीं क्यों मानै
दो० सुनो श्याम हिरदे बसत, सो छिपिये न छिपाय।

ज्यों शीशी के माहिं जल, परगट परत लखाय ॥

सो० बातें कहत बनाय, यह देखत हम सों हँसत।

जैहै कहूँ अनखाय, उरतें तब पछिताय हौ ॥

जो यह कहै करौ तुम सोऊ ❀ वह नागरि तुम नागर दोऊ

मतिहि खिभावो मोहिं कन्हाई ❀ भली करी लै सौति दिखाई

जाहु चले अब मैं सुख पायो ❀ ऐसे कहि मन मान बढ़ायो

रिस करि मौन रही गहि प्यारी ❀ देत मनहिं मन बाको गारी

शोचत श्याम देखि मन माहीं ❀ बोल सकत नहिं प्रियहि डराहीं

कहत बृथा जिय मान न कीजै ❀ नहिं अपराध जानि तिय लीजै

क्यों रिस करति प्रिया मन माहीं ❀ मेरे उर तेरी परछाहीं

यह सुनि कुँवरि राधिका रानी ❀ बोली रिस करि पिय सों वानी

कहा बनावत बातें हम सों ❀ जाहु चले बोलौं नहिं तुम सों

यह कहि ओट गई है प्यारी ❀ भये विरह बश तब गिरिधारी

अति व्याकुल तन मन अकुलाहीं ❀ बार बार शोचत मन माहीं

गयो सरोज बदन कुम्हिलाई ❀ तहां एकै सखि दूती आई

दो० सो हरिसों वृभूति भई, कहहु न मोहिं सुनाय।

आज दशा कैसी लखति, बैठे कहा गँवाय ॥

सो० क्यों तन रहे भुलाय, अति व्याकुल देखति तुम्हें।

रह्यो बदन कुम्हिलाय, ऐसो शोच कहा पख्यो ॥

बोले श्याम सखी हित जानी ❀ विरह बिकल कहि जात न वानी

कियो मान वृषभानु किशोरी ❀ मैं कहु नहिं अपराध कियो री

लखि मेरे उर निज परछाहीं ❀ रुसि रही करि कोप बृथाहीं

मैं कहि कै बहु भांति मनाई ❀ नहिं प्रतीति राधा उर आई
 बिन समझे इतनो हठ कीनों ❀ तब तैं मोहिं मदन दुख दीनों
 ऐसे कहि शोचत बलबारी ❀ लेत चैन भरि श्वास अधीरा
 परम चतुर दूतिका सयानी ❀ बिरह विकलता पिय जिय जानी
 कह्यो धीर धरिये बनवारी ❀ चलिये बन को कुंजबिहारी
 मैं प्यारी लै तुमहिं मिलाऊँ ❀ आज कहा तौ तुम सों पाऊँ
 गई सदन ते लै बन धामहिं ❀ लहँ बैठारि धीर धरि श्यामहिं
 मैं लै आवति राधा प्यारी ❀ कितक बात यह सुनहु बिहारी
 मेरे आगे की वह बारी ❀ कहा मान करि है सुकुमारी

दो० ऐसे कहि चातुर अली, आतुर लखि घनश्याम ।

श्रीवृषभानुलली जहां, चपल चली ब्रज धाम ॥

सो० मन मन रचत सयान, नई बनाऊँ बात इक ।

अबहिं छुड़ाऊँ मान, मोसों धौं कहि है कहा ॥

हरि सों रुसि मान करि वैसी ❀ अबहीं कहा भई यह ऐसी
 करति बिचार यहै मन माहीं ❀ गई सखी राधा के पाहीं
 कुँवरि किशोरी परम सयानी ❀ मुख देखतहि दूतिका जानी
 सहजहि बोलि ताहि ढिग लीनी ❀ सहजहि कह्यो दया कित कीनी
 तुरतहि कहि तब सखी मुनायो ❀ तुम को बन घनश्याम बुलायो
 मुनत कही प्यारी अनखाई ❀ काहे को तुम श्याम बुलाई
 तू आई याही कूं लीन्हे ❀ मैं अब श्याम भले करि चीन्हे
 कहा कह्यो तोकों री आली ❀ तुहं भली अरु वे बनमाली
 उनकी महिमा कहत न आवै ❀ अब इक नई नारि मन भावै
 ताको लै उर माहिं बसाई ❀ तोहिं वहां ते दारि पठाई
 आज कहा कहु कलह भयो री ❀ कैधौं कहु तैं मान ठयो री

तब वह आज अनमनी बतानी ❀ यह तो कछु मैं बात न जानी
दो० मोसों नहिं कछु हरि कह्यो, सहज पठाई लेन ।

कह धौं परी पुकार ह्वां, तुम चलि देखहु नैन ॥

सो० कहत सुनाय सुनाय, लै लै तेरो नाम सब ।

तैं धौं लियो छुड़ाय, कहि काके काके गथहि ॥

काहे को गथ लियो परायो ❀ अपनो नाम कुनाम धरायो

डारि देहु जाको जो लीनो ❀ तेरे बहुत दर्द को दीनो

तबहीं ते उन शोर लगायो ❀ ता कारण हरि तोहिं बुलायो

हरि तेरी दिशि तैं भगरैं री ❀ तू कत उनसों रोस करै री

यह कछु नोखी बात सुनाई ❀ मैं काको धन लियो छिपाई

काहे को हरि भगरत माई ❀ इति माया मोपै कहँ आई

जैसे हैं तैसे हरि जाने ❀ नहिं उनके गुण परत बखाने

बैठि किधौं तू घर जा अपने ❀ मैं उन पै अब जाउँ न सपने

हौं कह तोहिं मनावन आई ❀ मान करौ तुम और सवाई

पर धन ले सब को ब्रज बैठी ❀ कहा करति बातें यों ऐंठी

देति जवाब सबनि किन जाई ❀ मोपै कह इतनो सतराई

तब तैं सबसों लरत कन्हवाई ❀ जब मैं तोहिं बुलावन आई

दो० बार बार तू कह कहति, मोकों री डरपाय ।

मैं नहिं काहूको लियो, भूँठहिं दोष लगाय ॥

सो० लरत कौन सों श्याम, कौने करी पुकार अब ।

कहै न तिनको नाम, सांच तबहिं मैं मानिहौं ॥

तब बदिहौं ऐसे कहि है री ❀ श्याम निकट बैठे सब बैरी

कहँ लग सब के नाम गनाऊं ❀ एक एक करि तोहिं देखाऊं

नभ जल धराणि बनहु में आये ❀ कहँ लगि मोते जात सुनाये

जो तिनकी नहिं गथहि चुराई ॥ तौ तू कत बन चलति डराई ॥
 परी बान तोकों यह कैसी ॥ भली कहति अति लगति अनैसी ॥
 श्याम बिना क्यों न्याव चुकै री ॥ तिनहीं सों तू रोस करै री ॥
 कोटि करौ एकै पुनि है हौ ॥ वे अरु तुम कछु जियके दै हौ ॥
 मान कही चल श्याम बुलाई ॥ श्रवण लागि हरि मोहिं पठाई ॥
 जिनकी यह सब सौज तुम्हारे ॥ तजे न हरि पहुँ जाय पुकारे ॥
 इन्दु कहत मो बदन बिगोयो ॥ अलिकुल अलकन को दुख रोयो ॥
 हरिण मीन छवि दृगन दुराई ॥ खंजन हूँ तहँ देत दुहाई ॥
 शुक की छवि नासा हरिलीनी ॥ बैनन करी कोकिला हीनी ॥

दो० अधर बिम्ब दाढ़िम दशन, लूटे कंठ कपोत ।

लई तरणि छवि छीनि कै, तरल तरौना जोत ॥

सो० चक्रबाक कुच दोय, कटिहरि कदली जंघ लिय ।

गजमराल गति जोय, चरण पाणि पंकज हरे ॥

ये सब हरिसों करत लराई ॥ तैं जु करी इनसों अधिकाई ॥
 अति अनीति लखि कुँवर कन्हवाई ॥ पठई मोहिं लेन तोहिं आई ॥
 प्रति उत्तर अपनो करि चलिकै ॥ इहां रही कहँ बैठि मचलिकै ॥
 सुनि पियके गुण तिय हँसि दीनो ॥ कछु सकुची मन मान जो लीनो ॥
 चतुर सखी जियकी सब जानी ॥ सबहीं हरषि कही यह बानी ॥
 बान कहा अब तोहिं परी री ॥ जब तब लखि निज छाँह डरी री ॥
 ता दिन दर्पण लखि अम कीनो ॥ सो दृग मूँदि भेटि हरि दीनो ॥
 आज देखि पिय निज उर आहीं ॥ कियो इतो हठ कुँवर बृथाहीं ॥
 यह सुनि समुझि मनहिं सकुचाई ॥ सहचरि कंठ बिहँसि लपटाई ॥
 रस करि तुरत मान बिसरायो ॥ सुनि बन धाम श्याम सुख पायो ॥
 हँसिकै कह्यो सखी सों जा री ॥ तू हरिसों कहि आवत, प्यारी ॥

मैं अंग भूषण बसन सँवारी ❀ आवति बनहिं जहां बनवारी
 दो० यह सुनि हरषी दूतिका, गई जहां धनश्याम ।

अतिव्याकुल तनसुधि नहीं, बिहलकीनोकाम ॥

सो० बैठत उठत अधीर, क्योंहूँ सचुपावत न हरि ।

बढ़ति बिरह की पीर, श्री राधा राधा रटत ॥

राधा बिरह बिकल गिरिधारी ❀ कहूँ माल कहूँ मुरली डारी

कहूँ मुकुट कहूँ पीत पिछौरी ❀ नहिं कछु सुरति भई मति बौरी

कबहुँ मूँदि दृग ध्यान लगावैं ❀ कबहुँ प्यारी के गुण गावैं

कबहुँ लोटत कुंजन माहीं ❀ कबहुँ बैठि डुमन की छाहीं

ठाढ़े टेकि कबहुँ डुमडारी ❀ लखत प्रियापथ पलक विसारी

देखि दशा दूतिका सयानी ❀ कही श्याम सों आतुर बानी

काहे कों कदरात बिहारी ❀ मैं ल्याई बृषभानु दुलारी

बिरह विषाद दूरि करि डारौ ❀ नेक धीर अपने मन धारौ

सुनि प्यारी को नाम कन्हारै ❀ मिले दूतिका सों उठि धारै

कहां प्रिया कहि अति अकुलाये ❀ नैन सरोज नीर भरि आये

तब हँसि कह्यो दूतिका ग्वारी ❀ आवत प्रिया अवहिं बनवारी

मैं जु प्रतिज्ञा तुम तें कीनी ❀ विधिना आज राखि सो लीनी

दो० अब अपने मन हर्ष करि, दूर करो संदेह ।

आवति है बृषभानुजा, भुज भरि अंकम लेह ॥

सो० सुख शोभाकी खान, नहीं कुँवरि बृषभानुसी ।

तुमसमधन्यन आन, बड़ भागिनि तुमवशभये ॥

रसिक पुरंदर प्रभु सुख दानी ❀ सुनत सिहात दूतिका बानी

पुलकत अंग धीर नहिं धारैं ❀ पुनि पुनि प्यारी पंथ निहारैं

निज कर सुमन सुगंध लगावैं ❀ कुंजभवन रुचि सेज बनावैं

अति कोमल तन जानि पियारी * सेज कली चुनि करत नियारी
 जे डुमलता लटकै तन लागै * ते ऊपर धरि मन अनुरागै
 प्रेम प्रीति रस बश जग स्वामी * करत चरित मानहुँ अति कामी
 देखि श्याम की आतुरताई * हँसति सखी मन हर्ष बढ़ाई
 जानि प्रेम बश हरि मुख रासा * गई बहुरि प्यारी के पासा
 करि शृंगार नवल तन गोरी * राजत श्री बृषभानु किशोरी
 सहज रूप की राशि कुमारी * भई अधिक छवि भूषण भारी
 अंग अंग छवि पुंज बिराजै * निरखिमदन तिय कोटिक लाजै
 त्रिभुवन की छवि मनहुँ बढोरी * बिधि कीनी बृषभानुकिशोरी

दो० देखि रूप मन मदन सखि, बोली बचन सँभार ।

धन्य धन्य राधा कुँवरि, तुम गुण रूप अपार ॥

सो० तो समान नहिं तीय, तिहुँपुर सुन्दरि नागरी ।

बसति सदा पियजीय, तू मोहन मन भावनी ॥

चलहु बेगि अब सहित हुलासा * लागि रही पिय की इत आसा
 तेरोइ नाम जपत मन लाई * गावत तव गुण कुँवर कन्हवाई
 तुव तन परस पवन जो जाही * उठि आतुर परिस्रभत ताही
 तेरो रूप आनि उर अंतर * धरत ध्यान दृग मूँदि निरंतर
 रमी श्याम तू तन मन जाते * राधा स्मरण नाम है ताते
 सुनि सहचरि के मुख की बानी * पुलकि प्रफुल्लित मृदु सुसकानी
 पिय को प्रेम समुझि मुख पाई * चली मिलन गजगति हर्षाई
 मुख शशि कनक लतासी गोरी * बाल हरिण छवि नैन किशोरी
 भूषण बसन अनूप मुहाई * अंग अंग शोभित छवि छाई
 अंग सुगन्ध मनोहर ताई * भँवर भीर चहुँ ओर मुहाई
 हँसि हँसि कहति सखी सों बातें * भरत सुमन जनु रूप लतातें

ऐसे करति प्रकाश पियारी ❀ गई जहां प्रभु कुंजविहारी
दो० परम प्रेम दोऊ मिले, श्री राधा नंदनंद ।

गुण आगर नागर युगल, छवि सागर सुखकंद ॥

सो० जो प्रभु परम अपार, बेद भेद जानत नहीं ।

सो ब्रज करत बिहार, बरणि पार को पावहीं ॥

कुंजन मंजु फलन छवि छाई ❀ भँवर गुंज छवि पुंज सुहाई

फूलन सेज रुचिर रचि कीनी ❀ चित्र विचित्र रंग रस भीनी

फूले खग गण करत कलोलैं ❀ जहँ तहँ मधुर मनोहर बोलैं

फूली वृन्दावन तरु डारी ❀ तन मन फूले पिय अरु प्यारी

सहचरि सहित मनोहर जोरी ❀ राजत युगल किशोर किशोरी

हाव भाव करि रस उपजावैं ❀ हास विलास करत सुख पावैं

सखी कह्यो तब कै अब नीके ❀ सकुचि हँसी प्यारी सँग पीके

नैन कोर पिय को हिय ताक्यो ❀ तबहिं श्याम पीताम्बर दाक्यो

यह छवि निरखि सखी बलिजाई ❀ अचल रहौ जोरी सुखदाई

धनि राधा धनि कुँवर कन्हाई ❀ धन्य मान रसकेलि सुहाई

धन्य कुंजवन धनि महि पावन ❀ धन्य लता द्रुम सुमन सुहावन

धन्य सखी धनि सब ब्रजबासी ❀ जिन सँग बिहरत प्रभु सुखरासी

दो० गये श्याम श्यामासदन, सखीसहित सुखपाय ।

मानचरित रसकेलिकर, ब्रजबासी बलिजाय ॥

सो० मान चरित्र अनूप, जे सुभाव गावहिं सुनहिं ।

ते न परैं भव कूप, राधाकृष्ण प्रताप ते ॥

करत चरित नाना गिरिधारी ❀ सुख सागर भक्तन हितकारी

जाको शिव अज ध्यान लगावैं ❀ सनकादिक मुनिजप करि ध्यावैं

जा प्रभुको यश परम विशारद ❀ गावत अहि पति नारद शारद

सकल अनीह अकाम अभोगी ❀ योग समाधि न पावत योगी
 सो प्रभु सब के अन्तर्यामी ❀ युवतिन प्रेम भक्ति बश कामी
 बहु नायक है करत बिहार ❀ ब्रजपुर घर घर नंद कुमार
 रसलीला नाना उप जावैं ❀ काहु रुठावैं काहु मनावैं
 अस परस तिय सब यह जानैं ❀ हरि हैं सब के धाम लुभानैं
 अवधि बदत काहु सों जाई ❀ काहु के घर बसत कन्हाई
 सांभू कहत जाके घर आवन ❀ जात प्रात ताके मन भावन
 ब्रज गोपी जिनको पति जानैं ❀ कोउ आदरहिं कोउ अपमानैं
 खंडित बचन सुनत सुखदाई ❀ यह लीला हरि के मन भाई

दो० ब्रज में करत बिहार हरि, ब्रज बनितन के संग ।

अखिल काम पूरण करन, भरे प्रेम रसरंग ॥

सो० कोटि काम कमनीय, सुंदर सुख सागर नवल ।

रमणी मन रमनीय, ब्रजभूषण ब्रजलाडिलो ॥

ब्रज बीथिन नंद नन्दन ठाढ़े ❀ अंग अंग सुन्दर छवि बाढ़े
 ललिता आय गई तिहिं पैड़े ❀ मन मोहन रोकी मग बैड़े
 देखत छवि ललिता ललचानी ❀ बोली बिहँसि श्यामसों बानी
 कत रोकत मग में बिन काजै ❀ जाहु चले जितहौ हित साजै
 झूठहि इतौ सनेह जनावैं ❀ कबहुँ हमारे धाम न आवैं
 हरि हँसि कह्यो आज निज ऐहैं ❀ तेरी सों हम अनत न जैहैं
 ऐसे कहि मधुरे मुसुकाई ❀ छांड़ि दई मग छैल कन्हाई
 ललिता गई सदन सुख मानी ❀ ऐहैं श्याम आज यह जानी
 सांभूहि ते हरि पन्थ निहारै ❀ धाम आपने सेज सँवारै
 भूषण बसन नवल तन साजै ❀ खञ्जन ते दग अञ्जन आँजै
 सुमन सुगन्ध अनूप मँगाई ❀ रचि रुचि राखति माल बनाई

कवहूँ ठाढ़ी होति दुवारे ❀ कवहूँ लखति गगन के तारे

दो० कहति श्याम आये नहीं, होन लगी अधरात ।

गये आशदे मोहिं पुनि, कहा धरी जिय बात ॥

सो० वे बहु नायक श्याम, किधौं लुमाने अनत कहूँ ।

मन मन शोचत बाम, कारण कह आये नहीं ॥

कैधौं कछु ख्यालहि चित दीनों ❀ कैधौं मात पिता डर कीनों

कैधौं सोय रहे अलसाने ❀ कै मो घर आवत सकुचाने

ऐसे शोचति रैन विहानी ❀ जहँ तहँ बोले तमचुर बानी

तब बैठी अपनो मन मारी ❀ कछु शोच कछु रिस उर धारी

हरि निशि बसे सखी शीला के ❀ सुंदर श्याम धाम लीला के

तहँ सुख सोवत रैन गँवाई ❀ प्रात होत ललिता मुधि पाई

चले सहज शीलासों कहि कै ❀ जिय सकोच ललिता को गहिकै

आयो ललिता सदन विहारी ❀ चितैरही मुख की छवि प्यारी

अञ्जन रेख अधर पर राजै ❀ पीक लीक नैननि छवि छाजै

सोहत ललित कपोलन टीको ❀ लाग्यो बदन काहु को नीको

तुरत मुकुर लै उठी सयानी ❀ दिखरायो हरि सम्मुख आनी

कहति देखि निज बदन निहारो ❀ लाल कहाँ ते प्रात सिधारो

दो० पीक पलक अंजन अधर, देखि श्याम सकुचाय ।

रहे निचौहँ नैन करि, बचन कहाँ नहिं जाय ॥

सो० ज्योंज्यों सकुचत श्याम, त्योंत्यों हाठि नागरि कहति

देखहु छवि अभिराम, हाहा मुख कत फेरियत ॥

सकुचत कहा बोल के साँचे ❀ आये तौ मो गृह रँग राँचे

रैन नहीं तो प्रातहि आये ❀ धनिधनि वहजिन स्वाँग बनाये

तुम जिन मानहु बिलग कन्हाई ❀ मैं तौ करति अनन्द बधाई

क्यों मोहन दर्पण नहीं देखौ ❀ मूधे मोतन काहेन पेखौ
ठाढ़े कत बैठत क्यों नाहीं ❀ कहु कछु चूक परी हम पाहीं
रहे मूक हैं कहा ठगसे ❀ सोहत हौ अलसात जगसे
उत्तर मोहिं देत क्यों नाहीं ❀ मैं तबहीं ते बकत बृथाहीं
तब चितये दृग कोर कन्हई ❀ भाव अतिहि आधीन जनाई
ग्वालि प्रबीन जान सब लीनो ❀ तुस्त रोष उरते तजि दीनो
हँसि करि मोहन कण्ठ लगाये ❀ भले श्याम ऐसेहूँ आये
श्रमित अंग जागे निशि जानैं ❀ अति सनेह मनहीं मन मानैं
अंग सुगन्ध मरदि अन्हवाये ❀ बसन अभूषण दै बैठाये

दो० रुचि भोजन दै सेज पर, पौढ़ाये धनश्याम ।

रसबश करि नवनागरी, किये सुफल मनकाम ॥

सो० मुर मुनि सकत न पाय, प्रभु ब्रजबासीदासको ।

प्रेम प्रीति बश आय, सो गोपीबल्लभ भये ॥

कहत सौंह करि रसिकबिहारी ❀ तुम प्रिय भविं प्राणहुँ ते प्यारी
सदा बसत तुम मो मन माहीं ❀ तुम बिन लहत अनत सुख नाहीं
ऐसे कहि अति प्रीति जनावैं ❀ चतुर बचन कहि चितहि चुरावैं
यहै भाव युवतिन सों भाखैं ❀ सबहिनके मनकी रुचि राखैं
कुल मर्याद लोक डर त्यागी ❀ सब गोपी हरिसों अनुरागी
बिन देखे रिस भाव बढ़ावैं ❀ नैनन देखतही सुख पावैं
ब्रह्म सनातन जग सुखकारी ❀ यह लीला ब्रज में बिस्तारी
ललिता को सुख दै सुखसागर ❀ चले सदन अपने नटनागर
उत तें मग आवति चन्द्रावलि ❀ देखि रही सुंदर छवि सांवलि
बने विशाल कमलदललोचन ❀ चितवत चारु मार मदमोचन
इत मुसकाय श्याम तेहि हेरी ❀ खोर सांकरी भइ भटभेरी

बिहँसि कह्यो चन्द्रावलि प्यारी ❀ कहां रहत हरि हमहिं विसारी
दो० तुम कैसे बिसरति प्रिया, हँसि बोले घनश्याम ।

आज आय सुख लेहिंगे, रैनि तुम्हारे धाम ॥

सो० सुनि हरषी जिय बाम, चली सदन मुसकायके ।

लखि सुख पायो श्याम, मुदित गये अपने भवन ॥

चन्द्रावलि मन अधिक उझाहू ❀ फूली फिरत कहति नहिं काहू

सुख के करत मनोरथ नाना ❀ वासर कल्प समान विहाना

भये अस्त रवि निशि नियरानी ❀ उडुगण ज्योति देखि हरपानी

हरि सुखमा के भवन सिधाये ❀ चन्द्रावलि के भवन न आये

सूने घर देखी सो ग्वाली ❀ आतुर गये तहां वनमाली

सुखमा लखि हरिको सुख पायो ❀ अतिही आदर करि बैठायो

कोककला कोबिद बर नारी ❀ हाव भाव मोहे गिरिधारी

बसे तहां मोहन सुख पाई ❀ चन्द्रावलि की सुरति भुलाई

इत चन्द्रावलि सेज सँवारै ❀ बार बार हरि पन्थ निहारै

कबहुं भवन कबहुं अँगनाई ❀ कबहुं रहति द्वार टकलाई

कबहुं शोच करति मनमाहीं ❀ आवहिंगे मोहन के नाहीं

कबहुं आलस कछु जियजानी ❀ धोवति है नयनन लै पानी

दो० कबहुं कहति हरि आय हैं, उर में हर्ष बढ़ाय ।

कबहुं बिरहब्याकुल जरति, अतिआकुल अकुलाय ॥

सो० कबहुं कहत सुख पाय, बहुरमणी रमणीय पिय ।

बसे अनत कहुं जाय, मोसों भूठी अवधि बदि ॥

ऐसेहिं ऐसे रैनि विहानी ❀ सुनी श्रवण बायसकी वानी

भई काम दुख बाम उदासी ❀ जाने श्याम कपट की रासी

कहति नाम करि मन के माहीं ❀ श्याम नाम खोये सब आहीं

कोकिल श्याम श्याम अलि देखो * श्याम जलद अहि श्याम विशेषो
तिनहीं की करनी हरि लीनी * मोसों प्रीति कपट की कीनी
ऐसे क्रोध बिरहबश बाला * सुखमा सदन रहे नँदलाला
प्रात भये उठि चले तहां ते * आलस भरे नैन रंग राते
चन्द्रावली सदन चलिआये * ठाढ़े अजिर रहे सकुचाये
मन्दिर ते रिस भरी गुवारी * नख ते शिखलों रही निहारी
मनमनकहतिकुटिलअतिगिरिधर * प्रात होत आये मेरे घर
कियो मान मन में अतिभारी * आँगन में ठाढ़े बनवारी
और नारिके चिह्न बिलोकी * रोकति रिसहि रुकत नहीं रोकी

दो० तब बोली करि मान तिय, कहा काम मम धाम ।

ताही के घर जाइये, बसे जहां निशि श्याम ॥

सो० प्रात दिखावन मोहिं, आये रंग बनाय के ।

मैं सुनि पायो जोहिं, भले बने हौ लाल अब ॥

बिन गुण शोभित है उर माला * बीच रेख मुखचंद रसाला
अधर दीपसुत रेख सुहाई * नागबेलि रंग पलक रंगाई
लटपटि पाग महावर लाये * आलस नैन अरुण छवि छाये
चंदन भाल मिल्यो कहूँ बंदन * यह छवि अधिक बनी नंदनंदन
बलय गाढ़ पर पीठि धरे हौ * जान्यो नागरि अंक भरे हौ
इतने पर डाहन म्वहिं आये * सौंह करन को इत उठि धाये
जाउ तहीं जासों मन मान्यों * जैसे हौ तैसे मैं जान्यों
बिहँसि कह्यो तब लालबिहारी * तुमतेँ और कौन म्वहिं प्यारी
तुम बिन मोहिं कहूँ कल नार्ही * बसत सदा मन तेरे माहीं
यह चतुरई कहाँ पढ़ि आई * चीन्हे हौ गुण राशि कन्हई
यह कहि गई भवन में भामिनि * रीफे श्याम देखि छवि कामिनि

सन्मुख जाय भये पुनि ठाढ़े ❀ द्वार कपाट दिये तिन गाढ़े
 दो० पौढ़ि रही तिय सेज पर, बदन मूँढ़ि अनखाय ।

हरि तन पुनि चितयो नहीं, उर में प्रेम बढ़ाय ॥

सो० प्रभु गति लखी न जाय, जो चाहें सोई करें ।

पौढ़ि रहे सँग जाय, पौढ़ी तिय जहँ मान करि ॥

जो देखै तौ सँग कन्हारै ❀ चली बहुरि तिय सो उठि धारै

खोलि केंवार अजिर में आई ❀ देखे ठाढ़े जहां कन्हारै

बिनय करत नैनन की सैनन ❀ चकित भई देखति तिय नैनन

भीतर भवन गई पुनि प्यारी ❀ तहँ अंकम भरलाई मुरारी

तब नागरि रिस सबै भुलाई ❀ चेटक करि बश करी कन्हारै

मान छुड़ाय हुलास बढ़ायो ❀ तिय को मुख दीन्हो मुख पायो

तब निज धाम गये गिरिधारी ❀ चंद्रावलि उर आनंद भारी

तहां सखी दश पांचक आई ❀ चंद्रावलि बैठी जेहि ठाई

औरै बदन और अँग शोभा ❀ निरखि रही दृग द्वै मन लोभा

कहत प्रिया कह हर्ष बढ़ायो ❀ कहै न लूट कहं कछु पायो

क्यों अँग शिथिल मरगजी सारी ❀ यह छवि कही न जात महा री

हम सों कहा दुरावति प्यारी ❀ हम जाने त्वहिं मिले विहारी

दो० चंद्रावलि करि चतुरई, ज्वाब सखिन नहिं देह ।

रही मूँद मुख मंद हँसि, भीजी श्याम सनेह ॥

सो० रह्यो ध्यान उर ब्याय, वह लीला बिसरे नहीं ।

मुख सों कह्यो न जाय, गूंगे को गुरु सो भयो ॥

तब बोली ब्रूभति कह आली ❀ युवती मन मोहन बनमाली

है लीला अद्भुत सब जिनकी ❀ कही न जात बात सखि तिनकी

हा हा कह चंद्रावलि हमसों ❀ हमहूँ मुनै श्याम गुण तुमसों

कै त्वहिं मिले यमुन के तीरा ❀ कै त्वहिं मिले भवन बलवीरा
 तब चंद्रावलि गद गद बानी ❀ हरष सहित हरि कथा बखानी
 सुनि हरि चरित ललित मुखकारी ❀ भई प्रेम बश सब ब्रजनारी
 चंद्रावलि धनि धन्य कही तब ❀ कहन लगीं हरिके गुण गण सब
 नंदनंदन सब लायक हैं री ❀ सबहिन के मुखदायक हैं री
 बसे रैनि काहू के जा री ❀ काहू देत प्रात मुख आ री
 काहू को मन आय चुरावैं ❀ काहू सों अपनो मन लावैं
 काहू के जागत सिगरी निस ❀ काहू को उपजावत हैं रिस
 ब्रजबासी प्रभु के मन भावैं ❀ तैस्यइ तैसे चरित उपावैं

दो० यह लीला आनंद भरी, सकल रसन को सार ।

भक्तन हित हरि करत हैं, गाय तरत संसार ॥

सो० घर घर करत बिहार, ब्रजयुवतिन के संग हरि ।

गावत हैं श्रुति चार, ब्रजबासी प्रभु के यशहि ॥

श्री राधा बृषभानु दुलारी ❀ नंदनंदन पियकी अति प्यारी
 सहज रहे अपने मन माहीं ❀ नंदमुवन निशि अंत न जाहीं
 नंद भवन कै मेरे गेहा ❀ रहौ सदा चित यही सनेहा
 श्याम बसे काहू नारी के ❀ आये प्रात सदन प्यारी के
 रतिरंग चिह्न अंग परवाने ❀ सोहत नैन अरुण अलसाने
 प्यारी देखि रही मुख पियको ❀ जान्यो अंग लग्यो कहुँ तियको
 तब मन बिहँसि कह्यो श्रीराधा ❀ आज बन्यो पिय रूप अगाधा
 परउपकार हेतु तन धाख्यो ❀ पुरवन सबकी साध बिचाख्यो
 कहां पढ़ी यह नीति बताओ ❀ हमहूँ को सो ठाम सुनावो
 कहौ कहां काको मुख दीनो ❀ धनि धनि यह उपकार जु कीनो
 धनि यह बात आज मैं जानी ❀ क्यों नहिं कहियत प्रकट बखानी

धन्य मोहिं यह दश दिखायो ❀ धनि धनि जासों नेह लगायो

दो० भली दिखाई आज यह, अद्भुत छवि अभिराम ।

सूर उदय लोचन कमल, चंद उदय पर श्याम ॥

सो० उर कुच कुंकुम दाग, अधर दशन छवि राजई ।

रंगी महावर पाग, यह शोभा अनुपम बनी ॥

क्यों उठि भोर यहां को आये ❀ काहे को इतने रस भाये

तुमहूँ भले भली हैं वोऊ ❀ कीनो भलो भले मिलि दोऊ

कीनो है इतनो हित जिनतें ❀ तो अब किन बिछुरेहौ तिनतें

जाहु तहीं वे सुनि दुख पैहैं ❀ बहुरो तुमसों मन न मिलैहैं

तिनहीं को सुख दीजे मोहन ❀ जिनसों निशिबिलसे मिलि गोहन

तियसनमुख नहिं लखत कन्हई ❀ वदन नवाय रहे सकुचाई

कबहुं नैन की कोर निहारैं ❀ कबहुं चरण नख भूमि उखारैं

प्रकट त्रसित मन मन मुसकाई ❀ खंडित वचन सुनत हरपाई

पिय को सुख प्यारी नहिं जानै ❀ रोप करतहूँ पिय मन मानै

ज्वइ आवत स्वइ कहत बदनतें ❀ जाहु जाहु पिय कहति सदनतें

तुम जानत पिय हमहिं सयाने ❀ और बसत सब लोग अयाने

रैन बसत कहुं भोर हमारे ❀ आवत जाहि लजात ललारे

दो० तबहिं श्याम बानी मृदुल, बोले अति सकुचाय ।

किन देख्यो कौने कह्यो, भूठहि तुमसों आय ॥

सो० कहति भूठ यह बान, खोटी ब्रजनारी सबै ।

तुमतें प्रिय को आन, सौंह करौं जो मानिये ॥

बिनहीं बोले रहिये जू पिय ❀ कत ऐसे वचनन दहिये हिय

भूठी सबै एक तुम सांचे ❀ नीके लाज छांड़ि कै नांचे

सौंह कहुं करिबो सुनि पायो ❀ सो अब इहां काम है आयो

ऐसे खिजत पियासों प्यारी ❀ आई तहां और ब्रजनारी
 सखियन देखि कुँवरि मुसकाई ❀ उर अंतर है रिस अधिकाई
 तिन्हें कह्यो सैनन में प्यारी ❀ देखहु हरिकी छविहि निहारी
 मौनहि रहे श्याम सकुचाई ❀ गुवति बिलोकति छवि अधिकाई
 कहति सबै हँसि हँसि ब्रजबाला ❀ कहँ पाई छवि यह नँदलाला
 तबहिं सखिनसों कह्यो किशोरी ❀ करत इते पर सौँह लखोरी
 निशि औरनके चितहि चुरावत ❀ दरशन देन प्रात इत आवत
 तुमहीं अंग चिह्न पहिचानो ❀ सही परै सो बात बखानो
 कृपा करें तहँहीं पग धारैं ❀ नहीं काज इहँ बेगि सिधारैं
 दो० प्यारी उर अतिरोषलखि, अरु सखियनकी भीर ।
 तब वहँ ते बहराय कै, द्वार गये बलबीर ॥
 सो० शोच करत उर माहिं, भरे बिरह आनंद रस ।
 जाय सकत कहुं नाहिं, मनमें प्यारी डर डरत ॥

अथ मध्यममानलीला ॥

जबहीं श्याम गये द्वारे तन ❀ कियो मान प्यारी अपने मन
 कहति सखिन से देखो तुम अब ❀ बहुरि दोष देती मोकों तब
 ऐसे श्याम गुणन के आगर ❀ चोरत चित्त फिरत अति नागर
 ऐसे ख्याल मोहिं दिख रावैं ❀ जान देहु अब ह्यां जनि आवैं
 इहां काज उनको कह्यु नाहीं ❀ मैं बैठी अपने घर माहीं
 जाव तुमहुं अपने सब कामहिं ❀ यों कहि प्रिया गई उठि धामहिं
 नख शिख रोष भरी पिय प्यारी ❀ यौवन रूप गर्व उर भारी
 चली सखी बहु दशा निहारी ❀ द्वारे पर बैठे बनवारी
 कहति मुनो मोहन पिय हमसों ❀ प्रिया रोष कीनो अब तुमसों
 तुम्हरे आवत अति रिस पाई ❀ यह तुम कहा करी चतुराई

मुनत बात यह कुँवर कन्हई ❀ भये चकित अति गये भुराई
जान्यो मान कियो फिरि प्यारी ❀ भये विरह व्याकुल तन भारी
दो० तब सखियन हरिसों कह्यो, चतुर कहावत नाम ।

करत फिरत ऐसे गुणन, अब कव्यात कत श्याम ॥

सो० तुमहिं करायो मान, अटपट रूप दिखाय के ।

अब लागे पछितान, प्रथम विचार कस्यो नहीं ॥

यह मुनि धीरज कियो कन्हई ❀ तब इक युवती और बुलाई
तासों कहि सब बात जनाई ❀ दूती करि हरि ताहि पठाई
कहत श्याम तासों यह बानी ❀ बेगि मिटे जिय मान सयानी
दूती गई करति मन साधा ❀ बैठी तहां जाय जहँ राधा
प्यारी मान ठानि दृग बैठी ❀ हृदय रोष भौहँ करि ऐंठी
दूती कबू हाथ नहीं पावैं ❀ बिना भीत कह चित्र बनावैं
उरमें सौति शाल अति शालै ❀ नेक नहीं इत उत कहुं हालै
मनहीं मन दूती पछिताई ❀ अति आतुर म्वहिं श्याम पठाई
यह इत उत कहुं नाहिं निहारै ❀ कहा करों मन मांझ विचारै
तब कहि उठी दूतिका नारी ❀ मान कियो बृषभानु दुलारी
कहा करों मोहन अति कीन्ही ❀ उनकी बात आज मैं चीन्ही
ऐसे मैं उनको नहीं जानै ❀ अब कैसे उनसों मन मानै

दो० घरघरडोलत फिरत निशि, बोलत लगत न लाज ।

आय देखाये प्रात म्वहिं, टटके रति रँग साज ॥

सो० मैं आई अब बाज, जित चाहौ तितही फिरौ ।

उनको यहां न काज, राज करौ ब्रजमें सदा ॥

दूती मुनि प्यारी की बानी ❀ अंतर प्रेम रोष लपटानी
कह्यो यमुन ते मैं गृह आई ❀ सखी एक यह बात जनाई

तब मैं रहि न सकी घर माहीं ❀ भली प्रकृति हरिकी यह नाहीं
अब द्वारे ते हरि न दरत हैं ❀ पर घर जान कि सौह करत हैं
मन पछितात कहत घनश्यामा ❀ भूलेहु ऐसो करहु न कामा
तू जानि मान तजै सुनि मोसों ❀ यहै कहन आई मैं तोसों
अब समझे अरु हम समझावैं ❀ पर घर जान कि बात मिठावैं
अब मोकों यह बात लखाई ❀ जाहि न पर घर कुँवर कन्हाई
जब दूती यों बात बखानी ❀ द्वारे हैं हरि तब यह जानी
उमंगि उख्यो रस सुनि मन माहीं ❀ बाहर प्रकट कियो सो नाहीं
काहु के हरि द्वार खरे री ❀ कौने राखे जाय घेरी
तू रहि मान कहति रिस पावति ❀ यह हरि सों मैं ही कहि आवति

दो० लई तीय के हीय की, चतुर दूतिका जान ।

अति आतुर हरिपै गई, कहति आनकी आन ॥

सो० कही मनाऊं लाल, नेकु मरम नहि पाइये ।

दीठ न जोरति बाल, सूधे मुख बोलत नहीं ॥

अपनी सी बहुतै मैं भाषी ❀ सुनि उन मौन हृदय धरि राषी
नेक नहीं उत्तर मुख बोलै ❀ अति रिस कम्पत इत उत डोलै
मैं जु कही सो सुनहु कन्हाई ❀ भई बूंद बारू की नाई
भरि भरि लेत नैन दृग कोरै ❀ नहीं दरत बैठी मुख मोरै
तिरछी करि करि भौहन तानै ❀ कोटि कोटि अवगुण मुख गानै
ऐसी है वह ईठ तुम्हारी ❀ कहा बसीठ करै कोउ नारी
सुनहु रसिक बर कुँवर कन्हाई ❀ आपहि लीजै जाय मनाई
याको नाम भयो गढ़वाई ❀ लीजै ताहि सुरंग लगाई
यह सुनि बिरह भये बनवारी ❀ मुरझि परे घर मुरति बिसारी
सखी उठाय लये अँकवारी ❀ यों कत बिकल होत बलिहारी

नागर बड़े कहावत कौ जू ❀ धीर धरौ सुख पावत हौ जू
 बातन नेकु ताहि गहि पाऊं ❀ तौ तबहीं मैं तुमहिं मिलाऊं
 दो० धीरज दै घनश्याम को, दूती गई उताल ।

जाय कह्यो प्यारी निकट, परे श्याम बेहाल ॥

सो० सुख नहिं बोलत बैन, अति व्याकुल तेरे विरह ।

भरि भरि डारत नैन, कहा कहौं न सँभार कछु ॥

बारहि बार कहति पछितानी ❀ दैकर मुख जो कुँवरि सयानी

तूही प्रिया भावती हरिकी ❀ और नहीं कोऊ तू सरिकी

तेरोहि रसवश कुँवरकन्हाई ❀ तेरे तनक विरह कुम्हिलाई

तेरोहि रूप अधीन खरे री ❀ तेरोहि चितवन के चरे री

तेरे रंग बसन तन धारैं ❀ तेरे रंग को तिलक सँवारैं

चन्द्र बदन तेरो लखि गोरी ❀ मोर चन्द्र शिर मुकुट कियोरी

तेरोइ चरित सुनै अरु गानै ❀ तू मानै भावै जिन मानै

अति अनुराग श्याम को तेरो ❀ करि विचार नीके मैं हेरो

जो जाको नीके करि जानै ❀ सो तासों तैसे हित मानै

यहै प्रीति की रीति पियारी ❀ कहे तु बोलि लेहु गिरिधारी

तू कह गई कहन कह आई ❀ मैं जानति हरि तोहिं पठाई

मानति कौन कही अब तेरी ❀ जानतिहौं हरिचरित बड़ेरी

दो० अबधौं को तिनसों मिलै, जिन्हें परी यह वान ।

उर में राखत आन कछु, कहत करत कछु आन ॥

सो० हैं वे कपट निधान, बहुनायक पूरे गुणन ।

जिनको करत बखान, जिनवामनहैं बलिबल्यो ॥

मान किये अब नाहिं बने री ❀ देखु विचारि हिये अपने री

जाके गुणगण मुर मुनि मोहैं ❀ सो तेरे गुणगण माणि पोहैं

सनकादिक जेहि ध्यान लगावैं ❧ सो तेरे दरशन सुख पावैं
 शिव बिधि जाके द्वार खरे री ❧ सो प्रभु तेरे द्वार परे री
 जाके पद कमला कर लीन्हें ❧ सो प्रभु पद चिंतत मन दीन्हें
 अति आतुर नँदलाल हिये री ❧ सौँह करत हों शीश छुये री
 सुनु प्यारी अति हठ नहिं कीजै ❧ सर्वस वारि श्याम पर दीजै
 यह यौवन बर्षा को पानी ❧ गर्ब न कीजै याहि सयानी
 सब सुख हरि के संग किये री ❧ कृष्ण बिमुख कै काल जिये री
 पूरब पुण्य सुकृत फल तेरो ❧ भामिनि मान कहाँ कर मेरो
 हरिके रस रंग जो मन भीजै ❧ रूप मुधा जो नयनन पीजै
 सौँह चरण तेरेसी कीजै ❧ सुफल दरश दिश तौ यों जीजै

दो० बृथा जान नहिं दीजिये, हरिसों करिकै मान ।

उठति बैसकै दिनन कौ, सुनि तिय यहै सयान ॥

सो० हिलमिल करैं कलोल, मैं तेरे हितकी कहति ।

लेहि श्याम को बोल, परे द्वार बिलपत दई ॥

सोई चतुर सुलक्षण नीकी ❧ सदा भावती जो पियजीकी
 यौवन गुण द्युति अरु हित पीकी ❧ है सुन्दर तेरे शिर दीकी
 तेरे हित सब ब्रज की बाला ❧ कियो बुलाय रास नँदलाला
 तू तन श्याम प्राण री प्यारी ❧ परछाई अरु सब ब्रजनारी
 तोसी और नहीं ब्रज गोपी ❧ तेरेइ रूप बसे तिय ओपी
 सुन्दर श्याम सकल सुख दायक ❧ कहा भयो री वह शोभायक
 तुव समान वृषभानुलली को ❧ शशिहिकहावत कुमुद कलीको
 ऐसे जब दूती समुझाई ❧ तब बोली तिय कहु सुख पाई
 बादहि बकति आय मेरे घर ❧ बेधति ऐसे बचन सरासर
 उतकी इत इत की उत जाई ❧ मिलवत झूठी बात बनाई

जो चाहिहैं तो आपहि ऐहैं ❀ सौंह करें अरु हा हा खेहैं
 प्रीति रीति कहु समुझति नाहीं ❀ जोइ आवतिसोइ कहति बृथाहीं
 दो० जब प्यारी ऐसे कह्यो, सखी लियो तब जानि ।

मानत नाहीं लाड़िली, श्याम मनावो आनि ॥

सो० कह्यो सखी मुसकाय, नहिं मानत मेरो कह्यो ।

श्याम मनावैं आय, मैं जानी तब मानि है ॥

अरी मान वे बहुतें तेरे ❀ लगत मान नीकोई हेरे
 हाँसी खेल और को माई ❀ तुलत न तेरे बिस रुखाई
 ऐसे ही रहि जो लागि पाऊं ❀ यह मुख हरि को आन दिखाऊं
 पिय मन नूतन चोप बढ़ाऊं ❀ अति रस रूप अनूप उपाऊं
 यह कह गई श्याम पै आली ❀ कहत अजू सुनिये वनमाली
 मानति नाहिं मनायो प्यारी ❀ को जानै जिय में कह धारी
 हा हा करि मैं बहु समुझाई ❀ मुनतै अधिक होति रिसहाई
 तुम आतुर वैसी गति वाकी ❀ आवति जाति बीच मैं थाकी
 आपहि चलि लीजिये मनाई ❀ और भांति नहिं वनत बनाई
 बहै बयारि जैसिये जवहीं ❀ पीठ आड़िये तैसी तवहीं
 मोसी जो पठवो तुम कोरी ❀ नहिं मानत वृषभानुकिशोरी
 हौं तो कहति तुम्हारे हितकी ❀ पाई है कहु वाके चितकी
 दो० चले बनति है लाल अब, और यत्न नहिं कोय ।

काछ काछिये जौन हरि, नाच नाचिये सोय ॥

सो० आप काज महकाज, बड़े कहि गये बात यह ।

तजहु श्याम उरलाज, करि बिनती तिय सौं मिलहु ॥

चलो चले तुम्हरे हठ जैहैं ❀ देखत प्रेम उमँग उर ऐहैं
 सखी संग तब नवल बिहारी ❀ गये भवन बैठी जहँ प्यारी

आगे भये सकुचि के ठाढ़े ❀ अति आधीन प्रेम रस बाढ़े
 नेक नहीं इत उत कहुं डोलैं ❀ चित्र लिखे से मुख नहीं बोलैं
 यदापि लाल गाढ़े अति जीके ❀ सकल सयानप भूले नीके
 प्यारी देखि पियहि मुसकानी ❀ जिय डरते मोते यह जानी
 अति आनन्द भयो मन माहीं ❀ चुपही रही कह्यो कछु नाहीं
 मन मन कहत न अब उचटाऊं ❀ आदर करि पिय को बैठाऊं
 मोसों श्याम बहुत सकुचाने ❀ अब नहीं जैहैं धाम बिराने
 सहचरि कह्यो देख री प्यारी ❀ कब के ठाढ़े हैं गिरिधारी
 मान मनायो प्यारी पिय को ❀ तू पिय जिय जीवन है जीको
 प्राणहिं तनहिं रुसिबो कैसो ❀ यह कहुं भयो सुन्यों नहीं ऐसो
 दो० करि आदर बैठारि पिय, हँसि लै कण्ठ लगाय ।

घर आये नहीं कीजिये, ऐसी कत सकुचाय ॥

सो० है तू नागरि बाम, मन में कह ऐसी धरी ।

वे ठाढ़े हैं श्याम, तू मुख ते बोलति नहीं ॥

तब हँसि कह्यो भलो पिय वैसो ❀ अब जनि काम करौ कहुं ऐसो
 अबकी चूक नहीं मैं मानी ❀ और दिना को रहिये जानी
 मेरी सौंह करो मो आगे ❀ तजि सकोच बोलौ डर त्यागे
 कह्यो सौंह करि मोहन तबहीं ❀ और तियन पर जात न कबहीं
 नन्दभवन ते अबहीं आयो ❀ तुम्हरो रोष देखि सकुचायो
 ऐसी अब काहे को बोलौ ❀ अब नौकी करणी नहीं खोलौ
 अब जु काल्हिते अनत सिधारे ❀ तो तुमहीं जानोगे प्यारे
 अब हरि हँसि कर शिर पर राखे ❀ बारहिं बार सौंह करि भाखे
 सहचरि हँसि तब शंकिरही जू ❀ संखी आजते बात यही जू
 पान दिये प्यारी तब लालहि ❀ आई सखी सकल तोहि कालहि

सौह करी सबहिन यह जानी ❀ हँसे श्याम श्यामा मुसकानी
आदर करि सब को बैठायो ❀ निरखि युगल सबहिन मुखपायो
दो० कह्यो सखिन सों हँसिप्रिया, भरि आनन्द उछाह ।

तुमहूँ सब मिलि कै कह्यो, भये श्याम अब साह ॥

सो० लखिलखिसखीसिहाति, यहसुखलाडिलिलालको
बसे श्याम तहँ राति, चले आपने सदन को ॥

चले श्याम निज धाम सकोरे ❀ देखे ठाढ़े नन्द दुआरे
सकुचि फिरे घर जात लजाने ❀ प्रमुदा के घर जाय समाने
चकित बाल जब श्याम निहारे ❀ कहति लाल ये ख्याल तुम्हारे
कहां हते गमने कित पाहीं ❀ कबहूँ दरश देत हौ नाहीं
रहत कहां हौ सदा लुभाने ❀ आइ परे इत कहां भुलाने
कहौ कहा हौ कछू डरे से ❀ आलस भरे जम्हात खरे से
बसे कहूँ निशि तिय सँग जागे ❀ नयन अंरुण अति रस रंग पागे
मलयज उरज आय उरधारे ❀ दै शशि मनहूँ उदित उजियारे
नैन कछू सकुचत से ऐसे ❀ शशि के उदय सरोरुह जैसे
पुतरी अलि उड़ि सकेन जानो ❀ उरभ रहे अंग गातन मानो
डगमगात से डग पग डोलो ❀ रससभगात शिंगार अमोलो
अंग अंग शोभा के सागर ❀ धनि धनि जहां बसे अति नागर

दो० चले बिहँसि कहि श्याम तब, तरक करी तुम बात ।

समुभी सब हम आय हैं, आज तुम्हारे रात ॥

सो० सुनि हरषी जिय नौरि, पुलक गात आनन्द उर ।

ऐहँ आजु मुरारि, सांभ भये मेरे सदन ॥

प्राताहि तैं मन हरष बढ़ायो ❀ नौसत साज शिंगार बनायो
बार बार दर्पण मुख देखै ❀ भूषण वसन अंग अवरेखै

कदू सुत छवि आजत बेणी ❀ माँग सँवारति दधिसुत श्रेणी
भुवन जीय सुत रेख सँवारै ❀ धनपति पुरको नाम सुधारै
हीरावलि उरपर लै धारै ❀ श्याम मिलनसुखमनहिं बिचारै
रचि रचि सुमनन सेज बनावै ❀ केसर चन्दन अगर मिलावै
बहु नायक नँद सुवन कन्हारै ❀ गये अनत याको बिसरारै
बासर ऐसे कहत बिहानो ❀ एक याम निशिं को नियरानो
पखो शोच बिरहा अकुलानी ❀ श्याम न आये कहँधौं जानी
गये सांझही को कहि आवन ❀ अबहूँ नहिं आये मनभावन
कै धौं आवत हैं अब धाये ❀ किधौं परे कहुँ फंद पराये
वे बहु रमणी रमण बिहारी ❀ कै धौं मेरी मुरति बिसारी

दो० कुमुदाके घर हरि रहे, बढ़यो अधिक उर हेत ।

भीजे दोऊ प्रेम रस, अरस परस सुख लेत ॥

सो० सुदित श्यामसँगबाम, छिनसमबीततयामतिहि ।

याको युगुल सयाम, बीतत नम तारे गनत ॥

वैसे वहां याहि इहि रीती ❀ भयो भोर रजनी सब बीती
मनहीं मन युवती पछितानी ❀ मोसों श्याम कुटिलई ठानी
गयो मदन सुख बदन भुराई ❀ रहीं बैठि सदननि मुरझाई
आई तहां सहज इक आली ❀ देखी बिरह बिकल तन ग्वाली
लोचन जलज भरे जल ढारै ❀ मन मारे महि नखन बिदारै
बूझन लगी निकट सो जाई ❀ कहा भयो तोको री माई
आनँद रहित आज मुख तेरो ❀ देखत होत बिकल मन मेरो
सो तो बात नई है कैसी ❀ मोहिं सुनाय कहति किन तैसी
तब बोली मधुरे सुर बानी ❀ आंचर पोंछ नैन को पानी
कहा कहौं तोसों री आली ❀ कपटी कुटिल कठिन बनमाली

मोसों गये अवधि बदि माई ❀ अनताहि लुब्ध रहे कछुताई
 कियो नहीं मेरे गृह आवन ❀ भये सखी नैना दोउ सावन
 दो० ऐसे गुण हरिके सखी, निपट कपट की खानि ।

अब मोसों आवन कहा, बने लिये पहिंचानि ॥

सो० तोहि मिलैं जो आज, मेरी सों कहियो उन्हें ।

गहौ कछु जिय लाज, बचनन के सांचे बड़े ॥

उन्हें गई मैं कबू बुलावन ❀ आपहि अजिर गये करि पावन
 मोपै कृपा आय यह कीन्ही ❀ तोसों कहौ तवहि मैं चीन्ही
 काल्हि कहुं जागे तिय गोहन ❀ जात हते अपने घर मोहन
 द्वारे नन्दहि देखि डराने ❀ मेरे गृह आये सकुचाने
 डगमग पग दृग नैन भरे री ❀ बारहि बार जम्हात खरे री
 जब मैं कही कहां ते आये ❀ तब मोतन सम्मुख मुसकाये
 उत्तर नहीं दियो सकुचाई ❀ श्याम करी तब यह चतुराई
 कह्यो धाम मेरे निशि आवन ❀ आपहि श्रीमुख बचन सुहावन
 रैन जागि मैं सेज सँवारी ❀ तातें जरहुँ रिसहि की मारी
 इतनी कहत द्वार हरि आये ❀ ग्वालनि भीतर ते लखिपाये
 देखत ही रिस में महरानी ❀ कही सुनाय श्याम को बानी
 धन्य धन्य यह घरी बिधाता ❀ आये मेरे जू सुखदाता
 दो० ऐसे कहि चुप है रही, मुरि बैठी रिस गात ।

मधुरे बचनन सों कहति, निकट सखी सों बात ॥

सो० आये हैं करि गौन, चतुर नारि सँग निशि जगे ।

इनसों मिलिहै कौन, फिरत कहा कोऊ बही ॥

कृपा करहि अब इतहि न आवैं ❀ उतही जायँ जहां सुख पावैं
 सखी लखे सब अंग श्याम के ❀ जागे कहुँ निशि संग बाम के

कहुँ चंदन कहुँ बन्दन रेखा ❀ कहुँ काजूर कहुँ पीक सुबेखा
 लखि स्वरूप हरि तन मुसकाई ❀ मान कियो यह दियो जनाई
 मन मन शोचत कुँवर कन्हाई ❀ परे कठिन तियके फँद जाई
 मेरो नाम मुनतही ऐंठी ❀ मान कियो मोसों फिरि बैठी
 तबहीं श्याम करी चतुराई ❀ सैननहीं सों सखी बुलाई
 सो कहि ग्वालि जाति घर माई ❀ तू बैठी जो मान दिखाई
 अनतहि ठाढ़े भये कन्हाई ❀ तहां सखी सहजहि चलि आई
 निरखि बदन उनहीं हँसि दीनों ❀ सखी कह्यो तुम यह कह कीनों
 तब हँसि कह्यो सखीसों गिरिधर ❀ मैं मनाय लेहौं तू जा घर
 यह सुनि विहँसि गई कहि आली ❀ जाय मनाय लेहु बनमाली

दो० रसिकन के मणि जान मणि, बिद्यमानगुणराय ।

आपनहुँ तिहिते गये, तिनको दरश दिखाय ॥

सो० रही अकेली बाम, फिरि कै चितयो द्वारतन ।

तहां न देखे श्याम, अधिक शोच मनमें भयो ॥

तब जानी फिरि गये कन्हाई ❀ रही तिया मन में पड़िताई
 भई बिरह व्याकुल अतिनारी ❀ मिटि गयो मान हृदय दुख भारी
 कहति कहा मैं यह बुधि ठानी ❀ आवतही हरि सों गहरानी
 भीतर लौं आवन नहिं दीनो ❀ कहा क्रोध मोकों यह कीनो
 ज्यों त्यों करि मेरे घर आये ❀ सो मैं देखतही उचटाये
 बार बार ऐसे पड़िताई ❀ मनहीं रही मसोसा खाई
 श्याम गये निहचै जब जानी ❀ न्हान चली तब यमुना पानी
 अति व्याकुल मन कहुँ नमुहाई ❀ कोऊ सखी न संग बुलाई
 पहुँची यमुना तुरत अन्हाई ❀ चली बहुरि घर को अतुराई
 भये श्याम मारग में ठाढ़े ❀ पांच बरष के द्वै छवि बाढ़े

आगे हैं नागरि सों बोले ❀ सुन्दर कोमल वचन अमोले
कहां जाति है री तू नारी ❀ चलु बोलत जाकी तू प्यारी

दो० बनहिं बुलाई श्याम त्वहिं, लेन पठाई मोहि ।
सुनत बचन चक्रित भई, रही वाल मुख जोहि ॥

सो० श्याम नाम सुनि कान, अति आनंद उरमें भयो ।
अगम चरितको जान, ब्रजवासी प्रभु कान्हके ॥

कर गहि लियो चली हरपाई ❀ गोप कुमार जानि गृह लाई
कहत श्याम बन धाम बुलायो ❀ या बालक को लेन पठायो
पूछौं याहि भेद वनको सब ❀ कहा कह्यो है हरि चासों अब
अति आनंद भयो मन बालहि ❀ अन्तहपुर लै गई गुपालहि
तहां चरित्र कियो नँदलाला ❀ भये तरुण सुन्दर ततकाला
भुज गहि लई हरषि उरलाई ❀ चक्रित भई नागरि सकुचाई
झाँड़िदेहु मनमुदित कहति तिय ❀ ऐसे चरित कन्त धनि धनि पिय
ऐसे हरि भामिनी मनाई ❀ सुख दै गये सदन मुखदाई
परम हरष मन भई गुवारी ❀ रैन विरह तन ताप निवारी
समुझि समुझिकै पियगुण मनमें ❀ पुनि पुनि हर्षति पुलकित तनमें
हरि ये चरित करत ब्रज डोलैं ❀ यशुमतिदिग बालकजिमि बोलैं
निज गृह गये सदा नँदलाला ❀ परमविचित्र श्याम के ख्याला

दो० ब्रजवासी प्रभुकी कथा, अति विचित्र सुखखान ।

कहत सुनत गावत गुणन, हरषत सन्त सुजान ॥

सो० ब्रजनायक घनश्याम, नटनागर गुणआगरे ।

ब्रजवासी सुखधाम, गोपीपति नँदलाड़िलो ॥

अथ गुरुमानलीला ॥

सखिन संग बृषभानु किशोरी ❀ चली न्हान प्रातहिं उठि गोरी
जाके घर निशि बसे कन्हाइ ❀ ता घर ताहि बुलावन आई
ठाढ़ी भई द्वार पर जाई ❀ कढ़े तहां ते कुँवरकन्हाइ
औचक मिले न जानत कोऊ ❀ रहे चकित इत उत ते दोऊ
फिरी सदन को तुरतहि प्यारी ❀ न्हान जान की सुरति बिसारी
भई बिकल तन रिस अति बाढ़ी ❀ रहिगई सखी निरखि सब ठाढ़ी
रहि गये ठाढ़े श्याम ठगे से ❀ सकुचाने उर शोच पगे से
जब देखे हरि अति मुरभाये ❀ तब सखियन भुज गहि समुभाये
उलटि भई सब हरिकी घाई ❀ दैकै बांह प्रिया जहँ ल्याई
देखी श्याम आय जहँ राधा ❀ बैठी मान दृढ़ाय अगाधा
रिसही के रस मगन किशोरी ❀ भई श्याम मति देखत भोरी
ठाढ़े चकित चित्त अकुलाहीं ❀ मुख ते बचन कहे नहिं जाहीं
दो० व्याकुललखिनँदलालको, सखियनकियोबिचार।

अब दोऊ जैसे मिलैं, करिये सो उपचार ॥

सो० अति रिस नारि अचेत, को सुनि है कासों कहैं।

इत ये धरत न चेत, परी रुठावन बात इन।

प्यारी निकट गई सब आली ❀ ठाढ़े पँवरि रहे बनमाली
कहत मान कीनो तैं प्यारी ❀ न्हान जान ते फिरी कहा री
तोहिं लखत हैं री गिरिधारी ❀ अतिही डरत न सुरति बिसारी
सुरद्धि परे धरणी अकुलाई ❀ तरु तमाल जनु गयो मुरभाई
तैं ऐसो चितयो कहू उनको ❀ नेरहु चैन रह्यो नहिं तिनको
तेरे नयन अरी अनियारे ❀ की धौं बन खरसान सँवारे
भौंह कमान तान यों मारे ❀ क्यों कर रखैं प्राण पियारे

घायल जिमि मुर्झित गिरिधारी ❀ अमिय बचन अब सींचु पियारी
 बहु नायक वे तू नहिं जानै ❀ तिनसों कहा इतो दुख मानै
 बाँह गहौ हरि को ढिग लावै ❀ अब वे निज अपराध क्षमावै
 गहत बाँह तुमहीं किन जाई ❀ मोसों कहा गहावत आई
 काल्हिहि सौह मोहिं उन दीनी ❀ आजहि यह करणी पुनि कीनी
 दो० देखि चुकी उनके गुणन, निज नैनन मुखपाय ।

तिन्हैं मिलावति मोहिं अब, बाँह गहावति आय ॥

सो० मिलौं न तिनसों भूल, अब जौलौं जीवत जियहुँ ।

सहौं बिरह की शूल, बरु ताकी ज्वाला जरोँ ॥

मैं अब अपने मन यह ठानी ❀ उन के पन्थ न पीऊं पानी
 कबहुँ अञ्जन नैन न लाऊं ❀ मृगमद भूलि न अंग चढ़ाऊं
 हस्त बलय पट नील न धारौं ❀ नैनन कारे धन न निहारौं
 सुनौं न श्रवणन अलिपिकवानी ❀ नीले तन परसों नहिं पानी
 सुनत प्रिया की बात सुहाई ❀ हर्षत ठाढ़े पँवरि कन्हाई
 सखी कहति यों हठ नहिं लीजै ❀ हरि सों ऐसो मान न कीजै
 तू है नवल नवल गिरिधारी ❀ यह यौवन जु रहै दिन चारी
 क्षण क्षण ज्यों कर को जल छीजै ❀ सुन री याको गर्व न कीजै
 नंदनंदन पिय शशि सुखकारी ❀ तू कर नयन चंकोर पियारी
 हतौ प्रेम धन तौ यह भारी ❀ सो अब कहि तें कियो कहा री
 कहति हती रूसों नहिं कबहीं ❀ सो अब रूसत है जब तवहीं
 सुनि हैं सुघर नारि जो कोई ❀ करि हैं हँसी प्रेम की सोई
 दो० मान कियो जो भाव तें, सो न भावतो होय ।

उर तें रिसवत प्रेम कत, अन्त भावतो सोय ॥

सो० लाख कहै किन कोय, पिय सनेह जो गाइ है ।

चतुर नारि है सोय, लियो प्रेम परचौ किनहुँ ॥

तुम वे एक न दोय पियारी ❀ जल ते तरंग होति नहि न्यारी
रस रसनों ओसकैन वैसो ❀ सदा न रहिये चाहिये तैसो
तजिअभिमानमिलाहिपिय प्यारी ❀ मान राधिका कही हमारी
सुमन रहत कह करति मनावन ❀ तुम आईहौ बात बनावन
बहुत सही बरिआई यातें ❀ सुरति दिवावति पिछली बातें
मोसों बात कहति हौ काकी ❀ जाहु घरन अब कछु है बाकी
को उनकी ह्यां बात चलावत ❀ हैं वे अब तुमहीं को भावत
तुम पुनीत अरु वे अति पावन ❀ आईहौ सब मोहिं मनावन
यह कहि रही रोषभरि भारी ❀ गई सखी ये जहां बिहारी
कह्यो जाय हरिसों अरुवाई ❀ आज चतुरई कहां गँवाई
बिन निज जांधन चलहिंललारे ❀ कैसे चहत कियो सुख प्यारे
हो मन मोहन तुम बहु नायक ❀ नागर नवल सकल गुण लायक

दो० मान तजै नहिं लाड़िली, थार्की सबै मनाय ।

बेगि यत्न कछु कीजिये, रचिये आप उपाय ॥

सो० रच्यो दूतिका रूप, तब मनमोहन आपही ।

करि तिय संग अनूप, गये जहां प्रिय मानिनी ॥

बैठे निकट सखी मिस जाई ❀ कहत श्रवण ढिग बात सुहाई
बन घनश्याम धाम तू प्यारी ❀ करि बैठी यों मान कहा री
मैं उत गई तोहिं नहिं पाई ❀ हरिकी दशा देखि फिरि आई
अति आरत बन कुंजबिहारी ❀ इकले खड़े गहे डुमडारी
तेरोइ नाम रत मुख माहीं ❀ और कछू तिनको सुधि नाहीं
देखत व्यथा भई म्वाहिं गाढ़ी ❀ चल तू होहि नेक ढिग ठाढ़ी
कुंजभवन ठाढ़े दोउ देखैं ❀ तब मैं नैन सुफल करि लेखैं

अब हरि कहत कृपा मोहिं कीजै ❀ जो बूझिये दण्ड सो दीजै
 अति आरत प्रीतम को लेरी ❀ हठ तजु हा हा कह सुनु मेरी
 तब कारण बृषभानु दुलारी ❀ मेरे पांय परत गिरिधारी
 अब मैं पांय परति हौं तेरे ❀ करु अपराध क्षमा हरिकेरे
 चाहत कियो श्याम को जोई ❀ उन्हें जान मोसों करि सोई
 दो० क्षण क्षण परत चरण पर, क्षण क्षण लेत बलाय ।

कहत प्रिया अब मानत जु, पुनि पुनि हाहा खाय ॥

सो० खिलिखिलिसखीसिहाति, चरितलखति नंदलालके ।

मनहीं मन मुसकाति, भरी प्रेम आनन्द रस ॥

तब चितयो प्यारी नैनन भर ❀ आयो उधरि लाल लीलाधर
 श्याम चतुर्द मोसों माड़त ❀ वे गुण तुम अजहूं नहिं छांडत
 इन छन्दन में मानति हौं जू ❀ नीके सब गुण जानति हौं जू
 रसवादिन मोको करि पाई ❀ वे बातें अब देहु भुलाई
 यह कहि बहुरि भई रिसिहाई ❀ रहे श्याम ठाढ़े सकुचाई
 गहैं ग्रीव पट अति आधीना ❀ जलके निकट दीन जनु मीना
 फिरि पौढ़ी दै पीठ श्याम को ❀ हृदय विरह दुख अधिक वामको
 कर आरसी अग्र लै धारै ❀ पट अन्तर हरि वदन निहारै
 रिसबश धरत नहीं मन धीरा ❀ तलफत हिये विरह की पीरा
 इत नागरि उत नागर ओऊ ❀ भली चतुर्द वाढ्यो दोऊ
 जिते जिते मुख फेरि पियारी ❀ तितही ढरि आवत गिरिधारी
 ज्वइ ज्वइ बात भावतिहि भावै ❀ सोइ सोइ बातें श्याम चलावै
 दो० करिहारे छरछन्द सब, छुवन न पावत छाहैं ।

हठछांडत नहिं लाडिली, हरि शोचत मनमाहैं ॥

सो० देखि श्यामको दीन, विरह विवश प्यारी निकट ।

सखियां परम प्रवीन, तब सब समुभावन लगीं ॥

लखु री कमलनयन तुव आगे ❀ कब के ह हा करत अनुरागे
तेरे भय तें कुँवर, कन्हाई ❀ आये तिय को रूप बनाई
मधुर मधुर बचनन बनवारी ❀ तोहिं मनावत हैं री प्यारी
हा हा करि अरु पांयन लागे ❀ कियो कहा चाहति है आगे
लखु हरि खड़े मलिन मुरभाये ❀ आदर नहिं चुकिये घर आये
वे तौ बन के भँवर बिहारी ❀ तोसी और बेलि को प्यारी
करि सनमान बिहँसि करि वैसो ❀ कीनो कहा निठुर मन ऐसो
पावत कहा मान के कीने ❀ कहा गमावति आदर दीने
होत कहा घूँघुट पट खोले ❀ कहा न मान तनक हँसि बोले
ऐसी कहुँ कीजियत है री ❀ प्रीतम छाँड़ि राखियत बैरी
निज बश मदनगुपालहि जानी ❀ ऐसी कहा अधिक इतरानी
सिखकी कहत अनसिखी आवै ❀ कहा तोहिं कोऊ समभावै

दो० जो नहिं मानति श्यामसों, मानहि रहिहै हाथ ।

तब अपने मन जानिहै, जब दहिहै रतिनाथ ॥

सो० ऐसे कहिहै कौन, मान प्रिया हम कहति हैं ।

त्रिभुवन ठाकुर जौन, सो तेरे बश है पखो ॥

ऐसो समय बहुरि नहिं पैहै ❀ सुनु री फिरि पाछे पछितैहै
यह यौवन है धन सपने को ❀ मान मनायो पिय अपने को
अब ये दिन रुसन के नाहीं ❀ प्रिया बिचारि देखु मनमाहीं
पावस ऋतु हि कियो री फेरो ❀ गरजत गगन भयो री घेरो
बोलत दादुर चातक मोरा ❀ चहुँदिशि करत पवन भकभोरा
बर्षत मेघ भूमि हित लागी ❀ नारि सकल प्रीतम अनुरागी
जे बेली ग्रीष्म ऋतु दाहीं ❀ ते हुलसीं तरुसों लपटाहीं

सरिता उमंगि सिन्धुको जाहीं ❀ मिलत सरसरी आपस माहीं
 भयो समय यह दिवस चारको ❀ नन्दनँदन पियसँग विहारको
 सुनि सखियनके वचन किशोरी ❀ उमँग्यो प्रेम रही रिस थोरी
 नख शिख कह्यो जाहु उठि ताके ❀ रस कर हाथ विकाने जाके
 सुख सों भलो मनावत मेरो ❀ रहत सबै अनहित चित, प्रेरो

दो० सांच बखानत जगत सब, विरद तुम्हारो लाल ।

गहे रहत मन तियनके, विहरि कह्यो यों बाल ॥

सो० भये प्रफुल्लित श्याम, विरह ताप तनको गया ।

हर्षि उठीं सब बाम, प्यारी मुख विहँसत निरखि ॥

जब बोले हरि दोउ कर जोरी ❀ तेरी सों वृषभानु, किशोरी
 तूही हित चित जीवन मोको ❀ सदा करत आराधन तोको
 तू मम तिलक तुही आभूषण ❀ पोषण तेरेइ वचन पियूषण
 तेरोइ गुण मैं निशि दिन गाऊं ❀ अब तजु मान हृदय सुख पाऊं
 कर जोख्यो विनती करि भाख्यो ❀ कहत शीश चरणन पर राख्यो
 यह सुनि कहु प्यारी मुसक्यानी ❀ तव बोली उठि सखी सयानी
 सुनहु श्याम तुम हौ रससागर ❀ रूप शील गुण प्रीति उजागर
 तुम तैं प्रिया नेक नहिं न्यारी ❀ एक प्राण द्वै देह तुम्हारी
 प्यारी में तुम तुम में प्यारी ❀ जैसे दर्पण ब्राह्म निहारी
 रस में परै बिरस जहँ आई ❀ होय परति तहँ अति कठिनाई
 अब कै हम सब देति मनाई ❀ परसौ प्यारी चरण कन्हाई
 अब स्थाय हौ जो गिरिधारी ❀ राम राम तौ बहुरि हमारी

दो० जब परसे प्यारी चरण, परम प्रीति नँदनन्द ।

छुट्यो मान हरषी प्रिया, मिट्यो बिरहदुखद्वन्द ॥

सो० उर आनन्द बढ़ाय, प्रेम कसौटी कसि पियहि ।

अवगुणमनबिसराय, मिलीप्रियाउठि श्यामसों ॥

हर्षि मिले दोउ प्रीतम प्यारी * भई सखी सब निरखि सुखारी
तब दोउ उबटि सखी अन्हवाये * रुचिर शिंगार शिंगारि बनाये
मधुर मिष्ट भोजन मन भायो * दोउन एकहि थार जिमायो
दिये पान अचवन करवाये * सुमन सुगन्ध माल पहिराये
लै बीरा अपने कर प्यारी * दीनो बिहँसि बदन गिरिधारी
तबहिं सुफल हरिजीवन जान्यो * परम हर्ष उर अन्तर मान्यो
मिलि बैठे दोउ प्रीतम प्यारी * तब सखियन आरती उतारी
अति आनन्द भरे दोउ राजें * अस परस निरखत छबि छाजें
पाये बश करि कुञ्जबिहारी * बिहँसि कह्यो तब पियसों प्यारी
सुनहु श्याम वर्णा ऋतु आई * रचहु हिंडोरो शुभ सुखदाई
है मन पिय यह साध हमारे * सब मिलि भूलहिं संग तुम्हारे
सुनि तिय बचन श्याम सुखपायो * ऐसे कहि हरि मान छुड़ायो

छं० तिय मान हरि ऐसे छुड़ायो भक्त हित लीला करी ।

निगम नेति अपार गुण सुखसिन्धु नटनागर हरी ॥

यह मान चरित पवित्र हरिको प्रेमसहित जो गावहीं ।

रहै मान तिनको जगत में अरु सन्तजन सुख पावहीं ॥

दो० राधा रसिक गोपाल को, कौतूहल रस केलि ।

ब्रजबासी प्रभुजनन को, सुखदकामतरु बेलि ॥

सो० सुफल जन्म है तास, जे अनुदिन गावत सुनत ।

तिनको सदा हुलास, ब्रजबासी प्रभुकी कृपा ॥

अथ हिंडोरा वर्णन लीला ॥

भक्त बश्य प्रभु कुञ्जबिहारी * भक्तन हित लीला अवतारी

सदा सदा भक्तन मुखदाई ❀ करत सदा भक्तन मनभाई
 प्रेम भक्त दृढ़ ब्रज की बाला ❀ भये वश्य तिन के नँदलाला
 जो जो सुख तिनके मन भावैं ❀ सो सो ब्रज में श्याम वनावैं
 समय समय के सुखद विहारा ❀ करें तियन सँग नंदकुमारा
 ग्रीष्म गत पावस ऋतु आई ❀ परम मुहावन जन मुखदाई
 श्रीराधा मनकी रुचि जानी ❀ तव हिंडोल लीला मन आनी
 यमुना पुलिन गये मनभावन ❀ बृन्दावन घन परम मुहावन
 सखिन सहित सोहति सँग प्यारी ❀ कोटिक करत मनोज विहारी
 अति आनंद उमँगि चहुँ ओरा ❀ घुमड़ि रहे पावस घन घोरा
 जहां तहां बकपांति उड़ाहीं ❀ चपला चमक चपल घनमाहीं
 गरजत मधुर श्रवण मुखदाई ❀ तैसिय बहत समीर मुहाई

दो० नाना रँग खग फूल फल, लगे लगन के चार ।

गजमुक्कन के भूमका, भालर भवा अपार ॥

सो० शोभितलता बितान, अतिउतंग तरुसुमनयुत ।

रहे पान मिलपान, विविधगगन मानहुँ जड़े ॥

कनक वरण मय भूमि मुहाई ❀ छवि हिंडोर नहिं वरन सिराई
 तापर रसिक छबीले दोऊ ❀ उपमाको त्रिभुवन नहिं कोऊ
 नन्दनँदन वृषभानु किशोरी ❀ गौर श्याम सुंदर छवि जोरी
 चले उमँग आनंद उर भारी ❀ निरखत छवि नभ मुर नर नारी
 मोरमुकुट पीताम्बर सोहै ❀ श्याम शुभग तन त्रिभुवन मोहै
 प्यारी अंग बैजनी सारी ❀ शोभित चहुँ दिशि चारु किनारी
 युगल अंग भूषण छवि छाये ❀ रुचि रुचि सखिन शिंगार बनाये
 उर स्तनन के हार बिराजैं ❀ सुमनहार अतिशय छवि छाजैं
 उत कुंडल इत तरवन की छवि ❀ रह्यो लजाय निरखि छविकोरवि

सखिगण क्षण तृण तोरि निहारे ❀ वारत प्राण रीफ उर डारे
करि उछाह ऊंचे सुर गावैं ❀ पिय प्यारी को हर्षि बुलावैं
ताल मृदंग बाँसुरी बीना ❀ बाजत सरस मधुर सुर लीना
दो० यह सुख सुनि ब्रजसुन्दरी, अपरसकलनवबाल ।

वृन्दावन भूलति कुँवरि, राधा अरु नँदलाल ॥

सो० चलीं सकल अतुराय, नवसतसाजिशिंगारतन ।

गृह कारज बिसराय, मनमोहन के रस पर्गी ॥

चुनकर पहिरि चूनरी सारी ❀ अरुण चहचही कोर किनारी
यूथ यूथ मिलि हरिपै आवैं ❀ तिन्हैं प्रिया पिय निकट बुलावैं
आदर बचन सप्रेम सुनावैं ❀ सब के मनके साध पुरावैं
एकन लेत निकट बैठाई ❀ एकै चढ़त पीठपर धाई
एक बुलावति अति सचुपाई ❀ गावत एक मलार मुहाई
राग रंग सुख बराणि न जाई ❀ रह्यो जाय सुखनिधि बन जाई
युवति वृन्द चहुँओर मुहाई ❀ भूषण भीर बराणि नहिं जाई
बसन सुगंध सने बहु रंगा ❀ भँवर भीर छाँड़त नहिं संगी
हरिमुखशशिलखिशुभगअभंगा ❀ उमँगि मनो छवि सिंधुतरंगा
देत चावभरि जब झक भोरा ❀ होति अधिक छवि बढ़त हिंडोरा
ऊंचौ मिलत दुमन सों जाई ❀ लेत तहां ते सुमन कन्हाई
ज्यों ज्यों पैग बढ़ति अति भारी ❀ त्यों त्यों डरति कुँवरि सुकुमारी
दो० राखिराखि सखियनसहित, सौँहदिवावति जात ।

जबनहिंसकत सँभारितन, तब पियसों लपटात ॥

सो० हँसति परस्पर बाल, तब हिंडोर राखति पकरि ।

करत चरित्र रसाल, पिय प्यारी अति रसमरे ॥

इक उतरत इक चढ़त हिंडोरे ❀ इक आतुर चढ़िबे को दौरे

एक कहति मोहिं देउ उतारी ❀ एक चढ़न को विनवति नारी
 सब के मनकी रुचि हरि राखैं ❀ मधुर वचन सवसों हँसि भाखैं
 कबहुँ अकेले भूलत मोहन ❀ गावति युवति सवन भिलि गोहन
 कबहुँ युवतिन देत चढ़ाई ❀ आप भुलावत कुँवर कन्हाई
 कबहुँ मुरली मन्द बजावैं ❀ कबहुँ संग सवन के गावैं
 बिच बिच देत कोकिला ठेरै ❀ रहैं सवन घन भुकि अति नेरै
 परत फुहार मन्द श्रमहारी ❀ बहति त्रिविध अति मुखदवारी
 चातक पिय बिय रत पुकारी ❀ राधा नाम रत वनवारी
 ऐसे गोपिन सों मन मोहन ❀ करत केलि कौतुक हल गोहन
 अति आनन्द सवन उपजावैं ❀ निराखि सुमन सुरगण वरपावैं
 जय जय जय धुनि बोलत बानी ❀ धन्य धन्य ब्रज कहत बखानी

छं० कहत ब्रज धनि अमर अम्वर सकल मन आनँद भरे ।

कहत मन मन यहै चाहन हम न विधि ब्रज डुम करे ॥

भक्त हित प्रभु अज सनातन ब्रह्म तनु धरि अवतरे ।

बरणि कापै जाय सो मुख करत जो नित ब्रज हरे ॥

दो० नित लीला आनन्द नित, नित नव मंगल गान ।

धनि जिनके चित रहत नित, ब्रजवासी प्रमुध्यान ॥

सो० हरि के चरित रसाल, जे सप्रेम गावत सुनत ।

रहत सदा नँदलाल, ब्रजवासी तिनके निकट ॥

अथ फाल्गुन वर्णन लीला ॥

जय जय जय श्री नित्य विहारी ❀ नित्यानँद भक्तन हितकारी

ब्रह्म रूप अवतरे मुरारी ❀ नित नव करत विहार विहारी

नित्य नवल गिरिधर अभिरामा ❀ नित्य रूप राधा ब्रज बामा

नित्य रास जल केलि विहारी ❀ नित्य मान खण्डन व्यवहारी

नित्य कुंज सुख नित्य हिंडोरा * नित्य प्रेम सुख सिंधु हिलोरा
नित्य नवल हित हरि सँग जोरी * नित्य नवल छवि मन्मथ चोरी
नित बृंदावन घन सुखदाई * सदा बसंत रहत जहँ छाई
सदा सुमन नव पल्लव डारी * सदा त्रिविध मारुत सुखकारी
सदा मधुप मधुमाते डोलैं * कोकिल कीर सदा कल बोलैं
सुनि सुनि नारि हृदय सुख पावैं * मनहीं मन अभिलाष बढ़ावैं
वारि वारि कहि पिय सुख पावैं * ऋतु बसन्त आई समुझावैं
फागु चरित अति साध हमारे * खेलैं मिलि सब संग तुम्हारे

दो० जब बनिता हरिसों हरषि, कहति सुनहु ब्रजराज ।

देखहु बन शोभा निरखि, अतिहि बिराजत राज ॥

सो० खेलतहैं दोउ फाग, मानहुँ मदन बसन्त मिलि ।

लखि उपजत अनुराग, यहरस अधिक सुहावनो ॥

हुमन मध्य टेसू तरु फूले * करत प्रकाश अग्नि सम तूले
मानहुँ निज निज मेरु सुहाई * हरषि सबन होलिका लगाई
कुञ्ज कुञ्ज कोकिल सुख दानी * बोलत बिमल मनोहर बानी
निर्लज भई मनु कुल की नारी * गावत गृह प्रति चढ़ी अटारी
नाना खग केकी शुक नारी * जहँ तहँ करत कुलाहल भारी
मनहुँ परस्पर नर अरु नारी * देत दिवावत हैं सब गारी
प्रफुलित लता बिलोकति जितहीं * अति मधुमत्त जात चलि तितहीं
मानहुँ गणिका देखि सुहाई * मतवारे लपटत हैं धाई
पुहुप पराग अबीर सुहाई * लिये समीर फिरत हैं धाई
संयोगिन रस अनरस बिरहिन * कर छाँड़त मन भायो सबहिन
नव पल्लव दल सुमन सुहाये * बरन वरन बिटपन छवि छाये
जनु रतिराज संग छवि बाढ़े * बहुगँग भरे लसत जनु ठाढ़े

दो० भँवर गुंज निरभर शबद, बजत दुन्दुभी चारु ।

रची मण्डली मदन जनु, जहँ तहँ विविध विहारु ॥

सो० बृंदा बिपिन समाज, कहँ लगि बरणि बखानिये ।

कान्ह तुम्हारे राज, क्रीड़त सब आनँद भरे ॥

रचहु फाग मुख अब नँदलाला ❀ कर जोरे बिनवति सब बाला

सुनि गोपिन के बचन कन्हाई ❀ रची फागु लीला सुखदाई

बिहँसि कह्यो तब श्रीगिरिधारी ❀ सजहु समाज जाय तुम प्यारी

हमहँ सखन संग लै आवैं ❀ फागु रंग ब्रजमाहिं मचावैं

यह सुनि मुदित भई ब्रजबाला ❀ गये सदन को मंदनगोपाला

सखाबृन्द सब श्याम बुलाये ❀ सुनत सकल आतुर जुरिआये

हँसि हँसि उन्हें श्याम समुभायो ❀ आयो फागुनमास सोहायो

भैया हो सब खेलैं होरी ❀ भरो अवीर गुलालन भोरी

यह सुनि ग्वाल बाल अनुरागे ❀ होरी साज सजन सब लागे

कंचन कलश अनेक सुहाये ❀ केसर टेमू रंग भराये

अतर अरगजा विविध विधाना ❀ लिय सुगन्ध भाजन भर नाना

पीत अरुण बर बसन बनाये ❀ नेह सुगन्धन अति मन भाये

दो० अंग अंग भूषण ललित, उर सुमननकी माल ।

नैन सैन शोभा हरण, बनी मण्डली ग्वाल ॥

सो० पान भरे सुख लाल, उसकाये बाहँ भँगा ।

फेटन भरे गुलाल, पिचकारी कञ्चन वरन ॥

फेंटा पीत श्याम शिर सोहै ❀ तुरा की भलकन मन मोहै

तापर मोर चन्द्र छवि न्यारी ❀ कोटि चन्द्र रबिछवि बलिहारी

केसर खौर भाल शुभकारी ❀ बीच तिलक की रेख शिंगारी

भौहँ कुटिल नयन रतनारे ❀ कुण्डल भलक केश धुंधारे

चारु कपोल मनोहर नासा ❀ मंद हँसनि द्युति सदन प्रकासा
अधरै अरुण चिबुक छबिसीवां ❀ कटि अतिललित कंबुकलश्रीवां
भँगा भीन रँग पीत मुहायो ❀ शोभित तनु छबिसों लपटायो
घेरदार संजाफ जरीकी ❀ भ्रमकिरही छवि उमँग भरीकी
तैसिय कमल चरण पर पनहीं ❀ कंचन मणिमय मोहत मनहीं
कर चूड़ामणि जटित अँगूठी ❀ लसत अँगुरियन भांति अनूठी
बाहु बिजोदा जटित स्तनको ❀ चन्दन चित्रित श्यामल तनको
भलकत भीन भँगाके माहीं ❀ सोछवि कहत वनत मुख नाही

दो० कटि पर पट पीरो कसे, कनक किनारे चार ।

तापर खोंसे मुरलिका, उर मुक्कन के हार ॥

सो० तापर ललित विशाल, माल गुलाब प्रसून की ।

चितवन हँसन रसाल, बन्यो छैल नँदलाडिलो ॥

बन्यो यूथ सब रंग रँगिलो ❀ मधि नायक नँदनंद छबीलो
खेलत श्याम चले ब्रज होरी ❀ उड़त अबीर गुलालन भोरी
बाजत ताल मृदंग सुहाई ❀ डफ मुहचंग बीन सहनाई
और नगारन की कल जोरी ❀ बीच बीच मुरली सुर बोरी
कोउ नाचै कोउ भाव बतावै ❀ होरी गीत मिले सुर गावै
ब्रजबीथिन बीथिन सब ढोलै ❀ हो हो होरी मुखते बोलै
मिलत गलिनमें जो नरनारी ❀ बचत नहीं दीन्हे बिन गारी
अबिर गुलाल तासु पर डारै ❀ भरि भरि पिचकारिन रँग मारै
बोलत होरी बचन सुहाई ❀ करि छाँड़त सब मनकी भाई
गोरस के रस माते ढोलै ❀ घरन घरन के फरका खोलै
जो कोउ भाजि रहति घर बैठी ❀ बरिआई आनत तिहि पैठी
अटन चढ़ी देखै ब्रजनारी ❀ छजन ते छूटहि पिचकारी

दो० गावत होरी गीत सब, देहिं दिवावहिं गारि ।

हारत अबिरगुलालकी, भोरी भरि भरि नारि ॥

सो० इत हरिके सँग ग्वाल, मुदित गुलाल उड़ावहीं ।

पिचकारिन के जाल, वर्षत भरि केसरिललित ॥

होत कुलाहल आनंद भारी ❀ रंगे अवीरन महल अठारी

हैं गइ ब्रजकी बीधिन बीचा ❀ अबिर गुलाल कुंकुमा कीचा

ऐसे संग लिये सब ग्वाला ❀ करत फागु कौतुक नँदलाला

भीज रहे केसरि रंग वागे ❀ नखते शिख गुलालते पागे

आनंद भरे मुदित सब गावत ❀ गुनी जननके वाल नचावत

बरसाने को चले कन्हाई ❀ यह मुधि कुँवरि राधिका पाई

तुरत सखी सब बोलिपठाई ❀ सुनत सकल आतुर उठिधाई

नवसत सकल मनोरथ साजें ❀ वरन वरन वर वसन विराजें

बेंदी भाल विराजत रोरी ❀ मुख तँबूल तनकी छवि गोरी

होरी खेल सुनत सब चोपी ❀ आई प्रिया निकट सब गोपी

हँसिहँसिसबसों कहति किशोरी ❀ चलहु श्याम सँग खेलैं होरी

पकरि आज मोहन को लीजै ❀ मनभाई तिनसों सब कीजै

दो० ललितादिक ब्रजनागरी, मिलि सब सजो समाज ।

तिनमें श्रीकीरति कुँवरि, सबहिनकी शिरताज ॥

सो० परम रूपकी रास, गुणआगर नव नागरी ।

राजति भरी हुलास, मन मोहन मन भावती ॥

नख शिख लों सब सुन्दरताई ❀ रही छाव छविपुंज निकाई

भूषण जाल लाल नग केरे ❀ शोभित अंगन सुभग घनेरे

मुखछवि बरणि सकै सो कोहै ❀ जाहि देखि मोहन मन मोहै

लसति नवलतन सुन्दर सारी ❀ केसरिया कीनी जरतारी

गुलगचको लहँगा चटकीलो * घेरघनो अति छविन छबीलो
कङ्कण किंकिणि नूपुर बाजैं * होरीसाज सजे सब राजैं
रंग गुलाल संग सब लीनो * सोहति युवति यूथ रँग भीनो
मृगमद केसर मेल मिलाई * मथि मथि लीने कलश भराई
हाथन में लीने नवला सी * चलीं श्यामघनपै चपला सी
युवति यूथ लै संग किशोरी * गही जाय आगे ब्रजखोरी
उत ते आये मदन गोपाला * सोहत संग भीर नवबाला
देखि परस्पर आनँद बाढ़्यो * दुहुँदिशि गोल भयोरुपिठाढ्यो

दो० भरि भरि पिचकारी हरषि, इत ते धाये ग्वाल ।

नवलासी लैलै करन, सिमिटि चलीं उत बाल॥

सो० भौ भट भेरो आन, परी मार पिच रंग की ।

करत न कोऊ कान, मन भाई सुख तें कहत ॥

भरि भरि मूठि गुलाल चलावैं * हो हो होरी बचन सुनावैं
केसरि रँग लै लै पिचकारी * तकि तकि मारतपिय अरु प्यारी
दुहुँ दिशि चलत भराभर जेरी * भइ गुलाल की घटा अँधेरी
आय परत जाके जो बेड़ैं * सो केसरि के कलश उलेड़ैं
लगि लगि रहे चीर अंगन सों * पहिचाने नहिं परत रँगनसों
मुख शोभा कछु कहति न जाई * रही गुलाल भलक छबिछाई
कवि उपमा कहि कहा बखाने * शशि सरोज दोऊ सकुचाने
सकुच रहित गारी सब गावैं * दुहुँदिशि लै लै नाम चुकावैं
बाजत बीन रबाव तँबूरा * ताल पखावज ढोलक तूरा
नवला सी चपला सी गोरी * मारत ग्वालन कहि कहि होरी
यक भागे यक ढूँढ़न लागे * एक अबीर डारि मुख भागे
मच्यो खेल रँग रस अति भारी * सखियन बोलि कह्यो तव प्यारी

दो० बल बल कर कछु भेदसों, मोहन पकरे जाय ।

आंखआंज मुखमीडि तब, आंड़यो हहा कराय ॥

सो० हैं अति लंगर कान्ह, ऐसे ये नहिं मानिहैं ।

बसन चुराये आन, लेहिं दाँव सो आपनो ॥

तब यकतिय हलधरवपु काँड़यो ❀ चली ओढ़ि नीलांवर आँड़यो
निकसि यूथ तें हैकै न्यारी ❀ निकसी जित ठाढ़े वनवारी

हरि जान्यो आये बलदाऊ ❀ चले अकेले लेन अगाऊ

गये निकट ताके हरि तबहीं ❀ धरे जाय औचक तिन तबहीं

आई धाय और सब नारी ❀ लीने पकरि श्याम अँकवारी

हँसिहँसि कहत सकल ब्रजवाला ❀ ढोठो बहुत दई तुम लाला

सो फल आज तुम्हें सब देहैं ❀ दाँव आपनो नीको लेहैं

ठाढ़े हँसत दूर सब ग्वाला ❀ कहत गये पकरे नँदलाला

हँसति कुँवरि राधा दुर ठाढ़ी ❀ पियमुख निरखि सकुच उर बाढ़ी

किनहुँ लियो पीतपट छोरी ❀ काजर दियो किनहुँ बरजोरी

काहू बेनी शीश सँवारी ❀ मुख गुलाल लावति कोउ नारी

काहू उर अरगजा लगायो ❀ काहू रंग शीश ढरकायो

दो० गये छूटि मोहन तबै, मोहन चले पराय ।

आय मिले निज सखन में, रहीं नारि पछिताय ॥

सो० कर मीजत पछितात, कहत परस्पर बाल सब ।

भली बनी थी घात, दाँव लेन पाई नहीं ॥

गये आज तुम भजि नँदलाला ❀ जैहौ कहां काल्हि गोपाला

करि राखी जैसी तुम हमसों ❀ सो हम दाँव लेहिंगी तुमसों

पीताम्बर अपनो यह लीजै ❀ पठै ग्वाल काहू को दीजै

कै आपही आय लै जाहू ❀ अब हम नहीं पकरि हैं काहू

हँसत सखा सब तारी दैकै * बेनी छोरत हैं कर लैकै
कहत जाहु फिर कुँवर कन्हई * पीताम्बर लै आवहु जाई
भाजत हार हिये ते दूटै * पीताम्बर गहने दै छूटै
तबहिं कह्यो हरि नन्द दुहाई * अबहिं पीतपट लेत मँगाई
सखा एक हरि निकट बुलायो * युवति बेष करि ताहि पठायो
गयो सुमिलि युवतिन के माहीं * हँसत जाय ठाढ़ो पट पाहीं
कहत देहु पट धैं दुराई * अब नहिं पावहिं कुँवर कन्हई
अब यह पट हरिको तब देहैं * दाँव आपनो जब हम लेहैं

दो० ऐसी कहि पट लैलियो, आयो चमकि गुवाल ।
फेख्यो कर सों श्यामलै, चकित भई सबबाल ॥

सो० लखि हरिकी चतुराय, भई थकित ब्रजबाल सब ।
धिरवत कहत सुनाय, भली बनाई आज तुम ॥

गये आज बचि करि चतुराई * अब बरि हैं जो बचहु कन्हई
अब तो लाग लगी है हमसों * जबलगि दाँव लेति नहिं तुमसों
पकरि नचावहिं तुमहिं बिहारी * तब कहिहौ हमको ब्रजनारी
कहत श्याम अब भये सयाने * इन बातन कछु भय नहिं माने
जान लियो मैं कपट तुम्हारो * अब तुम कह कर सकत हमारो
अबहीं ग्वालन देहुँ लगाई * छांड़ौ अपनी बिनय करवाई
नेक कानि मानत हौं तिनकी * सखी कहावतिहौ तुम जिनकी
यह सुनि तब युवती मुसकानी * कहा करतहौ श्याम सयानी
तुम्हें नन्दकी सौंह कन्हई * जो नहिं बिनय करावहु आई
सखन सहित तब मोहन करषैं * लै लै पिचकारिन रँग बरषैं
उत सब युवती हो इकठौरी * लै लै नवला सी सब दौरै
दियो सबन को मारि हटाई * भाजि चले तब कुँवर कन्हई

दो० भाजे भाजे कहत सब, तारी दै ब्रजवाल ।

जो तुम जाये नन्दके, ठाढ़े रहौ गुपाल ॥

सो० फिरे बहुरि घनश्याम, सखावृन्द सब फेरिकै ।

शिथिलकरी ब्रजवाम, झोरिनमारिअवीरकी ॥

ऐसे खेलत मिलि रस होरी ❀ इत मोहन उत कुँवरि किशोरी

गोपी ग्वाल संग सब लीने ❀ मोहन सकल रंग रस भीने

कबहुँ परस्पर गावत गारी ❀ कबहुँ करत रसवाद विहारी

कबहुँ अवीर गुलाल उड़ावै ❀ कबहुँ रंग सलिल वरपावै

अरस परस छवि निरखत दोऊ ❀ परमानन्द मगन सब कोऊ

चढ़े विमानन नभ सुर देखै ❀ जन्म मुफल ब्रजको करि लेखै

पुनि पुनि हर्ष सुमन वर्षावै ❀ जै जै करि प्रभु को यश गावै

ऐसे श्याम रंग रस राख्यो ❀ ललिता आय बीच तव भाख्यो

आज श्याम तुम औचक आये ❀ हम काहू जानन नहिं पाये

बहुत करी तुम आय ढिठाई ❀ भई सांभ अव कुँवर कन्हाई

काहि प्रात है वार हमारी ❀ देखैगी मनुसाय तुम्हारी

ऐहँ नन्दगाँव लौ प्यारी ❀ रहिहौ सजग लाल गिरिधारी

दो० प्यारी करते पानलै, दीने सखी सुजान ।

प्रातअवधिबदि खेलकी, राख्यो दुहुँदिशिमान ॥

सो० घर आये घनश्याम, सखन संग गावत हँसत ।

गई प्रिया निजधाम, सखिन सहित आनँदभरी ॥

परमानन्द सकल ब्रजनारी ❀ कृष्णकेलिसुख की अधिकारी

लोक लाज को भय नहिं मानै ❀ कृष्ण विलास सदा उर आनै

श्रीराधिका कुँवरि सुख दाई ❀ प्रात सखी सब बोलि पठाई

कियो विचार सदन मिलि गोरी ❀ नन्दगाँव खेलै चलि होरी

मिलि मोहन सों यह सुख कीजै ❀ फगुवा नन्दमहर सों लीजै
सामा सकल खेलकी लीनी ❀ रंग गुलालन सों बहु कीनी
मथि मथि विविध सुगंधन लीन्हे ❀ भांति अनेक अरगजा कीन्हे
भरि भरि भाजन कनक सुहाये ❀ अमित सुगंध न जाहिं गनाये
लै काँवरिन अनेक अपारा ❀ चले संग सजि सुभग शिंगारा
ग्वालिन पोचन गर्ब गहेली ❀ श्रीराधा सँग चलीं सहेली
कुंकुम उबटि कनक तन गोरी ❀ रूपराशि सब नवलकिशोरी
एक बैस सुन्दर सब राजै ❀ निरखत कोटि मदनतिय लाजै

दो० नवसत साजि शिंगार तन, अंग अंग सब ग्वारि ।

चन्द्रावलिलललितादिसब, अमितगोपसुकुमारि॥

सो० को कबि बरणै पार, प्यारी सब नँदलालकी ।

शोभा अमित अपार, उपमा को त्रिभुवन नहीं॥

सुमन सुगंधन गूंधी बेणी ❀ लटकत कनक भूषी छवि श्रेणी
मोतिन मांग बनी अति नीकी ❀ केसरि आड़ जड़ाऊ टीकी
कुटिल भौंह अलकै घुँघुरारी ❀ मन मोहन मन मोहन हारी
खंजन नैन मधुप मृगहारे ❀ अंजन रेख सुभग अनियारे
श्रवणन तरवन रविसम ज्योती ❀ नकबेसर लटके गजमोती
दशन कुंद बिबाधर सोहै ❀ चिबुक नीलकण्ठ छवि मन मोहै
कंठ कपोत मोति उर हारा ❀ जनु युग गिरिविच सुरसरिधारा
कुच चकवा मुख शशि अम भूले ❀ बैठे जुरि मानहुँ दुहुँ कूले
कर कंकण चरी गजदंती ❀ नख मणि माणिक भेटत कंती
नाभी हृदय कहा कबि बरनै ❀ कटि मृगराज लेत जनु निरनै
चरणन नूपुर बिछिया बाजै ❀ चाल मराल चलत कल राजै
लहँगा कसब पीत रंग सारी ❀ चमक चह्नांदिशि लाल किनारी

दो० नखशिख सब शोभा भरी, बनी छबीली बाम ।
तिनमें श्रीराधाकुँवरि, राजत अति अभिराम ॥

सो० लई सबन गहि हाथ, पीरे सुमनन की छरी ।
होरी हरि के साथ, नंदगांव खेलन चलीं ॥

प्रेम प्रीति के स बश पागीं * नंदनंदन पियकी अनुरागीं
बाजे सुघर बजावैं गोरी * गावहिं कोकिल कंठ निहोरी
करति केलि कौतुक मन माहीं * अविर गुलाल उड़ावत जाहीं
लीनो घेर नंद गृह जाई * वसत तहां मनहरन कन्हाई
शोभित रूप लतासी गोरी * गावत फाग नंदकी पोरी
मुनि सुन्दर बर बाहेर आये * हलधर ग्वाल गुपाल बुलाये
एकते एक भई सब नारी * होली खेल मच्यो अति भारी
मृगमद कुंकुम चंदन घोरे * लै लै पिचकारी कर दोरे
गोपी ग्वाल भरे झक भोरी * अविर गुलालन मारहिं गोरी
उड़त गुलाल घटा घन छाई * महि केसरिकी कीच सुहाई
बाजे सरस मधुर स्वर बाजैं * गान सुनत गए गन्धर्व लाजैं
पकरत एक एक छुटि भाजैं * गारी देत एक ताजि लाजैं
दो० हो हो होरी कहत सब, भरे परम आनन्द ।

सखिनसंग उतलाड़िली, इतै सखा नंदनन्द ॥

सो० औचक धाई बाम, गहन हेत नंदनन्द तव ।

गहि पाये बलराम, निकसि गये हरि भाजिके ॥

अति निशंक सब ब्रजकी गोरी * ता में अवसर पायो होरी

भरि भरि केसरि रंग कमोरी * लै लै हलधर के शिर ठोरी

अविर उड़ाय अंधरो कीनों * ललिता गहि दृग काजर दीनों

व्यंग बचन सब कहत मुनाई * लेहु रोहिणी मात बुलाई

हास बिलास बिबिध कहि गावैं ❀ इत उत बल कहूँ जान न पावैं
 फगुआ मनभावतो मँगाई ❀ हलधर छाँड़े बिनय कराई
 हँसत सखन मिलि कुँवर कन्हारि ❀ आये दोऊ आँख अँजाई
 तब हलधर दुचिते हरि कीने ❀ युवतिन धाय श्याम गहि लीने
 सिमटे सखा छुड़ावन धाये ❀ युवतिन से हरि छुटन न पाये
 लै लै नवलासी नव बाला ❀ दिये हृदय मारि सब भूवाला
 श्यामहिं जीति यूथ में लाई ❀ भई सवन के मनकी भाई
 रस लंपट नँदनन्द कन्हारि ❀ दीनों आपुन आनि गहाई

दो० लै आई प्यारी निकट, हँसति कहति ब्रजबाल ।

कहिये अब कैसी बनी, बहुत करत हौ गाल ॥

सो० एक कहति मुसकाय, बसन हरेते आपुही ।

हमहूँ बसन छुड़ाय, लेहिं दाँव अब आपनो ॥

कान्ह कछो करिहौ कह मेरो ❀ सोई पाय भयो अब नेरो
 ऐसे कहति रूप अनुरागी ❀ मुरली छीन बजावन लागी
 एकनि लियो पीतपट छोरी ❀ एक रंग गागरि लै दोरी
 हरिके हाथ गहे चन्द्रावलि ❀ कजल लै आई संजावलि
 ललिता लोचन आँजन लागी ❀ एक श्रवणलगि कछु कहि भागी
 एक चिबुक गहि बदन उठावै ❀ एक गुलाल कपोलन लावै
 धेरि रहीं परिया की नाई ❀ करति सबै निज निज मन भाई
 काहू बेनी गूँध सँवारी ❀ काहू मोतिन मांग सुधारी
 पहिरावति लहँगा कोउ सारी ❀ काहू लै आँगिया उर धारी
 निरखि निरखि प्यारी मुसकाई ❀ राखत आपनि कृष्ण बड़ाई
 काहू बदन अप्रभू लीन्है ❀ नेकहु श्याम परत नहिं चीन्है
 बधू बधू कहि सबहिन गायो ❀ प्यारी निकट आनि बैठायो

दो० निरखिबदन प्यारी हँसी, श्याम हँसे सकुचाय ।

गहि प्यारी निजपाणि तब, दीनों पान खवाय ॥

सो० सखियाँ करत कलोल, गांठि जोरि आंचर दई ।

ब्रजमें रह्यो अडोल, यह जोरी युग युग सदा ॥

लीन्हे मध्य श्याम सब ग्वारें ❀ मगन भई अब वपु न सँभारें

पिय प्यारी मुखकी छवि जोहैं ❀ अरस परस दोऊ मन मोहैं

रंगन भरे रँगिले दोऊ ❀ त्रिभुवन छवि पटतर घट सोऊ

एक नैन की सैन मिलावैं ❀ एक युगल छवि लखि मुखपावैं

गावति एक महरिको गारी ❀ वज्रै मंजीरा डफ करतारी

भरि भरि मूठि गुलाल उड़ावैं ❀ ग्वाल निकट कहुँ लगन न पावैं

रही गुलाल घटा छवि आई ❀ फूली मानहुँ सांभ सुहाई

तब ललिता को यशुमति माई ❀ घर भीतर से वोलि पठाई

हँसिकै महरि बहुत सनमानी ❀ विनती करी बहुरि मृदुवानी

आज भई भोजन की चिरियां ❀ देखहु अब राधाकी बरियां

खान पान करि श्रमहि निवारो ❀ बहुरि खेलियो निकट सवारो

ल्यावहु अब लाड़िलिहि लिवाई ❀ कीरतिजी की सौंह दिवाई

दो० तब यशुमति पहुँचाधिकहि, ललिता चली लिवाय ।

सकुच जानि घनश्याम अति, छूटे हा हा स्वाय ॥

सो० हँसे ग्वाल मुख हेरि, तन शोभा देखत खरे ।

बलको लीनों टेरि, बन्यो आज अति सांवरो ॥

कहत सखा सब दै दै सोहन ❀ ऐसेहि चलौ नंद पै मोहन

चले भुजा गहि तहां लिवाई ❀ छवि अनूप वह बरणि न जाई

उत सब युवतिनके चित चोरे ❀ चले लाल इतते अति भोरे

अति छवि देखि हँसे नँदराई ❀ जननी मुनति दौरि तहँ आई

निरखि हरषि लीन्हे उर लाई ❀ अति आनंद हृदय न समाई
बार बार कर लेत बलैया ❀ किन यह कीनो हाल कन्हैया
ये ऐसी सब ब्रज की बाला ❀ सकुच हँसे मनहीं नँदलाला
तुरत श्याम सोइ बेष उताखो ❀ कटि पटपीत मुकुट शिर धाखो
युवतिन सहित कुँवरि श्रीश्यामा ❀ आई नंदमहरि के धामा
भूषण बसन नवीन बनाये ❀ यशुमति लै सबको पहिराये
अति सनेह बृषभानुदुलारी ❀ अपने हाथ शिंगार सँवारी
निरखि रूप प्रमुदित नँदरानी ❀ वारति राईनोन सिहानी

दो० बिबिध भांति मेवामधुर, और मिठाई पानि ।

सादर सबकी गोद में, भरे हरषि नँदरानि ॥

सो० रह्यो नन्दगृह बाय, होरी को आनंद अति ।

कहति यशोमति माय, फगुवा कहो सोदीजिये ॥

ललकि कह्यो औरै कछु नाहीं ❀ लेहैं कान्हर फगुवा माहीं
देखे बिन रहि सकहि तु उनको ❀ तौ मांगे देहैं हम तुमको
बाढौ बंश महर नँदराई ❀ चिरजीवहु बलराम कन्हाई
जिनसे यह सुख ब्रजमें लीजत ❀ यह अशीश सबही मिलि दीजत
अति आनंद मगन ब्रजबासी ❀ अष्टसिद्धि नव निधि सब दासी
गोपी ग्वाल भये अनुकूला ❀ न्हान चले यमुना के कूला
जहँ बर बिटप बिबिध रंग फूले ❀ गुंजत भँवर मत्त रस भूले
शीतल सुखद छांह छवि छाई ❀ फूल डोल तहँ रच्यो कन्हाई
भूलत रंग भरे पिय प्यारी ❀ गावत मिले गोप अरु नारी
ऐसे दूर खेल श्रम कीनों ❀ अति आनंद सबन को दीनों
तब यमुनाजल श्याम नहाये ❀ महिदेवन शिर तिलक बनाये
दियो दान तिनको नँदलाला ❀ वर्षत सुर सुमननकी माला

छं० बरषत माल प्रसून सुरगण निरखि छवि आनंद भरे ।
 श्रीनंदसुत सुखधाम पूरणकाम सब ब्रजजन करे ॥
 लूटि सुख रस फागको सब मुदित निज गृह गृह गये ।
 गोप बाल गोपाल बल निज धाम आये छवि छये ॥

दो० कियो जो फाग विहार हरि, शारद लहै न पार ।
 ब्रजवासी सो किमि कहै, लीला सिंधु अपार ॥

सो० जनमन के सुखधाम, चरित ललित गोपाल के ।
 गावत सुनत मुजान, ब्रजवासी जन रति लहत ॥

अथ सुदर्शनशापमोचनलीला ॥

पूरणब्रह्म कृष्ण भगवाना ❀ ब्रजविलास जो कीने नाना
 शिव विधि शारद नारद शेषा ❀ कहि नहिं सकहिं गणेश अशेषा
 कीने चरित रहस्य अपारा ❀ ब्रजयुवतिन मिलि रस शृंगारा
 साधन राखै काहु मन राखी ❀ करी सकल जो जाने भाखी
 ब्रजविलास रस केलि बड़ाई ❀ भांति अनेक मुनीजन गाई
 ब्रजवासी प्रभु सब गुण नायक ❀ जो कछु करहिं सो सबही लायक
 सखा संग सबको सुख दीनो ❀ मन भायो गोपिन को कीनो
 महारि नन्द पितु मात कहाये ❀ तिनके हेत देह धरि आये
 बालकेलि रस सुख करि भारी ❀ दियो परम आनन्द मुरारी
 गिरि धरि ब्रजजन सगरे राखे ❀ इन्द्रादिक सुर जै जै भाखे
 गाय बच्छ बनमाहिं चराये ❀ काली नाग नाथि लै आये
 करे चरित्र अनेक कृपाला ❀ भक्तन हित प्रभु दीनदयाला
 दो० भक्तन के हित लेत हैं, प्रभु युग युग अवतार ।

असुर मारि थापत सुरन, हरन भूमि भव भार ॥

सो० गावत संत अपार, यश पुनीत पावन करन ।

पूरि रह्यो संसार, करता हरता आप हरि ॥

इक दिन प्रभु भक्तन सुखदाई * नन्दहृदय यह मति उपजाई
चलिये आज सरस्वति तीरा * पूजन शंकर सकल अहीरा
लिये संग बलमोहन दोऊ * गोपी ग्वाल चले सब कोऊ
करत कुलाहल आनंद भारी * पहुँचे तहां सकल नर नारी
सरित पुनीत कियो अस्नाना * महि देवन दीनों सब दाना
देखि देवथल अति अभिमानी * सादर पूजे शम्भु भवानी
पूजा करत सांभ है आई * श्रमित भये सब लोग लुगाई
खान पान करि सहित हुलासा * कियो रैन तहँ वनमें बासा
सोये हरि हलधर सुखरासी * तब सोये सब ब्रजके बासी
आधीनिशि अजगर यक आयो * नन्दमहर के पग लपटायो
उठे पुकारि चौंकि नँदराई * आये ब्रजबासी सब धाई
अजगर देखि डरे सब कोई * लगे छुड़ावन छुटत न सोई
दो० हारे यत्न अनेक करि, सर्प न छोड़ै पांय ।

कृष्णकृष्ण करि नन्द तब, गुहराये अकुलाय ॥

सो० अति व्याकुल गये ग्वाल, बोले श्याम जगायकै ।

कह्यो महा यक ब्याल, लपटानो पग नन्दके ॥

सुनत उठे आतुर गोपाला * निकट जाय देख्यो सोइ ब्यालां
परस्यो ताहि कमल पद पावन * पाप शाप सन्ताप नशावन
छुवत चरण तिन लइ जमुहाई * धखो दिव्यतन बरणि न जाई
लाग्यो हाथ जोरि गुणगावन * जय जय जगतईश जगपावन
सब देवन के देव मुरारी * जय जय जय ब्रजगोपबिहारी
अपि अंगिरा शाप म्वहिँ दीनो * सो वह बहुत अनुग्रह कीनो

जातें प्रभु को दर्शन पायों ❀ जन्म जन्म को पाप नशायों
 ऐसी बिनती प्रभुहि सुनाई ❀ आयसु पाय चल्थो शिर नाई
 बहुरि नन्द को शीश नवायो ❀ देखि महर अति अचरज पायो
 पूंछयो जाय नन्द तब भेवा ❀ तुमतो दिव्यरूप कोउ देवा
 सर्प शरीर धख्यो क्यों आई ❀ सो सब हमसों कहौ बुझाई
 नंदवचन सुनि मन मुख पाई ❀ तब उन अपनी कथा सुनाई

दो० हौं यश गाहक श्याम को, नाम सुदर्शन होय ।

सुन्दर विद्याधरन में, मोते और न कोय ॥

सो० इकदिन ऋषिके धाम, गयों धरे अभिमान मन ।

कियों न तिन्हें प्रणाम, रूपद्रव्य के गर्व से ॥

ऋषि अंगिरा बड़े विज्ञानी ❀ जानि मोहिं जड़ अति अभिमानी
 दीनो शाप कोप करि एहा ❀ जाय होहु शंठ अजगर देहा
 ऐसे कह्यो मोहिं ऋषि जवहीं ❀ अजगर भयों तुरत में तबहीं
 देखि दुखित म्वहिं परमकृपाला ❀ भये बहुरि मुनिराय दयाला
 तब करि कृपा कह्यो यह मोहीं ❀ कृष्ण दरश है हैं जब तोहीं
 परसि चरणरज पाप नशैहै ❀ बहुरि आपनो तन तब पैहै
 ते पद आज परस सुखदाई ❀ भयों पुनीत रूप निज पाई
 जो पदरज ब्रह्मा नहिं पावैं ❀ शिव सनकादि सदा चित लावैं
 मुनि प्रसाद सो रज मैं पाई ❀ कहँलगि मुनिकी करों वड़ाई
 दीनदयाल जगत हितकारी ❀ संत समान कौन उपकारी
 ऐसे विद्याधर मुख मानी ❀ नन्दहि अपनी कथा वखानी
 बहुरि काल चरणन शिर नाई ❀ गयो लोक निज वह हर्षाई
 दो० नंदादिक आनन्द सब, महिमा देखि पुनीत ।

कहत परस्पर कृष्ण गुण, गई तहां निशि बीत ॥

सो० आये सब ब्रजधाम, प्रात होत आनन्दसौं ।

संग श्याम बलराम, प्रभु ब्रजबासीदास के ॥

अथ शंखचूड़बधलीला ॥

यक दिन सुन्दर मदनगोपाला ❀ श्रीबलदेव और सँग ग्वाला
दिवस अंत निशि समय सुहाई ❀ उंचित उड़प उड़गण छवि छाई
प्रफुलित चारु मालती सोहै ❀ कुसुद सुगन्ध पवन मन मोहै
गुञ्जत भँवर मत्त रसलोभा ❀ चले तहां देखन बनशोभा
ग्वालन मिलि गावत दोउ भाई ❀ कबहुं बजावत बेणु कन्हाई
ब्रजबनिता गण चहुंदिशि धेरे ❀ चलीं सुनत बंशी के टेरे
जिनके तन मन बसे कन्हाई ❀ मगन भई छवि लखि अधिकारी
पहुँचीं श्री बृन्दावन जाई ❀ गोपी ग्वाल संग समुदाई
बिहरत बनबिहार दोउ भाई ❀ गोपी ग्वाल साथ समुदाई
मन्द मन्द गति इत उत डोलैं ❀ मृदु मुसकाय लेत मन मोलैं
रूपराशि निधि छवि दोउ बीरा ❀ बैठे जाय यमुन के तीरा
पाछे सखा बृन्द सब सोहैं ❀ सम्मुख गोपी जन मन मोहैं

दो० करत सबै मिलि मुदित मन, भरे प्रेम रसमाहिं ।

भरे मगन उनमत्त जिमि, रही देह सुधि नाहिं ॥

सो० बाजत ताल मृदंग, बीन चंग मुरली मधुर ।

छाय रह्यो रस रंग, उठत तरंगें तान की ॥

प्रेम मगन सब घोषकुमारी ❀ हरिछवि निरखति मुरति बिसारी
शिथिल बदन कच शीश सुहाये ❀ बिह्वल तन मन श्याम सुहाये
को हम कहाँ नहीं कह्यु जाने ❀ नैन श्याम के रूप लोभाने
रही श्रवण मुरली धुनि छाई ❀ गृह वनकी कह्यु सुधि नहीं राई

चन्द्र बदन चपलासी गोरी ❀ हरिमुख नाद सुनत भई भोरी
 तहँ राक्षस औचक इक आयो ❀ शङ्खचूड़ नामी तिहि गायो
 सो वह धनद अनुग अभिमानी ❀ प्रभुप्रभाव नहिँ जान अज्ञानी
 देखतही बलराम कन्हई ❀ सब गोपिन लीनों अगुवाई
 घेर लेत जिमि गाय अहीरा ❀ उत्तर दिशि ले चलो अधीरा
 जब गोपिन हरि देखे नहिँ ❀ भयो चेत तब कहु मनमाहीं
 कही जाति हम काके साथी ❀ भई विकल जिमि परम अनाथा
 कृष्ण कृष्ण तब टेन लागीं ❀ महादुखित अति भयसों भारी

दो० सुनत श्रवण आरत बचन, उठि आतुर दोउ भाय।

अति समीप गोपीन के, तुरतहिँ पहुँचे जाय ॥

सो० मैं आयों हों धाय, मत डरपो तिनसों कह्यो।

अबहीं लेत छुड़ाय, तुम्हें मारि या दुष्टको ॥

शङ्खचूड़ फिरि कै तब देख्यो ❀ काल मृत्यु सम दुहुवन पेख्यो
 भयो त्रसित तब मूढ़ अभागो ❀ युवतिन छाँड़ि जीव लै भागो
 गोपिन पास राखि बल भाई ❀ ता पावे पुनि चले कन्हई
 अतिही निकट धाय कै लीनो ❀ मूका एक तासु शिर दीनो
 भयो प्राण बिन अधम अन्याई ❀ प्रभु प्रताप उत्तम गति पाई
 हती एक मणि ताके शीशा ❀ सो लै आये हरि जगदीशा
 दीनी सो बल को नँदलाला ❀ प्रमुदित भई देखि ब्रजवाला
 गोपी ग्वाल सहित दोउ भाई ❀ बहुरि कियो मुख वनमें आई
 सो दुख सबको तुरत मुलायो ❀ परमानन्द सबन उपजायो
 करत विविध विधि हास बिलासा ❀ गृह आये पुनि सहित हुलासा
 नवकिशोर सुन्दर सुखदाई ❀ ब्रजजीवन बलराम कन्हई
 ग्वाल बाल गायन के साथी ❀ क्रीड़ा करत ललित ब्रजनाथा

दो० देखि देखि हरिके चरित, परम चरित्र उदारि ।

निशिदिन सब प्रमुदित रहत, ब्रजबासी नरनारि ॥

सो० हरन सकल भय भीर, दुष्टदलन जन हितकरन ।

नंदनंदन बल बीर, ब्रजबासी प्रभु साँवरो ॥

अथ बृषभासुरबधलीला ॥

नंदनंदन संतन हितकारी ❀ कमल नयन प्रभु कुञ्जविहारी

मुरली मुकुट धरे ब्रज राजें ❀ कोटि काम निरखत अबि लाजें

नित नव सुख ब्रजमें उपजावें ❀ सुर नर मुनि त्रिभुवन यश गावें

मुनिमुनि अगम कृष्णगुण गाहा ❀ कंस असुर उर दारुण दाहा

जो जेहि भाव ताहि हरि तैसे ❀ हित को हित जैसे को तैसे

हित अनहित यह प्रभु की लीला ❀ सदा श्यामसुंदर सुख शीला

रीझ खीझ हरिको जो ध्यावै ❀ परमानन्द अभय पद पावै

रहै कंस उर ध्यान सदाहीं ❀ नंदनंदन पल बिसरत नाहीं

शत्रुभाव शोचत दिन राती ❀ नंदसुवन मारों किहि भांती

असुर अरिष्ट नाम बल भारी ❀ एक दिवस नृप लियो हँकारी

तासों कहि सब मरम बुझायो ❀ बल सराहि ब्रज ताहि पठायो

नंदनंदन मारन के काजा ❀ चल्यो असुर करि गर्व समाजा

दो० नृप को शीश नवाय कै, कह्यो अरिष्ट सुनाय ।

कितक काज महाराज यह, मैं करि आवत जाय ॥

सो० तुम असुरनके राज, इतने को शोचत कहा ।

पल में मारों आज, बालक नंद अहीरके ॥

बृषभ रूप स्वइ असुर बनाई ❀ आयो तुत ब्रजहि समुहाई

गिरिसमान तन अति बिकराला ❀ महाकठिन दोउ सींग विशाला

पूंछ उठाय डकारत आवै ❀ खोदि खुरन सों धार उड़ावै
 दृग आरक्त फेन मुख डारै ❀ कबहुँ सींगसे भूमि विदारै
 कबहुँ तरुनसों रगरत जाई ❀ इत उत खोजत फिरत कन्हारै
 उन्नत ग्रीव चहुँ दिशि धावै ❀ जहां तहां गैयन बिडारवै
 बार बार गरजत अति भारी ❀ सुनत डरे सब ब्रजनर नारी
 बिडरीं गाय गोप सब भागे ❀ कृष्ण कृष्ण कहि टेरनलागे
 कालस्वरूप बृषभ इक आयो ❀ सबन कृष्ण सों जाय सुनायो
 प्रभु सर्वज्ञ तुरत पहिंचान्यो ❀ बृषभ न होय असुर यह जान्यो
 बिहँसि कह्यो मोहन सब पाहीं ❀ मत डरपौ चिन्ता कछु नाहीं
 चले असुर सम्मुख मनमोहन ❀ गोप ग्वाल लागे सब गोहन
 दो० आगे है हरि हांक दै, तासों कह्यो सुनाय ।

रे शठ का तन तरुघसत, फिरत बिडारत गाय ॥

सो० मो सनमुख इत आय, तो तन उपजो कण्डु जो ।

अबहीं देहुँ मिटाय, कहत नन्दकी सौंह करि ॥

बृषभासुर सुनि हरिकी बानी ❀ मनमें गर्व कियो यह जानी
 याही बालकके वधकाज ❀ आदर दै पठ्यो म्वहिं राजा
 भले शगुन से ब्रजमें आयों ❀ जो याको तुरतहि लखि पायों
 अबहीं याहि पलक में मारौ ❀ नृपतिकाज करि जाय जुहारौ
 ऐसे अपने जिय अनुमानी ❀ चलो श्याम सम्मुख अभिमानी
 दूटिपखो हरि ऊपर आई ❀ लिये सींग गहि कुँवर कन्हारै
 यह आवत हरिकी दिशि धाई ❀ हरि पाछे लैजात हटारै
 पाछे पेल श्याम तिहि दीनों ❀ बहुरो बृषभासुर बल कीनों
 आवत जात असुर तब हाखो ❀ ग्रीव मोड़ि तब धराणि पछाखो
 पखो असुर परबत आकारा ❀ मुखते चली रुधिरकी धारा

असुर मारि उत्तम गति दीनी * जय जय धुनि देवन नभ कीनी
भये मुखी सब सुर समुदाई * बरषि सुमन अस्तुति मुख गाई

दो० चकित भये लखि परसपर, कहत सकल ब्रजबाल।
हम जान्यो कोउ वृषभहै, यह तौ असुर कराल ॥

सो० दुष्टदलन गोपाल, मुदित कहत नर नारि सब।
भक्तनको रक्षपाल, ब्रजवासी नँदलाड़िलो ॥

जब अरिष्ट माखो गिरिधारी * भयो कंस मुनि बहुत दुखारी
आये ऋषि नारद तिहिकाला * कखो कंससों सुनु भूपाला
जिन मारे सब असुर तुम्हारे * ते नहिं होहिं नन्द के बारे
मैं जान्यों निश्चय यह भेऊ * हैं बसुदेव पुत्र वे दोऊ
कन्या लै जो तुमहिं दिखाई * सो वह हती यशोमति जाई
भयो कछू यह सुनु बल राजा * को जाने कर्ता के काजा
यह तो पुत्र भयो हो जवहीं * कही हुती तोसों मैं तबहीं
अपनी सों बहुतै तुम कीनों * सो क्यों मिटै जो बिधि लिखि दीनों
करहु यत्न तुम अबहुँ सवारे * यह कह नारद स्वर्ग सिधारे
उख्यो कंस मुनि मुनि की बानी * भयो शोचबश मूढ़ अज्ञानी
प्रथम देवकी अरु बसुदेऊ * छोड़े हुते बन्दिते दोऊ
बहुत बुरो मान्यो तिन पाहीं * राखे बहुरि बन्दि के माहीं

दो० कैसे मारों कह करों, निशि दिन यहै विचार।
शालिरहै नृप कंस उर, हलधर नन्दकुमार ॥

सो० अबधौं पठऊं काहि, मनहींमन शोचत खरो।
काहु न माख्यो ताहि, असुर गये ते सब मरे ॥

अथ केशीवधलीला ॥

असुरन माहिं बड़ो बलधारी ❀ केशी असुर वीर अति भारी
 कंस ताहि तब बोलि पठायो ❀ अति आदर करि दिग बैठायो
 कहत कंस केशी सुनु मोसों ❀ जी की बात कहत मैं तोसों
 मो समान राजा कोउ नाहीं ❀ मेरी आन सकल जगमाहीं
 ये सेवक मेरे नहिं ऐसे ❀ जैसे मैं चाहत हों तैसे
 जासों कहों बात मैं जोई ❀ करि आवै कारज वह सोई
 छाते मोहिं यही पछितायो ❀ तब केशी कहि वचन सुनायो
 ऐसो कहा कठिन प्रभु काजा ❀ जाको तुम शोचत हो राजा
 तुम हो सब असुरन के नायक ❀ और कौन दूजो तुम लायक
 जाहि क्रोध करि चितवो जबहीं ❀ ताको नाश होय नृप तबहीं
 आयसु कहा मोहिं किन दीजै ❀ सो कारज अवहीं हम कीजै
 यह सुनि कंस हरष जिय आन्यो ❀ केशी को बहुभांति बखान्यो
 दो० असुर वंश सबही हते, काहि कहों सुबखान ।

नंदमहर के छोहरा, करि आवै बिन प्रान ॥

सो० कियो न तिनकछु काज, आगे जे पठये असुर ।

यह सुनिकै अति लाज, मारे सब नँदबालकन ॥

तोतें कछु है है मैं जानत ❀ बड़ो वीर तोको मैं मानत
 ता कारण ब्रज तोहिं पठाऊं ❀ बहुत और कहि कहा सिखाऊं
 जिहितिहिविधि छलबल करिकोऊं ❀ मारि आव नँदबालक दोऊ
 कै लै आव बांधि दोउ भैया ❀ कहत जिन्हें बलराम कन्हैया
 यह सुनि गर्व असुर भटकीनो ❀ चल्यो ब्रजहि नृप आयसु दीनो
 मनहिं कहत देखों धौ ताही ❀ कंसनृपति डरपत सब जाही
 अश्व रूप है ब्रज में आयो ❀ अति बलगराजि चहुँदिशि धायो

बेगवन्त अति बपुष विशाला ❀ भारत ग्रीव पूरु विकराला
 बारहि बारहि सो धुनि करही ❀ ब्रजके लोगन मास्त फिरही
 जित तित भाजि चले नर नारी ❀ भये बिकल सब अति भय भारी
 कह्यो जाय आतुर प्रभुपार्हीं ❀ अश्व एक आयो ब्रजमार्हीं
 अति बिकराल न जात बतायो ❀ कै धौं बहुरि असुर कोउ आयो
 दो० ब्रज आयो केशी असुर, जान लियो नँदलाल ।

सम्मुख ताके हरषि कै, चले कंस के काल ॥

सो० शीशमुकुटबनमाल, कटिकसिबांध्यो पीतपट ।

उर भुजनैन विशाल, असुरबिदारन सुर सुखदा ॥

जब केशी देखे हरि आवत ❀ भयो क्रोध करि सम्मुख धावत
 अति बल दोऊ चरण उठाये ❀ प्रभु के उरको चपल चलाये
 देखत डरे सकल ब्रजवासी ❀ गहे बीचही हरि अविनासी
 छूट न असुर बहुत बल कीनो ❀ ठेलि श्याम पाछे तब दीनो
 गिरो धरणि पर मूर्छित भारी ❀ उख्यो क्रोध करि बहुरि सँभारी
 दाँव घात करिकै बहु धावै ❀ पुनि पुनि चरण चपेट चलावै
 अतिहि बेग हरि जात बचाई ❀ करत युद्ध कौतुक सुखदाई
 देखत सुर सुनि चढ़े अकासा ❀ कछु हर्षे मन कछु इक त्रासा
 तकत गोप गोपी भय बाढ़े ❀ चक्रित चित्र लिखे से ठाढ़े
 बदन पसारि असुर तब धायो ❀ चाहत हरिको मुखमें नायो
 तबहिं श्याम यह बुद्धि उपाई ❀ दियो हाथ ताके मुख नाई
 दांतन दाब सक्यो सो नार्हीं ❀ बृश समान भयो मुख मार्हीं
 दो० एक हाथ मुख नाइके, तुरत केश गहि धाय ।

बली सुवन नँदरायके, पटक्यो असुर फिराय ॥

सो० शब्द भयो आघात, धरक्यो उर सुनि कंसको ।

नन्दमहर के तात, जान्यो केशीको हन्यो ॥

देखत सुरगण भये सुखारी ❀ वर्षे सुमन सुमंगल कारी
 प्रफुलित भये सकल ब्रजवासी ❀ बढ़्यो हर्ष उर मिठी उदासी
 गावत जय यश प्रभुहि सुनाई ❀ असुर निकंदन जन सुखदाई
 धाय धाय हरि को सब भेंटे ❀ धन्य धन्य कहि कहि दुख भेंटे
 बढ़ो दुष्ट मोहन तुम माख्यो ❀ ब्रजवासिन को प्राण उवाख्यो
 कान्हहि सदा सहाय हमारी ❀ धन्य धन्य मोहन गिरिधारी
 लिये लाय उर यशुमति मैया ❀ पुनि पुनि मुखकी लेत बलैया
 नंद देखि आनंद अति कीनो ❀ बहुत दान विप्रन को दोनो
 हरिको लै पुनि पुनि उर लावत ❀ मुख चूँवत लखि छवि सुख पावत
 केशी मार श्याम गृह आये ❀ भये सकल आनन्द वधाये
 घर घर सब ब्रज लोग लुगाई ❀ नन्दनंदन की करत बढ़ाई
 ब्रजवासी प्रभु जन प्रतिपालक ❀ संतन सुखद असुर कुल घालक
 दो० धनि धनि ब्रजमें अवतरे, भक्तन के हित आय।
 सुखसागरशोभा अधिक, बलनिधि त्रिभुवनराय॥
 सो० बल मोहन दोउ भाय, चिरजीवो जोरी युगल।
 देत अशीश मनाय, ब्रजवासी प्रभुको सबै॥

अथ ब्योमासुरबधलीला ॥

दूजे दिन सुन्दर ब्रजनाथा ❀ गये बनहिं गायन के साथ
 बलदाऊ अरु ग्वाल सुहाये ❀ शोभित संग सुभग मन भाये
 गई गाय बन में अगवाई ❀ जहँ तहँ चरन लगिँ सुख पाई
 ग्वालन संग श्याम अनुरागे ❀ चोर मिहिचनी खेलन लागे
 भये मगन तन सुधि कछु नार्ही ❀ दौरत दुरत फिरत मग माहीं
 तबहिं कंस केशी बध सुनिकै ❀ बार बार शोचत शिर धुनिकै

व्योमासुर एक अति बलवाना ❀ माया चरित बहुत सो जाना
पठ्यो ताको तब ब्रजमाहीं ❀ मारन कह्यो श्यामको ताहीं
गोप बेप धरि सो ब्रज आयो ❀ दूंदूत हरिको बनमें पायो
गयो समाय सखन के माहीं ❀ ताको किनहूँ जान्यो नाहीं
व्योमासुर एक बुद्धि उपाई ❀ प्रथम बालकन लेहुँ चुराई
इकलो करि जब हरिको पाऊँ ❀ तब मारौँ कै गहि लै जाऊँ

दो० दुरन जाहिँ बालक जहां, तहां असुर सँग जाय ।

आवहि एकहि एक लै, परबत माहिँ दुराय ॥

सो० रहिगये थोरे ग्वाल, जब यों बहु बालक हरे ।

तब जान्यो नँदलाल, व्योमासुर के कपटको ॥

धख्यो ध्यान तब ऊँवर कन्हाई ❀ हरिसों ताकी कहा बसाई
तुरत असुर लै भूपर पटक्यो ❀ प्राण देह तजि स्वर्गहि सटक्यो
असुर मारिकै दीनदयाला ❀ बालक शोधन चले गोपाला
ऋषि नारद आये त्यहि काला ❀ देखि श्याम मुख लख्यो विशाला
उपज्यो प्रेम हरष उर पावन ❀ बीन बजाय लगे यश गावन
जय जय ब्रह्म सनातन स्वामी ❀ आदिपुरुष प्रभु अन्तर्यामी
अलख अनीह अनन्त अपारा ❀ को जानै प्रभु रूप तुम्हारा
सकल सृष्टि के सिरजन हारे ❀ पालन लय सब ख्याल तुम्हारे
युग युग यह अवतार गुसाई ❀ भक्कन हित प्रभु लेत सदाई
धरणी भार पाप भइ भारी ❀ सुरन संग लै जाय पुकारी
त्राहि त्राहि श्रीपति दैत्यारी ❀ राखि लेहु प्रभु शरण उबारी
राज अनीति सुरन तब भाखी ❀ शशि अरु सूर भये सब साखी
दो० क्षीरसिन्धु अहिसेज प्रभु, श्रवणन परी पुकार ।

तब जान्यो सुर सन्त महि, दुखित दनुजके भार ॥

सो० कह्यो भूमि अवतार, सिन्धु मध्य बाणी प्रगट ।

श्रीपति प्रभु असुरारि, जगन्नाता दाता अभै ॥

मथुरा जन्म गोकुलहि आये ❀ मात पिता सोवतही पाये

नन्द यशोदा बालक जान्यो ❀ गोपिन कामरूप करि मान्यो

पय पीवतही बकी बिनासी ❀ भयो असुर मुनि कंस उदासी

यहि अन्तर जे दनुज पठाये ❀ ते प्रभु सब कौतुकहि नशाये

धन्य धन्य ये ब्रजके वासी ❀ जिन बश किये ब्रह्म सुखरासी

मन बुधि बचन तर्क तें न्यारे ❀ निगमहु अगम न परत विचारे

ते ब्रज शुवतिन बसहिं बिहारे ❀ कमल नयन प्रभु नन्ददुलारे

नील जलज तन सुन्दर श्यामा ❀ मोर मुकुट कुण्डल अभिरामा

मुरलीधर पीताम्बर धारी ❀ वनमाला धर कुञ्जविहारी

बसहु रूप यह उर धर पाऊं ❀ बहुरि नाथप्रभु विनय सुनाऊं

यह अवतार जबहिं प्रभु लीनो ❀ आयसु सुरन यहै प्रभु दीनो

दैत्य दहन सन्तन सुखकारी ❀ अब मारहु प्रभु कंस विचारी

दो० जब यह गाथा गायकै, नारद कही सुनाय ।

बोले प्रभु करि तब कृपा, सुधा बचन सुसकाय ॥

सो० जाहु बेगि भुविराय, करहु सुरनको काज यह ।

पठवहु मोहिं बुलाय, नृप आयसु ते मधुपुरी ॥

जब प्रभु हँसि यह आयसु दीनो ❀ तब प्रणाम प्रभु को ऋषि कीनो

हरषि चले मुनि नृपके पासा ❀ यहै बुद्धि मन करत प्रकासा

यहै बात हलधर समुझाई ❀ जो बानी ऋषि गये सुनाई

तुम प्रभु अखिल लोकके कारन ❀ जन्मे हो भुविभार उत्तारन

परमपुरुष अविगति अविकारा ❀ अविनाशी अद्वैत अपारा

सिन्धुरूप जनहित सुखकारी ❀ त्रिभुवनपति श्रीपति असुरारी

संकर्षण जब ऐसो भाख्यो ❀ मुनिमुनिश्याम हृदय सब राख्यो
तब हँसि कही भ्रातसों बानी ❀ जो तुम कहत बात मैं जानी
कंसनिकन्दन नाम कहाऊं ❀ केश गहौं पुहुमी घसियाऊं
ऐसे प्रभु हलधर समुझाये ❀ बालक बहुरि शोध सब लाये
व्योमासुर माख्यो नँदलाला ❀ भये मुदित सब देख गुवाला
धन्य धन्य सब प्रभु को भाखे ❀ कहत आज तुम हम सब राखे
दो० गाय गोप हलधर सहित, भये परम आनंद ।

सांभ समय बनसे चले, ब्रज को श्रीनँदनंद ॥

सो० आये नंद अबास, प्रभु ब्रजवासी दास के ।
गये कंस के पास, ऋषि नारद मथुरापुरी ॥

नारद गये कंस के पासा ❀ मन मारे मुख करे उदासा
आदर करि आसन बैठाये ❀ हर्षि कंस मुनि निकट बुलाये
कैसो मुख ऋषि मन क्यों मारे ❀ कह चिन्ता मन बढ़ी तुम्हारे
नारद कही सुनो हो राऊ ❀ कह बैठे कछु करहु उपाऊ
त्रिभुवन में नाहीं कोउ ऐसो ❀ देख्यो नन्दसुवन में जैसो
कहत कहा रजधानी ऐसी ❀ उपजी तुम को बात अनैसी
दिन दिन भयो प्रबल बहुभारी ❀ हम सब हितकी कहत तुम्हारी
तब बोल्यो नृप गर्वित बानी ❀ यह नारद तुम कहा बखानी
यदपि कहतहौ तुम हित केरी ❀ तदपि बराबर नहिं वह मेरी
कोटि दनुज मो सम मो पासा ❀ जिनको देखि सुरन मन त्रासा
कोटि कोटि जिनके सँग योधा ❀ जीतसकै को जिनके क्रोधा
तिन के बल कह कहूं बताई ❀ देखत जिनको काल डराई
दो० रहत द्वार संतत खरी, कोटि भवनकी भीर ।

अति प्रचंड कोदंडधर, महाबली रणधीर ॥

सो० महामत्त गज एक, त्रिभुवन गामी कुबलया ।
ऐसे सुभट अनेक, नामी सुभटन को गनै ॥

कहा ग्वाल के बालक दोऊ ॥ यदपि बली उपजे हैं ओऊ
प्रजा लोग ब्रजके सब मेरे ॥ सेवा करत सदा रहे नेरे
ताते सकुचत हों उन काजा ॥ बालक सुनत होत म्बहिं लाजा
भली करी यह बात बुझाई ॥ मनकी डारों खटक मिटाई
सुनहु और नारदमुनि हमसों ॥ कहत मतेकी वानी तुमसों
उनपर सेना कहा पठाऊं ॥ नन्द सहित सहजहि बुलवाऊं
डारों गज के चरण खुंदाई ॥ और प्रजा ब्रज देऊं वसाई
यहै बात मेरे मन आई ॥ तब सुनि मुनि बोले मुमुकाई
जो तुम अनो गर्व सँभारो ॥ तो जानो अब तुम उन मारो
त्रिभुवनमें को बलहि तुम्हारे ॥ यह कहि मुनि विधिधाम पधारे
कंस आपने जिय यह जानी ॥ नारद हितकी बात बखानी
अब मारों नहिं गहर लगाऊं ॥ मथुरा जिहि तिहि भांति बुलाऊं

दो० यहै शोच उर में पख्यो, नहिं बिचार कछु और ।

कैसे तिन्हें बुलाइये, करत मनहिं मन दौर ॥

सो० कबहुं बिचारत हीय, आपहि चढ़ि धाऊं ब्रजहि ।

पुनिसकुचत है जीय, ब्रजवासी प्रभुगुण समुभि ॥

जन्महिते वै हैं असुरारी ॥ सातहिं दिन ले बकी सँहारी
कागासुर बल गयो बढ़ाई ॥ सो सुरभाय गिख्यो फिरि आई
शकट तृणा क्षणही में मारे ॥ ख्यालहि और असुर संहारे
गये प्रतिज्ञा करि करि जोई ॥ आयो नहिं जीवत फिरि कोई
अब उनको सहजही बुलाऊं ॥ ऐसो को जिहि लेन पठाऊं
जाय नन्द सों कहै बुझाई ॥ श्याम राम सुन्दर दोउ भाई

मुनि मुनि अति नृपके मन भाये * देखन को मधुपुरी बुलाये
 ऐसे करि जब वै ह्यां ऐहें * बहुरो जियत जान नहिं पैहें
 यह बिचार उर में ठहरायो * तब आतुर अकूर बुलायो
 मुनि अकूर मन में भय पायो * किहि कारण नृप बेगी बुलायो
 आतुर गयो पँवरि पर धाई * जाय पँवरिया खबर जनाई
 सुनतहि बोलि महल में लीनों * सकुच गवन सुफलकसुत कीनों
 दो० कछु डर कछु जिय धीरधर, गयो नृपतिके पास ।
 देखि डख्यो मुख शोचबश, उर ते लेत उसास ॥
 सो० हाथ जोरि शिरनाय, अनबोल्यो सम्मुख रह्यो ।
 लीनो ढिग बैठाय, मरम बचन कहि कंस तब ॥

आपहि और तहां कोउ नाहीं * बोल्यो नृप सुफलकसुत पाहीं
 कहि जु गये नारद ऋषि बानी * सो सब कहिकैं प्रगट बखानी
 मुनि अकूर कहत सत तोकों * श्याम राम शालत उर मोकों
 ज्यहित्यहि बिधि अब उनको मारों * यह कछु दोष हृदय नहिं धारों
 पठवों काहि जाहि ब्रज जोई * कहै प्रीति करि नन्दहि सोई
 बल मोहन तुव तनय सुहाये * तुमहिं सहित नृपराज बुलाये
 सुन गुणरूपहि अगम अगाधा * है नृप को देखन की साधा
 काली पीठ कमल लै आये * तब तें नृप के मन में भाये
 सो बकसीस इन्हें अब देहैं * इन के बचन सुनत सुख पैहें
 यह कहिकैं उन को लै आवैं * भेद सु कोऊ जानि न पावैं
 ऐसे कहि जब कंस सुनायो * तब अकूरहि धीरज आयो
 मन मन कहत कहा यहि भावैं * आपुहि अपनो काल बुलावैं
 दो० कियो बिचार अकूर तब, कहत जु कछु मैं और ।
 तौ मारैगो मोहिं यह, अबहीं याही ठौर ॥

सो० कह्यो मानि है नाहिं, काल याहि आयो निकट ।
यह बिचारि मनमाहिं, सुफलकसुत बोल्योहरषि ॥

सुनहु नृपति नीके मन आनी ॥ धनि धनि नारद सत्य वखानी
बड़े शत्रु हम कों वे दोऊ ॥ उपजे नन्द भवन में कोऊ
कीजै बेगि नृपति यह काजा ॥ तुम सरि और कौन म्वहिं राजा
मुख तें आयसु जो करि पाऊं ॥ भोर बेग तिहि ब्रजहि पठाऊं
सुफलकसुत यह कही सयानी ॥ तब हष्यों नृप सुनि यह बानी
फिरि फिरि कहत हिये गरबाई ॥ प्रात बोलि मारों दोउ भाई
आधी निशिलौ यह मन कीनो ॥ तब अक्रूर विदा करिदीनो
पल्लो सेज आलस जिय जानी ॥ सेवा करन लगीं सब रानी
नेक पलक लागी भूपकाई ॥ लखे सुपन बलराम कन्हई
काल सरिस दोउ देख डरानो ॥ भिभिकिउठ्यो भरम्यो ससकानो
देख्यो जागि तहां नहिं दोऊ ॥ चकित भई रानी सब कोऊ
बूझन लगीं सबै अकुलाई ॥ कह भिभिके सपने नृपराई

दो० महाराज भिभिके कहा, सपने आज सकाय ।

कहिये काको शोच अति, जीमें रह्यो समांय ॥

सो० तब मनमें सकुचाय, सहजहि रानिनसों कह्यो ।

भेद न भयो जनाय, मम शंका उर धकधकी ॥

सावधान प्रतिपाल कराये ॥ जहँ तहँ योधा सकल समाये
श्याम राम भय पलक न लावै ॥ अंतर शोच न प्रगट जनावै
जाग्यो आप संग सब नारी ॥ भई याम निशि युग तें भारी
बैठत कबहुँ उठत अकुलाई ॥ ठाढ़ो होत कबहुँ अँगनाई
घरियाली सों पूछि पठावै ॥ बार बार निशि खबर मँगावै
शोचत सब प्रातहि कह करिहै ॥ क्रोध भख्यो नृप का शिर परिहै

कही घरीनिशि गणकन बाकी * इक इक क्षण युग यह गति ताकी
कहत ब्रजहि धौं काहि पठाऊं * जासों कहि नँदसुवन मँगाऊं
पठवों अक्रूरहि को जाई * ल्यावैं ब्रज तैं ठगि दोउ भाई
इत देख्यो सपनो नँदराई * बल मोहन कहूँ गये हिराई
ग्वाल बाल रोवत पछिताहीं * कहत श्यामतौ अब ब्रज नाही
संगहि खेलत रहे हमारे * निठुर होय कहूँ अंत सिधारे

दो० दूत एक कोउ आयके, सँग लै गये लिवाय ।

वाहीके दोउ हैगये, ब्रजवासिन बिसराय ॥

सो० अति ब्याकुल नँदराय, मुरझि परे धरणी सुनत ।

बिबश यशोदा माय, श्यामबिरह ब्याकुल खरी ॥

ब्याकुल नर नारी ब्रजवासी * पशु पक्षी सब परम उदासी
रोवत गिरत धरणि दुख पागे * अति अकुलाय नंद तब जागे
धकधकात उर सवत नयन जल * सुत अँग परसन लागे शीतल
ससक्त सुनत अतिहि अतुरानी * कह भ्रमे पूछत नँदरानी
नन्द नहीं कछु भेद जनायो * श्यामहिं लखि धीरज उर आयो
अति प्रभात रवि उगन न पायो * सुफलकसुत उत कंस बुझायो
सुनतहि द्वारपाल उठि धायो * सोवत ते अक्रूर जगायो
कह्यो बेगि चलिये नृपपासा * समझि मंत्रनिशि चलयो उदासा
ठाढ़ो नृपति द्वारही पायो * देखत दूरहिते शिर नायो
अति आदर करि निकट बुलायो * सिरो पाव नृप तुरत मँगायो
अक्रूरहि निज कर पहिरायो * बहुत कृपा करि बचन सुनायो
ल्यावहु नन्द महर सुत दोऊ * तुमसम और चतुर नहिं कोऊ

दो० मुख हरण्यो अक्रूर सुनि, हृदय गयो बिलखाय ।

असुर त्रासजियमें पख्यो, बचन कह्यो नहिं जाय ॥

सो० दीनो स्थहि चढ़ाय, जाहु बेगि ब्रज नृप कह्यो ।

लै आवहु दोउ भाय, अबहिं बिलंब न कीजिये ॥

तब अक्रूर कह्यो कर जोरी ॥ सुनहु देव विनती इक मोरी
बल मोहन प्रातहि दोउ भैया ॥ बन को जायँ चरावन गैया
जो उनको धरमें नहिं पाऊं ॥ जाते प्रभु यह बात सुनाऊं
आज नन्द गृह बसिहौ जाई ॥ प्रातहि लै आवहुं दोउ भाई
ऐसे जब अक्रूर जनायो ॥ कंस बात यह मानि पठायो
शीश नाय तब रथचढ़ि हांक्यो ॥ सुफलकमुत ब्रज सम्मुख ताक्यो
बहु प्रशंसि सब मल्ल बुलाये ॥ चाणूरादि सकल चलि आये
तिनसों कह्यो सुनौ सब बीरा ॥ ब्रजमें रहत जु नन्द अहीरा
कहियत बली तासु सुत दोऊ ॥ रामकृष्ण जिन कहै सब कोऊ
बहुत असुर मेरे उन मारे ॥ ताते हैं वे शत्रु हमारे
उनको मैं मधुपुरी बुलायो ॥ सुफलकमुत को लेन पठायो
उन को मति जानौ तुम बारे ॥ हैं वे महा कठिन बल भारे

दो० रंगभूमि तातें रचौ, चित्र विचित्र बनाय ।

सावधान छैकै तहां, रहौ मल्ल सब जाय ॥

सो० ऊँचो एक मचान, तहां और सुन्दर रचौ ।

जहां असुर परधान, बैठें सब मेरे निकट ॥

योधा और अनेक बुलावो ॥ सावधान करि सब बैठावो
ताते और पौरके बाहर ॥ रहै कुबलया गज तिहिठाहर
राखौ द्वार तीसरे जाई ॥ गरुड कठिन अति धनुष धराई
बहु भट तहां रहैं रसवारी ॥ अस्र शस्त्र धारी बल भारी
ऐसे सजग रहौ सब कोऊ ॥ जब आवैं वे बालक दोऊ
प्रथम धनुष उनसों चढ़वावो ॥ उन्हें कहौ यह धनुष उठावो

जब वे धनुष उठावैं नाहीं * घेरिलेहु उनको तिहि ठाहीं
ताही ठौर मार दोउ लीज्यो * भीतरलों आवन नहिं दीज्यो
जो कदापि ह्वांतें चलि आवैं * तौ गजतें आवन नहिं पावैं
डारौ गज के चरण रुँदाई * तुमको राखत अबहिं जनाई
जो छल बल करिकै बचि आवैं * रङ्गभूमि आवन नहिं पावैं
तौ सब मख मार उन लेहु * मो समीप आवन नहिं देहु

दो० ठौरहि ठौर सजायकै, सजग रहौ इहि माँत ।

जिहिं तिहिं विधि मारौ उन्हें, नहीं दूसरी बात ॥

सो० मन मन मौज बढ़ाय, ऐसो आयसु दे सबन ।

गयो सदन नृपराय, सुनहु कथा अकूर की ॥

सुफलकसुत मन शोच अपारा * है नृप कंस बड़ो हत्यारा
मंत्र कियो मिलि मेरे साथ * पठयो मोहिं लेन ब्रजनाथा
कैसे आनि देउं में जाई * मो देखत मारै दोउ भाई
नगर निकसि रथ कीन्हों ठाढ़ो * पखो बिचार हृदय अति गाढ़ो
गज मुष्टिक चाणूर सुमिरिकै * आयो नीर लोचनन ढरि कै
अति बालक बलराम कन्हारै * कहा करौं कछु नाहिं बसाई
मोहिं मारि अरु बन्दि करावै * यह बिचार करि रथ न चलावै
पुनि पुनि कृष्ण हृदय में ल्यावै * चलत फिरत कछु बनि नहिं आवै
प्रभु कृपाल सब अंतर्धामी * सुफलकसुत मन पूरण कामी
सुमिरत कृष्ण हृदय यह आई * वे श्रीपति प्रभु त्रिभुवन राई
अखिल जगत के कारण कर्ता * उत्पति पालन अरु संहर्ता
भूमिभार वारन अवतारा * को जानै गुण रूप अपारा
दो० धन्य कंस जिन मोहि ब्रज, पठयो लेन गोपाल ।

जाय रूप वह देखिहों, निगम नेति नंदलाल ॥

सो० यह विचार उर आन, रथ हांक्यो अक्रूर तब ।

भयो शकुन शुभवान, मृगगण आये दाहिने ॥

दाहिने देखि मृगन की माला ❀ सुफलकसुत उर हर्ष विशाला

कहत आज इन शकुनन जाई ❀ भुज भरि मिलिहों प्रभु सुखदाई

श्याम सुभगतन परम सुहावन ❀ इंदुवदन त्रयताप नशावन

अंग त्रिभंग किये गोपाला ❀ सारसहू ते नयन विशाला

मोर मुकुट कुण्डल बनमाला ❀ कटि कछनी पट पीत विशाला

तब चंदन की खौर बनाये ❀ नटवर बेप मनोज लजाये

हैंहैं गैयन के संग ठाढ़े ❀ ग्वालनमध्य महाद्वि वाढ़े

सो दरशन लखि होब सनाथा ❀ धरिहों जाय चरणपर माथा

जे शुभ चरण पितामह ध्यावैं ❀ महिमा जिनकी वेद बतावैं

जिन चरणन कमलापति मानी ❀ शंभु धर्यो शिर जिनको पानी

सनकादिक नारद यश गावैं ❀ जिन चरणन योगी चित ल्यावैं

बलि जिनकी मर्यादा न पाई ❀ हारि मानि निज पीठ नपाई

दो० शिला शाप मोचन करन, हरन भक्त उरपीर ।

आज देखिहों ते चरण, सकल सुखनकी सीर ॥

सो० अरुण कंज केरंग, अंकित अंकुश कुलिश ध्वज ।

गोपबालकन संग, गोचारत बन पाइहों ॥

परिहों जाय चरण पर जवहीं ❀ भुजन उठाय भेंटिहैं तवहीं

परसत उर आनंद उपजैहैं ❀ अंगन पुलकि तनूरुह ऐहैं

देखत दश परम सुख हैंहैं ❀ प्रेम सलिल लोचन भरिजैहैं

कुशल पूछिहैं म्वहिं सुखदानी ❀ कहि नहिं सकिहों गदगद बानी

बारहिं बार बचन मृदु कैहैं ❀ सुनि सुनि श्रवण परम सुख पैहैं

यों अक्रूर ध्यान में अटक्यो ❀ भूल्यो पंथ फिरत रथ भटक्यो

हरि अनुराग भयो उर माहीं ❀ रही देहकी सुधि कहु नाही
सांभ भई गोकुल नहि पायो ❀ नहि जानत को हों कहँ आयो
किन पठयो कह बात न जानी ❀ रथ बाहनकी सुरति भुलानी
भयो हर्ष उर प्रेम विशाला ❀ दशहूँ दिशि पूरण गोपाला
हरि अंतर्दामी सब जानी ❀ भक्तबद्धल है जिनकी बानी
भक्तभाव करि जो कोइ आवैं ❀ मिलत तिन्हें नहि बिलम लगावैं

दो० ग्वाल संग रुन्दा बिपिन, चारत धेनु सुजान ।

चले हरषि हलधर सहित, भक्तहेत जिय जान ॥

सो० यमुन पार करि गाय, गौरी गावत हरषि हरि ।

गायन तहां मँगाय, लागे गो दोहन करन ॥

गायन दुहन लगे सब ग्वाला ❀ आपहु दुहत भये नँदलाला
भक्त हेत यह सुख उपजायो ❀ तहां दरश सुफलकसुत पायो
रहिन सक्यो रथपर सुखव्याकुल ❀ उतरिपखो भूपर अति आकुल
भयो मनोरथ मनको भायो ❀ दौरि श्याम चरणन शिर नायो
पुलकगात लोचन जल धारा ❀ हृदय प्रेम आनंद अपारा
कृपासिन्धु करि कृपा उठायो ❀ भक्त हेतु मिलि कण्ठ लगायो
भयो जु सुख सो सोई जाने ❀ ब्रजबासी किहिभांति बखाने
जो अक्रूर चरित मन कीनो ❀ तैसिय भांति दरश हरि दीनो
मधुर बचन श्रवणन सुखदाई ❀ पुनि पुनि पृच्छत कुँवर कन्हवाई
आनन चारु निरखि सुखकारी ❀ तब बोल्यो अक्रूर सँभारी
कुशल नाथ अब दरश निहारी ❀ दैत्य दलन भक्तन हितकारी
भेदाहि भेद कंस की बानी ❀ सुफलकसुत सब प्रगट बखानी
दो० सुनत बचन अक्रूर के, मुसकाने ब्रजचन्द ।

फरकि भुजा भू भारकी, टारन असुरनिकन्द ॥

सो० मिले राम पुनि आय, परम प्रीति अकूर सों ।

उर आनंद न समाय, बासुदेव दोऊ निरखि ॥

कहि कहि उठत इहै नंदलाला ॥ हमहिं बुलायो कंस भुआला

लेबे को अकूर पठाये ॥ काल्हिहि करि अति कृपा मँगाये

मुनतहि भये चकित सब ग्वाला ॥ कहा कहत हैं मदन गोपाला

भये प्रेम बश मति अकुलानी ॥ भरि आयो नैनन में पानी

निरखि सबनको मुख सुखदानी ॥ तब बोले करि श्याम सयानी

चलहु काल्हि देखाहिं नृप कंसा ॥ मति आनौ जियमें कहु संसा

यह कहि चले हरषि ब्रजवालन ॥ कछु हरष कछु संशय ग्वालन

अति कोमल बलराम कन्हारै ॥ हँसि लीने अकूर उठारै

सुमनहु ते हरखे सुखदनियां ॥ दोउ लसत सुफलकसुत कनियां

ग्वाल सकल लीनो रथ डोरी ॥ पहुँचे आय सकल ब्रजखोरी

लखि जहँ तहँ ब्रजलोग चकाने ॥ कंस दूत सुनि नन्द सकाने

सपनो समुझि शोच उर बायो ॥ मन मन कहत कहाँ धौं आयो

दो० आतुर उठि आगे चले, लेन नन्द उपनन्द ।

देखन धाये घरनते, मुनत नारि नर वृन्द ॥

सो० श्यामराम उर लाय, स्यंदनतजिसुफलकसुवन ।

आवत लखिनंदराय, भये हरष विस्मय विवश ॥

सादर तिनको शीश नवाये ॥ कुशल प्रश्न करि गृह लै आये

चरण धोय बैठक शुभ दीनी ॥ विविध भांति भोजन विधि कीनी

क्षणक होत नहिं नेक नियारे ॥ मनहुँ दुलार उनहिं प्रतिपारे

तब अकूर संग लै दोऊ ॥ भोजन कियो लखत सब कोऊ

हरि इत उत फेरत नहिं आखैं ॥ सब ब्रजलोग मनहिं मन भाखैं

उठे अँचै तब पान खवाये ॥ आदर सहित पलंग बैठाये

पुनि करजोरि नन्द यों भाख्यो ❀ कहा कृपा करि पग इत राख्यो
तब ऐसे अक्रूर सुनायो ❀ बल मोहन को नृपहि बुलायो
तुमको कह्यो संग लै आवैं ❀ सुनि सुनि गुण मेरेमन भावैं
सङ्कर्षण अरु कुँवर कन्हैया ❀ मिलिगये अक्रूरहि दोउ भैया
देखन को अभिलाष जनायो ❀ तातें बेगहिं प्रात बुलायो
ब्रज के लोग सुनत यह बानी ❀ भये चकित सुधि बुद्धि हिरानी
दो० चकितनन्दयशुमतिचकित,मनहींमनअकुलात।

हरि हलधर को सैन दे, सबै बुलावत जात ॥

सो० माया रहित मुकुन्द, योग बियोग जाके नहीं ।

सदा एक आनन्द, अविगति अविनाशी पुरुष ॥

प्रेमभक्त की कछु उर लाजा ❀ कीनो चहैं भूमिसुर काजा
जाते नहिं काहू तन हेरत ❀ बोलत नहीं नैन नहिं फेरत
मनु पहिंचान कबहुंकी नाही ❀ लिखलिख सब डरपत मनमाहीं
हरि सुफलकसुतसों मन लायो ❀ यहै कहत नृप हमहिं बुलायो
हुती साध हमहुं मन माहीं ❀ कबहुं नृपति बोल्यो क्यों नाही
हँसि हँसि ऐसे कहत मुरारी ❀ यह सुनिबिकलसकल नरनारी
श्याम नहीं कछु मनमें आने ❀ भये नेह तजि तुरत विराने
कहति परस्पर तिय अकुलाई ❀ कितते आयो यह दुखदाई
महाक्रूर अक्रूर नाम को ❀ जैहै प्रात लिवाय श्याम को
जान कहत या संग कन्हवाई ❀ कैसे प्राण रहेंगे माई
बिलखि बचन शोचति सब ठट्ठी ❀ मनहुं बिचित्र चित्र लिखि काढ़ी
अब हम संग तुम्हारे जैहैं ❀ भलीभांति नृप देखन पैहैं
दो० ठौर ठौर ऐसी दशा, कहत न आवत बैन ।

बढ़ीश्यामबिछुरनव्यथा, ढरत उमंग जल नैन ॥

सो० फिरत बिकल सब ग्वाल, पूछत एकहि एकसों ।

चलन कहत नँदलाल, मनमलीन व्याकुल सबै ॥

ब्रजके लोग बिकल सब देखैं ❀ तब अकूर सवनि परितोखैं

चिन्ता मतिहि करो मनमार्हीं ❀ इनको कछु और डर नाहीं

भंजन धनुष यज्ञके काजा ❀ मधुपुरि इनहिं बुलायो राजा

व्याकुल महरि यशोमति धाई ❀ आतुर परी चरण पर आई

सुफलकसुत मैं दासि तुम्हारी ❀ सुनौ कृपा करि विनय हमारी

संतन धाम परम उपकारी ❀ सुनियत कीरति बड़ी तिहारी

बड़े दुखन में यह प्रतिपारे ❀ राम श्याम प्राणनते प्यारे

धनुष तोर कह जानैं वारे ❀ इन कब देखे मल्ल अखारे

राजसभा को यह कह जाने ❀ कब इन नृपजुहार पहिचाने

राजअंश अपनो सब लीजै ❀ और कहौ वरु अधिकै दीजै

जाहु नंद उपनन्दहि लैकै ❀ मैं कह करों सुतनको दैकै

है अकूर तुम्हारो नामा ❀ नगर कहा लरिकन को कामा

दो० कहा धनुष यह देखिहैं, बालक अति अज्ञान ।

कियो नृपति कछु कपट यह, परतमोहिं यों जान ॥

सो० देहुं नहीं हों जान, मैं निधनी के श्याम धन ।

लेहु कंस वरु प्रान, को जीवै नंदनन्द बिन ॥

कहति बिलखि हरिसों दुख भारी ❀ क्यों मोहन मम छोह विसारी

दुखित जानि अपनी महतारी ❀ मथुरा जाहु न मैं बलिहारी

ये अकूर क्रूर कृत रचिकै ❀ आये तुम्हें लेन रथ सजिकै

तिरछी भई करम गति आई ❀ यह धौं बिधना कहा बनाई

मोसी मात महर सों ताता ❀ कहत रहत क्षण क्षण दोउ भ्राता

तिहि सुख जान कहत हौ प्यारे ❀ कैसे रहिहैं प्राण हमारे

मैं बलि ऐसी जिय मति धारो ❀ मथुरा में कह काज तिहारो
 निरखि रूप यशुमति अकुलाई ❀ व्याकुल परी धरणि मुरझाई
 कहि अब लेवैं प्राण कन्हैया ❀ है कै निठुर तजत हैं मैया
 क्यों अक्रूर गोकुलहि आयो ❀ मेरे प्राण लेन को धायो
 नाम अक्रूर गुण क्रूर तुम्हारा ❀ करिहौ सूनो भवन हमारा
 रोवत बदन रोहिणी मैया ❀ ब्रजके जीवन ये दोउ मैया
 दो० भये निठुर अक्रूर मिल, घरहू आवत नाहिं ।

कहा करौं कासों कहीं, को राखे गहि बाहिं ॥

सो० अति व्याकुल ब्रजबाम, जहां तहां बिलखी कहैं ।

चलन चहत घनश्याम, धृकजु रहैंसखिप्राणतन ॥

कहैं वह मुख हरिको सँग सजनी ❀ विविध बिलास शरदकी रजनी
 हरिमुख शशि शीतल मुखकारी ❀ चखचकोर लखि रहत मुखारी
 कहैं वह सुन्दर हरिगर बाहीं ❀ पियत अधर रस मन न अघाहीं
 जग उपहास सह्यो जिहि लागी ❀ कुल अभिमान लाज सब त्यागी
 छुट्यो चहत सो हमसों आली ❀ करी कठिन बिधि करम कुचाली
 कहूं सखी फिरि कबहूं ऐसे ❀ मिलिहैं अब मिलियतहैं जैसे
 कहिहैं बहुरि बात हँसि कबहीं ❀ लागत परम निठुर म्वहिं अबहीं
 बिरहानल अग्निहुते ताती ❀ बिछुरत श्याम पीर अति छाती
 न्यायहि सखी नागरी नारी ❀ जरत बिरह उर अमित प्रचारी
 अब सहिहैं ऐसो दुख प्राणा ❀ निशि दिन करि उर बज्र समाना
 एक कहत कैसे हरि जैहैं ❀ यशुमति पै सखि जान न पैहैं
 कह करि है अक्रूर हमारो ❀ फिरिजैहै करि मुख निज कारो
 दो० हमतजि हरि नहिं जाइहैं, मोहिं जीय विश्वास ।

कहा लेहिंगे मधुपुरी, बांड़ि यशोमति पास ॥

सो० धरयो तनक जब धीर, सुनि ताकी बानी सबन ।

सो जाने यह पीर, जो रँग राती श्याम के ॥

करत नन्द उपनन्द विचारा ❀ करिये कहा कौन उपचारा
को जानै कह नृप मन माहीं ❀ नृपआयसु मेढ्यो नहीं जाहीं
अति बालक बलराम कन्हई ❀ भये शोचवश अब नँदराई
तब बोल्यो यक गोप पुरानो ❀ प्रभु प्रभाव उर राखि सयानो
कहत कि मो मन में यह आवै ❀ सोई करो जो श्यामहिं भावै
इनको बालक करि मति जानो ❀ कहिगये गर्ग सोई परमानो
ये करता हरता सबही के ❀ भार उतारनहार मही के
जिनगिरिकर धरिब्रजहिबचायो ❀ बहुरि हमैं बैकुण्ठ दिखायो
जाहि गयो मुरपति शिरनाई ❀ ल्यायो नाथि कालिअहि जाई
करुणाधाम देखि प्रभुताई ❀ करतिहते सब तुमहिं बड़ाई
कहा कंस ताको भय मानै ❀ इनकी महिमा येही जानै
कितक धनुष हरि तुरत चढ़ैहैं ❀ देखत नहीं कंस सुख पैहैं

दो० जो करि है कछु कपट तो, सब समरथ गोपाल ।

हरि हलधर भैया उमै, ये कालहु के काल ॥

सो० हरषे सबै अहीर, हरि प्रताप उरमें समुझि ।

सब लायक बलबीर, धीर धरौ यह जानि कै ॥

बार बार यशुमति अकुलाई ❀ कहत रहौ सुत कुँवरकन्हई
अबहीं तात बहुत तुम वारे ❀ मथुरा बसत मल्ल हत्यारे
क्यों बलराम कहत तुम नाहीं ❀ तुम बिन लाल मात मरि जाहीं
कहत राम सुन यशुमति मैया ❀ तू मति बारो जान कन्हैया
मतिहि कंस भय व्याकुल होही ❀ एक भरोसो हरिको मोही
प्रथमहिं बकी कपट करि आई ❀ अतिहि प्रबल विषकुच लपटाई

चारहि दिनके तबहिं कन्हई ❀ तो देखत ही ताहि नशाई
 शकट तृणाव्रत बत्स अन्याई ❀ अघ अरिष्ट केशी दुखदाई
 एकहि पल में सकल सँहारे ❀ बिषजलते सब सखा उबारे
 गोवर्द्धन जिन करपर धाखो ❀ महाप्रलयको जल सब दाखो
 हरि सम बली और कोउ नाहीं ❀ तू मत शोच करै मन माहीं
 हम बालक कह तुमहिं सिखावैं ❀ धीर धरौ हम फिरि ब्रज आवैं
 दो० सुनि चरित्र गोपालके, उर आयो अवरोहि ।

जो कुब्र करैं सो सत्यप्रभु, आवत है सब सोहि ॥

सो० कह्यो नंद तब आय, मैं लै जैहों संग हरि ।

धनुष यज्ञ दिखराय, लै ऐहों तुरतहिं बहुरि ॥

अथ मथुरागमनलीला ॥

ऐसेहि सबको रात बिहानी ❀ भयो प्रात चिरिया चुडुहानी
 महर कह्यो सब गोप बुलाई ❀ दधि घृत भार सजौ बहु जाई
 नृपति भेंट हित करो सँजोई ❀ हरिके संग चलो सब कोई
 ग्वाल सखा यह सुनि अकुलाने ❀ चहत श्याम मधुपुरि निज जाने
 पखो शोर ब्रज घर जहँ ताई ❀ हरि मुख देखनको सब धाई
 सजत ग्वाल चलबे को साजा ❀ गैया फिरति दुहन के काजा
 कह्यो श्याम अक्रूरहि तबहीं ❀ जोतहु तात तुरत रथ अबहीं
 सुफलकसुत आयसु जब पायो ❀ सहित सकोच रथहि पलनायो
 सुफलकसुत ढिग दोऊ भाई ❀ होत नहीं न्यारे कहुं राई
 देखतही यशुमति अकुलानी ❀ परी धरणि बिलपति बिललानी
 बिकल कहति मोहिं तजो दुलारे ❀ जात किये सूनो ब्रज प्यारे
 यह अक्रूर ठगौरी लाई ❀ मोहे मेरे बाल कन्हई

दो० यह सुफलकसुत बूझिये, तुम्हें हरे मो वाल ।

बिरध समयकी लकुटिया, मेरे मदनगोपाल ॥

सो० देखहु मनहिं बिचार, लाभ कछ यामें तुम्हें ।

दियो धरम डर डार, कूर भये इत आयकै ॥

चलत जात चितवत ब्रजनारी ❀ विरह विकल तन सुरति विसारी

जहँ तहँ चित्र लिखीसी ठाढ़ी ❀ नैनन नीर नदी जिमि बाढ़ी

लगत निमेष कूल दोउ नाहीं ❀ भ्रमति नाव पुतरी ता माहीं

ऊरध श्वास समीर झकोरत ❀ चित्र कपोल तीरतरु तोरत

काजल कीच कुचील किये तट ❀ अधर कपोल उरज अंचल पट

रहे जहाँ तहँ पथिक जकेसे ❀ चरण हस्त मुख वचन थकेसे

श्याम विरह व्याकुल ब्रजवाला ❀ नीर हीन जिमि मीन बिहाला

सूखत अधर बदन मुरझाने ❀ जनु हिमपरस कमल कुम्हिलाने

कहति परस्पर वचन अधीरा ❀ गदगद वचन ढरत दृगनीरा

जीवन धन प्राणन को प्यारो ❀ लिये जात अक्रूर हमारो

मुनहु सखी अब कीजै सोई ❀ जातें बहुरि शूल नहिं होई

गये दूर रथ रह्यो न जैहै ❀ पुनि पाछे पछितायो ऐहै

दो० परिहरि यश आशा जियन, लाज पंचकी कान ।

करिये बिनती श्याम सों, सखी समय पहिचान ॥

सो० होनी होय सो होय, पांय परसि हरि राखिये ।

नातरु मरिहैं रोय, समय चूक उर शालिहै ॥

प्रभु अन्तरयामी सुखदानी ❀ विरह विकल गोपीजन जानी

चितये नयन कमलदल लोचन ❀ सकल शोच संताप विमोचन

मृदु मुसकानि ठगोरी डारी ❀ श्याम ठगी सब ब्रजकी नारी

रहंगई चितवत वचन न आयो ❀ चढ़े श्याम रथ अवसर पायो

हरिकों नाम सुमिरि मनमार्ही * चढ़े अक्रूर तुरन्त तहांहीं
देखत महारि यशोमति धाई * पुत्र पुत्र कहि ठे लगाई
मोहन नेकु देखि इत लैहौ * बिहुरत लाल भेट म्हांहि दैहौ
राखहु तात बोध करि मैया * बहुरो चढ़हु बिमान कन्हैया
लेहु निहार जन्म को खेरो * बहुरौ ब्रज में होत अँधेरो
यह कहि ग्वाल सखनको फेरो * अपनी गाय जाय सब घेरो
ऐसे कहि यशुमति बिलखाई * किये यत्न बहु प्राण न जाई
बिलपति बिकल राम महतारी * अति ब्याकुल सब ब्रजकी नारी

दो० देखि दुखित ब्रजलोग सब, और यशोदा माय ।

तब हरि कहि यह सुख दियो, बहुरि मिलेंगे आय ॥

सो० धरणी के हितकारि, मथुरातन चितये बहुरि ।

कह्यो दृगन सनकारि, रथहांकन अक्रूरसों ॥

बार बार यशुदा यों भाखै * कोऊ चलत गुपालहि राखै
सुफलकसुत बैरी भयो आई * हरे प्राण धन बाल कन्हवाई
हरहु कंस वह गोधन सारो * कै करि मोहिं बन्ध में डारो
ऐसेहु दुख श्याम सभागे * खेलहिं भों नयननके आगे
यह कहि महि लोटत अकुलानी * अति ही दुखित नंदकी रानी
गोपीजन बिरहानल डाढ़ी * रह गई प्रेम बियोगिनि ठाढ़ी
जिमिकुमुदिनिगणनीरबिहीना * रविहि प्रकाश आस तें दीना
श्यामबिमुखक्षणकुम्हिलानी * बहुरो मिलन कठिन जिय जानी
बलबुधितकितसवंतजललोचन * चलि नहिं सकीं रहीं मद मोचन
गँवैडे लौं सब गई विहाला * ब्रज तजि गवन कियो गोपाला
लै गये मधु अक्रूर निकारी * माखी ज्यों सब दीन बिडारी
देखत रहीं थकी कलाई * जबलागि धूरि दृष्टि में आई

दो० भये ओट जब दृगन तें, मूर्च्छि परी विलखाय ।

कहति गयो रथ दूरि अब, धूरि न परति लखाय ॥

सो० कहा करें ब्रज जाय, मन हरि लै गयो सांवरो ।

परत न आगे पांय, पाछेही लोचन लखत ॥

बदन बिकल विहारस मार्ती ❀ भई न पवन संग उड़िजाती

रजहू नहीं विधाता वानी ❀ जार्ती चरणकमल लपयानी

भई नहीं यक रथको अङ्गा ❀ जार्ती चलीं तहां लागि संगी

बिछुरे आज श्याम मुखराशी ❀ तौ परतीत दृगनकी नाशी

उड़ि नहिं गये श्याम संग लागे ❀ कृष्ण मयी नहिं भये अभागे

रसिक प्रेमके जगत पखाने ❀ रूपलालची सबकोउ जाने

सो करनी कछु इन नहिं कीनी ❀ व्यथा मीनकी छवि हरि लीनी

धनि धनि मीन प्रीतिपथ सांचे ❀ साखि ये नयन हमारे कांचे

अब ये शूल सहित जिय शोचत ❀ उमगि उमगि भरि भरि जलमोचत

हरि बिन अब लखिये ब्रज सूनो ❀ समय चूक सहिये दुख दूनो

भई अजान सबै मनमार्ही ❀ काहू चलत गह्यो रथ नाही

बृथा लाज करि काज विगाख्यो ❀ सह्यो दुसह विरहा दुख भाख्यो

दो० यों ब्रजतिय पछिताय सब, देखि यशोदहि दीन ।

लै आई सब नंद गृह, कृश तन बदन मलीन ॥

सो० ब्रजतिय परम उदास, हरि बिन मुख संपति सपन ।

रहैं प्राण इहि आस, श्याम कह्यो मिलि हैं वहुरि ॥

खगमृग बिकल जहां तहैं बोलैं ❀ गाय बत्स रांभत सब डोलैं

तरु बेली पल्लव कुम्हिलानी ❀ ब्रजकी दशा न परति बखानी

चले नन्द गोपन संग लैकै ❀ ब्रजवासिन को धीरज दैकै

बालसखा हरि के मुखदाई ❀ दर्शन लागि चले सब धाई

उत अक्रूर शोच मनमाहीं * कियो काज मैं नीको नाहीं
बल मोहन भैया दोउ बारे * अति कोमल नवनीठ पियारे
करिकै जननी जनक दुखारी * व्याकुल सबै घोष की नारी
मैं लै जात कंस पै तिनको * मो देखत मारैगो इनको
धृक धृक धृक कुबुद्धि यह मेरी * जाहुँ लिवाय इन्हें ब्रज फेरी
कंस आज मारै बरु मोहीं * हरिको जाय देहुँ नहिं ओहीं
यहि अन्तर यमुना नियराई * ठाढ़ो कियो तहां रथ जाई
अन्तर्यामी हरि भगवाना * भक्त हृदय संशय पहिचाना

दो० भूख लगी तब हरि कह्यो, हमें कलेऊ देहु ।

करि यमुना अस्नान पुनि, ताततुमहुँ कछु लेहु ॥

सो० सुनतबचन मृदु कान, सुफलकसुतसुनि तुरतही ।

कछु मेवा पकवान, भोजन दुहु भैयन दियो ॥

आप स्नान करन मन दीनो * यमुना पौठि संकलप कीनो
जबहीं शीश नीर में ढाख्यो * तब अचरज इक भाव निहाख्यो
राम कृष्ण रथ पर सुखदाई * जल भीतर शोभित दोउ भाई
चकित भयो जलते शिर काढ़्यो * देख्यो रथ बाहर सो ठाढ़्यो
बहुरो बूढ़ि सलिल में पेर्यो * वैसोइ फेरि तहां रथ देख्यो
क्षण जलमें क्षण प्रगट निहारै * पुनि पुनि संभ्रम बुद्धि विचारै
स्वप्न किधौं जाग्रत यह होई * कै धौं मो मति में भ्रम कोई
कै धौं जल में रथ की छाया * कै धौं यह हरि की कछु माया
भयो बिकल मति थिर कछु नाहीं * देखन लग्यो बहुरि जलमाहीं
जब अक्रूर बहुत अकुलायो * निज स्वरूप तहँ श्याम दिखायो
देखत भयो तहां जलमाहीं * सकल देव ठाढ़े हरि पाहीं
अस्तुति करत चरण चित दीने * नमित कंध कर संपुट कीने

दो० शेषसहस्रफलमणिनयुत, जगमगज्योति अनूप ।
श्वेतचरण पट पीत युत, राजत हलधर रूप ॥

सो० नवनीरद तनश्याम, पीतबास लावण्यनिधि ।
भुज प्रलंब अभिराम, शेष अंक हरि सोहर्ही ॥

चारु अरुण पंकज दल नैना * चितवन चारु चारु मृदु बैना
चारु तिलक बर भाल विराजै * चारु कुटिल कुन्तल छवि छाजै

चारु तिलक नासिका मुहाई * चारु कपोल अधर अरुणाई
सुन्दर श्रवण चिबुक दग्ग्रीवा * चारु बसन बिहसन छवि सीवा

उर विशाल श्री चिह्न विराजै * उदर सुधर रोमावलि राजै
नाभि गँभीर क्षीण कटि देशू * भुज विशाल बर चारु सुवेशू

जंघ गुल्फ अति चारु मुहाई * पदकमलन नख शशिछवि छाई
नख शिख अनुपम रूप विराजै * दिव्याभरण सकल अंग छाजै

कुंडल मुकुट जटित मणिमाला * मुक्कमाल बनमाल विशाला
यज्ञोपवीत पीताम्बर कांधे * कौस्तुभमणि अंगन बर बांधे

कर पल्लवन मुद्रिका राजै * शंख चक्र गदा पद्म विराजै
क्षुद्रघंटिका अति द्युतिकारी * मणिन जटित नूपुर छवि भारी

दो० नन्द सुनंदादिकन तें, दिव्य पारषद आहिं ।
कर जोरे ठाढ़े सबै, परिचर्या के माहिं ॥

सो० ठाढ़ी जोरे हाथ, माया निज माया सहित ।
भक्त भक्तके साथ, अंबरीष प्रह्लाद बलि ॥

शिव अजसहित शिवा अरु बानी * सनकादिक नारद अरु ज्ञानी
भक्तन सहित मुरासुर जेते * कर जोरे ठाढ़े सब तेते

चन्द्र कुबेर बरुण दिगपाला * मनु विश्वकर्म धर्म यम काला
बंदन करत चरण धरि माथा * गावत बेद सकल गुणगाथा

जलमें लखि अक्रूर भुलान्यो * कृष्ण प्रभाव प्रगट सब जान्यो
चिन्ता सकल चित्तकी नाशी * जान्यो कृष्ण ब्रह्म अविनाशी
मोहिं कृपा करि दर्शन दीनो * तहँ प्रणाम सुफलकसुत कीनो
अति आनंद बढ़यो मनमार्ही * अस्तुति करन लग्यो तिहिठाहीं
धन्य धन्य प्रभु अंतर्दामी * नारायण त्रिभुवन के स्वामी
सकल विश्व तुमहीं विस्तारो * बिस्वरूप है रूप तुम्हारो
निर्गुण निर्विकार अविनाशी * लीला सगुन गुणनकी राशी
प्रभु तुम सब देवन के देवा * जानै कौन तुम्हारो भेवा

छं० को जान तुम्हरो भेव हरि तुम सकल देवमयी प्रभो ।
आदिकारण सबहिके तुम विश्व सब तुम्हरो बिभो ॥
नाग नर सुर असुर अग जग दास सब तुम्हरो हरी ।
रहत माया सब तुम्हारी जाहि तुम ज्यहि बिधि करी ॥
योग यज्ञ अनेक कर्मन करि तुम्हैं सब ध्यावहीं ।
जैसे जाको भाव तैसो तुमहिं ते फल पावहीं ॥
अति अगाध अपार तुम गति पार काहू नहिं लह्यो ।
शम्भु शेष गणेश बिधना नेति निगमनहू कह्यो ॥
भक्त हित धरि बिबिध तन तुम चरित अद्भुत बिस्तरौ ।
मच्छ कच्छ बराह बपु है वेद गिरि तुम उद्धरौ ॥
होय नरहरि भक्त प्रण करि शरण हित बामन भये ।
भृगुवंशमणि अभिराम तनु धरि मानमय क्षत्री हये ॥
राम रूप निपात रावण अरु बिभीषण नृप कियो ।
कंसअरि यदुवंशभूषण कृष्ण बपु छवि निधि लियो ॥
बोधराय दयाल कलकि हिंसादि कर्म न भावहीं ।
निःकलंक मलेच्छहा दश रूप श्रुति तव गावहीं ॥

दो० तवगुणरूप अनन्त प्रभु, हौ अजान जगदीश ।

यों अस्तुति अकूर करि, नायो पदपर शीश ॥

सो० तबहिं श्याम सुखदाय, अंतरहित जलतें भये ।

निकस्यो अतिअकुलाय, तब जलते अकूर पुनि ॥

लखी कृष्ण की जब प्रभुताई ❀ बढ्यो हर्ष अति उर न समाई

भूले नेम न कछु कहि जाई ❀ मगन ध्यान बलराम कन्हाई

कहत मनहिं मन यह अविनाशी ❀ पूरणब्रह्म सकल गुणराशी

हरण करण समरथ भगवाना ❀ नार्हिन इन समान कोउ आना

कितक कंस भेदी उरसंशा ❀ ये करिहैं ताको निखंशा

चल्यो हांकि रथ तब हर्षाई ❀ नंद उपनंद मिले तहँ आई

हरि अकूरहि बूझत जाहीं ❀ करि सयान मन मन मुसकाहीं

कही तात तुम अब हर्षाने ❀ प्रथमहिं कछु बहुत मुरझाने

कहौ सांच हमसों सोइ वानी ❀ तब अस्तुति अकूर बखानी

धन्य धन्य प्रभु धनि श्रीकंता ❀ गुणन अगाध अनादि अनन्ता

निगम नेति कहि जाहि बखानै ❀ सहसानन नित नवगुण गानै

करिकै कृपा जान निज दासा ❀ दियो दर्श संशय सब नासा

दो० अब म्वहिं प्रभु बूझत कहा, तुमत्रिभुवनके नाथ ।

कर्ता हर्ता जगत के, सकल तुम्हारे हाथ ॥

सो० कहा बापुरो कंस, कहा मल्ल कह कुवलय ।

अब करिये निर्बस, बेग नाथ ऐसे खलन ॥

मुनि मोहन सुफलकसुत वानी ❀ भये प्रसन्न भक्त सुखदानी

जात चले रथपर दोउ भाई ❀ सन्मुख दृष्टि मधुपुरी आई

तरणि किरण महलन बबिछाई ❀ जगमगात नभ सुंदरताई

अकूरहि बूझत धनश्यामा ❀ कहियत है मधुपुरी ये नामा

श्रवणन सुनत रहत हे जाही ❀ देख्यो आज दृगन तें ताही

कंचन कोटि कंगूरा सोहैं * बैठे मनहुं मदन मन मोहैं
 बन उपवन पुरके चहुं पाहीं * अति भावत मेरे मनमाहीं
 लखिलखि हरि मथुराकी शोभा * पुनि पुनिपुलकितकरिमनलोभा
 तहां जन्म जिय में करि जाने * तातें अधिक हर्ष उर माने
 बाजति नौबति नृपति दुवारा * होत शब्द घरियाल उदारा
 सुनि सुनि मन आनंद बढ़ावैं * नगर शोर सुनि रुचि उपजावैं
 कनकखचित मणिजटित अटारी * धवल नवल अति ऊँचि सँवारी

दो० ध्वजपताकतोरण कलश, जहँ तहँ ललितबितान।

मुक्ता भालर भलमलैं, को करि सकै बखान ॥

सो० निरखि निरखि हर्षात, मन मोहन अकूर को।

बलहि देखावत जात, ललित लाल करपल्लवन ॥

कह अकूर सुनहु ब्रजनाथा * भई आजु मधुपुरी सनाथा
 तुमहिं बिलोकि विराजति ऐसी * पति आगम तिय सोहति जैसी
 कसी कोट कटि किंकिणि मानौ * उपवन बसन विविधरँग जानौ
 मन्दिर चित्र बिचित्र सुहाये * जनु भूषण रचि रंग बनाये
 जहँ तहँ विविध बाजने बाजैं * मनहुं चरण नूपुर धुनि साजैं
 धामन ध्वजा विराजतहैं जिमि * संभ्रम गति अञ्जलचञ्जल तिमि
 उच्च अटन षट्शतु छवि छाजैं * जनु उर आनंद उमँगि विराजैं
 भूलीं अति सुख संभ्रमतातैं * प्रगटे कनक कलश कुच जातैं
 मोखा द्वार दरीची द्वारा * लागे बिद्धम कुलिश किवारा
 मनहुं तुम्हारे दर्शन लागी * नयनन रहीं निमेषन त्यागी
 मुक्ता भालर खिरकि विराजैं * हँसति मनो आनंदन साजैं
 जगमगि ज्योति रही छवि भूली * जनु तुम पंथ निहारत भूली
 दो० नीके हरि अवलोकिये, पुरी परम रुचि रूप।

असुर कंसको जीतिकै, होहु यहां के भूप ॥

सो० सुनि बिहँसे नँदलाल, लखत बचन अकूर के ।

पहुँच्यो रथ ततकाल, जाय निकट मथुरापुरी ॥

नगर निकट पहुँचे जब जाई ❀ सुफलकसुवन सहित दोउ भाई
गौर श्याम रथपर दोउ राजें ❀ कोटिन काम निरखि छवि लाजें
कंस दूत लाखि जहँ तहँ धाये ❀ समाचार सब नृपति सुनाये
आये बल मोहन दोउ भाई ❀ सुनतहि नाम उठ्यो अकुलाई
गहि कर खड्ग चर्म लै धायो ❀ रंगभूमि के महलन आयो
गज मुष्टिक चाणर बुलाये ❀ और सुभट सब बोलि पठाये
तिनसन कह्यो सजग सब होऊ ❀ ठाँवहि ठाँव रहौ सब कोऊ
बहुतक असुर निकट बैठाये ❀ धनुष पास बहु सुभट पठाये
पठवत दूत दूत पर धाई ❀ आये कहँ लागि देखौ जाई
गजें कंस सेन सब साजे ❀ द्वारे विविध बाजने बाजे
पीरौ भयो हृदय डर मानो ❀ सूखत अधर बदन कुम्हिलानो
नंद महरके सुत सुनि आवत ❀ मन मन मारन गर्व बढ़ावत
दो० पख्यो शोर मथुरा नगर, आवत नन्दकुमार ।

सुनि आये नर नारि सब, गृहको काम बिसार ॥

सो० लाजकानडरडार, कोउखिरकिनकोउ अटनपर ।

कोऊ खड़ी दुवार, कोउ धावत गलियन फिरत ॥

कियो प्रवेश नगर में जाई ❀ असुर निकन्दन जन सुखदाई
इन्दुवरण रथपर दोउ बीरा ❀ सुभग श्याम बर गौर शरीरा
शीश मकट कुंडल छवि छाजै ❀ कुंडल एक राम श्रुति राजै
नील पीत बर बसन निकाई ❀ मुकुमाल बनमाल मुहाई
निरखि सकल पुरजन अनुरागे ❀ धाय धाय रथ के सँगलागे

युगल रूप लखि होहिं मुखारे ❀ इकटक लोचन टरहिं न गरे
चढ़ी अदरिन देखहिं नारी ❀ बढ़यो प्रेम आनंद उर भारी
निशिदिन सुन गुणगण अभिलासी ❀ अति आरत दरशनकी प्यासी
शशि आनन मृदुबेष किशोरा ❀ भये निरखि दौड नयन चकोरा
पुलकि गात दृग आनंद पानी ❀ कहत सप्रेम परस्पर बानी
येई सखि बलराम कन्हारै ❀ सुनियत जिनकी बहुत बढ़ाई
नंद गोप के ये दौड दोय ❀ गौर श्याम सुन्दर बर जोय

दो० मणि कंचन के शिखर दौड, किधौं मानसरहंस ।

कै प्रगटे ब्रज देन सुख, त्रिभुवन के अवतंस ॥

सो० धनिधनिगोकुल ग्राम, धन्यश्यामबलरामधनि ।

धनिधनिब्रजकीबाम, प्रगट प्रीतिपालीजिन्हनि ॥

सुनति हुती पुरुषारथ जिन के ❀ देखहु रूप नयन भरि तिन के
अतिहि अनूप बेष नट सोहै ❀ कहहु सो को छवि देखि न मोहै
पूरब जन्म मुकृत कोउ कीनो ❀ सो बिधि यह नयनन फल दीनो
अति अभिराम श्याम छवि धारी ❀ इनहीं प्रथम पूतना मारी
शकटा तृणा इनहिं संहारे ❀ बत्स बका अब पुनि इन मारे
इन्द्र कोप बर्षन ब्रज कीनो ❀ इनहीं गिरि कर धरि रख लीनो
जलते काली इनहिं निकाखो ❀ पुनि अरिष्ट केशी इन मारयो
गौर शरीर नाम बल होई ❀ धेनुक अरु प्रलम्बहा सोई
अब अकूर पठै नृपराई ❀ इहां बोलि पठये दौड भाई
रंगभूमि रचि कियो अखारो ❀ कहा करन धौं हृदय विचारो
जननी धीर धरयो धौं कैसे ❀ अति बालक पठये हैं ऐसे
देहिं अशीश मांगि बिधि पाहीं ❀ न्हातहु बार खसहु तन नाहीं

दो० लेत बलैया वारिकै, आंचर यह कहि नार ।

करि है इनसों कपट नृप, तौ कै है जरि द्वार ॥

सो० सुफल भये मन काम, देखि दरश इनको सखी ।

कुशल जाहु निज धाम, देत अशीश सुनाय सब ॥

कहति युवति यक सुनहु सयानी ❀ मैं जो सुन्यों सो कहत बखानी
ये बसुदेव कुँवर सखि दोऊ ❀ ऐसे लोग कहत सब कोऊ
कंस त्रास करि मात पठाये ❀ नन्द सखा गृह जाय दुराये
करि दुलार यशुमति पय प्याये ❀ हित करि तिनके बाल कहाये
गौर अंग नयनन रतनारे ❀ जो प्रलम्ब को मारन हारे
कुंडल एक बामश्रुति धारी ❀ ते रोहिणी सुवन सुखकारी
अति अभिराम महाबल धामा ❀ ताते नाम धख्यो बलरामा
श्याम सुभग तन उर बनमाला ❀ शीश मुकुट युग नयन विशाला
जिन्हें हेतकरि सँग ब्रजवामा ❀ मान्यो नाह सकल सुखधामा
जिनके चरण छुवत बड़पापी ❀ पाई सुगति सुदर्शन शापी
अमित प्रभाव कृष्ण सब कहहीं ❀ जिनके नाम अगम गति लहहीं
कहत देवकीसुत सब तिनसों ❀ कंसराज भय मानत जिनसों

दो० आये हैं अकूर सँग, तात मात सुखदैन ।

रंगभूमि रिपु जीति कै, करि हैं यदुकुल चैन ॥

सो० सुनिसुनिमुदितसुनारि, अतिप्रियबाणीतासुकी ।

मांगत गोद पसारि, बिधिसों ऐसो होय सब ॥

देत सबन सुख यों मनभावन ❀ उतरे जाय बाग इक पावन
गोपन सहित नन्द तहँ राख्यो ❀ तब सुफलकसुतसों हरि भाख्यो
कहहु तात आगे तुम जाई ❀ आये श्याम राम दोउ भाई
बहुरि नृपति जब हमैं बुलैहैं ❀ करि विश्राम हमहुँ तब ऐहैं
तब अकूर जोरि युग पानी ❀ बोल्यो सुनत श्यामकी बानी

म्वहि न्यारो क्यों करत गोसाईं ❀ राखो निकट दास की नाई
 कंसदूत मोको जनि मानो ❀ निज सेवक अपनो करि जानो
 अरु मेरे मनमें यह आसा ❀ चलिय धाम कीजै मो बासा
 तब हँसि कै बोले घनश्यामा ❀ ऐहाँ एक दिना तुम धामा
 ऐसे कहि अकूर पठाये ❀ बिदा होय नृप पास सिधाये
 रथते उतरि परे दोउ भाई ❀ ग्वालबाल सब लिये बुलाई
 सखा भ्रात संग सहज हुलासा ❀ गये यमुनतट नगर निवासा
 दो० बाल बयस शोभित सुभग, बाल सखनके संग ।

गौर श्यामशोभानिरखि, लज्जितकोटिअनंग ॥

सो० अति बिचित्र को जान, ब्रजवासी प्रभुके चरित ।

अमित गुणन की खान, जनरंजन दुष्टनदलन ॥

अथ रजकबधलीला ॥

नृपतिरजक अम्बर नृप धोवै ❀ आवत देखि श्यामतन जोवै
 हँसत गर्व बातै यों चालैं ❀ कंस राज के उर ये शालैं
 लघु लघु बयस गोपके जाये ❀ बहुत अचगरी करि ये आये
 तृणावर्त प्रभु रह्यो हमारो ❀ इनहीं ताहि शिलापर मारो
 अति खोटे जिहि नाम कन्हई ❀ प्रथम ताहि डारै मरवाई
 है बलभद्र तैस्वई खोटे ❀ गोरो अंग महाबल मोये
 ताहु को मारैगो राजा ❀ बोले हैं याही के काजा
 ऐसे कहत परस्पर बानी ❀ प्रभु अन्तर्यामी सब जानी
 ग्वालन सहित गये तिहिपाहैं ❀ कहाँ कछु अम्बर हम चाहैं
 तिनको पहिरि नृपति पै जैहैं ❀ देहैं बहुरि तुम्हैं जब ऐहैं
 जो पहिरावन नृप सों पैहैं ❀ तामें कछु तुमहूँ को देहैं
 कै पहिलेही लेहौ हम सों ❀ बूझत हैं तैसी हम तुमसों

दो० हँस्यो बचन सुनि श्यामके; कह्यो गर्व करि बैन।

बलिके बकरा है रहे, आये हैं पट लैन ॥

सो० राखें घरी बनाय, है आवहु नृप द्वार लौं।

तब लीजो पट आय, जो भावै सो दीजियो ॥

बन बन फिरत चरावत गैया ❀ अहिर जाति कामरी उढ़ैया

नट को भेष साज के आये ❀ नृप अम्बर पहिरन मनभाये

जुरि कै चले नृपति के पासा ❀ पहिरावन लेबे की आसा

नेक आश जीवन की जोऊ ❀ खोवन चहत अबहिं पुनि सोऊ

यह सुनि श्याम कह्यो मुसकाई ❀ देहु बसन है तुमहिं भलाई

हम मांगत हैं सहजहि तुमसों ❀ तुम कत करत इती रिस हमसों

सहज बात को रिस नहिं कीजै ❀ मांगे देहु मान गुण लीजै

ऐत भौह बरज करि मानो ❀ ये नृप बसन नहीं तुम जानो

अबहीं सुनत क्षणक में मारैं ❀ नन्दहि पकरि बन्दि में डारैं

जाहु चले ह्यांते अब नीके ❀ कै है हौ अबहीं बिन जीके

करत अचगरी मोसों आई ❀ दुहुन मारिहों कंस दुहाई

यह मनि कियो श्यामसो ख्याला ❀ भुजा पकरि पट्यो ततकाला

दो० तुरत गयो तन तजि स्वर्ग, कीनो रजक निहाल।

जन्म मरण तैं रहगयो, ऐसो गुण गोपाल ॥

सो० लखि कै गये पराय, संगी ताके सब रजक।

लीने बसन लुटाय, श्याम प्रथम ही नृपति के ॥

रजक मार सब बसन लुटाये ❀ आप पहिरि ग्वालन पहिराये

विविध रंग बहुभांति नवीने ❀ निज निज रुचि ग्वालन सब लीने

ले तहां ते सब हर्षाई ❀ मिल्यो एक दरजी पुनि आई

प्रभुको देखि बहुत सुख पायो ❀ चरण कमल को माथ नवायो

घाट बाढ़ जो बसन सुहाये * ते उन सम करि तुरत बनाये
ताको कृतहि मान प्रभु लीनो * अभयदान दै निजपद दीनो
पुनि यक माली हतो सुदामा * ताके द्वार गये घनश्यामा
तुरत आय तिन पद शिर नायो * हरि हलधर लखि हरष बढ़ायो
आदर सहित सदन में आने * चरण धोय निज भाग्य बखाने
नृपति हेतु जो हार बनाये * ते सप्रेम प्रभु को पहिराये
हाथ जोरि बहु बिनय सुनाई * जय जय श्रीपति प्रभुपदराई
मोको बहुत अनुग्रह कीनो * दीन जानि अपनो करि लीनो

दो० सुनि सप्रेम ताके बचन, रीझे श्याम सुजान ।

माली पूरणकाम करि, दियो भक्ति बरदान ॥

सो० सखन सहित दोउभाय, बहुरि हर्ष आगे चले ।

तहां पंथमें आय, कुबजा लै चन्दन मिली ॥

निरखि श्यामछबि तनसुधिभूली * बोली हरष प्रेमरस फूली
हो प्रभु दीनबन्धु सुखदाई * तुम्हें नाथ चन्दन में ल्याई
मोहिं कल्पना यह जगबन्दन * चरचौं अंग तुम्हारे चन्दन
दासी कुल कुबजा मम नाऊं * नृप के उर चन्दन नित लाऊं
चरचे जनिके प्रभु तिहि ठाहीं * अरि अरु मित्र बसत उरमाहीं
आजहि दश प्रगट प्रभु पायो * मो जियको सन्ताप नशायो
अब यह भली कृपा करि लीजै * पूरण काम नाथ मम कीजै
अन्तर्यामी प्रभु सुख दानी * भाव भक्ति कुबजा पहिचानी
भावहि के बश त्रिभुवनराई * हित करि कुबजा निकट बुलाई
बन्दन करि पूजे दोउ भाई * रही श्यामछबि निरखि मुलाई
तब हरि हलधरसों हँसि भाख्यो * हेतु बहुत इन सबसों राख्यो
हमहूँ कछु याको हित कीजै * मूधे अंग नेक कर दीजै

दो० पग राख्यो पग पीठपर, धख्यो शीश कर श्याम ।

नेक उठाई चिबुक गहि, भई सुन्दरी बाम ॥

सो० को करि सकै बखान, जाहि बनाई आप हरि ।

भई रूप गुण खान, कुबजा मन आनन्द अति ॥

महा कुरूप कूबरी तैसी ❀ परसत तुरत भई रति जैसी

तब कुबजा अपने मन मान्यो ❀ मिले मोहिं मोहन पति जान्यो

पुनि पुनि कमल चरण शिर नाई ❀ हाथ जोरि बहु विनय सुनाई

जिभि कीनी भविं कृपा कृपाला ❀ तिभि मम सदन चलहु नँदलाला

अपने कमल चरण तहँ धरिये ❀ सुफल मनोरथ मेरो करिये

तासों बिहँसि कह्यो घनश्यामा ❀ कंस देखि ऐहों तब धामा

अपनी करि तिय सदन पठाई ❀ चले धनुष देखन दोउ भाई

ग्वालसखा सँग सुभग सुहाये ❀ काम सबै बर रूप बनाये

पुरजन भीर चहुँ दिशि भारी ❀ चढ़ी अशरित देखहि नारी

निरखि श्याम मुखइन्दु उदारा ❀ जनु पुर उदधि तरंग अपारा

जहँ तहँ कहत सकल पुरबासी ❀ भई सुन्दरी कुबजा दासी

श्याम कछु चेशक सो कीनों ❀ अंग सुधारि रूप बर दीनों

दो० रजक मारि लूटे बसन, करी कूबरी चारु ।

बालभाव मोहत मनहिं, हैं कोउ देव उदारु ॥

सो० सुनत रहे दिन रैन, पुरषारथ इनको भवन ।

तैसे देखे नैन, ब्रजवासी प्रभु नंद सुत ॥

गये धनुष शाला दोउ बीरा ❀ देखत चकित भये भट भीरा

अस्र सँभार उठे अकुलाई ❀ देखि थके सुन्दर दोउ भाई

धनुष समीप असुर सब ठाढ़े ❀ अति बलवंत धीर रन गाढ़े

सहजहि घेर लिये दोउ भैया ❀ बोल उठे सब मुनहु कन्हैया

मुनियत अतिबल भुजा तुम्हारी ॥ यह कोदंड चढ़ावहु भारी ॥
तिनसों बिहँसि कह्यो सुखरासी ॥ कहा करत हम सों यह हाँसी ॥
कहां बाल हम बैस किशोरा ॥ कहां धनुष अति गरुअ कठोरा ॥
शूरवीर ठाढ़े सब लाहिये ॥ तिनसों धनुष चढ़ावन कहिये ॥
खेलन कहौ खेल कछु हमको ॥ सो हम खेल दिखावैं तुमको ॥
ऐसे श्याम हँसत तिनमार्हीं ॥ अरु अकूर गये नृपपाहीं ॥
समाचार सब जाय सुनाये ॥ नंदसहित बल मोहन आये ॥
यह कहि घर अकूर सिधारे ॥ रजक जाय तिहिकाल पुकारे ॥

दो० मारे बिन दूषण हमैं, नंद गोप के बाल ।

लीने बसन लुटायके, पहिराये सब ग्वाल ॥

सो० सुनतहि उठयो रिसाय, बोल्यो सबन बुलाय नृप ।

करी प्रथमहीं आय, देख्यो इन ढीठे बड़े ॥

अब मारिहौ अवशि दोउ भाई ॥ लेहु आज सब ब्रजहि लुटाई ॥
देहु बन्दि में नन्दहि ल्याई ॥ गये अहीर बहुत इतराई ॥
मैं सादर करि इनहि बुलायो ॥ आगे दै इन रजक मरायो ॥
देखहु कोउ जान नहिं पावैं ॥ असुर जाय सबको गहि ल्यावैं ॥
ऐसे कंस कहत रिस पाई ॥ तबहीं दूतन खबरि जनाई ॥
कुबजा सों चंदन हरि लीनो ॥ ताको रूप अनूपम दीनो ॥
धनुष निकट पहुंचे दोउ भाई ॥ यह सुनतहि कछु गयो सुखाई ॥
बहुरि धीर धरि असुर पठाये ॥ ते यह कहत श्यामपहँ आये ॥
पहिले तोरि धनुष गोपाला ॥ बहुरि बुलायो निकट सुवाला ॥
सुनि असुरनके बचन कन्हाई ॥ बोले मनहीं मन मुसकाई ॥
याही को नृप हमहिं बुलायो ॥ जोखो बैर जान यह पायो ॥
गहन लगे तैं बालक जानी ॥ तबहिं श्याम कछु रिस उर आनी ॥

छं० उर आनि रिस गहि पानि तुरतहि असुर ले मारे सबै ।
 अतिहि बेग उठाय धनुषहि तोरि महि डाख्यो तबै ॥
 उठे तब करि क्रोध योधा मार मार पुकारहीं ।
 नंदसुत रण बीर ही धरि धीर असुर सँहारहीं ॥
 एक भटकत एक पटकत तेन मटकत फिरतहीं ।
 एक अटकत एक लटकत एक सटकत जहिं तहीं ॥
 ताल चटकत चमकि छटकत देखि भटकत नट भले ।
 एक पकरि फिराय पटकत जात ते नृप पहुँ भले ॥

दो० ख्यालहि मारे असुर सब, तोर धनुष नँदलाल ।
 चले सामुहे पँवरि तकि, जहां कुबलया व्याल ॥

सो० देखत चढ़े विमान, ब्रह्मादिक सुर सिद्ध मुनि ।
 डारत सुमन सुजान, ब्रजबासी प्रभुपर हरषि ॥

रंगभूमि हरि हलधर आये ॥ संग सखा सब ग्वाल मुहाये
 आप आपनी छवि सब छाये ॥ रवि शशि उडुगण उदित मुहाये
 देख्यो द्विद द्वारपर ठाढ़ो ॥ मनहुं गर्व को गिरिवर गाढ़ो
 कंध केशरी गर्वी प्रहारी ॥ बल तन हँसे गयन्द निहारी
 ता क्षणकी छवि कही न जाई ॥ कसत पीतपट कटि लपटाई
 श्याम सुभग लट घूंघरवारी ॥ पाग पेच मिलि पाग सँवारी
 मधुपुर की युवती सब बाढ़ी ॥ कहत परस्पर महलन ठाढ़ी
 लखहु सखी अंग अंग लुनाई ॥ रूप राशि मनहरण कन्हाई
 कोटिमदनछवि विधिलुनीलीनी ॥ तब यह मूरति सांवरि कीनी
 अतिहिकुशलये लखि सुखदाता ॥ हम अभागि कै कूर विधाता
 धनि ब्रजतिय इनके सँग लागीं ॥ निशि दिन रहत प्रेम रसपागीं
 बन बीथिन कुंजन बिच डोलैं ॥ रास हास रस करत कलोलैं

दो० होयँ हमारे सुकृत कछु, सुनहु सखी तौ आज ।

जैसे तोख्यो धनुष हरि, त्यों जीतैं गजराज ॥

सो० सुरनमनावतजात, अति कोमल नँदलाल लखि ।

बचहु कुशल दोउ भ्रात, मात पिताके पुण्यते ॥

देखि मतंग द्वार मतवारो ❀ गजपालहिं बलराम हँकारो

सुनहु महावत बात हमारी ❀ लेहु द्वास्ते बारण दारी

जान देहु हमको नृप पासा ❀ नातरु द्वैहै गज को नासा

कहे देत नहिं दोष हमारो ❀ मति जानै तू हरिको बारो

त्रिभुवनपति दुष्टन संहारी ❀ धरणी भार उतारन कारी

सुनत बोल गजपाल रिसानो ❀ रे गोपाल तुम्हैं मैं जानो

त्रिभुवनपति अब गाय चराये ❀ गाँडे खान गजन सों आये

बादत बड़े शूर की नाहीं ❀ जैहैं प्राण अबहिं क्षणमाहीं

तोख्यो धनुष भयो अतिगारो ❀ नहिं जानत यह गज अतिभारो

दश सहस्र गजको बल याही ❀ डरपति है ऐरावत ताही

जब लागि यासों लरि नहिं लैहौ ❀ तबलगि कैसे भीतर जैहौ

ऐसे कहि अंकुश कर लीनो ❀ गज गजपाल सामुहे कीनो

दो० तबहिं कोप हलधर कह्यो, सुन रे मूढ़ कुजात ।

गजसमेत पटकों अबहिं, मुँह सँभार कहु बात ॥

सो० नेक न लगिहै बार, बारन मरिजैहै अबहिं ।

तोसों करत पुकार, मान अजहुं मेरो कह्यो ॥

यह सुनि गज गजपाल रिसायो ❀ झटकि सूंड़ि बहुरौ गज धायो

लीनो लपटि सूंड़ि के माहीं ❀ देखत शूर वीर चहुंघाहीं

तब बलराम कोप करि भारी ❀ बज्रसमान थाप यक मारी

तन समेट कर करि सकुचान्यो ❀ दर्ई कूक बढ रंघ्र सुखान्यो

तबहीं उचटि भये बल न्यारे ॥ असुरसेन देखत हिय हारे
 हँसत निकट ठाढ़े दोउ भाई ॥ देखि महावत रह्यो लजाई
 थकित रह्यो हाथी जब जान्यो ॥ तब मनमें गजपाल डरान्यो
 जो ये बालक बधे न जाहीं ॥ मारै कंस मोहिं पल माहीं
 अंकुश मसक शीशपर दीनो ॥ बहुरि गयन्दहि तातो कीनो
 भयो क्रोध हाथी मन माहीं ॥ गरडस्थल मद अम्बु चुचाहीं
 पवन बेग ते आतुर धायो ॥ गरज घुमरि दोउनपर आयो
 महाकोप करि गहे कन्हाई ॥ पखो दशन दै धराणि धसाई

दो० डरपि उठे तिहिकाल सब, सुर मुनि पुरनरनारि ।

दुहूँ दशन बिचकै कढ़े, बलनिधि प्रभु दैत्यारि ॥

सो० उठे गजहि के साथ, बहुरि खयालई हांक दै ।

तुरतहि भये सनाथ, देखि चरित सब श्यामके ॥

हांक सुनत अति कोप बढ़ायो ॥ भटकि सँड बहुरौ गज धायो
 रहे उदर तर दबकि मुरारी ॥ गये जान गज रह्यो निहारी
 पाछे बहुरि प्रगट हरि देख्यो ॥ बलदाऊ आगे ते घेख्यो
 लागे गजहिं खिलावन दोऊ ॥ चकित भये देखत सब कोऊ
 चहुँधां फिरत चक्र की नाई ॥ सँड पूछ क्षण क्षण क्वै जाई
 नेक नहीं अवसर गज पावै ॥ चारोंदिशि हरि फिरत नचावै
 घात करत मनहींमन माहीं ॥ गज रिसबिकल इन्हें रिस नाहीं
 कबहुँ पूछ पकरि के भेलैं ॥ ज्यों बालक बछरन सँग खेलैं
 कबहुँ इत उत ते दोउ बीरा ॥ भजत मारिकै मुष्टि गँभीरा
 कबहुँ उदर तर है कढ़ि जाहीं ॥ नेक छुवन पावत गज नाहीं
 नील पीत पट कटि फहराहीं ॥ चपल नैन दीरघ वर बाहीं
 खेलत गज चंचल सँग राजै ॥ निरत मदन मनहुँ गति साजै

छं० जनुमदन निरुत साजि गति इमि श्याम अरु गज खेलहीं ।
 पूछ कर गहि कबहुं आगे कबहुं पाछे पेलहीं ॥
 गजहिलखि पुरनारि नरसब विकल बिधिहि मनावहीं ।
 बेग मारैं श्याम गजको हम निरखि सुख पावहीं ॥
 दीनो महावत बहुरि अंकुश क्रोध करि हाथी चल्यो ।
 जबहिं हरि गहि पूछ पटक्यो नेक नहिं भूपर हल्यो ॥
 लये खैंच मृणाल ज्यों रद सुमन भर देवन करी ।
 दास ब्रजवासी हरष सब असुर की सेना डरी ॥

दो० हँसत हँसत माख्यो प्रबल, द्विरद कुबलया श्याम ।
 सखनसहित ठाढ़े मुदित, छबिनिरखत ब्रजबाम ॥

सो० माख्यो गज बल भ्रात, जहँ तहँ सबकोऊ कहत ।
 चिरजीवहु दोउ भ्रात, प्रभु ब्रजवासीदासके ॥

कुबलयावधलीलासम्पूर्णम् ॥

अथ मल्लयुद्धलीला ॥

चले जहां सब मल्ल गोपाला * द्विरददन्त धरि कन्ध विशाला
 गौर श्याम सुन्दर दोउ भाई * श्रमसीकर मुख कमल सुहाई
 छवि अपार बलनिधि गम्भीरा * संग गोप बालक की भीरा
 सुनत कंसजिय अति भय मान्यो * नवलग ज्यों पिंजर अकुलान्यो
 भाजनको मन मांझ बिचाख्यो * भाज न सक्यो लाज को माख्यो
 गये रंगमहि मोहन जबहीं * ज्यहि जसभाव दरशतेहि तसहीं
 उठे शंकि सब मल्ल अधीरा * बलसमूह देखे दोउ वीरा
 दुष्ट दैत्य मारे तहँ जेते * रूप भयानक दरशे तेते
 कंस समीप भूप जे आये * तिन्हें राजवंशी दरशाये

साधु सिद्ध देखहिं शुभधामा ॥ इष्टदेव पूरण सब कांसा
देखे सुरगण मगन सुखारी ॥ सब देवन के देव सुरारी
गवालबाल सब देखत ऐसे ॥ सदा संग खेलत ब्रज जैसे
दो० महलन ते देखैं प्रभुहि, सकल सुन्दरी वाम ।

कोटि काम शोभाहरण, नवकिशोर सुखधाम ॥

सो० देखत अति बिपरीत, कंस नृपति नँदलालकों ।

कंपि उख्यो भयभीत, प्रगट काल दरशन भयो ॥

सर्व भाव पूरण भगवाना ॥ अवलहिं अवलवलहिं बलवाना

ललितहि ललित साधुको साधू ॥ छलिन छली सबगुणन अगाधू

जो जन जैसो ध्यान लगावैं ॥ ताको तिहिविधि दरश दिखावैं

कहत देखि सब सुन्दर जोय ॥ येई नन्दमहर के दोय

रजक मारि नृप वसन लुटाये ॥ कीने कुवजा अंग सुहाये

इनहीं असुरसमूह सँहाखो ॥ धनुष तोरि हाथी इन माखो

धरे कन्ध गजदन्त बिराजैं ॥ बालक गोप सखा सँग राजैं

देखत असुर भीर चहुँ पासा ॥ जिनके वश में भूमि अकासा

लीने घेर कंस भयमानी ॥ तब चाणूर कहत हँसि बानी

आवहु श्याम इतहि पग धारो ॥ सुनत हुते बहु नाम तुम्हारो

सबकोउ तुम्हरे बलहि बखानै ॥ हारि जीत काकी को जानै

कहा भयो जो गज तुम माखो ॥ लरहु आज हम संग अखाखो

दो० कहा नाम हमरो सुन्यो, हँसि बोले घनश्याम ।

हम बालक भोरे अबहिं, हमैं खेलसों काम ॥

सो० कहिये बात बिचार, हमैं तुम्हैं लरिबो कहा ।

अपगति यह व्यवहार, आप देखि देखहु हमैं ॥

जान देहु हम को नृप पाहीं ॥ काहे को रोकत मगमाहीं

नृप हमको करि हेतु बुलायो * तुम यह हम को कहा सुनायो
 तब चाणूर कह्यो पुनि ऐसे * तुमकों बालक कहिये कैसे
 किये कर्म ब्रज में तुम जैसे * देखे सुने नहीं कहूं तैसे
 गिरि गोवर्द्धन करौ धार्यो * जल तें काली नाग निकार्यो
 औरौ अमुर बीर बलभारे * सुनियत खेलतही तुम मारे
 सो बल आज देखि हम लेहैं * आगे जान तुम्हें तब देहैं
 ज्यों ज्यों कंस लखत दोउ भाई * त्यों त्यों भय व्याकुल अकुलाई
 कहि कहि बारहि बार पठावैं * मल्लन को बहु त्रास सुनावैं
 क्योंरे सकुच करत मनमार्हीं * मारत शत्रु बेग क्यों नाहीं
 जो दोउ बालक आज न मारो * करें सकल तौ नाश तुम्हारो
 नृप संदेश सुनि मल्ल डराने * कहत परस्पर मन सकुचाने

दो० लौन नृपतिको मानकै, नंदसुवन सों आज ।

लर मरिये कै मारिये, करैं कंस को काज ॥

सो० लेहु सुयश नृप पास, अब बिलंब नहिं कीजिये

कछु क्रोध कछु त्रास, बोलि उठे तब मल्ल सब ॥

हमसों श्याम लरत क्यों नाहीं * घाटि न कछु हमते बलमाहा
 पशु पालक तुम कुँवर कन्हारि * जीते बहुतक पशुन खिलाई
 अब लागि नहीं मल्ल कोउ भेंट्यो * अबतौ हम सँग पर्यो चपेट्यो
 मल्ल युद्ध तुम सों हम लरिहैं * अब नरपति को कारज करिहैं
 ऐसे कहि कहि प्रभुहि सुनावैं * भुजा ऐंठि रज अंग चढ़ावैं
 ठोकेँ ताल गाज ज्यों गरजैं * गहैं गांस हरितन तकि तरजैं
 आपुस में सब करत बिचारा * डारहु मारि उभय सुकुमारा
 सुनि सुनि हरि हलधर मुसकाहीं * बोले बहुरि विहँसि तिहि पाहीं
 सुनिये सकल मल्ल समुदाई * यह तुम्हरे मन अवहीं आई

नृप पै हमें जाय नहिं देहौ ॥ वड़ो मुयश हम सों लरि लेहौ
 निपट खोज अब परे हमारे ॥ यह न वसी उर भली तुम्हारे
 हँसत कहैं तौ तुम चित जैसी ॥ कहत कहा कीजै अब तैसी
 दो० जबहिं श्याम ऐसे कह्यो, विलखि उठीं सबनार।

देखौ री मारन चहत, मल्ल उभय सुकुमार ॥

सो० अति कोमल अति चार, वाचैं कैसेहूँ दर्ई।

कहत नयन जलढार, क्यों जननी पठये इहां ॥

अतिहि निडुर उर जाति अहीरा ॥ लोभ लागि पठये दोउ बीरा
 ये तो बालक अतिहि अजाना ॥ कियो कहा उन यह अज्ञाना
 होन चहत अब धौ यह कैसी ॥ कहत कंस यह, बात अनैसी
 कहत सबै हम को यह भावै ॥ करि सहाय विधि इनहिं वचावै
 तोखो धनुष हन्यो गज जैसे ॥ जीतहिं श्याम इनहुं को तैसे
 जोरि जोरि कर विधि के आगे ॥ अंचर छोरि छोरि सब मांगे
 तब चाणूर कृष्ण पै आयो ॥ सहज श्याम कटि पट लपटायो
 भुज भुज जोरि भये भिड़ ठाढ़े ॥ तकि तकि दाँव चलावत गाढ़े
 ऐसेई मुष्टिक बलरामा ॥ भिड़े बढ़ाय वाद बलधामा

दोऊ बीर लरत अंति सोहैं ॥ देखत सुर नर के मन मोहैं
 दीरघ नयन कमल ते आछे ॥ ललित लाल कछनी कटिकाछे
 तनचन्दन चित्रित छविजाला ॥ बृषभकन्ध उर बाहु विशाला
 दो० शिरसों शिर भुजसों भुजा, दृष्टि दृष्टि सों जोरि।

चरणचरणगहिभपटकै, लपटभपटभकभोरि ॥

सो० गहन न पावत घात, छूटजात लपटात पुनि।

शिवविधिपै न गहात, तिन्हें मल्ल चाहतगहन ॥

श्याम सहज मल्लन सों खेलैं ॥ पकरि पकरि भुजदण्डन पेलैं

भये प्रथम कोमल तन तहाँ ❀ शिथिल रूप पबिवत मनमाहीं
तब चाणूर मनहिं गरबान्यो ❀ हरिके बलहि तुच्छ करि मान्यो
कोटि कुलिशसमतन तिहिकाला ❀ तुस्तहि होय गये नँदलाला
करिकै कोप मुष्टि यक मारी ❀ फूल समान श्याम उरपारी
पुहुपहुतें कोमल तिहि मान्यो ❀ तिन माख्यो अपने जिय जान्यो
भयो बेगि अति हरषि नियारो ❀ कहन लग्यो मुरि अहिर पङ्कारो
देख्यो हँसत गोपालहि ठाढ़ो ❀ पख्यो शोच प्राणन अति गाढ़ो
नन्द सुवन महिमा तब जानी ❀ निहचै मीच आपनी मानी
तब मोहन करि कोप हँकाख्यो ❀ जनु गज को मृगराज पुकाख्यो
सुनत हाँक सब दाँव भुलानो ❀ थरथराइ चाणूर डरानो
धख्यो धाय तब झपट कन्हारि ❀ पटक्यो गहि गहि चरण फिराई

बं० पटक्यो चरण गहि फेरि महि चाणूर अतिबल साँवरे ।
धसगयो धर मसकि अँग सब बिकट भूख्यो दाँवरे ॥
भयो शब्दाघात सुनि नृप कंस उर धसकौ पख्यो ।
निरखि पुनरनारि नभसुर हरषिहिय अनँद भख्यो ॥
पकरि ऐसिय भांति तब बलराम मुष्टिक मारियो ।
कहैं धनि धनि लोग सब जयजयतिसुरन उचारियो ॥
मल्ल अरु अति सल्ल आदिक मल्ल तहँ जितने हते ।
डपाटि झपटि पङ्कारि कै पुनि नंदसुत मारे तिते ॥

दो० जब मारे हरि मल्ल सब, परयो कटक में शोर ।
जिमि तारागण रबिउदय, छपे असुर चहुँ ओर ॥

सो० सखन सहित दोउ बीर, रंगभूमि राजत खरे ।
हरण भक्त भय पीर, ब्रजबासी प्रभु नन्दके ॥

अथ कंसासुरबलीला ॥

जबहीं श्याम मल्ल सब मारे ❀ चपे असुर सब लखि हिय हारे
 देखि कंस अति भयो दुखारी ❀ सेनापतिन कहत दै गारी
 कांपत लिये खड्ग बहु क्रोधा ❀ कहत गये कित रे सब योधा
 लै तरवार ढाल सब कोऊ ❀ डारहु मारि नन्दसुत दोऊ
 डारे मारि मल्ल सब भेरे ❀ तनक छोहरा अहिरन केरे
 हर नहीं करत चले इत आवैं ❀ देखहु जीवत जान न पावैं
 असुर बीर अपनी सर जेते ❀ लै लै नाम पठाये तेते
 कहा द्वारपालन भय बाढो ❀ करहु कपाट पँवरि को गाढो
 नृप भयमानि असुर सब धाये ❀ अस्त्र शस्त्र लै हरिपर आये
 भये बिकल लखि पुर नर नारी ❀ मन मन देत कंस को गारी
 कहत कि भई कठिन यह वाता ❀ वचहिं श्याम सो करै विधाता
 आवत लखी असुर की भीरा ❀ भिरे हांक दै दै दोउ बीरा

छं० अवलोकि असुर समूह आवत हांक दै दोऊ भिरे ।

मनहुँ गजगण निरखि केहरि धाय तिन ऊपर परे ॥

सुनत शब्द गँभीर हरिको हहरि सेनापति गये ।

लपकि गहि महि पटक जहँ तहँ क्रोध कर बलजू हये ॥

श्याम गौर किशोर सुन्दर असुरगण बिच यों लरैं ।

जनु शांत अरु शृंगार धरि तन बीरकी करनी करैं ॥

जात नहीं वरणी कटक गहि पटक इत उत धावहीं ।

भूमि भार अपार अधनिधि असुर निकर नशावहीं ॥

दो० पर्योनगरखलभलसकल, अतिमयब्याकुलकंस ।

पुनिपुनिमंत्रिन साँ कहत, बढ्यो अधिकउरसंस ॥

सो० कीजै कछुउपाय, जियत जाहिं नहीं बन्धु दोउ ।

मारहु नन्द बुलाय, ब्रज कोउ रहन न पावहीं ॥

पुनि बसुदेव देवकी दोऊ * मारहु कठिन बन्दि ते सोऊ
बहुरों उग्रसेन को मारों * पिता दोष कहु उर नहिं धारों
ऐसे पुनि पुनि बचन उचारे * कंपित रिसन खड्ग कर धारे
क्षण बैठत क्षण उठत अधीरा * मारे असुर सकल दोउ वीरा
आति बलवन्त नन्द के बारे * तब सकोप नृप ओर निहारे
गये मचान मचकि चढ़ि दोऊ * बाज भपट देखत सब कोऊ
द्वैगयो चकित नृपति भय मान्यो * आयो काल निकट यह जान्यो
रहिगयो लिये खड्ग करमाहीं * हरिको मारि संक्यो सो नाहीं
तबहीं श्याम लात यक मारी * गिरि गयो मुकुट शीशते भारी
दीन ढकेलि मंचते भूपर * कूद परे हरि ताके ऊपर
तहां चतुर्भुज रूप दिखायो * सो स्वरूप दै स्वर्ग पठायो
माख्यो कंस कहत सब बानी * जय धुनि सुरगण गगन बखानी

छं० जय धुनि गगन सुरगण बखानी सुमन की वर्षा भई ।
कहत सब हरि कंस माख्यो हांक यह त्रिभुवन गई ॥
ब्रह्मादि सुरमुनिसिद्ध गंधर्व मुदितमन अस्तुति भनी ।
भूमि सुर उपकार दिन अवतार धुनि त्रिभुवन धनी ॥
धन्य गज धनि मल्ल मारे धन्य कंसासुर अनी ।
परसि तन अनुपम लही गति जात नहिं महिमा गनी ॥
धन्य अलख ब्रह्माण्डनायक भक्तहित नरतन धख्यो ।
धन्य ब्रजबासी सकल जिन प्रेमकरि तुमबश कख्यो ॥

दो० करि अस्तुति पुनिपुनि हरषि, सुमन वरषि सुरबृंद ।

मुदित बजावत दुंदुभी, कहि जय जय नंदनंद ॥

सो० मथुरापुर नर नारि, अति प्रफुलित सबको हियो ।

मनहुंकुमुदबनचारि, बिकसतहरिशशिमुखनिरखि॥

माखो कंस जबहिं भगवाना ❀ भ्राता अष्ट तासु बलवाना
करि करि कोप युद्ध को धाये ❀ ते पुनि सब बलदेव नशाये
बहुरि केश गहि कंस मुरारी ❀ दियो घसीट यमुन जल डारी
कीन्हो कलुक तहां विश्रामा ❀ भयो विश्रामघाट तिहि नामा
मुनिके मरण कंस की नारी ❀ और सकल भ्राता की प्यारी
रोदन करि करि बिबिध बिलापा ❀ सुमिरि भूपगुण रूप प्रतापा
निज हित समुझि भयो दुखभारी ❀ चहत मरण पतिनेह विचारी
गये तहां बहुरो दोउ भ्राता ❀ करुणामय कोमल सुखदाता
करि प्रबोध बोलीं सब रानी ❀ रहीं मरणते मुनि प्रभु बानी
बहुत भांति तिनको समुझाई ❀ आये महलद्वार दोउ भाई
कालनेमि के बंश सुहायो ❀ उग्रसेन मुनिकै उठि धायो
तिन प्रभु चरण आय शिर नायो ❀ त्राहि त्राहि कहि बचन सुनायो

बं० त्राहि त्राहि सुनाय आरत बचन प्रभु चरणन गिख्यो ।
अबकरहु करुणानिधिक्षमा अपराध यह हमते पख्यो ॥
असुर मारे कंस भाइन सहित सो उचितै करी ।
परद्रोह रत खलदलनहित अवतार यह तुम्हरो हरी ॥
करिकै कृपा अब प्रजापालन हेतु प्रभु चित दीजिये ।
बर बैठिसिंहासन सुभग यह राज्य मधुपुर कीजिये ॥
मुनि दीन बचनन हरषि हरि तब उग्रसेन उठायकै ।
बहुभांति करिसनमान पुनि पुनि लियेहृदयलगायकै ॥

दो० श्रीमुखसों करजोरि पुनि, कह्यो सुनहु महाराज ।

यहुबंशिन को शाप है, हमें उचित नहिं राज ॥

सो० करहु देव तुम राज, दूरि करौ सन्देह सब ।

हम करिहैं सब काज, जो आयसु देहौ हमें ॥

जो नहिं मानै आनि तुम्हारी ॥ ताहि दण्ड करि हैं हम भारी ॥
और कछु चित शोच न कीजै ॥ नीति सहित परजहि सुख दीजै ॥
यादव जिते कंस की त्रासा ॥ गृह तजि तजि भजिगये प्रवासा ॥
तिन सब को अब खोज बुलाओ ॥ सुख दै मथुरा मांझ बसाओ ॥
बिप्र धेनु सुर पूजन कीजै ॥ इन की रक्षा में चित दीजै ॥
यों प्रभु उग्रसेन समुझाये ॥ राज सिंहासन पुनि बैठाये ॥
शिर पर मंजुल छत्र फिराई ॥ निज कर चँवर लिये दोउ भाई ॥
युग युग प्रभु भक्तन सुखदाई ॥ राखत जन की सदा बड़ाई ॥
बरषि सुमन सुर कहत सुखारी ॥ जय जय जय भक्तन हितकारी ॥
उग्रसेन नृप करि बैठायो ॥ लखि मथुरा लोगन सुख पायो ॥
धनि धनि कहत सकल नरनारी ॥ अब करिहैं पितु मात सुखारी ॥
यहै बात सब घर घर माहीं ॥ इन सम और जगत कोउ नाहीं ॥

छं० नर नारि सब यह कहत घर घर और नहिं इनते कियो ।

धनिमातुपितुदिनरातिधनिसोजन्मजगजबहरिलियो ॥

गहि कंस सहित सहाय माखो मरननहिं राखिन दियो ।

उग्रसेन नरेश करि पुनि चँवर कर अपने कियो ॥

बिबुध हर्षे सुमन बर्षे सुथिर सब यदुकुल भयो ।

अबपावहीं पितुमातु सुनि सुख सकलदुख उनको गयो ॥

हमजियेअबसबनिरखिसुखअबिजन्मकोफलजगलह्यो ।

जियहु युग युग आत दोऊ हरषि पुस्बासिन कह्यो ॥

दो० कंस मारि भूमारहरि, उग्रसेन करि भूप ।

कहां हमारे मात पितु, तब बोले सुखरूप ॥

सो० संगहि चले लिवाय, उग्रसेन अक्रूर तब ।

रामकृष्ण दोउ भाय, ब्रजवासीजनदुखहरन ॥

उत बसुदेव स्वप्न निशि आयो ❀ हृदय हर्षि देवकी सुनायो
 राम कृष्ण जनु मधुपुर आयो ❀ सुफलकसुत संग नृपति बुलाये
 असुर सेन हति कंसहि माखो ❀ उग्रसेन नृप करि बैठाखो
 सुनि तिय कहैं नयन भर पानी ❀ कहत कहा पिय ऐसी बानी
 सुनि है दूत कोऊ दुखदाई ❀ कहि है, अबहिं कंस सों जाई
 हम करि पाप जन्म जग लीन्हो ❀ सो फल हमैं बिधाता दीन्हो
 बधे सात सुत देखत आगे ❀ बच्यो एक डरि ब्रज लै भागे
 तापर बंदि किये हम दोऊ ❀ धृगजीवन परवश जग कोऊ
 हमको मीच नीच बिधि भूल्यो ❀ होहु कंस को वंश निमूल्यो
 कह बसुदेव रोव मति नारी ❀ धोवौ बदन दीन्ह जल भारी
 कहियत है दुखहरण गोपाला ❀ गर्व प्रहारी दीनदयाला
 हैं हैं प्रगट कबहुँ सुखदाई ❀ तात तुम्हारे त्रिभुवनराई

दो० अब जनि होहु अधीर तिय, धरहु धीरसुखपाय।

आयु तुलानी कंसकी, देखत जाय विलाय ॥

सो० स्वप्न बृथा नहिं जाय, मानु कह्यो मेरो प्रिया।

आज काल्हिमें आय, तोहिं मिलैं तेरे सुवन ॥

यहि अन्तर द्वारे हरि आयो ❀ बज्र कपाट जहां जड़ि लाये
 करुणा करि हरि तिन्हें निहारा ❀ गये सहज सब उघरि केंवारा
 लखि बसुदेव सामुहे पाये ❀ कहत कुँवर कांके दोउ आयो
 दियो दरश तिहि प्रेम सुहायो ❀ जन्म समय जो दरशन पायो
 मिले धाय पितु मातु निहारे ❀ कह्यो तात हम सुवन तुम्हारे
 रोवत मधुर निरखि सुत दंपति ❀ मुनै न कंस मनहिं मन कंपति
 तबहीं कृष्ण कह्यो सुनु माता ❀ माखो कंस असुर हम ताता

मल्ल पद्धारि सुभट सब मारे ❀ द्विरद कुबलया दन्त उखारे
 यह कह करि पितु मातु सुखारे ❀ तुरत तोरि पगबन्धन डारे
 तब जननी निश्चय करि जानी ❀ रोवन लगी कण्ठ लपटानी
 बारहिवार कहत उर लाये ❀ मैं नहिं कबहूँ गोद खिलाये
 द्वादश वर्ष कहां रहे प्यारे ❀ माता पिता जाहिं बलिहारे
 दो० सुनि जननी के बचन प्रभु, करुणानिधि यदुराय ।

भये प्रेमबश दुखितलखि, बोले अति सकुचाय ॥

सो० लिख्योनमेढ्योजाय, मतिकरिमान विषादचित ।

अब पुरवैं दोउ भाय, तुव मनके अभिलाष सब ॥

पुत्र जन्म जगमें सुखकारी ❀ तुम पायो हम ते दुख भरी
 मात पिता जाते दुख पावैं ❀ वृथा जन्म सुत तामु बतावैं
 सो अब दोष न मनमें दीजै ❀ होनहार ताको कह कीजै
 अब जननी सब शोच निवारो ❀ तजो शोक आनंद उर धारो
 सकल मनोरथ तुमरे करिहौं ❀ स्वर्ग पताल जात नहिं डरिहौं
 अष्टसिद्धि नवनिधि ले आऊं ❀ घर घर मथुरा मांफ बसाऊं
 सुनि प्रभु बचन जननि सुखपायो ❀ बार बार गहि कंठ लगायो
 अति आनंद भयो मन माहीं ❀ सो कहि सकत शारदा नाहीं
 कहत तात तुम बदन निहारो ❀ सुफल भयो अब जन्म हमारो
 सुतहित सवत पयोधर क्षीरा ❀ मिथीसकल उर अन्तर पीरा
 बसुदेव हृदय हर्ष अति आयो ❀ सिद्धि लाभ साधक जन पायो
 पूरब पुण्य फल्यो सुखकारी ❀ पायो सुत हित करि दैत्यारी

अथ बसुदेवगृहउत्सवलीला ॥

दो० तुरत बोलि तब विप्रवर, प्रीति सहित परिपाँय ।

प्रथमहिं संकल्पीहती, दई लक्ष ते गाय ॥

सो० और दियो बहु दान, बन्दीजन आये सुनत ।

परितोषे सनमान, अति उछाह बलदेव सन ॥

तब देवकी कह्यो पति पासा ❧ भरी परम आनन्द हुलासा
 प्रगटे आज सुवन मम धामा ❧ करहु जन्मउत्सव की सामा
 सुनि बसुदेव परमसुख पावा ❧ हरष द्वार दुन्दुभी बजावा
 गडुबंशी सगरे जुरि आये ❧ ध्वज पताक मन्दिरन बंधाये
 रोपे कदली खम्भ रसाला ❧ बांधी रचि रुचि बन्दनमाला
 लाखि हरिजन्म अनंदवधाई ❧ अद्धि सिद्धि प्रगटीं सब आई
 हाटक कलश अनेक विधाना ❧ मङ्गल द्रव्य रचे विधिनाना
 गजमुक्कन के चौक बनाये ❧ मन्दिर गलिन सुगंध सिंचाये
 सुनि सब मथुरा पुर नर नारी ❧ उमंगि उठीं आनंद उर भारी
 घर घर सबहिन मंगल साजे ❧ द्वार द्वार प्रति वाजन वाजे
 नवसत साज सकल बरनारी ❧ सजि सजि मंगल कंचन थारी
 गान करत कलकण्ठ लजावैं ❧ श्रीवसुदेव धाम को आवैं

दो० जाति पाँति परिजन प्रजा, बंधु हितू सबलोग ।

लैलै आवत भेट सजि, हरषत निज निज योग ॥

सो० भई भवन अति भीर, नट नाचत गावत गुणी ।

धरि धरि मनुजशरीर, मानहुँ मुख आये सकल ॥

तब जननी मन अति सुख पाये ❧ उपटन कर दोउ सुत अन्हवाये
 निज कर अंग अँगोळि सुहायो ❧ तनद्युति लाखि दृगताप नशायो
 केसरि मलय मिलित रुचिकारी ❧ कियो तिलक वरभाल सुधारी
 भूषण बसन शृंगारत कैसे ❧ राजकुँवर वर पहिरत जैसे
 कंचन मणिमय खचित नवीनो ❧ क्रीट मुकुट शोभित शिर कीनो
 कलंगी ललित जड़ाव जड़ाई ❧ तुरा मध्य अनूप सुहाई

गज मुकन के कुंडल कानन ❀ अति विशाल छवि शोभित आनन
कंठ पदिक के हार विराजें ❀ उर विशाल पर अति छवि छाजें
पंचरत्न के अंगद नीके ❀ शोभित भुजन भावते जीके
कर चूरानन स्तन निकार्ई ❀ पाणि पल्लवन छाये सुहाई
किंकिणि कलितललित स्वकारी ❀ कटि केहरि पर बलित सँवारी
चूराचारु मनोहर पायन ❀ चरण कमल भक्कन सुखदायन

दो० नील पीत बर बसन तन, दोऊ सुतन शृंगार ।

चारु अलक मुख शशि भलक, निरखि जात बलिहार ॥

सो० हते श्याम के साथ, ग्वाल तिन्हें पुनि देवकी ।

पहिराये निज हाथ, जानि कृष्ण प्रीतम सबै ॥

ग्वाल बाल सब चकित निहारे ❀ कहि न सकत कछु मनहि बिचारे
ये तो कृष्ण देवकी जाये ❀ झूठहि यशुमति सुवन कहाये
करत शोच मनहीं मन माहीं ❀ अब हरि ब्रज चलिहैं कै नाहीं
तब दोउ कुँवर चौक बैठारे ❀ बिप्रबृन्द बसुदेव हँकारे
बिधिवत पूजि तिलक करवाये ❀ दान बहुत हरि हाथ दिवाये
बहुरि आरती मात उतारी ❀ लखि छवि मुदित सकल नर नारी
बेदध्वनि महि देवन कीन्हों ❀ द्रव्य अनेक निछावरि दीन्हों
वरुण सहित मुर नभ यश गावैं ❀ बरषि कुसुम दुन्दुभी वजावैं
परमानन्द सकल पुरवासी ❀ निधि सिधिसब गृहगृह की दासी
बहुरो सखन सहित दोउ भैया ❀ निज कर परसि जिमाये भैया
पूजी सकल कामना जीकी ❀ मिट्टी कल्पना दारुण हीकी
यहि विधि कंस मारि यदुराई ❀ मात पिता की बन्दि छुड़ाई

छं० यहि भांति कंस निपात यदुपति मातु पितु को सुख दियो ।

हरषि अति नरनारि मथुरा घरन घर आनंद भयो ॥

परम पावन यश सुहावन पलहि में त्रिभुवन गयो ।
 जीव जल थल नाग नर मुरसरस रस जहँ तहँ भयो ॥
 यह कंस हतन पुनीत यश नित नर मुनै जे गावहीं ।
 ते न भव बंधन परहिं फिरि अघसमूह नशावहीं ॥
 मिटहि दारिद दोष दुरमति बिपति निकट न आवहीं ।
 सकल मन बांछित लहै अरु भक्ति अबिचल पावहीं ॥

दो० कठिन शूल संकटहरण, मंगल करण अशेष ।
 रामकृष्ण के चरित बर, गावत सुनत विशेष ॥

सो० नरतन पाय सुजान, अनुदिन गावत हरिकथा ।
 सकल सुखनकी खान, ब्रजवासी प्रभु के सुयश ॥

अथ कुब्जागृहप्रवेशलीला ॥

श्री यदुकुल कुलकमल तमारी ❀ दीनबन्धु भक्तन हितकारी
 करिकै जननी जनक सुखारी ❀ तव कुब्जा की सुरत सँवारी
 नृपति भवन तजिकै अभिरामा ❀ चले बसन कुब्जा के धामा
 कृष्ण कृपा सबही पै न्यारी ❀ भाव भजन कुब्जा भई प्यारी
 साँचो भाव हृदय जहँ जाने ❀ बिबश होय त्यहि हाथ बिकाने
 नारि पुरुष कछु नहिंन भेदा ❀ नीच ऊँच नहिं करत निषेदा
 प्रथमहिं आय मिली मगपाई ❀ सो हित मानि लियो यदुराई
 चन्दन चरचि तनक तन दीन्हो ❀ मनहुँ कोटि तप काशी कीन्हो
 अति अकुलीन कंसकी दासी ❀ परसत पावन भई रमासी
 आये पुनि प्रभु ताके धामा ❀ भक्त बत्सलै जिनको नामा
 जब कुब्जा जान्यो हरि आये ❀ पाठम्बर पाँवड़े बिछाये
 अति आनन्द लिये उठि आगे ❀ पूरण पुण्य पुंज सब जागे
 दो० टेढ़ी ते सुधी करी, दियो रूप अभिराम ।

दासी ते रानी भई, पूरे सब मन काम ॥

सो० को करिसकै प्रकास, अति विचित्र हरिके गुणन।

सदा दास को दास, भयो रहै प्रभु जनन के ॥

पुरवासिन सबहिं यह जानी ॥ राजा हरि कुब्जा पट रानी

घर घर कहत सकल नर नारी ॥ कियो कहा धौं इन तप भारी

मिली तनक चन्दन दै मगमें ॥ भई बिदित अति पावन जग में

यह महिमा कछु कहत न आवै ॥ को ताकी पटुतर अब भावै

भूलि कहत कुब्जा जो कोऊ ॥ ताहि रिसाय उठत सब कोऊ

सो तो भई कृष्ण की प्यारी ॥ दासी कहत डरत नर नारी

करत त्रास मन में सब प्राणी ॥ डारहि मारि सुनै जो रानी

जापर कृपा करै यदुसाई ॥ ताहि नहीं यह कछु अधिकारि

सदा सदा हरि की यह रीती ॥ मानत एक भक्ति सों प्रीती

धनि धनि कुब्जा हरि की रानी ॥ धनि धनि कृष्ण प्रीति कर मानी

धनि धनि चन्दन अंग लगायो ॥ धनि धनि भवन जहाँ हरि आयो

कहि कहि सब सुरनारि सिहाहीं ॥ आज कूबरी सम कोउ नाही

दो० बसे श्याम कुब्जासदन, तहँ कछु करि विश्राम ।

पुनि आये बसुदेवगृह, जन मनपूरण काम ॥

सो० तब श्रीनंदकुमार, ब्रजवासिन की सुरति करि ।

मनमें कियो विचार, अब सब चलिये नंद पै ॥

लै बसुदेव संग दोउ भाई ॥ गे जहँ उग्रसेन नृपसाई

तहां बहुरि यादव सब आये ॥ औ अक्रूर उद्धवहि बुलाये

तब हरि ऐसे बचन सुनाये ॥ मम हित ब्रजवासी सब आये

नन्दादिक सब गोप जितेका ॥ रह्यो नहीं ब्रज में कोउ एका

गाय बत्स सब तजे अनेरे ॥ हैं सुने मंदिर सब केरे

हैं है दुखित यशोमति मैया ❀ जिन हम प्रतिपाले दोउ मैया
 बहुत हेतु उन हमसों कीनो ❀ विविध भांति अबलौं सुख दीनो
 सकुचत हौं अपने मन माहीं ❀ उनसों उच्छृण कबहुँ मैं नाहीं
 पलटौ नहीं जो उनको दीजै ❀ अब चलि विदा उन्हें ब्रज कीजै
 सुनि हरि बचन परम सुख पाई ❀ सब मिलि चले जहां नँदराई
 सुनी नंद गोपन यह बाता ❀ मारो कंस जाय दोउ भ्राता
 साँच नहीं मन में कछु माने ❀ प्रजाभाव सब रहे सकाने
 दो० मनहीं मन शोचत खड़े, नहिं आये बलराम।
 ब्रजमें आये हैं गयो, तिन्हें आयबो वाम॥
 सो० अब कैसे ब्रजजाहिं, बलमोहन दोऊ विना।
 अति व्याकुल मन माहिं, कबधौं नयननदेखिहैं॥

अथ नन्दविदालीला ॥

आये तबहीं कुँवर कन्हारि ❀ नृप वसुदेव सहित दोउ भाई
 देखत नन्द मिले उठि धाई ❀ लिये लगाय कंठ सुखदाई
 अब चलिहैं ब्रज को यह जान्यो ❀ अति आनंद हृदय हरषान्यो
 लखि बसुदेव बहुत सुख पाई ❀ मिले नन्द सों सादर धाई
 उग्रसेन तब नन्द जुहारे ❀ आदर सहित सकल बैठारे
 उग्रसेन बसुदेव उपाँगसुत ❀ सुफलकसुत अरु यादव गणयुत
 बैठे मिलि हरि हलधर भाई ❀ नन्दहि मिले निकट बैठारि
 और गोप ठाढ़े सब पेखैं ❀ यशुमति सुत को भाव न देखैं
 नंद मनहिं मन अति अकुलाहीं ❀ चलत बेग अब ब्रज क्यों नाहीं
 सबही के मन में यह आई ❀ हरि अब हमसों प्रीति घटाई
 करत विचार श्याम मन माहीं ❀ प्रीति बिस बोलत सकुचाहीं
 तब हरि यों सुख बचन उचारो ❀ बहुत कियो प्रतिपाल हमारो

दो० भभाकि परे नँदराय सुनि, कहा कहत गोपाल ।

मोसों कहत कि आन सों, किन किन्हों प्रतिपाल ॥

सो० चौकत जिय नँदराय, मति मोसों ऐसो कहौ ।

गहवरहिय भरि आय, डारिसकत नहिं नयन जल ॥

तब हरि मधुर कह्यो नँदराई ॥ सुनहु तात हम कहत लजाई

कही गर्ग तुम सों जो बानी ॥ सो तुम तब निश्चय नहिं जानी

पुत्र हेतु हम को प्रतिपारे ॥ तात मात जिमि अधिक दुलारे

खेलत हँसत बसत ब्रजमाहीं ॥ जात इते दिन जाने नार्हीं

हम को तुम दीन्हों सुख जितनो ॥ कह्यो न जात बदन ते तितनो

तुम सम मात पिता न हमारे ॥ जहाँ रहैं तहाँ तात तुम्हारे

बिछुरन मिलन मोह अरु माया ॥ यह प्रपञ्च जग बिधि उपजाया

हैहै दुखित यशोमति मैया ॥ मो बिन ब्रजतिय अरु सब गैया

ताते गमन बेग ब्रज कीजै ॥ जाय सबन को धीरज दीजै

यशुमतिसों बिनती मम कहियो ॥ माने सदा पुत्रहित रहियो

मेरी सुरति न उरते टारो ॥ मैं तुमते कबहूँ नहिं न्यारो

हरि यों नन्दहि बचन सुनाई ॥ बहुरो रहे सकुचि अरगाई

दो० निठुर बचन सुनि श्याम के, भये बिकल अतिनन्द ।

उमँगिनीर नयनन चल्यो, परिगये दुखके फंद ॥

सो० दुखितसखा अरु गोप, चकित रहे हरि मुख निरखि ।

करत मनहिं मन कोप, ये चरित्र अकूर के ॥

परे नन्द तब चरणन धाई ॥ कहत न ऐसी कबहुं कन्हाई

हों मोहन तजि चरण न जैहों ॥ तुम बिन जाय कहा ब्रज लैहों

मधुबन तुमहिं छाँड़ि जो जाऊं ॥ यशुदै उत्तर काह सुनाऊं

सन्मुख सुनत दौरि जब ऐहै ॥ तुम बिन काहि गोदंकरि लैहै

पंथ निहारत है है मैया * चलहु बेगि ब्रज कुँवर कन्हैया
सदमाखन मथि कीन्हो है है * कहौ सो तुम बिन काहि खवै है
क्यों जीहै बिन दर्शन पाये * होत निडुर कित मथुरा आये
बारह वर्ष कियो हम गारो * नहिं जान्यो परताप तुम्हारो
अब प्रगटे बसुदेव कुमारा * कीन्हों बचन गर्ग निरधारा
कत हम काज महा रिपु मारे * कत दरिद्र दुख हरे हमारे
हारिन दियो कमल कर गिरिवर * दबि मरते ब्रजजन ताके तर
कहैं नन्द यों बिकल अधीरा * भई कठिन विछुरन की पीरा
दो० देखि प्रीति अति नन्द की, मन बसुदेव सिहात ।

सकुचरहे सब प्रेम बश, कहि न सकत कछु बात ॥

सो० व्याकुल सबै अहीर, मानहुँ पन्नग के डसे ।
हरिमुख लखत अधीर, ठाढ़े कगड़े चित्र से ॥

तब हलधर नंदै समुभावत * कहत तात तुम कित दुख पावत
करि कछु काज बहुरि ब्रज आवैं * तुम बिन और कहाँ सुख पावैं
हरि प्रगटे भूभार उतारन * कह्यो गर्ग तुम सों सब कारन
मात पिता हमरे नहिं कोऊ * तुम्हरे सुवन कहावैं दोऊ
हमैं तुम्हें सुत पितु को नातो * और परे अब होत न हांतो
बहुत कियो प्रतिपाल हमारो * जाय कहाँ उर ध्यान तुम्हारो
जननि अकेली व्याकुल है है * तुम्हें गये धीरज कछु पै है
व्याकुल नंद सुनत यह बानी * पुनि पुनि कहत जोरि युग पानी
अबकै चलहु श्याम मम गोहन * ब्रजमें मिलि आवहु फिरि मोनह
मारयो कंस कियो सुर काजा * दीन्हो उग्रसेन को राजा
सुख बसुदेव देवकी पायो * भयो सकल यदुकुल मन भायो
तदपि यशोमति बिन गिरिधारी * को जानै प्रभु टेक तुम्हारी

दो० ऐसे कहि अति विकल हैं, रहे नंद गहि पाय ।

भई क्षीणद्युति हीनमति, नयननजल न रहाय ॥

सो० मायारहित मुकुंद, नहीं बिरहसंयोग तिहि ।

ब्रह्म पूरणानंद, सब घटबासी एकरस ॥

देखि बिरह अति कादर नंदहि ॥ सखा बृन्द अरु सब उपनंदहि

बिह्वस्त तजत चहत हैं प्राणा ॥ तब यह चरित रच्यो भगवाना

मेरी अति दुस्तर है माया ॥ जिन कर जीव बिमुख भरमाया

तिन कछु दुन्द कियो जग माहीं ॥ तब हरि बोध करत नंदपाहीं

कत पछितात तात हौ एतो ॥ ब्रज अरु मथुरा अंतर केतो

कहा दूर तुम ते कहुं जाहीं ॥ करि बिचार देखौ मन माहीं

हैं ब्रजके नर नारि दुखारी ॥ ताते कीजै बिदा तुम्हारी

ऐसे बोध कियो ब्रजनाथा ॥ तब नंद कह्यो जोरि युग हाथा

जो प्रभु तुम को ऐसी भाई ॥ तौ अब मेरो कहा बिसाई

जैहों ब्रज प्रभु कहे तुम्हारे ॥ जात बचन मोपै नहिं टारे

बहुत करी तुम मम प्रभुताई ॥ नीच दशा लै ऊंच चढ़ाई

परम गँवार ग्वाल पशुपाला ॥ भयो धन्य सब जगत विशाला

दो० मेटि पाप संताप सब, कियो मुकृत की खान ।

भरी साखि चौदह भुवन, सुर मुनि बेद पुरान ॥

सो० ऐसे कहि नंदराय, परे बहुरि हरि के चरण ।

लीन्हें श्याम उठाय, कह्यो जान सन्मान तब ॥

तब बसुदेव बिनय बहु भाखी ॥ आगे बहुत सम्पदा राखी

कियो जो हम अति तुम उपकारा ॥ ताको बदलो नहिं संसारा

बालक ये अपने ही जानो ॥ इहां उहां कछु भेद न आनो

मुनि मुनि नंदमहर पछिताई ॥ रहे ठगे तन दशा भुलाई

ऊरध श्वास नयन बह पानी ❀ कंपित तनु कहि जात न बानी
 सों कलु सम्पति नंद न लीनी ❀ विनती बहुरि श्यामसों कीनी
 मांगत हौं प्रभु यह कर जोरी ❀ ब्रज पर कृपा होय नहिं थोरी
 तब सब गोप नृपति पहुँ आये ❀ बहुत बोध करि ब्रजहि पठाये
 गोप सखा बोधे हरि सबहीं ❀ बिदा किये आदर दै तवहीं
 चले सकल ब्रज शोचत भारी ❀ हारे सबस मनहुँ जुवारी
 काहू सुधि काहू सुधि नाहीं ❀ लटपट चरण परत मग माहीं
 ब्रजतन जात बिलोकत मधुवन ❀ बिरह व्यथा बाढ़ी व्याकुल तन

दो० भये बिरह बारिधि मगन, अति अचेत अकुलाय।

श्याम राम तजि मधुपुरी, आये ब्रज नियराय ॥

सौ० उतहि गये हरि गेह, उग्रसेन बसुदेव युत।

ब्रजवासिन को नेह, पुनि पुनि श्रीमुखते कहत ॥

पुनि पुनि नंद कहत पछिताई ❀ चूक परी हरि की सेवकाई
 कहँ लगि गनिये यह अपराधू ❀ किये कर्म हम परम असाधू
 कोमल पद बन अति कठिनाई ❀ तहँ हरि पै गैया चरवाई
 रंचक दधि के काज रिसाई ❀ बाँधे यशुमति ऊखल लाई
 इन्द्र कोप ब्रजलोग बचाये ❀ बरुण लोक ममहित उठि धाये
 हम मतिमन्द न उनहीं जाने ❀ निकट बसत नाहिंन पहिंचाने
 तन धन लोभ कंस भय पाई ❀ करि दीने आगे दोउ भाई
 ऐसे समुक्ति नन्द निज करणी ❀ परे मुरझि व्याकुल अति धरणी
 बार बार जोवत मग माता ❀ व्याकुल बिन मोहन बल ताता
 आवत देखि गोप ब्रजओरी ❀ हरष हृदय आतुर उठि दोरी
 धाई धेनु बत्स को जैसे ❀ माखन प्यारो है धौं कैसे
 कनियां लेबे को अतुरानी ❀ आये बल मोहन यह जानी

दो० धाई अति हर्षित हिये, सुनत रोहिणी पास ।

दरश आश आई सबै, ब्रजतिय हिये हुलास ॥

सो० त्यहिक्षण अति आनन्द, ब्रजवासी ब्रजतिय सबै ।

अतिसकोचबश नन्द, सो दुख कापै जात कहि ॥

अथ ब्रजकी बिरहलीला ॥

आतुर सकल गई नँदपासा ❀ मनमोहन दर्शन की आसा

देखे नन्द गोप सब देखे ❀ श्याम राम दोऊ नहिं पेखे

बुझत यशुमति अति अकुलाई ❀ कहँ मेरे श्याम राम दोउ भाई

सुनत बचन व्याकुल नँदराई ❀ नयन नीर भरि नारि नवाई

देखत मूख गई ब्रजनारी ❀ जनुप्रफुलित कुमुदिनि हिमहारी

जान्यो आन भई बिधि सोई ❀ कहिगे बचन गर्गमुनि जोई

अति व्याकुल सब विन ब्रजनाथा ❀ भये सकल नर नारि अनाथा

परे भूमि सब ठेरे लगाई ❀ कौन दोष प्रभु हम विसराई

यशुमति अति बिलपति बिलखानी ❀ कहत सरोष नंद सों वानी

धृक धृक महर कहा यह कीनो ❀ मथुरा तजि सुत ब्रज पग दीनो

मारग सूझि पखो केहि भाँती ❀ बिदा होत फाटी नहिं छाती

अर्द्ध बचन सुनतहि उठि धाये ❀ कहा लेन सुख ब्रज में आये

दो० कैसे प्राण रहे हिये, बिछुरत आनंदकन्द ।

सुनत नहीं स्वारथ कहा, कहँ श्रवण मतिमन्द ॥

सो० मैं मधुपुर को जाय, रहि हों हरिकी धाय हैं ।

लीजै ठाँकि बजाय, अब अपनौ ब्रज नन्द यह ॥

यह सुनि नन्द परे मुरझाई ❀ अति व्याकुल ब्रजलोग लुगाई

पुनि पुनि कहत यशुमति ठेरे ❀ कहँ छाँड़े दोऊ सुत मेरे

यौवन प्राण सकल ब्रजप्यारो ❀ छोरि लियो वसुदेव हमारो
 सुफलकसुत बैरी भयो भारी ❀ लै गयो जीवनमूरि हमारी
 हौं न गई हरिसंग अभागी ❀ सिखये इन लोगन के लागी
 जो मैं जान पावती गोहन ❀ तौ क्यों छांड़ि आवती मोहन
 ऐसे रोवत कस्त बिलापू ❀ कहिन जात यशुमति परितापू
 हरि बिन सब नर नारि उदासी ❀ आये जवहिं सकल ब्रजवासी
 नहीं श्याम बिन सदन सुहाई ❀ मनहुं मसान भूमि धरिखाई
 पूछत बिलपि यशोमति मैया ❀ कहौ नन्द कह कह्यो कन्हैया
 तुमको बिदा ब्रजहि जब कीन्हों ❀ हरि कछु मोहिं सँदेशो दीन्हों
 तुम कछु हरिसों विनयन भाखी ❀ कहा श्याम मन में यह राखी

दो० मैं अपनो सों बहु कियो, वे प्रसु त्रिभुवननाथ ।

जो चाहैं सोई करें, कहा सु मेरे हाथ ॥

सो० कहिकै तोहिं प्रणाम, बहुरि श्याम ऐसे कह्यो ।

करिकै कछु सुरकाम, मिलिहौं तुमसों आय ब्रज ॥

पुनि बोले ऐसे बल भैया ❀ दुखी होन पावै नहिं मैया
 धीरज देहु तात तुम जाई ❀ कछु दिन में हम मिलि हैं आई
 पठ्यो मोहिं तोहिं हितलागी ❀ तब में वचन सक्यों नहिं त्यागी
 सुनि सँदेश यशुमति दुख पागी ❀ रहे प्राण हरिचरणन लागी
 एक पलक बिहुरत हरि नाही ❀ गहि रहि मिलन आशमनमाहीं
 ब्रज घर घर सब कहत गुवाला ❀ किये कृष्ण मथुरा जो ख्याला
 मारयो रजक जाय हरि जवहीं ❀ नहिं निबहैं जान्यो हम तवहीं
 चन्दन बहुरि कंसको लीन्हो ❀ रूप अनूपम कुबरी दीन्हो
 वैसे धनुष तोरि पुनि डार्यो ❀ फिरि दोउ भाइन गजको मार्यो
 रंगभूमि सब मल्ल पझारे ❀ असुर अनेक युद्ध करि मारे

कहत हते ब्रज में हरि जैसे * कियो जाय कंसहि पुनि तैसे
केश पकरि महि तुरत गिरायो * मारि यमुनजल माहि बहायो
दो० उग्रसेन राजा कियो, निजकर चमर डुराय ।

मथुरा नर नारी सबै, आनन्दे सुख पाय ॥

सो० पुनि भेंटे हरि जाय, देवकि औ बसुदेव सों ।

कह्यो परम सुख पाय, तात मात कहि आत दोउ ॥

तहीं भयो उत्सव अति भारी * दियो दान बहु बिप्र हँकारी

हरि को पट भूषण पहिराये * मंगल सब नर नारिन गाये

मथुरा घर घर बजी बधाई * बहु संपति बसुदेव लुटाई

अब नहि गोप गोपाल कहावैं * बसुदेव सब नाम बुलावैं

यदुकुलकमल सकल जगनायक * बिरदवान बर्णन गुण गायक

भये कृष्ण मथुरा के राजा * अहिरन देखि लगत अब लाजा

पुनि ग्वालन यह बात सुनाई * बसे श्याम कुब्जा गृह जाई

भयो जासु बश अति हित मानी * कीन्ही ताहि आपनी रानी

राजा हरि कुब्जा भइ रानी * गोपिन सुनी जबहि यह बानी

गई बिरह तन तपस्यै सिराई * सौति शाल शाल्यो उर आई

भयो दुसह दुख ऊरध श्वासा * मिथी श्याम आवन की आसा

नयनन जलधारा अति बाढ़ी * रही शोच बैठी कोउ ठाढ़ी

दो० जुरि आई ब्रजतिय सबै, सुनि कुब्जा की बात ।

लागी आपुस में कहन, मन दुख मुख हर्षात ॥

सो० करी सुहागिन श्याम, कुब्जा दासी कंस की ।

अपना पति वहबाम, कियो नाम तिहुँपुर बिदित ॥

लै श्रीखण्ड मिली मग माई * सुनियत तातें अति मन भाई

भली बुरी कछु जात न चीन्हीं * बहुत रूप दै समकर लीन्हीं

वे बहु रमण नगर की सोऊ ❀ बन्यो संग अपनी को ओऊ
 कहत जु वह सोई अब मानें ❀ निशि दिन वाके गुणहिं बखानें
 जानि अनोखी नेह बढ़ावैं ❀ अब नहिं सखी श्याम ब्रज आवैं
 अपर कह्यो कलु रोष जनाई ❀ श्याम सदा के ऐसेइ माई
 जब अकूर लेन ब्रज आयो ❀ कानलागि तब यहै सुनायो
 नई कूबरी नारि बताई ❀ तब गहिये ताके सँग धाई
 बोली एक और तिनमाहीं ❀ कुब्जा तुम देखी की नाहीं
 दधि बेंचन जब जात तहाँ री ❀ तब नीके हम ताहि निहारी
 अंग देदी मालिन की जाई ❀ हँसत जाहि सब लोग लोगाई
 बसत दिगन नृप महलन जोई ❀ सुनियत करी सुन्दरी सोई

दो० कोटिबार दाहौ अनल, कोटि कसौ किन सोय ।

तौ कत पीतर ते कहूं, कैसे सोनो होय ॥

सो० हरि तजि दीन्ही लाज, हमें होत सुनिकै हँसी ।

जाय कूबरी काज, मथुरा मारयो कंस नृप ॥

बोली सखी और एक बानी ❀ अलि यह बात नहीं तुम जानी
 कुब्जा सदा श्याम के प्यारी ❀ वे भर्त्ता उनकी वह नारी
 तैसे तहीं ताहि कर दासी ❀ सखि ये अवगति गुणगण रासी
 रूपरतन कूबर में राख्यो ❀ जिमि मोती सीपन में भाख्यो
 कंस मारि कै सो अब लीन्हीं ❀ ताकी प्रभुता प्रगट न कीन्हीं
 ब्रजबनिता त्यागी अब तातें ❀ बूझी सकल श्यामकी बातें
 कहत एक तब सुनु सखि एरी ❀ वे दिन हरि को विसरि गये री
 लिये फिरत ही जब सब कनियाँ ❀ पाहिखन सखिये हम तनियाँ
 घर घर डोलत माखन खाते ❀ यशुदाहि उरहन देत लजाते
 बहुरि भये जब कलुक सयाने ❀ बाट घाट औगुण बहु ठाने

जो जो उन हमसों गुण ठान्यो ॥ हम सब ताही में सुख मान्यो ॥
जिमि भजि आय गोकुलै आये ॥ गोप बेष करि रहे छिपाये ॥
दो० देव मनावत दिन गये, बड़े होन की आस ।

बड़े भये तब यह कियो, बसे कूबरी पास ॥

सो० यशुमति लाड़ लड़ाय, बारे ते सेवा करी ।

ताहू को बिसराय, भये देवकी पुत्र अब ॥

मुनो सखी अब कह्यो हमारो ॥ नहिं कीजै तिनको पतियारो ॥

जे जन जग में कृतहि न मानै ॥ निज स्वारथ लागि बहुगुणठानै ॥

ज्यों भँवरा कल कुंज स्वहाई ॥ बैठत चाहि सुमनपर आई ॥

रसहि चाहि पुनि हित नहिं जानै ॥ मिलत कुलहि जब होत सयानै ॥

पालत काग पिकहि हित माने ॥ मिलत अन्यरस होत बिराने ॥

सोई भई हमहिं अरु नंदहि ॥ कहिये कहा सखी गोविंदहि ॥

जे खोटे मन कपट सयाने ॥ औसर परे परै पहिंचाने ॥

बैठत अब नृप आसन माहीं ॥ सुनियत मुरली देखि लजाहीं ॥

मोर पंख देखत नहिं भावै ॥ ब्रज को नाम लेत बहरावै ॥

मुरभी चित्रहु में जो हेरत ॥ तौ लजाय इत उत मुख फेरत ॥

हमरो नाम सुनत चपि जाहीं ॥ सुनत करत ग्वालन की नाहीं ॥

वे कह जानै पीर पराई ॥ जिन की प्रकृति परी यह आई ॥

दो० भयो नयो अब राजह्मां, नये मात पित गेह ।

नई नारि कुब्जा मिली, भये सखा नव नेह ॥

सो० बिसरे ब्रज की बात, कुंज केलि रसराग को ।

गये आपनी घात, दिन दिन सुख दूनो यहै ॥

कौन बात को कौं परेखो ॥ सखि अपने जिय शोच न देखो ॥

ना हरि जाति न पाँति हमारी ॥ तिन को दुख मानिये कहा री ॥

गोपीनाथ नन्द के लाला ❀ अब न कहावत कान्ह गुवाला
 बासुदेव अब उहां कहावत ❀ यदुकुलदीप भाट वर गावत
 नहीं बनमाल गुंज उरमाहीं ❀ मोर पक्ष माथे पर नाहीं
 गृह बन की सब प्रीति भुलाई ❀ वा मुरली सँग गई सगाई
 अब वह सुरत होत कब राजन ❀ दिनदशप्रीति करी निजकाजन
 सबै अजान भई तिहि काला ❀ सुनि मुरली को शब्द रसाला
 अब मन जलनिधि खगज्यों थाकै ❀ फिरि फिरि शरण जहां जिहि ताकै
 कहत एक सुन री ब्रजनाथा ❀ ब्रज अब मानों कियो अनाथा
 तब वह कृपा हती ब्रजपाहीं ❀ राख्यो गिरिवर करतल माहीं
 बहुरो और प्रताप कियो री ❀ हमहित दावानल अबयो री

दो० अब यह दोष लगैहमें, समुभत सकुचत जीय ।

भयो बज्रहू ते कठिन, बिछुरत फट्यो न हीय ॥

सो० अब लागे दिनजान, सुनुसखि मोहनलालबिन ।

रहत देह में प्रान, बिन वह मूरति सांवली ॥

रहत बदन देखे बिन नैना ❀ श्रवणन रहत सुने बिन बैना
 रहत हियो बिन हरि कर पस ❀ वेधत बाण मनोभव वसें
 अब सखियो सहियत दुख भारो ❀ मनहुँ नैन तन प्राण हमारो
 जब बिधि बालक बत्स चुगये ❀ तब हरि तैसेइ और बनाये
 जनु वैसेइ कुँवर कन्हाई ❀ विरह बृष्टि ब्रज और चलाई
 ऐसे मन गुण सुनि गोपाला ❀ भई विरहवश सब ब्रजवाला
 अतिही कठिन भयो दुख मन में ❀ व्यापी दशहैं अवस्था तन में
 कोउ कहै लोचन दीन हमारे ❀ क्यों जीवाहिं बिन श्याम निहारे
 ज्यों चकोर बिन चंद दुखारी ❀ जैसे री बारिज बिन वारी
 बिबरन जिमि ग्रीष्म के खंजन ❀ जैसे दुखी अमर बिन कंजन

श्याम सिंधु ते बिहुर परे री ॥ तड़फड़ात ज्यों मीन खरे री
भरत दरत पुनि पुनि अकुलाहीं ॥ हरि बिन धरत धीर दग नाहीं
दो० देख्यो नहीं मुहात कछु, गृह बन बिननंदनन्द ।

बिरह व्यथा जारत नहीं, भयो तपन अतिचन्द ॥

सो० बिन श्वासा की देह, और रूप कै जात जिमि ।

तिमि लागत ब्रजगेह, हरि बिन सखी भयावनो ॥

इहिं बिरियां बनतें हरि आवत ॥ दूरिहि तें कल बेणु बजावत

कबहुं परम चतुर गोपाला ॥ गावत ऊंचे स्वरन रसाला

कबहुं लै लै नाम सुनावत ॥ धौरी धूमरि धेनु बुलावत

देत दृंगन मुख बनतें आई ॥ वह मनमोहन रूप दिखाई

और, सखी बोली एक ऐसे ॥ बहुरो कबहुं देखिये वैसे

बैठे ग्वाल बालकन साथ ॥ बांठत खात अशन ब्रजनाथा

एक दिन दधि चोरत मम धामा ॥ मैं दुर देखि रही छवि धामा

वे भाजे मम लखि परछाहीं ॥ तब मैं धाय लई गहि बाहीं

मुखकर पोंछि लियोगहि कनियां ॥ प्रेम प्रीति रस के सुखदनियां

रहे लागि छाती सों जैसे ॥ सो वह कहो जात सुख कैसे

जिन धामन वे मुख अवलोके ॥ ते अब धरि धरि खात बिलोके

सुमिरि सुमिरि वे गुणगण नाना ॥ हरि बिन रहत अधम तन प्राना

दो० कहँ लगि कहिये ए सखी, मनमोहन के खेल ।

उनबिन अबगोकुल भयो, ज्यों दीपक बिन तेल ॥

सो० रहत नयन जल धाय, सुमिरि २ गुण श्याम के ।

कहिये काहि सुनाय, भये पराये कान्ह अब ॥

एक प्रलाप करत मन माहीं ॥ कहै जाय कोऊ हरि पाहीं

लेहु आप निज गायन धेरी ॥ फिरत नहीं ग्वालन के फेरी

बिहरी फिरत सकल वन माहीं ❀ तुम विन नाहिं काहु प्रतियाहीं
 अपनो जानि सँभारहु आई ❀ मति विसरौ ब्रज हेतु कन्हाई
 बिलखत गाय बत्स सब ग्वाला ❀ नेकु सुनावहु वेणु रसाला
 बूढ़त बिरह सिन्धु में नारी ❀ लेहु आय गहि भुजा निकारी
 काहु कहत कहै कोउ जाई ❀ वसो फेरि ब्रज कुँवर कन्हाई
 अब नहिं तुमसों गाय चरावैं ❀ नहिं जगाय वन प्रात पठावैं
 माखन खात बरजि हैं नाहीं ❀ नहिं उरहन यशुदहि लै जाहीं
 नहिं दावरि यशुमति को देहैं ❀ नहिं अब ऊखल सों बँधवैहें
 चोरी प्रगट करैं नहिं काहु ❀ नहीं जनावहिं अबगुण ताहु
 बेनी फूल गुहन नहिं कैहें ❀ नहीं महावर चरण दिवैहें

दो० मांगत दान न बरजि हैं, हठ नहिं करिहें मान ।

आय दरश अब दीजिये, रहत न तुम विन प्रान ॥

सो० ऐसे कहि गहि पाँय, ल्यावहिं फेरि मनाय हरि ।

बसहिं बहुरि ब्रज आय, तौ ब्रजनन्दन साँवरो ॥

एक कहत अब हरि नहिं आवैं ❀ नृपपद तजि क्यों ग्वाल कहावैं
 उहँ गजरथ चढ़ि चलत कन्हाई ❀ इहँ क्यों गाय चरावहिं आई
 उहां पटम्बर पहिरि दिखावैं ❀ इहाँ कि क्यों अब कामरि भावैं
 अब उन यशुमति मातु बिसारी ❀ कौन चलावत वात हमारी
 बोली अपर सखी बिलखाई ❀ भये निठुर अब कुँवर कन्हाई
 करी प्रीति हमसों हरि ऐसी ❀ सुन सखि सलिल मीन की जैसी
 तलफत मीन निपट अकुलाने ❀ नीर कछू उर पीर न जाने
 इतनी दूर दया नहिं कीन्ही ❀ बीती अवधि खबरि नहिं लीन्ही
 दैगये बिहँसि चलत परतीती ❀ मिलिहौं आय बहुरि रिपु जीती
 हारे नयन उनहिं मग जोवत ❀ रोय रोय उर कंचुकि धोवत

जैसो दिन निशि तैसी जाई ❀ पलभर नींद परत नहिं आई
मन्द समीर चन्द्र सुखदाई ❀ इनते जरत सेज अधिकई

दो० सपनेहूं तो देखिये, नींद परे जो नैन ।

कीने बिबिध उपाय मन, क्योंहूं लहै न चैन ॥

सो० बोलि उठी इकबाम, सुन सखि हौं तोसों कहौं ।

जबते बिछुरे श्याम, आज लखे मैं सपन में ॥

आये जनु मम सदन गोपाला ❀ हंसि भुज पाणि गहे नँदलाला

कहा कहौं अरि नींद भई री ❀ एकहु क्षण नहिं और रही री

ज्यों चकई लखि निज पर छाहीं ❀ पतिहि जानि हर्षी मन माहीं

तबहीं निठुर बिधाता आई ❀ दियो पवन मिस सलिल डुलाई

मेरी दशा भई सखि सोई ❀ जो जागों तौ दिग नहिं कोई

देखहु कहा अधिक अकुलाई ❀ बिरह जरी अरु काम जराई

कहा कहौं किहि दोष लगाऊं ❀ अपनी चूक समुझि पछिताऊं

बिछुरत ही नहिं तज्यों शरीरा ❀ समुझि परी तबहीं यह पीरा

महा दुखित अब अंग हमारे ❀ भये सखी दोउ नयन पनारे

अतिही भ्रम माते बिन देखे ❀ चाहत रूप श्याम को पेखे

रसना यहै नेम गहि राख्यो ❀ हरि बिन और न चाहत भाख्यो

जबते बिछुरे कुँवर कन्हाई ❀ तब ते भये सबै दुखदाई

दो० ओई निशि ओई दिवस, ओई ऋतु वइ मास ।

बदले सबै सुभाव जनु, बिन हरि मदन बिलास ॥

सो० चली और ही चाल, अब या ब्रज में ए सखी ।

बिमुख भये गोपाल, भये दुखद जे सुखद सब ॥

गृह कंदरा सेज भइ शूली ❀ शशि कीकिरण अग्नि समतूली

सींचत अली मलय घस नीरा ❀ होत अधिक ताते उर पीरा

फूली अरुण फूल बन डारी ❀ भरत देखियत मनहुं अंगारी
हरि विन फूल लगत सब कैसे ❀ मनहुं त्रिशूल शूल उर जैसे
तब इन तरुन अमृत फल लागे ❀ अब ते फल सब विष रस पागे
त्रिविध समीर तीर सम लागे ❀ कोकिल शब्द अग्नि जनु दागे
तपत तेल सम बारिद पानी ❀ उठत दाह सुनि चातक बानी
सुनु सखि चातक दोष न दीजे ❀ ज्वावै या पक्षी के कीजे
जैसे पिय पिय हम रत्नावत ❀ तैसे ही कहि कहि वह गावत
अति सुकंठ पीतम हित मानी ❀ क्षण नहिं रहत रत्न पिय बानी
आप सुधारस पी सुख पावै ❀ ढेरि ढेरि विरहिन को ज्यावै
जो यह खग नहिं करत सहाई ❀ लहत प्राण तो दुख अधिकार्ई
दो० या पक्षीसम और को, सुन सखि सुकृत समाज ।

सुफल जन्म है तासुको, जो आवै पर काज ॥

सो० मगन सकल ब्रजबाल, ऐसे हरि के बिरह बश ।

नहिं बिसरत नंदलाल, सोवत जागत दिवसनिशि ॥

पाथिक जात मधुवन तन हेरै ❀ ताहि धाय ब्रजतिय सब धेरै
कहत परहिं हम पाँय तुम्हारे ❀ सुनहु बटोही वचन हमारे
उत हैं बसत कृष्ण ब्रजनाथा ❀ कहियो तिनसों ब्रजकी गाथा
तुम जो इन्द्र को यज्ञ नशायो ❀ पुनि गिरि कर धर ब्रजै वचायो
सो अब वह विरहा है आयो ❀ चाहत है ब्रज फेरि बहायो
बरषत निशिदिन दगधनकारे ❀ बहत कुचन बिच सलिल पनारे
ऊरध श्वास पवन झकझोरे ❀ गरजत शब्द पीर घनघोरे
महाबज्र दुख सुख डुम डारे ❀ व्याकुल अंग सकल अतिमारे
व्यथा प्रबाह वद्यों अति भारी ❀ बूड़त विकल सकल ब्रजनारी
चितवत मग सब नाथ तुम्हारो ❀ जानि आपनो आइ उवारो

गये मिलन कहि श्रीमुख बानी ❀ अबधि बदी ते सबै सिरानी
तुम बिन तलफत प्राण हमारे ❀ जैसे मीन सलिल ते न्यारे

दो० एक बार फिर आय कै, देहु सुदरशन श्याम ।

तुम बिन ब्रज ऐसे लगत, ज्यों दीपक बिन धाम ॥

सो० मिलते बेणु बजाय, अब वह कृपा भई कहा ।

पुनि का करि हौ आय, प्राण गये ब्रज आयकै ॥

मुनहु पथिक त्वहि राम दुहाई ❀ कहियो यह मोहन ते जाई

तुम बिन राधे को तन जाई ❀ भई सबै अबिपरीत बनाई

बदन छपाकर प्रीति छिपानी ❀ अब रह गई कलंक निशानी

अखियाँ हुती कमल पखुरीसी ❀ सो अब मनहुँ रंग निचुरीसी

आँच लगे कंचन जिमि काचो ❀ तिमि तन बिरहानल को ताचो

कदली दलसी पीठ मुहाई ❀ सो अब मानों उलटि वनाई

मुखकी संपति सकल नशानी ❀ जारत भई कोकिला रानी

अब सब साद मान का नासो ❀ हैरहि तुम्हरे दर्श पियासी

चातक पिकमृग अति कुलजाती ❀ तब इन को देखत अनखाती

अब तिन सों पूँछत हैं धाई ❀ तुम्हरे चरण कमल कुम्हिलाई

ललितादिक सखियाँ लखि धाई ❀ जानि अग्र चढ़ि गर्व बढ़ाई

अब कहि सखी तिन्हें अकुलाई ❀ मिले रोय कै करठ लगाई

दो० सुधि बुधि सब तनकी गई, रह्यो बिरह दुख छाया ।

होन चहत दर्श दिशा, बेगि मिलहु तिहि आय ॥

सो० ऐसे निज निज हेत, कहत सँदेशो श्यामसों ।

पथिकहि चलन न देत, होत सांभ ताको तहां ॥

बिरह बिकल सब ब्रजकी बाला ❀ हरि बियोग उर पीर विशाला

हरिदरशन बिन कल नहिं पावैं ❀ ज्यहित्यहि कहि उर व्यथाजनावैं

जब पपिहा बोलत निशि आई ❀ कहत ताहि कोऊ अनखाई
 हों तौ बिरह जरी सन्तापी ❀ तू कत जारत रे खग पापी
 पिय पिय कहि अधरात एकारै ❀ मूढ़ मृतक अबलन कत मारै
 तू नहिं सुखित दुखित बिन नीरा ❀ तेउ न समुझत शठ पर पीरा
 करत कहा इतनी कठिनाई ❀ हरि बिन बोलत ब्रज पर आई
 उपजावत बिरहिन उर आरत ❀ काहे अगिलो जन्म विगारत
 एक कहत चातक सों टेरी ❀ हैं सारंग चेरी हम तेरी
 पौढ़े होहिं जहां सुखदाई ❀ ऊंचे टेरी सुनावहु जाई
 गइ ग्रीष्म पावस ऋतु आयो ❀ सब काहु चितचाव बढ़ायो
 तुम बिन ब्रज तिय डोलत ऐसे ❀ नाव बिना करिया की जैसे

दो० मानेंगे तेरो कह्यो, तेरे हित घनश्याम ।

लेहु सुयश चातक बड़ो, लै आवहु सुखधाम ॥

सो० सुन चातक के बैन, कोऊ सखि ऐसे कहत ।

यह बिहंग मुख दैन, सखिम्बहिं प्यारो पीवतें ॥

निशिदिन पियपिय रत बिचारो ❀ पियके बिरह भयो जरि कारो
 स्वाति बूढ़ लागि रहत दुखारो ❀ तज्यो सिंधु को जल करि खारो
 आप पीर पर पीरहि पावै ❀ जिय को जीवन नाम सुनावै
 प्रेम बाण लाग्यो ज्यहि होई ❀ जानै ब्यथा प्रेम की सोई
 कोऊ कहत कोकिलहि टेरी ❀ सुन री सखी सीख यक मेरी
 बसत जहां हित कुँवर कन्हाई ❀ फिर आवहिं बारिक तहँ जाई
 तू कुलीन कोकिला सयानी ❀ सबहिं सुनावति मीठी बानी
 तो सम कोऊ नहीं उपकारी ❀ जानत हौ बिरहिन दुख भारी
 उपबन बैठि श्याम को टेरी ❀ कहियो अबलन मनमथ घेरी
 श्रवण सुनाय मधुरकल बानी ❀ ब्रज लै आव श्याम सुखदानी

प्राणहुँ पलट मिलत नहिं ये री ॥ सेंट सुबिकत सुयश की देरी
हैंहैं बिन मोलन हम चेरी ॥ गावहिं गोकुल कीरति तेरी

दो० कोऊ ऐसे कहि उठत, बरजहु बोलत मोर ।

रह्यो परत नहिं टेर सुनि, बिन श्रीनंदकिशोर ॥

सो० बोलत करत बिहाल, मोरहु सखि बैरी भये ।

बसे बिदेश गोपाल, ये बनते न टरैं मरैं ॥

बिरह मगन यों ब्रजकी नारी ॥ नहीं कृष्ण सों पलभर न्यास
रहीं कृष्ण अबि दृगन समाई ॥ रसना कृष्ण नाम रटलाई
मनमें गुणहिं सदा गुण हरिके ॥ श्रवण रहे हरि को यश भरिके
बसी श्याम मूरति उर माहीं ॥ बिसरत मुरत एक पल नाहीं
बैठत उठत चलत घर बाहर ॥ श्यामसनेह गुप्त अरु जाहर
सोवत जागत दिन अरु राती ॥ प्रीतम कृष्ण प्रीति रसमाती
सब अंग कृष्ण प्रेमरस पागी ॥ भई कृष्णमय सकल सभागी
धनि सो प्रीति कृष्ण सों लागी ॥ धनि सो मुरति कृष्णरस पागी
धनि सो सुख हरिसंग बिहारी ॥ धनि सो दुख हरि बिरह बिचारी
धनि सो प्रेखौ हरिसों जोई ॥ धन्य सरेखौ हरि को होई
धनि सो ज्ञान ध्यान धनि सोई ॥ जप तप धन्य जो हरि हित होई
धन्य जन्म जो हरि के दासा ॥ सबबिधि धन्य जिन्हैं हरि आसा

दो० नन्दयशोमति गोपिकन, निशिबासरहरिध्यान ।

ब्रजबासी प्रभु दासकी, आश रहे लगि प्रान ॥

सो० बिसरे सब व्यवहार, और न दूजी गति कछ ।

अंध लकुटिया धार, एक मुरति नंदनंद की ॥

अथ श्रीकृष्णजीकी यज्ञोपवीतलीला ॥

रहे जाय मथुरा हरि जबते ❀ नितनव मोद होत तहँ तवते
 देवकि मन अभिलाष पुरावै ❀ निरखि निरखि दोउ सुत सुखपावै
 परमानन्द मगन बसुदेऊ ❀ सुखी सकल यादव गण तेऊ
 सुदित सकल मथुरापुर वासी ❀ देत सवन सुख प्रभु सुखरासी
 एक दिवस बसुदेव सुजाना ❀ बोले जे कुल मध्य प्रधाना
 करि आदर मानता बड़ाई ❀ तिनसों कहि यह बात सुनाई
 राम कृष्ण अबलों दोउ भाई ❀ ग्वालन मध्य रहे व्रज जाई
 यदुवंशिन की रीति न जाने ❀ हैं अवहीं कुलधर्म अयाने
 ताते यह विचार अब कीजै ❀ यज्ञोपवीत दुहुँन को दीजै
 मुनि ये बचन सवन मन भाये ❀ गर्ग आदि सब विप्र बुलाये
 पूंछि सुदिन शुभ लगन धराई ❀ यज्ञ काज सब सौंज मँगाई
 सकल तीर्थन ते जल आये ❀ राम कृष्ण तासों अन्हवाये
 दो० सकल वेदविधि मंत्रपढ़ि, करि अभिषेक पुनीत।
 दोउ भाइन तब गर्गमुनि, दियो यज्ञ उपवीत ॥
 सो० अन्त न पावैं शेष, वेद श्वास जाको सकल।
 ताहि दियो उपदेश, गायत्री गुरु गर्ग मुनि ॥
 दियो दान बसुदेव अनेका ❀ पूजे सब द्विज सहित विवेका
 सब नर नारिन मंगल गायो ❀ बन्दीजनन द्रव्य बहु पायो
 लाखि कौतुक सुर गण सुख पावैं ❀ बरषि सुमन दुन्दुभी वजावैं
 अति आनन्द भयो सब काहू ❀ तात मात उर परम उछाहू
 पुनि एक दिन बसुदेव सज्जानी ❀ यह इच्छा अपने मन जानी
 परिदत भलो कहूं जो पैये ❀ तौ विद्या सब सुतन पढ़ैये
 काहू तब यह बात बखानी ❀ संदीपन परिदत बड़ ज्ञानी

रहै अवनतीपुर के माहीं ❧ तासम जग पण्डित कोउ नाहीं
 यह मुनि कृष्ण सकल गुणखानी ❧ पितुके मनकी रुचि पाहिचानी
 है के नेम सहित दोउ भाई ❧ बिद्या पढ़न गये यदुगई
 वेद बिदित सेवा हरि कीन्हीं ❧ अल्प काल बिद्या सब लीन्हीं
 लखि प्रभाव गुरु अति मुख पायो ❧ जानि जगत्पति मन हर्षायो
 दो० तब हरि गुरुसों जोरि कर, बोले सहित सनेहु ।

गुरुदक्षिणा कछु चाहिये, माँगि सो हमसों लेहु॥

सो० तब गुरु कह्यो बिचारि, तुम प्रभु कर्त्ता जगतके ।

बूझिलेहुं निज नारि, जो वह कहै सो दीजिये॥

तब संदीपन तिय पहुँ आये ❧ बचन कृष्ण के ताहि सुनाये
 देन कहत हरि दक्षिणा हम को ❧ माँगें कहा सो बूझैं तुम को
 मरे हुते ताके सुत दोई ❧ तिन माँगे हरि सों पुनि सोई
 कृष्ण सकल जीवन के स्वामी ❧ जल थल सब जिनके अनुगामी
 गये बहुरि भक्तन सुखकारी ❧ जग उत्पति पालन लयकारी
 चाहैं कियो होय सब सोई ❧ आनि दिये गुरु के सुत ओई
 भये सुखी द्विज अरु द्विजनारी ❧ सुत संताप मिट्यो दुख भारी
 है प्रसन्न गुरु आशिष दीन्हों ❧ नमस्कार प्रभु गुरु को कीन्हों
 गुरु आयसु ले पुनि दोउ भाई ❧ आये मधुपुरि जब सुखदाई
 तात मात लखि अति मुख पायो ❧ भयो मनोरथ सब मन भायो
 राज काज पुनि प्रभु सब कई ❧ उग्रसेन आयसु अनुसरई
 हितजन परिजन नर अरु नारी ❧ सुखी सकल हरिवदन निहारी

दो० ऊधो अरु अकूर जे, सखा श्याम के साथ ।

मिलि बैठत खेलत हँसत, इनके संग यदुनाथ ॥

सो० ब्रजवासिन को ध्यान, ब्रजवासी प्रभु के सदा ।

यदपि ब्रह्म सुख खान, तदपि भक्त बश प्रेमरस॥

अथ उद्धवजीको ब्रजगमनलीला ॥

ऊधो यदुपति सखा सखानी ❀ एक ब्रह्म सुख सों रति मानी
हरि को त्रिगुण रूप करि मानै ❀ प्रेम कथा कछु उर नहिँ आनै
जब हरि ब्रज की बात चलावै ❀ तब ऊधो हँसि कै उचटावै
हरि लखि मनहीं मन पछिताहीं ❀ भली बानि याकी यह नाहीं
रूप रेख जाके नहिँ कोई ❀ धखो नेम उर में इन सोई
निर्गुण कथा योग की गावै ❀ जामें कछु रस स्वाद न आवै
मानत एक ब्रह्म अविनासी ❀ ज्ञानगर्व में रहत उदासी
बिछुरन मिलन दुःख सुख जाहीं ❀ नहीं प्रेम उपजत तन माहीं
कनककलश पानी बिन जैसे ❀ याको रूप बन्यो है तैसे
जो हौं कहौं कहा यह माने ❀ निंदा और हमारी ठाने
कहिये काहि प्रेम की गाथा ❀ बन्यो हंस वायस को साथ
ब्रज को ध्यान सदा उर मेरे ❀ प्रेम भजन याके नहिँ नेरे
दो० कहां यशोदानंद से, सुखद तात अरु मात ।

कहँ वहसुख ब्रजधाम को, नहिँबिसरतदिनरात ॥

सो० कहाँ सखनको संग, कहाँ केलि बृन्दा बिपिन ।

कहँ वह प्रेम तरंग, वंशीबट यमुना निकट ॥

कहाँ नवल ब्रज गोपकुमारी ❀ कहँ राधा बृषभानुदुलारी

कहँ वह प्रीति रीति सुख संगी ❀ कहाँ रास रस हास तरंगी

कहँ कुंजनबन केलि निकाई ❀ कहाँ मानलीला सुखदाई

कहँलागि ब्रज के सुखन सँभारों ❀ जिहिँ लागि पुर वैकुण्ठ विसारों

कहिये यह रस वाके आगे ❀ ऊधो सुनत प्रेम को भागे

कैसे प्रेम होय या माहीं ❀ मेरे कहे मानि हैं नाहीं

ब्रज को याको देऊँ पठाई ❀ पैहै प्रेम तहाँ यह जाई
याके मन अभिमान बढ़ाऊँ ❀ कहि युवतिन की प्रीति सुनाऊँ
यहै बात यदुपति उर आनी ❀ पठऊँ ब्रज यहि थापत ज्ञानी
कहाँ बोध तिनको करि आवै ❀ प्रेम मिटाय ज्ञान ससुभावे
जैहैं तुरत सुनत यह बाता ❀ कहि हैं हरि जानत म्वहिं ज्ञाता
करि अभिमान तुरत ब्रज जैहैं ❀ ह्वांते जाय साधु है ऐहैं

दो० ऐसे हरि बैठे करत, अपने उर अनुमान ।

ऊधो के उरते करों, दूर ज्ञान अभिमान ॥

सो० आयगये तिहि काल, ऊधोजी हरिके निकट ।

बिहँसिमिले नँदलाल, सखासखाकरि अंकभरि ॥

अतिसुन्दर साँवलि छवि छायो ❀ जब हरि को प्रतिबिम्ब स्वहायो
अंश भुजा दैकै यदुराई ❀ ऊधो से ब्रज बात चलाई
उद्धव सुनौ कहौं तुम पाहीं ❀ ब्रज को सुख म्वहिं बिसरत नाहीं
नेकहु नहीं यहां मन लागत ❀ उठि उठि पुनि उतही को भाजत
यह मन होत वहीं पुनि जैये ❀ गोपी ग्वालन में सुख पैये
कहँ वह हेतु यशोमति मैया ❀ दै दै माखन लेत बलैया
नहिं बिसरत मनते बिसराई ❀ वह राधा की प्रीति सुहाई
गोप सखा बृन्दावन गैयाँ ❀ नहिं भूलत वंशीबट छैयाँ
त्यागत तिन्हें बहुत दुख पाये ❀ मिटत नहीं मनतें पछिताये
ऊधो सुनि बोले मुसकाई ❀ कहा कहत हरि यों अकुलाई
सदा रहत यह हित थिर नाहीं ❀ जगव्योहार सकल मिथ्याहीं
मोसों सुनो बात यदुराई ❀ एकै ब्रह्म सदा सुखदाई

दो० जब ऊधो ऐसे कही, बिहँसि ज्ञानकी बात ।

तब यदुपति सुखपायकै, पुनि बोले हरपात ॥

सो० भाई मो मन माहिं, उद्धव कहि जो बात तुम ।

तुमसमान कोउ नाहिं, सखा और मेरो हितू ॥

ऊधो तुम ब्रज बेग सिधारो ❀ करि आवहु यह काज हमारो
 पूरण ब्रह्म अलख अज जोई ❀ मात पिता ताके नहिं कोई
 रूप न रेख जाति कुल नाहीं ❀ व्यापिरह्यो सब घट घट माहीं
 हौ ताके ज्ञाता तुम ज्ञानी ❀ गोपी सकल प्रीति रत मानी
 यह मत तिन्हें बोध करि आवो ❀ प्रेम मेदि कै ज्ञान ददावो
 मेरे प्रेम बिबश वे वाला ❀ सहत विरह दुख दुसह विशाला
 काम अग्नि तनतूल समाना ❀ शोच श्वास मारुत बलवाना
 भस्म होत पावत सो नाहीं ❀ भोजिरहत नयनन जल माहीं
 इहै आज लोपै इहि भाँती ❀ विरह व्यथा व्याकुल दिन राती
 एते सर कैसे वे न्यारे ❀ समाधान विन धीरज धारे
 एते सखा बेगि तुम जाहु ❀ मेदौ तिन के उर को दाहु
 पठऊं नारिन के ढिग सोई ❀ जो तुमहीं सों लायक होई

दो० इक प्रबीन अरु सखा मम, तुमते ज्ञानी कौन ।

सो कीजै ज्यहि ब्रज बधू, साधन सीखैं पौन ॥

सो० जिहि सुख पावैं नारि, ज्ञान योग उपदेशते ।

डारैं मोहिं बिसारि, ब्रह्म अलख परचौ करैं ॥

ऊधो सुनो कहत मैं तुम को ❀ तुम सम हितू और नहिं हम को
 कैस्यउ उन गोपिन सों मोहीं ❀ उच्छृण कीजिये विनवत तोहीं
 निशिदिन भक्ति मेरिये उनको ❀ नाहिं आनिरुचि कैसिहु तिनको
 सर्वस तिनन मोहिं सब दीनो ❀ तन मन प्राण समर्पण कीनो
 मुक्ति तीन तिन को मैं दीनी ❀ सो उनाहित एकहु नहिं कीनी
 रही एक सो योजन कहिये ❀ सो वह ज्ञान विना नहिं लहिये

सो अब देहु तिनहिं तुम ज्ञानू ॥ जिहि पावैं वह पद निखानू ॥
जो अङ्गीकृत करैं न तासू ॥ तो मैं हों उनको ऋण दासू ॥
गाय चरावत उन की रहौं ॥ ब्रज तजि नहीं अनत कहूँ जैहौं ॥
यहै बात मेरे मन भावै ॥ और न कछु मोपै बनि आवै ॥
ऊधो जाहु बिलम्ब करौ जिन ॥ उनको युग बीतत मोबिन छिन ॥
समाधान तिनको करि आवो ॥ ब्रज में जाय बिलम्ब न लावो ॥
दो० ऊधो ब्रज में जाय कै, बिलम न रहियो जाइ ।

तुम बिन हम अकुलाय हैं, श्याम करत मन राइ ॥

सो० तुमहौ सखा प्रवीन, बार बार सिखऊँ कहा ।

जिय ज्यों जल बिन मीन, सोई मतौ बिचारिये ॥

कही श्याम ऐसे जब बानी ॥ तब ऊधो अपने जिय जानी ॥
यदुपति योग सांच अब जान्यो ॥ ज्ञान गर्व अपने मन आन्यो ॥
बोल्यो अति अभिमान बढ़ाई ॥ तुम आयसु शिर पर यदुराई ॥
तुम पठवत गोपिन के माहीं ॥ मैं कैसे प्रभु करौं कि नाहीं ॥
तुम्हरे कहे गोकुलहि जैहौं ॥ ज्ञान कथा ब्रज लोगन कैहौं ॥
जो मानि हैं ब्रह्म उपदेशू ॥ तो कहिहौं समुझाय संदेशू ॥
दिन द्वै रहि ब्रज में सुख दैहौं ॥ बहुरौं आय चरण पुनि लैहौं ॥
यह सुनि बिहँसि कह्यो हरि तबहीं ॥ जाहु उपांगसुत ब्रज को अबहीं ॥
ज्ञान दृढ़ाय खबरि तिन दीजै ॥ एक पन्थ द्वै कारज कीजै ॥
आये भ्रात इतै हम दोऊ ॥ तब ते ब्रज पठ्यो नहिं कोऊ ॥
जाय नन्द यशुमति परितोषो ॥ ज्ञान कथा कहि युवतिन पोषो ॥
सकुचो मतिहि जानि ब्रजनारी ॥ कहियो ज्ञान योग विस्तारी ॥
दो० बचन कहतही समुभिहैं, वे हैं परम प्रवीन ।

हैं हैं शीतल बिरह ते, ज्यों जल पायो मीन ॥

सो० पठवत थापि महंत, ऊधो को यहि काज हरि ।

हैं आवैंगे संत, ब्रज भक्तन के दरश करि ॥

अपनो ही रथ तुरत मँगायो ❀ दै उपंगमुत को पल नायो

अपनेइ भूषण बसन सुहाये ❀ निज कर ऊधो को पहिराये

अपनेइ मुकुट आपनी माला ❀ पहिराई उर विहँसि विशाला

ऊधो तब हरि रूप स्वहाये ❀ एक भृगुपद के चिह्न वराये

लिख्यों पत्रिका श्री यदुराई ❀ नन्दबवा को विनय बढ़ाई

पालागन कहियो कर जोरी ❀ यशुमति से यह भांति करोरी

बालक ग्वाल सखा समुदाई ❀ लिख्यों मिलन सबहीं उर लाई

अरु नर नारि सकल ब्रज जेते ❀ प्रीति जनाय लिखे सब तेते

लिखि गोपिन को योग पठायो ❀ भाव जानि काहू नहिं पायो

लेहु दृढ़ाय प्रीति ब्रजवाला ❀ यह आनी उर में नँदलाला

नीके रहियो यशुमति मैया ❀ कछु दिन में ऐहें दोउ भैया

लिखि पाती ऊधो कर दीन्ही ❀ और मुखागर विनती कीन्ही

दो० कहा कहीं कछु दिवस ते, जननी विछुर्यों तोहिं ।

तादिन ते कोऊ नहीं, कहत कन्हैया मोहिं ॥

सो० कह्यो सँदेश न जात, अति दुख पायो मातु तुम ।

अब मोकों निज तात, बसुदेव अरु देवकि कहत ॥

कहियो नन्दबवा सों जाई ❀ कह मन धरो इती निठुराई

जबते दियो इतै पहुँचाई ❀ बहुरो सोध लियो नहिं आई

बारिक बरसाने ले जैयो ❀ समाचार तहँ के सब लैयो

ग्वाल बाल सब सखा हमारे ❀ हैं हैं वे मम विरह दुखारे

तिन्हें जाय मम दिशि ते भेंये ❀ कहि सँदेश तिन को दुख मेये

ब्रजवासी जेते नर नारी ❀ गोप बत्स खग मृग वनचारी

जोजिहि बिधि तासों तिहि भांती ❀ अर्स पर्स कहियो कुशलाती
मित्र एक मम दरशन पैहौ ❀ देखत ताहि परम सुख लैहौ
बृन्दावन में रहत निरन्तर ❀ होत नहीं कबहूँ उर अन्तर
सघन कुञ्ज तरुलता मुहाई ❀ मिलियो ताको शीश नवाई
इहि बिधि ऊधो सों यदुनाई ❀ कहि सब मन की बात सुनाई
बल करि ताको प्रेम जनायो ❀ ज्ञान गर्व ताके उर छाया
दो० ऐसे ऊधो सों कही, प्रगट श्याम ब्रजप्रीति ।

ऊधो तिनको ज्ञान लै, चले करन बिपरीति ॥

सो० लखि ऊधो को जात, हलधरलिये बुलाय ढिग ।

समुझत ब्रजकी बात, आये जलभरि नैन पुनि ॥

कहा कहौँ ऊधो मैं तुम सों ❀ यशुमति करत हेत जो हमसों
एक दिवस खेलत मो साथी ❀ खेल कियो भगरो यदुनाथा
मोको दौरि गोद तब लोन्हों ❀ करसों ठेलि श्याम को दोन्हों
नन्दबबा तब बन ते आये ❀ इन्हें गोद लै मोहिं खिजाये
लगे कहन नान्हो तेरो भाई ❀ तोकों छोह लगत नहिं राई
वह हित नहिं भूलत है हमको ❀ कहत सँदेश बनत नहिं तिनको
कहियो तुम प्रणाम अब जाई ❀ अरु दोउ भैयन की कुशलाई
कहियो हम हैं तनय तुम्हारे ❀ मात पिता नहिं आन हमारे
मिलिहैं आय धाय कै तुमकों ❀ कारज कलुक और है हमकों
नहिं बिसरत क्षण गोकुल गाई ❀ तुम तजि सुख को हमें देखाई
सुनि बसुदेव देवकी पायो ❀ ऊधो ब्रज कों जात पठायो
दो० नंदयशोमति हितसमुझि, लिखिपाती बसुदेव ।

पालि दिये तुम सुत हमें, नहीं उच्छ्रय तुमसेव ॥

सो० मति सकुचो जिय माहिं, रामकृष्ण तुम्हरे तनय ।

हम कहिये को आहि, मात पिता तुम दुहुँन के ॥

बालपने तुम पालन हारे ॥ बाल कोलि रस तुम्हें दुलारे ॥
हम तौ पाये बैस कुमारा ॥ सो ये सब उपकार तुम्हारा ॥
मति कल्पो अपने मन माहीं ॥ हरिसों मिलि किन जात इहांहीं ॥
श्याम राम नाहि तुम्हें भुलावैं ॥ दिवस रैन तुम्हरे यश गावैं ॥
ऐसे लिखि पाती सुखदाई ॥ ऊधो कर वसुदेव पठाई ॥
तब हरि ऊधो बेगि पठायो ॥ तुस्त अंक लै हरि बैठायो ॥
आयसु लिये बिदा हरि कीन्हों ॥ चले उषंगसुत ब्रजपथ लीन्हों ॥
ऊधो चले गर्व मन धारी ॥ कहा ज्ञान समुझैगी ग्वारी ॥
देखों हों ब्रज लोगन धाई ॥ मानत इतो तिन्हें यदुराई ॥
चले उषंगसुत जव हर्षाई ॥ गोपिन मन तब गयो जनाई ॥
पुनिपुनि अमर श्रवण लागि जाई ॥ भयो कलुक दुख कलु हर्षाई ॥
समुझिसो शकुन दश अनुरागी ॥ जहँ तहँ काग उड़ावन लागी ॥
दो० जो गोकुल हरि आवहीं, तो तू उड़ रे काग ।
दधि ओदन तोहिं देहुँगी, अरु अंचल की पाग ॥
सो० सुनि गोपिन के बैन, उठि बैठत बायस अनत ।
लखि पावत सब चैन, कहत परस्पर आप में ॥

सखी आज गोकुल हरि आवैं ॥ कैधों काहू ब्रजहि पठावैं ॥
नीकी बात सुनावैं कोऊ ॥ फरकत बाम नयन भुज दोऊ ॥
बेन बयारि अम्बर फहराई ॥ टूटि टूटि कंचुकि बँद जाई ॥
उठि उठि बैठत काग कहते ॥ उमँगत मन आनंद लहेते ॥
अमर एक चहुँदिशि मड़राई ॥ पुनि पुनि कान लगत है आई ॥
होत शकुन सुन्दर शुभकाला ॥ आवन हार भये नँदलाला ॥
जानत भाग दशा बिधि फेरो ॥ दूर करो अब दुख मन तेरी ॥

बहुरि गोपाल मिले जो आई * सुख सनेह करि लीजै माई
आसन हृदय कमल में दीजै * नैनन निरखि वदन छवि लीजै
देखत रूप मान तजि दीजै * प्रेम भजन अपनो करि लीजै
आवैं जो ब्रज कुंजबिहारी * वढ़ि भागिनी सबै ब्रजनारी
नन्द यशोमति सखि सुख पावैं * अति वढ़िभागिनि बहुरि कहावैं
दो० घर घर सगुन बिचारहीं, ब्रजकी तिय बड़भाग ।

ब्रजबासी प्रभुदरश कों, सब को अनुराग ॥

सो० कब आवहिं ब्रजराय, यहै करत अभिलाष मन ।

मथुरा तन टकलाय, अनुदिन पंथ निहारहीं ॥

अथ ऊधोजीका ब्रजआगमनलीला ॥

ऊधो चले ब्रजहिं समुहाये * मथुरा तजि गोकुल नियराये
रथ पर बैठे शोभित कैसे * दूजे नन्दनंदन मनु जैसे
वहै मुकुट पीतांबर काछे * श्याम रूप शोभित अंग आछे
दूरहि ते रथ की उजियारी * देखत हरषीं ब्रज की नारी
जान्यो आवत कुँवर कन्हाई * आतुर जहँ तहँ ते उठि धाई
कहत परस्पर देखहु आली * मधुवन ते आवत बनमाली
गये श्याम रथपर चढ़ि जाहीं * तैसो रथ आवत मगमाहीं
तैस्वइ मुकुट मनोहर राजै * तैस्वइ पट कुण्डल छवि छाजै
रथ तन सब देखत अनुरागी * सपने को सुख लूटन लागीं
ज्यों ज्यों रथ आतुर चलि आवै * त्यों त्यों पीताम्बर फहरावै
भई सकल सुख व्याकुल नारी * प्रेम बिबश आनंद उर भारी
जौं लागि रथ आवत नियराई * तौं लागि मानहुँ कल्प बिहाई
दो० यहै शोर ब्रज घर घरन, आवत हैं नंदलाल ।

देखन को निकसे हरषि, तरुण बृद्ध अरु बाल ॥

सो० सुनत यशोदा नन्द, लेन चले आगे हरषि ।

भये परमआनन्द, तिहिंक्षण ब्रजके लोग सब ॥

जब कछु रथ आगे नियरायो ❀ तब संदेह सवन मन आयो
श्याम अकेले रथ के माहीं ❀ हलधर संग देखियत नाहीं
कोऊ कहत न हैं ब्रजनाथा ❀ जोपै हलधर नाहिंन साथ
इतना कहत निकट रथ आयो ❀ ऊधो निरखि नयन जल आयो
रहीं ठगीसी सब ब्रजवाला ❀ नूतन विरह भई बेहाला
मनहुँ गई निधि केहूँ पाई ❀ बहुरि हाथ ते तुरत गँवाई
हैं गई सपने की रजधानी ❀ जागत कछू नहीं पछितानी
जवहीं कह्यो श्याम सो नाई ❀ जहां सो तहां रहीं मुरझाई
परी विकल यशुमति ज्यहि ठाई ❀ ब्रजतिय धाय तहां चलि आई
श्याम बिना रथ पर अकुलानी ❀ जहां सो तहां रहीं मुरझानी
रुदन करत व्याकुल अति भारी ❀ लई उठाय पोंछि दग बारी
यशुदहि बोध करत सब वाला ❀ ऊधो को पठयो गोपाला

दो० भली भई मारग चल्यो, सखा पठायो श्याम ।

उठहुबूझियेहरि कुशल, कहति महरिसों वाम ॥

सो० सुफल घरी है आज, करहु जानियह मन हरष ।

आवन को ब्रजराज, इनके कर लैहै लिख्यो ॥

यह सुनि उठी कछुक सुख पाई ❀ ऊधो निकटहि पहुँची आई
हरिके रूप निरखि सुख पायो ❀ श्यामसखा कहि सवन सुनायो
ऊधो निरखि कहत ब्रजनारी ❀ सुन्दर सजल सुशील महारी
ताही ते हरि याहि पठायो ❀ लै संदेश मोहन को आयो
नीके नीके बचन सुनैहै ❀ सुनि सुनि श्रवणन हियो सिरैहै
यह जानिये बेगि हरि ऐहै ❀ याके मुख अब यह सुनि पैंहै

चहुँदिशि घेर लियो रथ जाई ❧ नन्द गोप ब्रज लोग लुगाई
गये लिवाय नन्द निज द्वारे ❧ ऊधो रथ ते हरषि उतारे
अरघ देय भीतर घर लीन्हो ❧ धनिधनि तिन कहि आदर कीन्हो
चरण धौय आसन बैठाये ❧ बहु प्रकार भोजन कखाये
बिबिध भांति करिके पहुनाई ❧ नन्द श्याम की बात चलाई
ऊधो कह्यो कुशल दोउ भैया ❧ अरु बसुदेव देवकी भैया
दो० करत हमारी सुधि कबहुँ, कहु ऊधो बलबीर ।

पुलकि गात गदगद बचन, पूछत नन्द अधीर ॥

दो० चूकपरी अनजान, कह पछिताने आजके ।

घर आये भगवान, जाने हम निज अहिर करि ॥

प्रथम गर्गमुनि कह्यो बखानी ❧ भूल्यो संग दोष हितजानी
अब ऊधो बिछरे गिरिधारी ❧ मरियत समुझि शूल स्वइ भारी
कह्यो यशोमति दृग भरि पानी ❧ ऊधो हम ऐसी नहीं जानी
सुत को हित करिकै हम माने ❧ हरि है बसुदेव प्रगटने
ज्याहि बिरंचि शिव ध्यान लगावै ❧ निशिदिन अंग बिभूति चढ़ावै
सो बालक हम अतिहि अयान्यो ❧ ऊखल सों बांध्यो गहि पान्यो
फाटत नहीं ब्रजसम छाती ❧ अब यह समुझि हृदय पछिताती
वैसे भाग कबहुँ अब ऐहैं ❧ बहुरि श्याम को गोद खिलैहैं
जबते हरि मधुपुरी सिधारे ❧ तब ते ऊधो प्राण दुखारे
तलफत मीन नीर बिन जैसे ❧ देख्यो श्याम मनोहर तैसे
उठि के प्रात जातिहौं खरिका ❧ देखत दुहत और के लरिका
उठत शल ऊधो मन माहीं ❧ क्यों ये प्राण निकसि नहीं जाहीं

दो० ग्वालसखा सँग जोरि अब, को गैया लैजाय ।

को आवै सन्ध्या समय, बनते गाय चराय ॥

सो० काहि लेहुँ उर लाय, आंचर से रज भारिकै ।

काकी लेहुँ वलाय, चूमि मनोहरकमलमुख ॥

मैं बलि सांची कहियो ऊधो ❀ कैसे श्याम रहत है मूधो
दही मही माखन नित जाई ❀ खात कौन के धाम कन्हई
कौन ग्वाल बालन के साथे ❀ भोजन करत तहां ब्रजनाथा
कौन सखा लीन्हे सँग डोलै ❀ खेलत हँसत कौन से बोलै
काको माखन चोरै जाई ❀ देत उरहनो को अब आई
वन में यमुना तीर कन्हई ❀ किन गोपिन को रोंकत जाई
किन को दूध दही ढरकावै ❀ किन सों दधि को दान चुकावै
इतनी बूझत यशुमति माई ❀ भई विकल गुण सुमिरि कन्हई
बोले नंद बिलखि तब बानी ❀ कहियो ऊधो सांच बखानी
श्याम कबहुँ बहुरो ब्रज ऐहैं ❀ ब्रजवासिन की ताप नशैंहैं
मोहिं तात यशुमति सों माता ❀ सदा कहत हैं हरि सुखदाता
कहि गये चलतीबार मुरारी ❀ मिलिहों बहुरि तात यकवारी

दो० करिहैं सो अपनो बचन, कबहुँ श्याम प्रतिपाल ।

कहौ ऊधो तुमसों कछु, कह्यो कि नाहि गोपाल ॥

सो० भये सकल कृशगात, श्याम विरह ब्रजनारिनर ।

युगसम दिवस बिहात, ऊधो हमकों हरि विना ॥

लखि ऊधो ब्रजरीति सुहाई ❀ रहे कलुक ऊधो सकुचाई
मुनत नंद यशुमति की बानी ❀ बोल्यो हृदय परम सुख मानी
कहि दोउ भाइन की कुशलाती ❀ दई श्याम दीन्ही सो पाती
हरि को कह्यो संदेश सुनायो ❀ हलधर को सब कह्यो सुहायो
पाती बांचि नंद उर लाई ❀ भेटे मानहुँ कुँवर कन्हई
लिखी श्याम के करकी पाती ❀ यशुमति लैलै लावति छाती

दुसह बिरह की ताप नशावै ❀ हरिसँदेश मुनि मुनि सुख पावै
 पुनि बसुदेव लिख्यो है जोई ❀ ऊधो दियो नन्द को सोई
 बांचत नैन नीर भरि आये ❀ कहत श्याम अब भये पराये
 पुनि बसुदेव लिखी का बाता ❀ बोली बिलखि यशोदा माता
 यद्यपि हरि बसुदेव कुमारा ❀ उदर देवकी के अवतारा
 तद्यपि म्वहिं धायहु के नाते ❀ एक बार मोहन मिलिजाते

दो० ऊधो यद्यपि हम सबै, समुभावत ब्रजलोग ।

उठतशूलतद्यपि निरखि, माखनहरिमुखयोग ॥

सो० रोटी अरु नवनीत, नितमांगत उठि प्रातही ।

को देहै करि प्रीत, तिन्हैं बानि जाने बिना ॥

यद्यपि देवगृह सब सुख भोगा ❀ हैं बसुदेव सदन सब योगा
 हम पशुपाल ग्वाल ब्रजवासी ❀ दही महीं धन घोष निवासी
 राजमुखन कोउ कोटि लड़ावै ❀ तो माखन नहीं हरि सुख पावै
 निशिदिन रहत यहै जिय शोचू ❀ हैहैं हरि हां करत सकोचू
 एक बार गोकुल फिर आवैं ❀ मनकरि माखन भोग लगावैं
 सपत रहैं गोकुल में नाहीं ❀ उलाटि बहुरि मधुपुरिको जाहीं
 ऐसे कहि यशुमति बिलखाई ❀ ऊधो चरण रही शिरनाई
 तब ऊधो बोले सुखपाई ❀ धन्य यशोमति धनि नँदराई
 धन्य धन्य हैं भाग तुम्हारे ❀ जिनको कृष्ण प्राण ते प्यारे
 पूरण ब्रह्म कृष्ण सुखरासी ❀ जगत आत्मा सब घट वासी
 हैं व्यापक पूरण सब ठाहीं ❀ जैसे अग्नि काठ के माहीं
 मति जानो हरि हमते न्यारे ❀ वे हैं सब जन के रखवारे

दो० मति जानो सुतकरि तिन्हैं, वे सब के करतार ।

तात मात तिनके नहीं, भक्तन हित अवतार ॥

सो० हम हैं सब अज्ञान, प्रभु महिमा जानें नहीं ।

वे प्रभु पुरुष पुरान, सकल कर्म करिकै रहित ॥

हम सब अपने भ्रमहिं भुलाने ❀ नर समान हरि को करि जाने
ज्यों शिशु आप चक्र सम फिरई ❀ ताको फिरत जानि सब परई
ताते प्रभुहि जानि हरि ध्यावो ❀ जाते मुक्ति पदारथ पावो
ऊधो जो तुम हमहिं सिखावत ❀ हमहुं बहुत मनहिं समझावत
तद्यपि वह मृदुरूप कन्हाई ❀ देखे बिना रह्यो नहिं जाई
सब ब्रज के जीवन हरि वारे ❀ ऊधो कैसे जात विसारे
जा दिन मोहन बन नहिं जाते ❀ ता दिन बन खग मृग अकुलाते
नहिं अघात देखे वह मूरत ❀ रूप निधान साँवरी मूरत
सो मृग तृण भरि उदर न खाहीं ❀ भये रहत कृश श्याम बिनाहीं
मुरली धुनि खग मोहे जोई ❀ सो अब मुख फल खात न कोई
जे बन सदा नवल सुख दाता ❀ ते अब सूखे जीरण पाता
कोकिल कीर मोर नहिं बोलैं ❀ व्याकुल भये सकल बन ढोलैं

दो० जिन्हें चरावत श्याम जो, फिरत दुखारी गाय ।

जहँ जहँ गोदोहन कियो, सुंघत तहँ तहँ जाय ॥

सो० सब ब्रज बिरह अधीर, युगसम वीतत पल हमैं ।

धरैं कौन बिधि धीर, ऊधो मनमोहन बिना ॥

ऐस्यहि कहत मुनत गुण हरिके ❀ बैठे वीति गई निशि भरिके
ठाढ़े यशुदाहि रैन बिहानी ❀ भरि भरि लोचन दारत पानी
ब्रज घर घर सब होत बधाई ❀ कहत कान्ह की पाती आई
निपट समीपी सखा स्वहायो ❀ ऊधो को हरि ब्रजहि पठायो
कंचन कलश दूब दधि रोरी ❀ नन्द सदन लै आवत गोरी
गोप सखा सब कृष्ण उपासी ❀ आये धाय सकल ब्रजवासी

ऊधो को हरि रूप निहारी ❀ भये सुखी सब नर अरु नारी
ब्रज युवती मिलि तिलक बनावैं ❀ करि परदक्षिण शीश नवावैं
कहत पाय कै दश तुम्हारो ❀ भयो जन्म अब सुफल हमारो
बूझत कुशल सकल नर नारी ❀ नन्द अवास भीर भइ भारी
ऊधो लखि ब्रज प्रेम जकेसे ❀ बोलि सकत नहिं रहे थकेसे
हकबकात चहुंदिशि सब ठाढ़े ❀ ऊधो रहे मौन गहि गाढ़े

दो० ऊधो की लखि कै दशा, ब्रजजन मन अकुलात ।

क्यों ऊधो तुम कहत नहिं, रामकृष्ण कुशलात ॥

सो० इकक्षण युगसम जाहिं, हमैं सुने बिन प्रीति हरि ।

आवन कह्यो कि नाहिं, ब्रजहि कृपा करि सांवरे ॥

तब ऊधो बोले धरि धीरा ❀ सदा कुशल हरि हलधर वीरा
दियो तुम्हें लिखि पत्र सँदेशू ❀ अरु श्रीमुख यह कह्यो सँदेशू
करि समाधि अन्तर म्हाहिं ध्यावो ❀ गोप सखा करि मति चितलावो
हौं अनादि अविगति अविनासी ❀ सदा एकरस सब घट वासी
निगुण ज्ञान बिन मुक्ति न होई ❀ बेद पुराण कहत हैं सोई
ताते दृढ़करि यह मन धारो ❀ सगुणरूप तजि निगुण विचारो
तुस्त तापत्रय तरि दुखदाई ❀ मिलिहौ ब्रह्म सुखहि सब जाई
ऊधो कही जबहिं यह बानी ❀ गोपी जन सुनिकै बिलखानी
इतनी दूर बसत सुनि आली ❀ अब कछु और भये वनमाली
रही बिरह की बात विचारी ❀ बूझी सकल मनहुं बिन वारी
मिलन आश गइ सुनत सँदेशू ❀ उपज्यो उर अति कठिन अँदेशू
फैल गई जहाँ तहाँ यह बानी ❀ कहत परस्पर सब अकुलानी

दो० यह सब दाषलगै हमैं, करम रेख को जान ।

प्रेम सुधारस सानिकै, अब लिखि पठ्यो ज्ञान ॥

सो० इक ऐसे यह देह, रही भुरसि विरहा अनल ।
कैलाहूते खेह, अब आयो ऊधो करन ॥

रूपराशि जो सब सुखदाई ❀ ब्रज की जीवनमूरि कन्हई
बिहारे जिन्हें इतो दुख पायो ❀ सो इन हिरदय माहिं बतायो
तिन्हें कहत चितवो मन माहीं ❀ वे हैं पूरणभरि सब ठाहीं
जाको यत्न करत हैं योगी ❀ निर्गुण निराकार निर्भोगी
सो करि कृपा आइ कै ऊधो ❀ वीथिन मांझ बहायो सूधो
अबलन कारण श्याम पठायो ❀ व्यापक अगह गहावन आयो
भजो आय बिरहिन सब कोई ❀ गायो निर्गुण निगम न जोई
जो समदृष्टि एकरस मोहन ❀ तौ कित चित्त चुरायो गोहन
ऊधो यह हित लागै का है ❀ जो पै इष्ट कृष्ण हियमा है
निशिदिननयनदरशहितजागत ❀ कल नहिं परत पलक नहिं लागत
चहुँदिशि चितवति बिरहअधीरा ❀ विलखि विलखि भरि डारत नीरा
ऐस्यहु दुख प्रगटत क्यों नाहीं ❀ जो पै श्यामहिं कहत इहाहीं

दो० रहन देहु ऐस्यहि हमैं, अवधि आश की थाह ।

फिरि चाहै नहिं पायहाँ, डारे अगुण अथाह ॥

सो० ल्याये युवतिन योग, जो योगिन को भोग तुम ।

हमतनमखोबियोग, भयो अधिकदुखश्रवणसुनि ॥

एक कहत दूषण नहिं याको ❀ यह आयो पठयो कुबिजाको
वाने जो कहि याहि पठायो ❀ सोई याने आय सुनायो
अब कुबिजा जो जाहि सिखावै ❀ सोई ताको गायो गावै
कबहुँ श्याम कहैं नहिं ऐसी ❀ कही आय ब्रज में इन जैसी
ऐसी बात सुनै को माई ❀ उठै शूल सुनि सहि नहिं जाई
कहत भोग तजि योग अराधौ ❀ ऐसी कैसे कहि हैं माधौ

जप तप संयम नेम अचूरो ❀ यह सब बिधवा को व्यवहारा
युग युग जीवहु कुँवरकन्हई ❀ शीश हमारे पर सुखदाई
अच्छतखसम भस्म किन लाई ❀ कहो कहां की रीति चलाई
हमरे योग नेम व्रत एहा ❀ नन्दनँदन पद सदा सनेहा
ऊधो तुम्हें दोष को लावै ❀ यह सब कुविजा नाच नचावै
जब युवतिन यह बात सुनाई ❀ ऊधो रह्यो मौन सकुचाई
दो० योगकथा युवतिन कही, मनहीं मन पछिताय ।

प्रेमबचन तिनके सुनत, रहिगयो शीशनवाय ॥

सो० तब जान्यो मनमाहिं, ये गुण हैं सब श्यामके ।

म्वहिं पठयो इहि ठाहिं, याही कारण के लिये ॥

ऊधो सुनि गोपिन की बानी ❀ गुरु करि तिन्हें प्रथमहीं मानी
मन मन करि प्रणाम हर्षाने ❀ ऊधो चले बहुरि बरसाने
श्रीवृषभानु कुँवरि हरिप्यारी ❀ और सकल ब्रजगोपकुमारी
जिनके मनमोहन नँदलाला ❀ सुनी सबन यह बात रसाला
कोऊ है मधुवन ते आयो ❀ हित करि श्रीनँदलाल पठायो
गूथ गूथ मिलि अति अतुराई ❀ पियसँदेश सुनतैं उठि धाई
मिले उपँगसुत पन्थ मझारी ❀ रथ लखि कहत परस्पर नारी
बहुरि सखी सुफलकसुत आयो ❀ वैसोई रथ परत लखायो
लै गयो प्रथमहिं प्राण हमारो ❀ अब धौं कहा काज जिय दारो
तिहि क्षण ऊधो दरश देखायो ❀ तब धीरज सबके मन आयो
संगी सखा श्याम को चीन्हो ❀ सबन प्रणाम जोरि कर कीन्हो
ऊधो लखि अति भये सुखारी ❀ मनहुँ विकल रूप पायो बारी
दो० तब ऊधो रथतें उतरि, बैठे तरु की छाहिं ।

भई भीर गोपीन की, अति आनँद मन माहिं ॥

सो० अति प्रियपाहुन जान, सुधि ल्याये ब्रजराजकी ।
करिकै अति सनमान, प्रेमसहित पूजे सबन ॥

हाथ जोरि पुनि विनय सुनाई ❀ कहिये ऊधो निज कुशलाई
बहुरि कहौ मधुबन कुशलाता ❀ हैं वसुदेव देवकी माता
कुशल क्षेम कहिये बलदाऊ ❀ अरु अकूर कुशल कुवजाऊ
बूझत श्याम कुशल अकुलानी ❀ नयन नीर मुख गदगद बानी
लाखि गोपिन की प्रीति स्वहाई ❀ प्रेम मगन भये ऊधो राई
पुलाकि गात अँखियां जल छाई ❀ गयो ज्ञान को गर्व हिराई
पुनि पुनि यहै कहत मन माहीं ❀ ऐसी हरि को बूझिय नाहीं
ब्रजनारिन को योग पठावैं ❀ चितते ब्रज की प्रीति मिठावैं
पुनि ऊधो उर में धरि धीरा ❀ बोले सोधि नैन को नीरा
सब विधि कहि हरि की कुशलाती ❀ दीनी प्रथम श्याम की पाती
लै लै करन मिलति सब पाती ❀ कोऊ नैन कोउ लावति अती
काहू लै कर शीश चढ़ाई ❀ बूझत आपन लिखी कन्हाई

दो० अतिहितपातीश्यामकी, सबमिलिमिलिमुखपाय ।

ऊधो कर दीनी बहुरि, दीजै बांचि सुनाय ॥

सो० ऊधो सबन समोध, बांचि श्याम की पत्रिका ।

लागे करन प्रबोध, ज्ञान कथा बिस्तारि कै ॥

मोको हरि तुम पास पठायो ❀ आत्म ज्ञान सिखावन आयो
जाते पाप नहीं न्यिराई ❀ मन ते विषय देहु विसराई
हरि आपहि नर आपुहि नारी ❀ आपुहि गृही आप ब्रह्मचारी
आपहि पिता आपुही माता ❀ आपहि पुत्र आपुही भ्राता
आपहि पण्डित आपहि ज्ञानी ❀ आपहि राजा आपहि रानी
आपहि धरती आप अकाशा ❀ आपहि स्वामी आपहि दाशा

आपहि ग्वाल आपही गाई * आपहि आप दुहावन जाई
 आपहि भ्रमर आपही फूला * आपहि ज्ञान बिना जग शूला
 राव रङ्ग दूजा नहिं कोई * आपहि आप निरन्तर होई
 ज्यों बहु दीप ज्योति है एकू * तैस्वइ जानो ब्रह्म विवेक
 यहि प्रकार जाको मन लागै * जसमरण नाशै भ्रम भागै
 योग समाधि ब्रह्म चितलावै * ब्रह्मानन्द सुखहि तब पावै

दो० सुनतहि ऊधो कें बचन, रहीं सबै शिरनाय ।

मानहुं मांगत सुधारस, दीन्हों गरल पियाय ॥

सो० रहीं ठगीसी नारि, हरि सँदेश दारुण सुनत ।

बोलीं बहुरि सँभारि, ऊधो सों कर जोरि कै ॥

भले मिले तुम ऊधो राई * भली आय कुशलात सुनाई
 कछु यक हती मिलनकी आशा * कियो आय ताको तुम नाशा
 इन बातन कैसे मन दीजै * श्याम बिरह तन पल पल छीजै
 बिन देखे वह मूरति प्यारी * कुण्डल मुकुट पीत पट धारी
 ऊधो कहो कौन बिधि जीजै * योग युक्ति लैकै कह कीजै
 छांड़ि अछत नँदनंदन प्यारो * को लिखि पूजै भीति पगारो
 हम अहीर गोरस के भोगी * योग युक्ति जानै कोउ योगी
 ऊधो तुम सों सांच बखानै * प्रेम भक्ति हमरे मन मानै
 हम को भजनानंद पियारो * ब्रह्मानंद सुख कहा विचारो
 ब्यावरि व्यथा न बंध्या जानै * ये दृग हरिदरशन सुख मानै
 पुनि पुनि हमें वहै सुधि आवै * कृष्णरूप बिन और न भावै
 नवकिशोर को नयन निहारै * कोटि ज्योति ता ऊपर वारै

दो० अधर अरुण मुरली धरे, लोचन कमल विशाल ।

क्यों बिसरत ऊधो हमें, मोहन मदनगोपाल ॥

सो० सजल मेघ तन श्याम, रूपराशि आनंद भख्यो।

मोहीं सब ब्रजबाम, और न जानत ब्रह्म हम।

ऊधो सुनि गोपिन की वानी ❀ बोले बहुरो साजि सयानी
जौ लागि हृदय ज्ञान नहिं नीकैं ❀ तौलों सब पानी की लीकैं
बूझे विन सपनो नहिं होई ❀ विन विवेक मुख पाव न कोई
रूप रेख जाके कलु नहिं ❀ नैन मूँदि चितवो मन माहीं
हृदय कमल में ज्योति विराजै ❀ अनहदनाद निरन्तर वाजै
इडा पिंगला सुखमन नारी ❀ सहज शून्य में बसत मुरारी
नासा अग्र ब्रह्म को वासा ❀ धरहु ध्यान तहँ ज्योति प्रकासा
क्रम क्रम योगपंथ अनुसरहु ❀ इहि प्रकार भव दुस्तर तरहु
ऊधो हम गोपाल उपासी ❀ ब्रह्मज्ञान सुनि आवत हांसी
जो वै रूप रेख नहिं चीन्हा ❀ हाथ पांव मुख नयन विहीना
तौ यशुदा करि काको जायो ❀ काको पलना घालि भुलायो
कैसे ऊखल हाथ बँधायो ❀ चोरि चोरि कैसे दधि खायो

दो० कौन खिलाये गोद करि, कहे न तुतरे बैन।

ऊधो ताको न्याव है, जाहि न सूझै नैन ॥

सो० नटवर बेष प्रकाश, श्रीवृन्दावन चन्द तजि।

को खोजै आकाश, मुन्नसमाधि लगाय कै ॥

जानि बूझि मति होहु अयानी ❀ मानहु सत्य हमारी वानी
भजौ ब्रह्म ब्रह्मै सब होहु ❀ छाँड़ि देहु ममता अरु मोहु
माया नित आंधरी न बूझै ❀ ज्ञान अनंत नयन सब सूझै
मैं यह कहत कृष्ण की भाखी ❀ देखहु बूझि वेद सब साखी
लगे आगि घर घूर जरावै ❀ को निज गृह तजि घूर बुझावै
घरी करौ बल योग सँवारो ❀ भक्ति विरोधी ज्ञान तुम्हारो

योग कहा सब ओढ़ि विद्यावै ❀ दुसह बचन हम को नहिं भावै
अबलन आनि सिखावत योग ❀ हम भूलीं कैधों तुम लोग
ऐसे कहि गोपी अनखानी ❀ मनमें श्याम परेखो आनी
ताही समय भ्रमर इक आयो ❀ सहज निकट है बचन सुनायो
तासों कहि सब बात सुनावै ❀ ऊधो प्रति बहु व्यंग बनावै
बचन स्वभाव त्रिगुण अनुसारी ❀ लागीं कहन सकल ब्रजनारी
दो० कोऊ ऊधो सों कहत, कोउ अलीप्रति बात ।

निजनिजमनकी उकत करि, अपनी अपनी घात ॥

सो० ऊधो भूले ज्ञान, उत्तर बोल न आवहीं ।

रहे मौन सो मान, सुनत बचन नारीन के ॥

बोली उठी ऐसे इक ग्वारी ❀ आय सुनो री सब ब्रजनारी
आयो मधुप देन पद नीको ❀ लीन्हे शीश सुयश को टीको
तजन कहत भूषण पट गेहा ❀ सुत पति बंधू सजन सनेहा
शीश जग अरु भस्म लगावो ❀ सगुण छांड़ि निर्गुण मन लावो
आयो करन तियन पर छोहा ❀ बस्ती छांड़ि बतावत खोहा
मुनि साखि कहत एक अरु बाला ❀ ये मधुपुरि दोउ बसत मराला
वे अक्रूर और ये ऊधो ❀ निरवारक पानी अरु दूधो
जानत भली गांस की वाता ❀ इनहीं कंस करायो घाता
इनके कुल ऐसी चलि आई ❀ प्रकट उजागर वंश सदाई
अब करि कृपा ब्रजहि उठि धाये ❀ अबलन योग सिखावन आये
ऐसे एक कहत अरु ग्वाली ❀ ये दोउ इकमन सुन री आली
तव अक्रूर अबहिं ये ऊधो ❀ ब्रज आखेट कियो इन सूधो
दो० बचन फाँसि फाँसि हैं सिहरन, उनलियो रथ बैठाय ।

हर लीन्हो इन गोपिका, हती ज्ञान सर आय ॥

सो० देखहु दीन्हो लाय, चहुँदिशि दावा योग को ।

भई कठिन अति आय, अब धौं का चाहत कियो ॥

लागी कहन और इक ग्वारी ❀ मधुकर जानी बात तुम्हारी
तुम जो हमैं योग यह आन्यो ❀ करो भली करनी सो जान्यो
इक हरि बिरह रही हम जरिकै ❀ सुनतैं अधिक उठी अब बरिकै
तापर अब जनि लोन लगावो ❀ मतै पराई बात चलावो
दई श्याम तुम्हरे कर पाती ❀ मुनि कै बहुत सिरानी छाती
कीन्हों उलटो न्याय कन्हाई ❀ वहे जात मांगत उतराई
इक हम दुसह बिरह दुख पावैं ❀ दूजे लिखि लिखि योग पठावैं
मधुकर श्याम भेद अब पायो ❀ नेह रत उन कहूं गँवायो
पहिले अधर सुधारस प्यायो ❀ कियो पोष बहु लाड़ लड़ायो
बहुरो शिशु को खेल बनायो ❀ गृहरचना रवि चलत मिठायो
साँप कंचुकी ज्यों लपटाई ❀ ऐसी हित की रीति दिखाई
बहुरो सुरति लई नहिं जैसे ❀ तजी श्याम हम को अब ऐसे

दो० करहु राज जहँ जाउ तहँ, लेहु अपन शिर भार ।

दीजत सबै अशीश यह, न्हातहु खसो न बार ॥

सो० बहुरंगी सुख तूल, जिनहिं जात नितहीं सदा ।

इकरंगी दुख मूल, चातक मीन पतंग गति ॥

मधुप कहा कहि तुम्हें सुनैये ❀ करिकै प्रीति सबै पछितैये
निबहैगी ऐसे हम जानी ❀ उन लैकै कहु औरै ठानी
कारे तन को कहा पत्यारो ❀ मृदुमुसकनि मन हरो हमारो
तब काहु मन हरत न जान्यो ❀ हँसि हँसि सब लोगन सुख मान्यो
घर वहि कुवजा कीन्हों नीको ❀ मुनि मुनि मधुप मिटत दुख जीको
चन्दन तनक श्याम उर धरिकै ❀ श्रोसरवस्य पियो सब भारिकै

जैसो छल हम सों हरि कीन्हों ❀ ताको दाँव कूवरी लीन्हों
बोली और एक यों नारी ❀ भाग दशा ऊधो किन जारी
बिलपत रहत सकल ब्रजनारी ❀ कुवजा भई श्याम की प्यारी
सात बच्चो असुरन को जोई ❀ अब कुल बधू कहातव सोई
राजकुँवरि कोऊ हरि बरते ❀ तो कछु हम चित में नहि धरते
बच्चो साथ अब अतिही आगर ❀ कागा और मराल उजागर

दो० अब खेलत दोउ लाज तजि, बारहमासी फाग ।

लौंड़ी की डौंड़ी बजी, हांसी अरु अनुराग ॥

सो० हमें देत बैराग, अपना दासी बश भये ।

चतुर चचोरत आग, ऊधो यह अचरज बड़ो ॥

ऊधो हरि ऐसे जनकारी ❀ सुयश रह्यो त्रिभुवन महि भारी
आये असुर जिते ब्रजमाहीं ❀ मारे सकल बच्चो कोउ नाहीं
विषजल सों सब ग्वाल जिवाये ❀ कालीनाग नाथि लै आये
इन्द्रमान दलि ब्रजहि बचायो ❀ गोबर्द्धन कर वाम उठायो
जब बिधि बालक बत्स चुराये ❀ करिकै यत्न आप उपजाये
धनुष तोरि गज प्रबल सँहास्यो ❀ मल्लन सहित कंस नृप मास्यो
कीन्हों उग्रसेन को राजा ❀ भये सकल देवन के काजा
ऐसी कीरति करि सब नासी ❀ कीन्हीं नारि कूवरी दासी
कहँ श्रीपति त्रिभुवन सुखदायक ❀ अखिल लोक ब्रह्मांडके नायक
ब्रह्मा शिव इन्द्रादिक देवा ❀ करत निरन्तर जाकी सेवा
ऊधो कहां कंस की दासी ❀ यह मुनि होत सकल ब्रज हांसी
कत मारत यदुकुल को लाजन ❀ अब करिकै हरि ऐसे काजन
दो० गावत जग सब गीत अब, वा चेरी के काज ।

ऊधो यह अनुचित बड़ो, चेरीपति ब्रजराज ॥

सो० ऊधो कहियो जाय, अबहं चेरी परिहरैं ।

यह दुख सहयो न जाय, सौति कहावति कूवरी ॥

बोली और बाम यक ऐसे ❀ ऊधो हरि गीभे धौं कैसे
यक चेरी अरु कूबर पाछे ❀ सोवत नहीं उताने आछे
कुटिल कुरूप जाति कुलहीनी ❀ ताको श्याम सुहागिनि कीनी
कहा सिद्धि धौं कूबर माहीं ❀ हम को लिखि पठवत क्यों नाहीं
हमहं कूबर यत्न बनावैं ❀ चलिकै टेढ़ी चाल दिखावैं
कहैं श्याम सोई अब कीजै ❀ लोकलाज भाभिनि तजि दीजै
होहिं आय गोकुल के वासी ❀ तजैं निगोड़ी कुवजा दासी
मधुकर जो हरि हमें विसाखो ❀ गोपीनाथ नाम क्यों धाखो
जो नहिं काज हमारे आवत ❀ तौ कलंक कत हमहिं लगावत
जोपै प्रीति करी कुवजा की ❀ तौ अब विरद बुलावहिं ताकी
करतहि सुगम सबन करि पाई ❀ प्रीति निवाहन अति कठनाई
अब परतीति कवन विधि माने ❀ क्षण में हो गये श्याम धिराने

दो० ज्यों गज को रद त्यों करी, हरि हमसों पहिचान ।

दिखरावन को आनहीं, काज करन को आन ॥

सो० बिषकीरा बिष खात, छांड़ि छुहारा दाख फल ।

अन मन कीजै बात, ऊधो कहिये काहिसों ॥

ऊधो कहि कहि तुम्हें सुनावैं ❀ जैसे हरि बिन हमं दुख पावैं
बर रहते मथुरा घनश्यामा ❀ कित आये यशुदा के धामा
कत करि गोप बेष सुख दीन्हों ❀ कत गोवर्द्धन कर पर लीन्हों
कतहि रासरस रचि बनमाहीं ❀ किये विविध सुख वराणि न जाहीं
करिकै ऐसी प्रीति कन्हाई ❀ अब मन धरी इती निदुराई
जवते ब्रज तजि गये बिहारी ❀ तबते ऐसी दशा हमारी

घटे अहार बिहार हर्ष हिय ॥ भोग सँयोग आश आवन जिय
बाढ़ी निशा बलय आभूषन ॥ लोचन जल अंचल प्रति अञ्जन
उर चिन्ता कंचुकी उसासा ॥ जीवन रह्यो अवधि की आसा
वीतत निशा गनत नभ तारे ॥ दिवस तकत पथ लोचन हारे
रही नहीं सुधि बुधि मनमाहीं ॥ बिरहानज तन जरत सदाहीं
सुमिरि सुमिरि कै हरिगुणग्रामा ॥ दुख अधिकात सुहात न धामा

दो० कहँ लगि कहिये निज ब्यथा, अरु हरि की निठुराय ।

तापर लाये योग अलि, अबलन करन सहाय ॥

सो० कठिन बिरह की पीर, जिहि ब्यापै सो जानही ।

क्यों धरिये मन धीर, सुनि अलिबचन भयावने ॥

जे कच फूल फुलेल सँवारे ॥ निज कर हरि ग्रंथों निखारे
कहि पठयो तिनको मन भावन ॥ भस्म सानि कै जटा बनावन

रत्न जटित ताटक सुहाये ॥ जिन कानन मोहन पहिराये

तिन को अब मुद्रा माटी के ॥ ल्याये हैं ऊधो गढ़ि नीके

भाल तिलक अंजन नकबेसर ॥ मृगमद मलयज कुंकुम केसर

उर कञ्चुकी मणिन के हारा ॥ सब तंजि कहत लगावहु द्वारा

ज्यहि गरश्याम सुभग भुजमेली ॥ पडै तिहिं आँगी अरु सेली

पहिरे जात न चीर सुहावन ॥ ताहि भगोंहों कहत रहावन

जा मुख पान सुगंध सुहाये ॥ निज हाथन ब्रजराज खवाये

रस बिबाद बहु तान तरंगा ॥ गावत कहत रहत हरिसंगा

बदन विलास हासरस भाख्यो ॥ हरिमुख अधसुधारस चाख्यो

निजमुख मौन कौन बिधि कीजै ॥ ऊरध श्वास घूटि किमि जीजै

दो० वे तो हरि अतिही कठिन, जानी तिनकी घात ।

मधुपतुम्हें नहिं चाहिये, कहत कठिन यों बात ॥

सो० तब बजाय मृदु बैन, अधरातन बोली नहीं ।

किये रास रस ऐन, अब कटुबचन सुनावहीं ॥

मधुकर मधु माधो की बानी ❀ हम सब जिमि माखी लपटानी
उड़ि नहिं सकीं फँसी हैं तामें ❀ आवत शोच कहै अब कामें
जिमि अहारबश मीन बिचारे ❀ कंटक गिलत कठिन अनियारे
अटकत कुटिल हृदय दुख बाढ़ै ❀ बहुरि कौन विधि तिनको काढ़ै
जैसे बधिक सुनाद सुनावै ❀ मृग मन मोहि समीप बुलावै
बहुरि करत धनुशर संधाना ❀ तुरतहि मारि हरत है प्राना
जिमि सनेह बल दीप प्रकाशै ❀ रजनी के तमको दुख नाशै
रूप लोभ नहिं शलभ दिखाई ❀ क्षण में तिन को देत जराई
जिमि ठग मदमोदक न खवावै ❀ पथिक जनन सों प्रीति जनावै
रस विश्वास बढ़ावत भारी ❀ प्राण सहित ग्रथरहित पिछारी
तिमि मृदु मुसकनि मनहिं चुराई ❀ खग जिमि हम ब्रजनाथ बभाई
पाछे अब करनी यह कोनी ❀ योग छुरी सब के गर दीनी

दो० हरि हमसों ऐसी करी, कपट प्रीति विस्तार ।

भई बिरह बिष बेलि ब्रज, रसकी ऊख उखार ॥

सो० कहिये कहा बखान, जिनसे हित यह मति तिन्हें ।

हरि जो हमरे प्रान, हम हरिके भाये नहीं ॥

यह मुनि कहाँ और इक ग्वाली ❀ कहत कहा मधुकर सों आली
उनहीं को संगी यह जोऊ ❀ चंचलचित्त श्याम तन दोऊ
वे मुरली धुनि जग मन मोहन ❀ इनकी गुंज सुमन दल जोहन
वे निशि अनत प्रात कहुँ आनैं ❀ ये बसि कमल अनत रुचि मानैं
वे द्वै चरण सुभग भुजचारी ❀ ये षट्पद दोउ बिपिनबिहारी
वे पटपीत मञ्जु तन काछे ❀ इन के पीत पङ्क दोउ आछे

वे माधो ये मधुप कहावत ❀ काहू भांति भेद नहि आवत
वे ठाकुर ये सेवक उनके ❀ दोऊ मिले एकही गुनके
कहा प्रतीति कीजिये इनकी ❀ परी प्रकृति ऐसी है जिनकी
निरस जानि भाजत पलमाहीं ❀ दया धर्म इनके कहु नाहीं
मन दै सबस प्रथम चुरावैं ❀ बहुरो ताके काम न आवैं
इन की प्रीति किये यों माई ❀ ज्यों भुसपर की भीत उठाई

दो० कहाँ एक तिय सुन सखी, कारे सब इकसार ।

इनसों प्रीति न कीजिये, कपटिन की चटसार॥

सो० देखो करि अनुमान, कारे अहि कारे जलद ।

कबिजनकरतबखान, भ्रमरकागकोयलकपट॥

राखि पिठारे जो अहि कारो ❀ पय पियाय अतिहित प्रतिपारो
कुल सुभावसों डसि भजि जाहीं ❀ यद्यपि तिन्हें लाभ कहु नाहीं
जलद सलिल बरषत चहुँ पाहीं ❀ भरत सकल सर सरिता माहीं
निशि दिन ताहि पपीहा ध्यावैं ❀ भाँवरि दै दै प्रीति वढावैं
एक बूँद को त्यहि तरसावैं ❀ भ्रमर मालती सों मन लावैं
जब रसहीन होत वा माहीं ❀ निरमोही तजि जाहिं पराहीं
सुनियत कथा काग पिके केरी ❀ अण्डन सेव करावत हेरी
बड़े होत निजकुल उड़िजाहीं ❀ बैठत निज माता पितु पाहीं
ये सब कारे हरि पर वारे ❀ सबहिन में अतिही अनियारे
सबही उपमा अरु गुणयोगू ❀ न्याय देत पटतर कबिलोगू
अलिकुल अलक कोकिला बानी ❀ भुज भुजंग तनजलद वखानी
समझी बात आज यह सारी ❀ खानि कपट की कुञ्जविहारी
दो० मृदुसुकनि बिष डारिकै, गये भुजंगलौ भाग ।

नंद यशोदा यों तजी, ज्यों कोकिलसुत काग ॥

सो० गये प्रीति यों तोरि, जिमि अलिरसलै सुमनसों ।

धनले भये कठोर, चातक सी हम रटत सब ॥

ऊधो सुनो एक उपखानो ❀ बाजी ताँत राग पहिचानो
हरि आगे तुम से अधिकारी ❀ क्यों नहिं दुख पावैं ब्रजनारी
कहत सुनत लागत हौ ऐसे ❀ मीठो कहत गरल सों जैसे
पायो छोर कपट को तवहीं ❀ लिखि आयो निर्गुण पद जवहीं
योग तहां अधिकारहि पाये ❀ क्यों नहिं तूँवा तहां बुझाये
सुनि लीजे ऊधोजी हम सों ❀ राज काज चलिहै नहिं तुमसों
करिये पोष आपनी काया ❀ आये इतै करी बड़ि माया
जो तुम है हमरे हित आन्यो ❀ सो हम शिर चढ़ाय मुख मान्यो
सुनिकै सब ब्रजलोग अनंद्यो ❀ नर नारी परच्यो कर बंध्यो
अब सँभारि अपनो यह लीजै ❀ जिन तुम पठये तिनहीं दीजै
उनहिन में यह योग समैहै ❀ यहां न काहू पै निरवैहै
हम ब्रज बसत अहीर गँवारी ❀ योग सोग की नहिं अधिकारी

दो० अंध आरसी बहिर धुनि, रोगग्रसित तनु भोग ।

ऊधो तिनको न्याव है, हमैं सिखावत योग ॥

सो० हमैं योग जो योग, सोई योग भित्ताइये ।

कहे न जानै रोग, कहा कीजिये बैद्य सों ॥

ऊधो जाउ भले तुम ओऊ ❀ अपने स्वारथ के सब कोऊ
निर्गुण ज्ञान कहां तुम पायो ❀ कौने या ब्रज तुम्हें पठायो
और कह्यो संदेशो कोऊ ❀ कहि निवै अब मुनिये सोऊ
तव अकूर आय वह कीन्हों ❀ सगरे ब्रज को मुख हरिलीन्हों
तुम आये ऊधो यहि ठटी ❀ अन्न छुड़ाय खवावत माटी
जो पै हती ज्ञान की गाथा ❀ तौ कत रास नचे ब्रजनाथ

मन हरिलीन्हों बेणु बजाई ❀ आधी निशि सब नारि बुलाई
 रस लीला बृंदावन ठानी ❀ अब मथुरा है बैठे ज्ञानी
 तब समता क्यों नहिं उर धारी ❀ मातुल माखो कंस पट्टारी
 बूझि परे नीके सब कोई ❀ हती कछुक आशा सोइ खोई
 पढ़े सबै एकै परिपाटी ❀ अधिक एक ते एक न घाटी
 हम बावरी चली नहिं त्योहीं ❀ ज्यों जग चलत आपनी गोंहीं
 दो० मन की मनहीं में रही, करिये कहा बिचार ।

हम गुहारिजिततें चहत, तिततें आई हार ॥

सो० जानत है सब कोय, जैसी तुम हम सों करी ।

हम सहिलीनी सोय, पावोगे अपनो कियो ॥

ऊधो जो पूंछत हम तुम को ❀ जो हरि योग सिखावत हम को
 तौ करि कृपा आप किन आवैं ❀ योग ज्ञान कहि प्रगट जनावैं
 जो उपदेशी निकट न आवैं ❀ तौ श्रोता किहिविधि मन लावैं
 अब लागि सुनी न काहू आनन ❀ मन्त्र देन लागे बिन कानन
 जब लागि युक्ति न सिद्ध बतावैं ❀ तब लागि साधक कैसे पावैं
 हम गोकुल वे मथुरा माहीं ❀ खेती होत सँदेशन नाहीं
 जो पै करी श्याम यह माया ❀ करैं और तें इतनी दाया
 दरशन प्रथम दिखावैं आई ❀ करहिं पवित्र चरण पखराई
 योग जानि कै नगर को त्यागैं ❀ सघनकुंज बन मन अनुरागैं
 आसन मौन नेम आचारा ❀ जप तप संयम व्रत व्यवहारा
 योग अंग कहियत हैं जेते ❀ बनहीं में बनिआवैं तेते
 करि प्रबोध कर माथ झुवावैं ❀ होहिं सिद्ध फल तौ सुख पावैं
 दो० तब तो खेलत सौंह करि, राख्यो कछु न सुहाय ।

अब यह योग मिल्यो कहां, ऊधो कहियो जाय ॥

सो० हमको निर्गुण ज्ञान, जहँ स्वारथ तहँ सगुणहँ ।

लिखि पठयो निर्वान, चाटें सहत लगाय कै ॥

बोली और एक रिसमानी ॥ मधुकर समुक्त कहत किन बानी
पर मधु पिये जात नहिँ दीजे ॥ मुख देखे को न्याव न कीजे
बीचहिँ परे सत्य सो भाखे ॥ राव रंक की शंक न राखे
सूक्त न परत दिवस अरु राती ॥ बात कहत हो ठकुरमुहाती
ब्रजयुवतिन को योग सिखावत ॥ वृषभ जोति मुरभीन गनावत
रे कृतघ्न लंपट व्यभिचारी ॥ कीरति इहे आनि विस्तारी
हम जान्यो अलि हे स भोगी ॥ कत मीर्यो यह योग क्योगी
जे भयभीत होहिँ लखि माला ॥ ते क्यों छुवें भयानक व्याला
क्यों शठ वक्त बाँड़े लज्जा डर ॥ कहँ अवला कहँ वेश दिगम्बर
साध होय तो उत्तर दीजे ॥ कहा तोहिँ कहि अपयश लीजे
भई बायसी देखियत तोहीँ ॥ इन बातन डर लागत मोहीँ
प्रथमहिँ यत्न आपनो कीजे ॥ ता पाछे औरन सिख दीजे

दो० कत श्रम करि बकिबकि मरत, कौन मुनततनु बचात ।

वन कारो यों होत है, उठि किन ह्याँ ते जात ॥

सो० देखि मृदु चितचाय, कहँ परमारथ कहँ विरह ।

राजरोग कफ जाय, ताहि खयावत हो लही ॥

बोली और एक कोठ नारी ॥ ऊधो मुनिये बात हमारी
प्रथमहिँ ब्रजकी क्या विचारो ॥ पाछे योग सिद्ध विस्तारो
जा कारण पठये हैं माधो ॥ सो विचार कहू जियमें साधो
केतिक बीच विरह परमारथ ॥ देखो जियमें समुक्ति यथार्थ
परम चतुर हरि के निजदासा ॥ रहत सदा मंतन के पासा
जल बूझत पुनि पुनि अकुलाई ॥ कहा फेन पकरत हो भाई

सुंदर श्याम कमलदल लोचन ❀ सबविधि सुखद सकलदुखमोचन
ब्रज को जीवन नंददुलारो ❀ कैसे उरते जात बिसारो
योग मुक्ति किहि काज हमारे ❀ वाकी मुरली पर सब वारे
तुम निर्गुण की कीरति गाई ❀ करै कहा सो बहुत बढ़ाई
अति अगाध पैहैं नहिं पारा ❀ मन बुधि कर्म सवनके सारा
रूप रेख बपु बर्ण न जासों ❀ कैसे नेह निबाहै तासों

दो० बिनहीं तोय तरंग अरु, बिन चेतन चतुराय ।

अबलों ब्रजमें नहिं हुती, मधुप करौ तुम आय ॥

सो० कहो बिबिध बिधि कोय, नहिं सुहात नंदनंदबिन ।

अन्न धुधारत जोय, सृक चंदन क्यों सुख लहै ॥

लागी कहन और इक ग्वाली ❀ कित बेकाज बकतहै आली
कहिये त्यहि जो होय बिबेकी ❀ यह अलि निज वातनको टेकी
बकि यासों को मूढ़ पचावै ❀ फटकै भुसी हाथ कह आवै
तजि रस गेह नेह हरि पीको ❀ सिखवत नीरस निर्गुण फीको
देखत प्रगट नयन कछु नाहीं ❀ ज्योति ज्योति खोजत तममाहीं
श्रवण सुनत जाकी मुरली धुन ❀ भूलि रहे शिवसे योगीजन
सों प्रभु भुज ग्रीवा पर डारी ❀ बन बन लाज छुड़ाय विहारी
रस विलास बिबिध उपजायो ❀ संग हमारे नाच दिखायो
लोक लाज कुलकान नशाई ❀ हम सब तिनके हाथ बिकाई
काटि सुहाग प्रेमको हेली ❀ वावत योग जहर की बेली
चौपद होय ताहि समुझैये ❀ कौन भांति षट्पदहि सिखैये
लागै कौन कहे अब याके ❀ छाँछौ दूध बराबर जाके

दो० हम बिरहिनि बिरहाजरी, जारी और अनंग ।

सुखतो तबहीं पाइये, जब नाचै फिर संग ॥

सो० झाँड़ि जगत उपहास, दृग व्रतकीन्हों श्यामसों ।

सोई हमें सुपास, और युक्ति चाहैं नहीं ॥

मुनरे मधुप कुटिल कुविचारी ❀ ये ब्रजलोग कृष्ण व्रतधारी
सुन्दर श्यामरूप रस साने ❀ श्रीगोपाल तजि और न जाने
जो तजि श्याम और को ध्यावैं ❀ व्यभिचारी ते भक्त कहावैं
विद्यमान तजि सुरसरि तीरा ❀ चाहत कूप खोद कै नीरा
मुनै कौन यह सीख तुम्हारी ❀ अति अनन्य मगडली हमारी
योग मोट तुम शिर धरि आनी ❀ सो नहिं ब्रजवासिन मनमानी
इतनी दूर जाहु लै कासी ❀ चाहत मुक्ति तहां के वासी
हम कह करैं मुक्ति लै रूखी ❀ अबला श्याम संगकी भूखी
ओसन प्यास कौन विधि जाई ❀ जबलगि नीर न पिये अघाई
ऐसी बात कहौ अलि हमसों ❀ तजहु शोच मिलिहैं हरि तुमसों
हेत हमारे जो पगु धारे ❀ तो हित करि दुख हरो हमारे
करहु सो यत्न श्याम जिमि आवैं ❀ प्रगट देखि अवि हम सुख पावैं

दो० सांचो ज्ञान औ ध्यान अलि, सांचो योग उपाय ।

हमको सांचो नन्दसुत, गर्ग कहाँ समुभाय ॥

सो० बश कीन्ही मृदुहास, हम चेरी नंदनंद की ।

नख शिख अंग विलास, तिनहीं देखे जीजिये ॥

इतनेहीं सों काज हमारो ❀ मिलहि फेरि ब्रज नंददुलारो
और अनेक उपाय तिहारो ❀ राज करहु अलि हमहिंन प्यारो
तुम तौ मधुप प्रीतिरस जानो ❀ हम काजै कत होत अयानो
सब सुमननमें फिरि फिरि आवत ❀ क्यों कमलनमें आप बँधावत
जिहि बल काठ फोरि घर करहु ❀ क्यों न कमलदल दारत तवहू
रंग श्याम रंग जे पहिलेसे ❀ चढ़त और रंग तिनपर कैसे

पारस परसि जो लोह सुहायो ❀ सो किमि बहुरि चुँबक लपटायो
सुनी जिनन मुरलीधुनि कानन ❀ सो किमि सुनत कींगरी तानन
बसे जासु उर सगुण कन्हई ❀ कैसे निर्गुण तहां समाई
यह मन श्यामस्वरूप लुभानो ❀ कहा करें लै योग बिरानो
सिंह सदा आमिष रुचि मानै ❀ तृण न भखै बरु तजै परानै
हरि तजि हमैं न और सुहाई ❀ कोटि भांति कोउ कहै बुझाई
दो० द्वै दृग रूप बिराट के, कहियत एक समान ।

ताहूमें हित चंद्रमा, नहीं चकोरहि भान ॥

सो० लोचन रूप अधीन, सगुण सलोने श्यामके ।

क्यों सुख पावै मीन, जल बिन डारे दूध में ॥

नहिं मानत ये नयन हमारे ❀ सुख न लहत बिन कान्ह निहारे
भये श्याम छवि जलके मीना ❀ मुरलीधुनि के मृग अधीना
अलि लोभी पंकज पद करके ❀ कोक कोकनद युति दिनकरके
बदन इन्दु के कुमुद चकोरा ❀ तन घन छविके चातक मोरा
वहै रूप परगट जब देखैं ❀ जीवन मुफल तबहिं करि लेखैं
बिगरि परे मन मधुप हमारे ❀ ज्ञानबचन नहिं सुनत तुम्हारे
ललित अनंग रूप रस साने ❀ खरे चकित ताते जग जाने
श्वान पूंछलों सम नहिं होई ❀ जो कोउ यत्न करै पचि कोई
सो मन गयो श्याम के साथी ❀ सुनै कौन अब निर्गुण गाथा
एकै मन एकै वह मूरति ❀ अटकौ ताहि न तजौ महरति
जो होतो दूजो मन कोऊ ❀ तौ हम लै धर्तीं तहँ सोऊ
ऊधो हरि हैं ईश हमारे ❀ ते अब कैसे जात विसारे
दो० योग दीजिये लै तिन्हें, जिनके मन दश बीस ।

कित डारत निर्गुण इतैं, ऊधौ ब्रजमें खीस ॥

सो० गुण करमाहीं श्याम, की निर्वाहो निर्गुणहि ।

किये जन्मके काम, क्योंतजिये नँदनन्द अब ॥

कहत मधुप तुम बात सुहाई ❀ कहतहि सुगम करत कठिनाई
 प्रथम अग्नि चन्दनसी जानी ❀ सती होन उमहै सुख मानी
 ताको तपत और सिखराई ❀ कहै कौन पाछे पुनि आई
 पैठत सुभट यथा रण जाई ❀ कुसुमलता सम खड्ग सुहाई
 दिये अपनपौ शूर उदारा ❀ को अब करै तासु निखारा
 ये मनमोहन साँ उरमाने ❀ दुख सु लाभहानि नहिँ जाने
 प्रेम पंथ सूधो अति ऊधो ❀ मति निर्गुण कंटक लै रूधो
 नेह न होइ पुरानो क्योंहीं ❀ सरित प्रवाह नयो नित ज्योंहीं
 निरखहिँ आनँद रूप छकी जल ❀ रवि प्रतीति नहिँ मीन चढ़ै थल
 बूझत उमहि सिन्धु के माहीं ❀ एतउ नीर न पियत अघाहीं
 दिन दिन बढ़त कमलदल कैसे ❀ हरि ब्रवि दगन लालसा तैसे
 बसे गोपाल हृदय अंबुज अलिं ❀ निकसत नाहिँ सनेह रहे रलि

दो० योगकथा अब मत कहो, ऊधो बारहिँ बार ।

भजै आन नँदनन्द तजि, ताकी जननी छार ॥

सो० यहै हमारे भाउ, अब कोऊ कछुवै कहौ ।

जैबो होय सुजाउ, रही प्रीति नँदलालकी ॥

रहै प्राण तन प्रेमहि खोई ❀ कौन काज आवै पुनि सोई
 बिना प्रेम शोभा नहिँ पावै ❀ निशा गये जिमि शशिन सुहावै
 बिना प्रेम जग खग बहुतेरे ❀ चातक यश गावत सब ढेरे
 प्रेमहिँ सहित मीन की करणी ❀ नयन अछत देखहु जग बरणी
 हम तें प्रेम जात नहिँ दीन्हो ❀ दुहुंभांति हमतो यश लीन्हो
 मिलै श्यामतौ अधिक सुहायो ❀ नातर सकल जगत यश गायो

कहँ हम या गोकुल की ग्वारी ❀ वर्णहीन घट जाति हमारी
कहँ वे श्रीकमला के नाथा ❀ बैठे पांति हमारे साथ
निगम ज्ञान मुनि ध्यान अतीता ❀ सो ब्रज भये हमारे मीता
तिन्हें संग लै रासविलासी ❀ मुक्ति इतै पर काकी दासी
यह मुनि बोलिउठी इक आनै ❀ मेरो बुरो न कोऊ मानै
रस की बात रसिकही जानै ❀ निरस कहा रसकी पहिचानै

दो० दादुर कमलन ढिगबसत, जन्म भरण पहिचान।

अलि अनुरागी जानिकै, आप बँधावत प्रान ॥

सो० जानै कहा मिठास, गूंगो बात सवाद को।

मानहुँ काट्यो घास, इनसों कहिये प्रेमरस ॥

धनि धनि ऊधो तुम बड़ भागी ❀ हरिसों हित नहिं मन अनुरागी
पुरइन बसत यथा जलमाहीं ❀ जलको दाग लग्यो कहूँ नाहीं
गागर नेह नीर में जैसे ❀ अपरस रहत न भीजत तैसे
पैरत नदी बूंद नहिं लागी ❀ नेक रूप सों दृष्टि न पागी
हम सब ब्रजकी नारि अयानी ❀ ज्यों गुड़ सों चींठी लपटानी
अब कासों वह लगन बखानै ❀ लागे बिन ऊधो को जानै
हृदय दहै नित शोचत रहिये ❀ पशुबेदन ज्यों मन मन सहिये
सब तें परि लागन की हारी ❀ यत्न रहित दुख सुखतें न्यारी
मंत्र यंत्र उपचार न पावैं ❀ बेद कहाँ लागि ताहि बतावैं
घायल पीर जानिहै सोई ❀ लाग्यो घाव जिसी के होई
प्रेम न रुकत हमारे बूते ❀ गज कहूँ बँधत कमल के सूते
कैसे बिरह समुद्र सुखाई ❀ योग अग्नि की तनक लुकाई

दो० यद्यपि समुभाये बहुत, हम करि मनहिं कठोर।

तदपि न कबहुँ भूलई, ऊधौ नन्दकिशोर ॥

सो० क्यों सुख पावैं प्रान, पलकलगत तवसहत नहिं।

लागे वर्ष विहान, अब विन देखे श्याम के ॥

तव षट मास रास के माहीं ❀ एक निमिष सम जाने नाहीं

अब औरै गति विना कन्हाई ❀ एक एक पल कलप विहाई

तव वन वन हरि संग विहारी ❀ अब ब्रज में यह दशा हमारी

ज्यों देवी उजारी पुर माहीं ❀ को पूजै कोउ मानत नाहीं

कहत और यौवन अब ऐसो ❀ चित्र अँधेरे घर को जैसो

तव शशि अतिसीरो अब तातौ ❀ भयो सकल सुख करि तन हातौ

कत करि प्रीति गये मन भावन ❀ जासों हम लागीं दुख पावन

फिरि फिरि यहै समुझि पछिताहीं ❀ कह्यो हतो आवन हम पाहीं

याही आश प्राण तनमा हैं ❀ वारिक बहुरि मिल्योही चाहें

ऊधो हृदय कठोर हमारे ❀ फटे न विद्वुरत नन्ददुलारे

हम तें भली जलचरी होई ❀ अपनो नेह निवाहत जोई

जो हम प्रीति रीति नहिं जानी ❀ तौ ब्रजनाथ तजी दुख मानी

दो० कहँ लगि कहिये आपनी, ऊधो तुमसों चूक।

हम ब्रजवास वसीं मनहुँ, सबै दाहिने शूक ॥

सो० ऊधो कह्यो न जाय, मोहन मदनगोपाल सों।

नयनन देखो आय, एक बार ब्रजकी दशा ॥

बोली और एक ब्रजवाला ❀ ऊधो भली करी गोपाला

अब ब्रज कबहुँ आवैं नाई ❀ मथुराहि रहे सदा सुखदाई

इहां चली अब उलटी चाली ❀ देखत दुख ऐहें वनमाली

तपत इन्दु सूरज की भांती ❀ चन्दन पवन सेज सब ताती

भूषण वसन अनल सम दागैं ❀ गृह वन कुंज भयानक लागैं

जित तित मार डुमन की डारन ❀ धनु शर लिये करत है मारन

हम तौ न्याय सहै दुख एतो ❀ ब्रजवासिनी ग्वाल जड़ तेतो
वे प्रभु भोग संयोग भुवाला ❀ क्यों सहि हैं कोमल तन ज्वाला
ऊधो कह्यो संदेश सिंधारो ❀ जान्यो सब परपंच तिहारो
बातन कहा हमें भरमावत ❀ जलमथिसुन्यो न माखन आवत
सगुण निकट दर्शत है जिनको ❀ निर्गुण ओट बतावत तिनको
जोपै निज तुम यहै बखानो ❀ प्रभु पूरण सब में सम जानो

दो० तौ तुम कापै करत हौ, ऊधो आवागौन ।

को नेरे को दूर है, वहां कौन ह्यां कौन ॥

सो० खोज्यहु पावत नाहिं, योगी योग समुद्र में ।

इहां बँधावत बाहिं, सो यशुदा के प्रेमबश ॥

हम गुवाल गोकुल के बासी ❀ गोप नाम गोपाल उपासी
राजा नन्द यशोदा रानी ❀ यमुना नदी परम सुखदानी
गिस्विंधारी मित्र हमारे ❀ बृन्दावन मिलि संग बिहारे

अष्टसिद्धि नवनिधि सब दासी ❀ इहां न योग विराग उदासी

वहै प्रेमरस की सब भूखी ❀ कीजै कहा मुक्ति लै रूखी

निर्गुण कहा प्रेमरस जाने ❀ उपदेशहु जे लोग सयाने

हम ऐसहि अपनी रुचि माने ❀ रहिहैं विरह वायु बौराने

निशि दिन सपने सोवत जागे ❀ वहै श्याम छविसों दग पागे

बाल चरित्र किशोरी लीला ❀ सुधासमुद्र सकल सुखशीला

सुमिरि सुमिरि सोई सुख ग्रामा ❀ रटि रटि मरिहैं माधव नामा

बिरहा मधुप प्रेम को कई ❀ ज्यों पट पुट तरंग गहि धरई

ज्यों घट प्रथम अनल तनतावै ❀ बहुरि उमहि रसभरि सुख पावै

दो० सम्मुख शर सहि शूर जब, रविरथ बेधत जाय ।

प्रथम बीजअंकुरत महि, पुनि फल फरत अघाय ॥

सो० को दुख सुखहि ड्यराय, कृष्ण प्रेमकेपंथ चलि।

और न कछ उपाय, ऊधो मीनन नीर विन॥

बोली एक सखी मुनि लीजै ❀ अपने काज कहा नहिं कीजै
दिना चार यहू सब करिये ❀ जो हरि मिलें योगहू धरिये
जय बनाय भस्म तन माँजै ❀ मूँद रहें नयनन धिन आँजै
सिंगी दण्ड लेहिं मृगझाला ❀ पहिरें कंथा सेली माला
धरि धीरज सनमुख शर सहिये ❀ भाजे आजउ पार न लहिये
विरह ज्ञान विच विनहीं काजै ❀ मरियत हैं यह दुमह दुराजै
एक सखी ऐसे कह दीन्हो ❀ ऊधो तुम जु कह्यो सब कीन्हो
नयन मूँदि के ध्यान लगायो ❀ इत उत मनको बहुत चलायो
उरफ रह्यो नँदलाल प्रेमवस ❀ नेक न चलत गयो गाढ़े फस
जो हरि मिलत जानिहू परते ❀ तौ लै योग शीशपर धरते
पहिले देहु तिनहिं फिरि जाई ❀ जिन पठ्ये तुम इतहिं मिखाई
लेहिं न बेऊ जान हमारे ❀ देखियत माथे पखो तुम्हारे

दो० भूले योगी योग जिहिं, तुमसे कियो बखान।

जान्यो गयो न पंचमुख, ब्रह्म रंध्र तजि प्रान ॥

सो० हमउर जाको ध्यान, हमहिं दिखावहु ज्योतिसो।

निपटहि छत्रो ज्ञान, ऊधो कहा सुनावहीं ॥

ऊधो जबते श्याम निहारे ❀ तब तें योगी नयन हमारे
शिखा सीख गुरुजन की ठारी ❀ धख्यो जनेऊ लाज उतारी
पलक बसन धूँधुट गृह त्यागे ❀ दिशा दिगम्बर मन अनुरागे
सजत समाधि रूप टक लाये ❀ भये सिद्ध नहिं डिगत डिगाये
ताके बीच विघ्न के कर्त्ता ❀ पचि पचि रहे मातु पितु भर्त्ता
अब ये और योग नहिं जाने ❀ वही श्यामझवि साधु भुलाने

भये कृष्णमय नयन हमारे ❀ नहीं कृष्ण हमते कहूँ न्यारे
हमसों कहत कौन की बाते ❀ गयो कौन तजि हमको ह्यांते
मथुरा जाय रजक किन माखो ❀ धनुष तोरि किन द्विरद पछाखो
किन मल्लन मथि कंस बहायो ❀ उग्रसेन किन बन्दि छुड़ायो
को बसुदेव देवकी जाये ❀ तुम किनके पठये ब्रज आये
कुण्डल मुकुट गुञ्ज उर राजै ❀ गोकुल यशुदा नन्द बिराजै

दो० को पूरण को अलखगति, को गुण रहित अपार।

करत वृथा बकबाद कत, यहि ब्रज नन्दकुमार॥

सो० जात चरावन धेनु, दिन उठिग्वालन संग मिलि।

मधुर बजावत बेनु, आवत संध्याके समय॥

जिन ऊधो मथुरा तब देख्यो ❀ ब्रजवसिजन्म सुफल करितेख्यो
लेहौ कहा जाय प्रभुतामें ❀ परिहौ जाय राज्य विपदामें
निरख्यो गोकुल बाल कन्हाई ❀ घर घर माखन खात चुराई
जन्म कर्म गुण गावो नीके ❀ परम मधुर सुखदायक जीके
नन्दराय उत्सव किमि कीन्हो ❀ कैसे दान द्विजनको दीन्हो
कैसे गोपीजन सुनि धाई ❀ कैसे पट भूषण पहिराई
कैसे गोप ग्वाल सब आये ❀ नृत्यत भेष विचित्र बनाये
कैसे दधिकी कीच मचाई ❀ ब्रज सब भई अनन्द वधाई
बाल बिनोद कौन बिधि कीन्हो ❀ कैसे गोवर्द्धन कर लीन्हो
कैसे दधिको दान चुकायो ❀ शरद रास सुख किन उपजायो
यह रस प्रेमकथा चितलावो ❀ अपनी नीरस कथा बहावो
निगम नेति निर्गुण को ध्यावै ❀ क्यों नहिं प्रगट दश चितलावै
दो० भावतहै जो कृष्ण को, योग सो हमसों देखि।

ऊधो सबतन खेह करि, सुमति होय करि पेखि॥

सो० सब अंग करिकै कान, बैठी मनहिं बटोरिकै ।

तजहु ज्ञान अभिमान, तौ यह अर्थ सुनावहीं ॥

नहीं जटा नहीं भस्म लगावैं ❀ रुंधें श्वास न शृंग वजावैं

नहीं वेद नहीं पढ़हिं पुराना ❀ शम दम नेम न संयम ध्याना

हम श्रीगोकुलचंद अराध्यो ❀ प्रेमयोग तप तिनसों साध्यो

मन बच कर्म और नहीं जानैं ❀ लोक वेद दुख सुख भ्रम मानैं

मानपमान निंद कुल करसी ❀ अग्निआंच गुरु जनु बच सरसी

हनति ताप चहुँदिशि तन देखो ❀ पियत धूम उपहास विशेषो

करि सुप्रेम बन्दन जगवन्दन ❀ कर्म धर्म कामना निकन्दन

हमजु समाधि प्रीति वानिक हरि ❀ अंग माधुरी हृदय रही धरि

निस्खत रहत निमेष न त्यागत ❀ यह अनुराग योग नित जागत

सर्गुण रूप रंग रस रागे ❀ भृकुटि नैन नैनन लागि लागे

हँसन प्रकाश सुमुख कुंडलद्युति ❀ शशि अरु सूर देखिये उद्दुति

मुखी अधर मधुर स्वर गाजै ❀ शब्द अनाद स्वई धुनि वाजै

दो० बरषत रस रुचि मन अचै, रह्यो परम सच मान ।

अति अगाध सुतसंग को, पद आनन्द समान ॥

सो० मन्त्र दियो रति ऐन, भजन ज्ञान हरिको हमैं ।

गुरु करैं अब कौन, कौन सुनै फीको मतो ॥

ऊधो ब्रजकी रीति निहारी ❀ भये विवश निजनेम विसारी

लाग्यो कहन धन्य ब्रजवाला ❀ जिनके सरवस मदनगोपाला

धन्य धन्य यह प्रेम तुम्हारो ❀ भक्ति सिखाय मोहिं निस्तारो

तुम मम गुरु में दास तुम्हारो ❀ धन्य कृष्णपद दृढ़ व्रत धारो

मैं जड़ कीन्हो और उपाई ❀ अब तुम दरश भक्ति निज पाई

ऊधो आयो योग सिखावन ❀ सीखे प्रेम भक्ति अति पावन

भये मगन रस प्रेम विशाला ❀ लागे गावन गुण गोपाला
लोहत कबहुँ कुंजमें जाई ❀ कबहुँ बिटपन भेंट धाई
कबहुँ ब्रजरज शीश चढ़ावैं ❀ कबहुँ गोपिन पद शिर नावैं
पुनि पुनि कहत धन्य ब्रजनारी ❀ धन्य ग्वाल गैया वनचारी
धन्य भूमि यह सुखद सुहावन ❀ धन्य धाम बृन्दावन पावन
ऐसे प्रेम मगन मन फल्यो ❀ को हौं कित आयों सुधि भूल्यो
दो० ऊधो मन आनंद अति, लखिके प्रेम बिलास ।

आयो हौं दिन दोयको, बीति गये षटमास ॥

सो० जब उपज्यो उर शोच, बचन कृष्ण के सुरति करि ।
मन में भयो सकोच, बोल्यो हो प्रभु बेग म्वहिं ॥

तब उपंगसुत रथहि पलान्यो ❀ मथुरा चलिबे को अतुरान्यो
ऊधो जात गोपिकन जानी ❀ आई धाय सकल अकुलानी
तब ऊधो सबकों शिर नाई ❀ हाथ जोरिकैं बिनय सुनाई
अब म्वहिं देबि अनुग्रह कीजै ❀ जाउँ कृष्ण पै आयसु दीजै
मैं सेवक जैसो उनकेरो ❀ त्यों जानिये आपनो चरो
कह्यो जो मैं कहु तुमसों आई ❀ कृष्ण कहे मैं करी दिठाई
सो अपराध क्षमा अब कीजै ❀ द्वै प्रसन्न यह आशिष दीजै
जासों कृष्ण करैं म्वहिं दाया ❀ रहै प्रीति तुमचरण अमाया
करों बड़ाई कहा तुम्हारी ❀ ऐसी विमल न बुद्धि हमारी
कृष्ण सदा तुम्हरो यश गावैं ❀ जाको अंत वेद नहिं पावैं
कबहुँक सुरत करत मम रहियो ❀ जानि आपनो जन हित गाहियो
सुनि ऊधो की निर्मल बानी ❀ भई विवश ब्रजतिय सुख मानी
दो० क्यों नहिं ऊधोजी कहो, ऐसे बचन विचारि ।

अन्त बड़े सब भांति तुम, हम निदान जड़ ग्वारि ॥

सो० होय न शील समान, लघु दीरघ ताते भयो ।

भृगु कीन्हों अपमान, श्रीपति करि भूषण लियो ॥

कहां गरल से बचन हमारे ❀ कहँ अति शीतल मृदुल तुम्हारे
तुम हित कह्यो हमें सुखमानी ❀ तरन उपाय वेद विधि वानी
हम गँवारि उलटी सब बूझी ❀ कही कटुक तुमसों जो सूझी
लोक वेद ओढ़यो हम जैसो ❀ ताको फल भुगततहैं तैसो
कहा करें मन बहु समुझावैं ❀ श्याम दरश विन सुख नहिं पावैं
दुर्लभ दरश तुम्हारो हमको ❀ कहिये जान कौनविधि तुमको
करिकै कृपा कीजियो सोई ❀ जैसे दरश श्याम को होई
देखन हौ या तनको दहिवो ❀ समय पाय हरिआगे कहियो
घोष बसत की चूक हमारी ❀ मन नहिं धरें लाल गिरिधारी
जानि हमें अति दीन दुखारी ❀ करहिं कृपा मन गुणहि निहारी
आवन अवधि कही ही जोई ❀ धरि हैं सुरति बचन की सोई
बहुत कहा कहिये ब्रजराजहि ❀ करि हैं बांह गहे की लाजहि

दो० प्रभु दीनन पति दीनहित, यही हमारे आस ।

कबहुँक दरश दिखायकै, हरिहैं लोचन प्यास ॥

सो० ऐसे कहि ब्रजबाम, भई बिरहसागर मगन ।

ऊधो करि परणाम, आये यशुमति नन्द पै ॥

मांगी विदा जोरि कर दोऊ ❀ तुम सम धन्य और नहिं कोऊ
राम कृष्ण करि सुत जिन पाये ❀ बाल भाव करि गोद खिलाये
धनि गोकुल धनि गोकुलवासी ❀ किये प्रेमवश जिन अविनाशी
कृपा करो म्वहिं कृष्ण पठायो ❀ जाते दरश सबन को पायो
अब तुम मोको देहु निदेशू ❀ जाय कृष्ण सों कहों सँदेशू
सुनि सप्रीति ऊधो की बाता ❀ नन्दववा अरु यशुमति माता

उमग्यो प्रेम नयन जल बाढ़े ❀ भये जोरि कर आगे ठाढ़े
 उर बर श्याम बिरह की पीरा ❀ कहत सँदेश बहत दृग नीरा
 ऊधो हरि सों कहियो जाई ❀ यशुदा की आशीश सुनाई
 कमल नयन सुन्दर सुखदाई ❀ कोटि युगन जीवहु दोउ भाई
 कहियो बहुरि इती समुझाई ❀ तुम बिन दुखित यशोमति माई
 इतनी दया मात पै कीजै ❀ एकबार दरशन फिर दीजै

दो० नंद दोहनी भरि दई, कह्यो नयन भरि नीर ।

वा धौरी को दूध यह, भावत हौ बलबीर ॥

सो० दई यशोमति माय, सुरली ललित गोपालकी ।

ऊधो दीजो जाय, प्यारी ही अति लालकी ॥

अथ ऊधोजीकी बिदा लीला ॥

ऊधो लै माथे पर लीनी ❀ लखि शुभ प्रीति दण्डवत कीनी
 गयो योग की नाव बुड़ाई ❀ ह्वै गयो आय. गोप ब्रज आई
 ऊधो पग पद शीश नवायो ❀ प्रभु सादर ह्वै कण्ठ लगायो
 कहिये सखा कुशल सों आये ❀ ब्रजमें जाय बहुत दिन लाये
 नन्दबबा अरु यशुमति माई ❀ कहौ कौन विधि देखे जाई
 बसत प्राण मोहीं में जिनके ❀ कैसे दिन बीतत हैं तिनके
 कहा दशा ब्रज गोपिन केरी ❀ जिनके प्रीति निरन्तर मेरी
 ऊधो समुझत ब्रज की बाता ❀ भये प्रेमवश पुलकित गाता
 भूल्यो यदुपति नाम बड़ाई ❀ कह्यो सुनौ गोपाल गुसाई
 कहौ कहा प्रभु तुम्हें सुनाई ❀ ब्रजकी रीति कही नहीं जाई
 कृपा करी म्वहिं तहां पठायो ❀ ब्रजवासिन को दरश दिखायो
 ता दिन गयो तुम्हें शिर नाई ❀ पहुँच्यों साँभ गोकुलहि जाई

दो० दूरहि ते लखि रथध्वजा, अरु पटपीत रसाल ।

जानि तुम्हें आवत हरषि, धाये गोपी ग्वाल ॥

सो० रथपर मोहिं निहार, रहे ठगेसे थकि सबै ।

चली दृगन भरिधार, परे मुरझिब्याकुल धरणि ॥

भये बिकल सब आशा टूटे ❀ बिरह घात सुरभे फिर फूटे

जब तुम्हरो पठयो म्वहिं जान्यो ❀ लै नँद सद सदनहिं सनमान्यो

तुम बिन यशुमति परम दुखारी ❀ बूझी कुशल सराम तुम्हारी

तृपित चातकी लौं अकुलानी ❀ कृष्ण कृष्ण लागी जकवानी

बारहि बार यहै पबिताही ❀ प्रभु प्रभाव हम जान्यो नाहीं

बांधे ऊखल तनक दही को ❀ अब कसकत कसकनिसो हीको

ब्रज अब शून्य बिना मनमोहन ❀ परम अभागी गई न गोहन

ठाढ़ी रही ठगोरी लाई ❀ बिरध वयस तजि गये कन्हाई

दशरथ प्राण तजे सुत लागी ❀ मैं देखतही रही अभागी

अब जनु ऐसेही मरि जैहों ❀ बहुरि न श्यामहिं कनियां लैहों

यों तुम्हरे हित यशुमति माता ❀ अतिही दीन दुखित बिलखाता

नन्दहु सुमिरत तुम गुणग्रामा ❀ बीती निशा चारहु यामा

दो० यद्यपि मैं बोधे बहुत, तुम बिन कछु न स्वहात ।

तिनकी दशा बिलोकि म्वहिं, युगसम बीती रात ॥

सो० नन्द यशोदहि पाय, गयो प्रात वृषभान पुर ।

सुनि सब आई धाय, धामकामतजि बाम तहँ ॥

मोहिं तुम्हारो निजजन जानी ❀ सनमान्यो सबही सुख मानी

लखि पट भूषण चिह्न तुम्हारे ❀ भई प्रेमबश सुरति सम्हारे

शिथिल अंग भरि आये नैना ❀ पूंछी कुशल सु गदगद वैन

जब मैं कह्यो सँदेश तुम्हारो ❀ सुनतहि आयो सवन तमारो

बीती घरिक धीर उर आन्यो ❀ मेरो कह्यो सांच नहिं मान्यो
दूषण सब कुबजा को दीन्हो ❀ कछुक परेखो तुमसों कीन्हो
तिनकी बात न जात बखानी ❀ प्रेम पन्थ वे सकल सयानी
वह रसरीति देख उन केरी ❀ कटुक कथा लागी भवहिं फेरी
यद्यपि मैं बहुविधि समुझाई ❀ ग्रन्थयुक्ति सब कथा सुनाई
कहिबे मैं न कछू शक राख्यो ❀ भयो पवन ज्यों भुसमें भाख्यो
ज्ञानपन्थ जो श्रीमुख बानी ❀ सेवत तिनकों भई कहानी
कैइक कही बनाइ अनेका ❀ उनके दृढ़ व्रत पातिव्रत एका

दो० गही एकही गहन उन, मेटि बेदबिधि नीति ।

गोपमेष भजि सांवरे, रहीं बिश्वभरि जीति ॥

सो० नहिं सीखैं सिख आन, जो बिधि जाहिसिखावहीं ।

तुमहूँ बड़े सुजान, उहां जाहु तो जानहू ॥

क्षमा करो आयसु जो पाऊं ❀ तौ अपनी सब विपति मुनाऊं
योगकथा कहि अबलन माहीं ❀ होवै इतो दुःख क्यों नाहीं
मैं निर्गुण गुण एक बखानो ❀ सोऊ पूरो कहि नहिं जानो
वे सब उमगे बारिधि ज्योंहीं ❀ जामें थाह न पाऊं क्योंहीं
कह्यो एक मैं पहर इक माहीं ❀ वे कोटिक क्षणमें कहिजाहीं
कौन कौन को उत्तर आवै ❀ सुनत सबै उनहीं के भावै
प्रेम प्रीति उनकी लखि बांकी ❀ धरी रही सब बात यहांकी
रह्यो चकित जिमि मनकी ऊलै ❀ जैसे रहत चौकरी भूलै
देखि परत पटिया मो शीशा ❀ सिखवों काहि योग जगदीशा
वे षट्बेत्ता सकल सुभाऊं ❀ मैं शठ बारह खड़ी पढ़ाऊं
अबलन बचन सुनतही मेरे ❀ भई अग्नि ज्यों घृत के गेरे
बहुत भांति करि मैं सब जांची ❀ एकै अंग न कोऊ झंंची

दो० सगुण प्रेम दृढ़ उन गहो, यथा पपीहा पैद ।

जानि लेहु प्रभु तुम यहां, कहा निरोगहि वैद ॥

सो० तिन्हें निरन्तर ध्यान, श्याम राम अंबुजनयन ।

लागत फीको ज्ञान, अविलोकत उनको भजन ॥

मैं देख्यों षट्मास खोज कर ❧ एकै रीति सबै ब्रज घर घर

ज्यों कुरु खेत दिये वाढ़त धन ❧ त्यों अधिकात प्रेम नित तुमतन

प्रगट तुम्हारे गुण चित दीन्हे ❧ देह गेह अर्पण सब कीन्हे

कोऊ कहत गये गोचारन ❧ कोऊ कह गये अघासुर मारन

कोऊ कहत इन्द्र जल जाई ❧ गोवर्द्धन कर लियो कन्हाई

कोऊ कहत यमुन सुनि काली ❧ नाथन गये ताहि वनमाली

घर घर दुसह कहत कोऊ वाला ❧ कोऊ कह वन खेलत नँदलाला

कोऊ कहत कुटिल लम्पट हरि ❧ बसे जाय री धों काके धरि

एक कहत वन बेणु वजावैं ❧ चलौ मुनत यों कहि उठि धावैं

ऐसी लीला प्रगट बखानैं ❧ मेरो कह्यो न कोऊ मानैं

हरि मानी निजमति घट्मानी ❧ सुनि लीन्हीं उनकी मैं वानी

प्रीतिरीति लखि तहां डुलान्यो ❧ नाथ तुम्हारी मुरति सुलान्यो

दो० तुमसों आवन कहिगयो, वेगहि ब्रजतें नाथ ।

उन लखि उनसों हँसलग्यो, गावन उनके साथ ॥

सो० बीत गये षट् मास, समुझि परी आयो कहा ।

तब उपज्यो जियत्रास, भाज चलौ दै आन कहि ॥

बहुरि कहा मोको सुख वैसो ❧ रस लीला विनोद ब्रज कैसो

कहत न बनै देखतहि भावै ❧ यह सुख बड़भागी स्वइ पावै

बस्यो न पांचो दिन उनमाहीं ❧ तासु जन्म जगमाहिं बृथाहीं

नहिं श्रुति शेष ब्रह्म सुख पायो ❧ जो रस ब्रह्म गोपि मिलि गायो

निरखत यदपि इहां यह मूरत तदपि जाय उतही मन पूरत
 बरही मुकुट गुञ्ज की माला मुख मुरली धुनि भेष विशाला
 आगे धेनु रेणु मण्डित तन तिरझी चितवन चारु हरण मन
 गोपी गालनसों हरिबोलत खेलत खात हँसत ब्रज डोलत
 तब वह सुख समुभूत मन भावै इत यह लखि कछु कहत न आवै
 तुम्हरी अकथकथा तुम जानो मैं कह समुभौ मूढ़ अयानो
 हिय में मोहिं बहुत यह शालै तुमतौ प्रभु करुणाके आलै
 होत कठोर कठिन मन काहे बनत कौनविधि बिना निवाहे

दो० निगम कहत बश भक्तके, पूरण सब सुखसाज ।

करि सुदृष्टि ब्रज पेखिये, गहो बिरह की लाज ॥

सो० अतिहिदुखिततनक्षीन, ब्रजवासी तुमबिरहबश ।

तुम तन धन मन लीन, रटत चातकी लों सबै ॥

कहौ कहा गति प्रभु राधा की जैसी व्यथा बिरह बाधा की
 भूषण बिन अति क्षीण शरीरा बसन मलीन सवत दृगनीरा
 सुधि बुधि कछु देह की नाही रहत बावरी ज्यों धुप माहीं
 कबहुँक कृष्ण कृष्ण रटलावै कबहुँक नाम आपनो गावै
 विवदिशि अग्निकाठकिमिजैसे सहत बिरहदुख दुहुँदिशि तैसे
 लहत न कोहू शीतलताई कबहुँ रहत मौन शिर नाई
 यह जन देखि देखि दुख पावै नहिं कछु सुनत कोटि समुभावै
 सूखी जिमि नलिनी बिन पानी जुगवत यत्नन सखी सयानी
 तृणके अग्र ओसकण जैसे आशा अवधि प्राण तन तैसे
 अचरज मोहिं बड़ो यह आवै प्रभु तुमको कैसे यह भावै
 करुणामय प्रभु अन्तर्यामी भक्तनहित तन धारौ स्वामी
 बेगि कृपाकरि दर्शन दीजै ब्रजजन मरत ज्याय सब लीजै

दो० यह मुरली दै बिलखिकै, कह्यो यशोमति माय।

एकबार हित नन्दके, दरशदिखावहिं आय॥

सो० जिन गैयन को श्याम, आप चराई हेत करि।

बहुरि न आई धाम, बिडरी कुञ्जन में फितर॥

सुनिकै प्रभु ऊधो के बैना ॥ उमंगे प्रेम भरे दोउ नैना

ब्रजजन प्रीति आय उरशाली ॥ भये विवश जन प्रणप्रतिपाली

लै उठाय मुरली उर लाई ॥ धरि ब्रज ध्यान रहे अरगाई

सहज स्वभाव कृपालहि ऐसे ॥ होत तुरत जैसन को तैसे

पुनि हा ब्रज कहि छांड़ि उसामू ॥ पोंछि पीतपट जलसों आंसू

ऊधो सों यों बचन सुनाये ॥ भले सखा शिष दै ब्रज आये

मन में यों प्रभु कियो विचारा ॥ ब्रज भक्तन ममरूप अधारा

मेरे मुक्ति बड़ी निधि सोई ॥ सो वे नहीं आदरत कोई

ताते जो जनके मन भावै ॥ सोई मोहिं करत बनि आवै

भक्ताधीन सो पूर्ण हमारे ॥ ब्रजबासी मोको अति प्यारे

सदा बसत ताते ब्रजमाहीं ॥ इनसम मोहिं और हितु नाहीं

सब समरथ प्रभु सब गुणनागर ॥ ब्रजबासी जनके सुखसागर

दो० मनकरि हरि ब्रजमें रहे, मिलि ब्रजजनमन साथ।

तनकहि देवन काज हित, भये द्वारका नाथ॥

सो० सदा बसत ब्रज श्याम, नटवर बपु मुरली धरे।

ब्रजजन पूरणकाम, कोटिकाम लावण्यनिधि॥

बसत सदा ब्रज कुँवरकन्हारै ॥ ब्रजबासी जनके सुखदारै

कृष्ण प्रेम मूरति ब्रजनारी ॥ कबहूँ नहीं कृष्ण ते न्यारी

नित्य नवल नित बनिहि बिहारा ॥ ब्रजविलास नित नवल उदारा

नित्य धाम बृन्दावन पावन ॥ नित्य रासरस परम सुहावन

शिव सनकादि शेष ज्यहि ध्यावैं ❀ सुर नर मुनि सब ध्यान लगावैं
 ब्रज गोपिन की महत बढ़ाई ❀ एक समय ब्रह्मासन गाई
 भृगु नारद आदिक जे भक्ता ❀ पूंछत भये बिनय संयुक्ता
 तिनसों विधि यहि भांति बखानो ❀ बेद ऋचा सब ब्रजतिय जानो
 इन सम सत्य कही तुम पाहीं ❀ मो शिव शेष लक्ष्मी नाहीं
 नहीं कृष्ण ते यकक्षण न्यारी ❀ इनते और न कोउ अधिकारी
 इनके भाव कृष्ण जो ध्यावैं ❀ प्रीति रीति दृढ़ करि मनलावैं
 नारि पुरुष कोऊ किन होई ❀ बेद ऋचा गति पावैं सोई

दो० परसे इनकी चरणरज, वृन्दावनमहि माहिं ।

सोऊ गति इनकी लहै, यामें संशय नाहिं ॥

सो० यों विधि कही बुझाय, महिमा ब्रजगोपीनकी ।

व्यास कही सो गाय, पावन वृहद पुराणमें ॥

ताते भृगु आदिक नारदमुनि ❀ इन्द्रादिक सुर शिव ब्रह्मा पुनि
 अरु हरिभक्त जगत जे अहहीं ❀ वृन्दावन रज बाञ्छित रहहीं
 ब्रजरज अति दुर्लभ श्रुति गावैं ❀ बड़भागी जन तेई पावैं
 चित धरि सोई ब्रजरस रासा ❀ ब्रजविलास गायो ब्रजदासा
 कृष्ण चरित ब्रजवन निकुञ्जको ❀ सार सकल सुख सुकृत पुञ्जको
 सार ज्ञान बिज्ञान ध्यानको ❀ बेद शास्त्र औ स्मृति पुरानको
 सार बहुरि इतिहास भजनको ❀ योग जाप अरु यज्ञ जननको
 सार अमित मुनि सन्त मतनको ❀ हरिपद पङ्कज प्रेम यतनको
 सार जन्म अरु सुगति मुक्तिको ❀ परमानन्दरु विमल भक्तिको
 सार सकल रसरस काईको ❀ परम मधुर सुन्दरताईको
 सार सार को परम सुहायो ❀ ब्रजविलास भक्तन मन भायो
 सहित स्वभाव प्रीति जे गैहैं ❀ ते जन गति गोपिन की पैहैं

बं० यह ब्रजविलास हुलास सों नरनारि सुनि जे गाय हैं ।
 सीखैं सिखावैं पढ़ैं रुचिकर प्रेममन उपजाय हैं ॥
 धरि भावरमता कृष्णसों उर कमलपद चितलाय हैं ।
 हरि राधिका परसादते ब्रजगोपिकागति पाय हैं ॥
 पूरणसकल मनकाम सब सुख धाम यश नँदलालको ।
 दलन दारिद दोष दुख भव भय हरण यमकालको ॥
 यहजान गावहिं सुजनगायो जिनन आनँदपद लह्यो ।
 तिनकी कृपा बलपायकछु इक दास ब्रजवासी कह्यो ॥

दो० ब्रजविलास ब्रजराजको, को कहि पावै पार ।
 भक्तभाव गावत भगत, भजन प्रभावविचार ॥
 सिंगरे दोहा आठसौ, और नवासी आहिं ।
 हैं इतनेहीं सोरठा, ब्रजविलास के माहिं ॥
 दश सहस्रषट्सों अधिक, चौपाई बिस्तारु ।
 छन्द एकशत षट्अधिक, मधुर मनोहर चारु ॥
 सबको नुष्टपछन्द करि, दशसहस्र परिमान ।
 खण्डित होन न पावहीं, लिखियो जान सुजान ॥
 बिधि निषेध जाने नहीं, कछु ब्रजवासी दास ।
 ज्यों जाने त्यों राखिहैं, नन्दनँदनकी आस ॥
 नहिं तप तीरथ दानबल, नहीं कर्म व्यवहार ।
 ब्रजवासी के दास को, ब्रजवासी आधार ॥
 ब्रजवासी गाऊँ सदा, जन्म जन्म करि नेह ।
 मैं जप तप व्रत यहै, फल दीजै पुनि एह ॥

। श्रीब्रजविलासे सबसुखरासे भक्तिप्रकाशे कृतब्रजवासीदासे सम्पूर्णम् ॥

